


**RECUEIL D'AUCUN
PLAIDOYEZ
FAICTS EN LA
COUR DES
AYDES, PAR M...**

Cardin Le Bret, Valenti
Gonzaga





XIV. 4. 13.

Y.L.



121565

XIV-4-13




PREMIER PLAIDOYE.

*Que l'on peut vser de contrainte pour faire
contribuer vn chacun au basti-
ment d'un temple.*



OMBien que les temples
comme materiels & corru-
ptibles, ne participēt de soy
en ce qui est du mystere de
l'Eglise, qui ne cōsiste qu'ēs
choses spirituelles & intel-

ligibles; si est-ce neantmoins que de tous
siecles ils ont esté tenus au rang des choses
sainctes, comme seruans au sacré ministere
de la religion. De fait l'Ecriture n'en parle
iamais qu'avec vn titre insigne de saincte-
té; cōme faisant mention au Genese de ce-
luy qui fut consacré à Dieu au commence-
ment du monde, elle l'appelle *domus dei*, & *portam cœli*: Et celuy qui luy
fut dédié apres la loy de Moyse, la mesme
Ecriture l'appelle *sanctuarium vel sanctum*.



en l'Exode 25. *vel οἶκος ἁγίου*, en Esaie 26. Du temps des Prophetes toujours elle l'appelle *Tabernaculum Domini*: & au nouveau testament, *οἶκος τῷ θεῷ*, & *οἶκος τῷ πατρὶ*. ailleurs, *domū orationis*, en S. Iean & S. Marc. Qui sont toutes marques & epithetes d'honneur & de sainteté grande, qui montrent clairement de quelle estime les temples ont esté de tout temps en l'Eglise.

Le premier qui voulut desaprouuer l'usage d'iceux, fut vn Eustachius, mais aussi tost fut assemblé cōtre luy le Cōcile d'Antisgrane, auquel il fut excommunié, & tous ceux de son opinion, mesmement vn nommé Patarenus, qu'il eut pour associé en son erreur, & cōtre lequel nous auons vne Cōstitution de Federic 2. en la loy dernière, *Gasaros. C. de heret.* encores qu'ils se disoient fondez sur ce texte de S. Paul, *Act. 17. Deus in manufactis templis nō habitat*, quasi cōforme à ce precepte de Zenon, biē que payen & idolatre, disant *ἱερεῖ θεῶν μὴ οἰκοδομεῖν*.

Car cela se doit entendre sainement, & deuons aduoüer que Dieu n'a pas du tout reietté les choses materielles & externes de son seruice: au cōtraire on voit qu'il s'en sert en ses plus estroicts & recommandez Sacremens & mysteres, esquels le materiel

est comme vne caisse ou vehicule du spirituel & intelligible, ainsi que le corps est de l'ame; Et qu'ores que la matiere soit d'elle-mesme sans vertu, toutesfois la diuinité venant à y engrauer apres l'efficace & la force, comme dit Iamblique en son liure de *Mysterijs*, peut par ce moyen la faire participer aucunement au merite d'icelle: mais ne faut pourtant que nous nous arrestions trop à la regarder; cōme faisant part essentielle de la diuinité, d'autant que celle-cy n'est toute que forme, & vn pur acte. Qui est ce dont S. Paul nous veut aduertir en ce passage; Ou bien pour nous monstrier que Dieu, pour l'entretienement de sa gloire n'a que faire de noz ouurages, suyuant le dire d'Irenee lib. 4. *Offerimus Deo non quasi indigenti, sed gratias agentes.*

Et combien que les plus anciēes autheurs de l'Eglise, Minutius, Arnobe & Lactance, ne fassent peu ou point de mētion de leurs temples, nous ne deuons toutesfois croire qu'ils en fissent moins d'estat; car c'estoit qu'en ce temps-là, & au milieu des persecutions que l'Eglise naissante souffroit, il ne leur estoit permis de bastir des temples, leurs assemblées n'estans lors que de nuit & en cachettes, tesmoing ce qui se lit en

A ij

P R E M I E R

leurs liures *De antelucanis & nocturnis Christi-
catibus.*

Ce que nous auons estimé estre besoin de dire deuant toutes choses, pour mon-
strer qu'il est tres-perilleux, voire comme
approchant de l'impiété, de s'opposer au
bastiment d'un temple : & aussi pour satis-
faire à ce que les opposans ont dit dès l'en-
trée de leur plaidoyé, que les temples n'e-
stoient autrement vtils au seruice de la di-
uinité.

Le second moyen qu'ils ont proposé pour
l'appuy de leur opposition, est qu'ils disent
que dans la ville de Baugé y a trois autres
Eglises, *ad quid igitur perditio hæc?* que c'est
vne despêse superflüe, inutile, & à la char-
ge du peuple d'en rebastir vne autre.

Et de verité vn temps a esté qu'il n'y auoit
qu'un temple en chasque Prouince, auquel
tous les Chrestiens estoient tenus conue-
nir pour receuoir instruction, & n'estoit pas
permis de tenir Eglise à part. Ce qui se fai-
soit à fin que les hommes qui lors estoient
encores rudes & grossiers en la foy, se ren-
contrans en vn mesme lieu, oyans mesme
leçon, participans au mesme ministere, ap-
prinsent à se conformer à vne mesme créa-
ce & discipline, tenir mesmes ceremonies,

& de s'vnir avec vne plus estroicte amitié. Mais depuis que le nombre des fideles fut acreu, & chacun affermy en la foy, il fut permis se diuifer en parroisses, de bastir & construire des Eglises en tous lieux. ce qui arriua du temps du Pape Dionysius, comme il appert *in c. statuit. 13. quest. 1.* Et de fait ceste liberté estant ouuerte à la deuotion, qui estoit lors toute entiere & parfaicte, on veit en peu de téps toutes les villes & bourgades, & les plus signalées montagnes remplies & honorées d'un grand nombre de temples; si que saint Bernard disoit, *Quacunque incedam, certa video fidei maiorum nostrorum monimenta, templa, sacellâq; innumera, &c.* Il ne taxe point cela de superfluité, au contraire il le magnifie, comme vn tesmoignage signalé de la pieté de nos peres. Et à cela est conforme le precepte d'un autre ancien Pere, disant, *iam nullus locus ys vacet, non domus vlla, non vicus.*

Et quand les historiens de Rome disent que Numa fit dresser en plusieurs endroits d'icelle *septuaginta quinque altaria ex cespiti-bus*, & que c'estoit à fin que le peuple à la rencontre de tant d'autels sacrez deuint plus modeste, plus continent, & plus religieux, *cum videlicet falsæ mentes præsentia reli-*

P R E M I E R

gionum perterreantur, dit Symmaché en l'une de ses Epistres, ne iugez-vous pas que la multitude de nos tēples peut valoir à mesme effect? Et combien que les Mages de Perse au rapport d'Herodote & de Cicéron apres luy au 2. de ses Loix, eussent reprouvé l'usage des temples, disans que c'estoit faire tort à la grandeur immense de la diuinité, que de la resserer dans l'enclos d'un edifice, veu qu'elle n'a autres bornes & limites que celles de son infinité: si est-ce que vous voyez qu'ils se rapportoient aucunement à mesme intention, en ce qu'estimās tous lieux & places estre comme temples & sanctuaires, & que Dieu estoit present en tous endroits, ils retenoient enuers luy par tout où ils se treuuoient vne modestie & reuerence esgale.

Bref comme Solon estant mort (dit Aristide 2. *Orat. Plato.*) les habitans de l'Isle Salamine n'enfermerent pas ses cendres dans vn seul sepulchre, mais les espendirent par tous les endroits de leur Isle, à fin qu'estant toute couuerte & sanctifiée des sacrées cendres de ce grand homme, elle deuinst moins accessible aux forces de leurs aduersaires: Ainsi pouuons-nous dire que ce grand nombre de temples que les anciens

appelloient *Martyria*, pour ce que c'estoiẽt les sepultures des Martyrs, sont autant de saintes & sacrées forteresses dans les citez & Royaumes, pour les preseruer contre leurs ennemis. A ceste occasion ce Poëte tant celebre alloit menassant d'affliction le peuple de Rome, de ce qu'il estoit incurieux de reparer les temples de leur ville, disant,

Delicta maiorum immeritus lues

Romane, donec templa refeceris.

Alleguer donc superfluité de temples, vous voyez combien cela est esloigné des reigles de la pieté, signamment pour ce qui concerne la ville de Baugé au fait de ceste cause, l'Eglise ancienne de laquelle estant auourd'huy hors de la liberté du peuple pour estre clause & enfermée dans le chasteau, où il y a garnisons pour le seruice du Roy, & les autres Eglises n'estans que petis oratoires, non capables de tenir vn si grand peuple, comme nous l'auons appris par information qui en a esté faite expres de l'ordonnance de la Cour, vous iugerez si ce nouveau temple est pas necessaire pour le seruice del'Eglise.

Mais les opposans adioustent pour vn autre moyen, que si ce vœu est raisonnable, &

A iiij

P R E M I E R

qu'il soit iugé necessaire de bastir ce nouveau temple, il doit s'accōplir aux frais des volontaires seulement, sans qu'on puisse contraindre personne, *ne precio redempta religio videretur*, comme dit Ter. *Apol. cap. 395.* aussi que la deuotion n'auroit plus de merite. s'il y auoit de la contrainte, Seneque disant, *Beneficium id esse quod quis dedit cum ei liceret & non dare.*

Ce qui auroit certes quelque apparence, s'il n'y alloit que d'une deuotion particuliere, & non autrement necessaire: mais estant question d'un honneur public, decerné à Dieu par un commun vœu d'un corps de ville, que le Roy auctorisé par ses lettres Patentes, avec permission de leuer sur la ville de Baugé six mil escuz en trois ans, que l'Euesque du Diocese a confirmé, que tous les habitans ont desiré & affectionné si religieusement, excepté les opposans qui ne sont que sept ou huit, nous ne voyons point qu'en ce cas personne se puisse dispenser d'y contribuer, sans un mespris notoire de Dieu & de l'Eglise. Et c'est en cest endroit que nous pouuons dire avec S. Ambroise, *non donasse Ecclesie tulisse est*: ne conferer rien du sien pour l'honneur de Dieu, c'est luy oster: ceste espargne est un larcin,

ceste negligence vne vraye irrelegion. Ce que mesme le Pleufide de Plaute persuade, disant, *quod in diuinis rebus sumas, sapienti lucro est.*

Verité est que nos Docteurs sur l'Epistre quatriesme de *Ecclesiasticis edificijs*, disent que les parroissiens peuuent estre contrains d'aider de leurs moyens *ad refectionem Ecclesie, & non ad adificationem*, par la mesme raison que nous tenons *in edificijs priuatis*, qu'un particulier peut estre contraint de refaire sa maison *si collabatur, ne ruinis facies urbis deformetur*, & qu'on ne peut pas le contraindre d'en bastir vne nouuelle. Mais ceste distinction ne peut auoir lieu, quand pour l'exercice de la religion & seruice de l'Eglise il est necessaire de construire vn nouueau temple, comme il est au cas qui s'offre.

Que si nous voulons prendre exemple sur noz peres, lors qu'il bastissoient leurs premiers temples (côme avec raison nous le deuons) il est certain que chacun y contribuoit: tesmoin ceste vieille inscription qui se lit encores és frontispices de quelques anciens temples (*are collato*) pour dire qu'ils auoient esté construits par vne contributiõ generale du peuple, & Tertullian

P R E M I E R

le confirme *aduers. Valent.* disant, *Ex ære collatio in honorem & gloriam patris pulcherrimum construunt fidus, &c.* Matthæus mesme ancien autheur *Rerum Anglicarum*, le tesmoigne parlant du Roy Elfredus, *Aurum collaticium imperauit (inquit) in ædificationem templorum*, & appelloient ceste collation ou contribution *symbolam*, vnde *asymbolus*, celuy qui estoit refusant d'y contribuer; ce qu'ils auoiët emprunté de la Loy de Moysé, commandant qu'un chacun d'aage au dessus de vingt ans eust à porter au Gazophylace ou tresor public, vn demy cicle pour le bastiment du sacré temple de Dieu comme il se lit en Exode 30.

Et si nous est permis recourir aux payës pour nous faire sages en cest endroit, il est certain que les Romains en vsoient d'une toute semblable façon. car non seulement ils contraignoient de contribuer, mais encores ils forçoient les artisans d'y trauailler gratuitement, comme lors que le Capitole, siege ou repaire principal de leurs Dieux fust basti, Ciceron le remarquant *in Verrem*, quand il dit, *Id olim publicè, gratis coactis fabris, operisque imperatis, ex ædificatum constructumque fuit.*

Enquoy il semble qu'ils vouloient pra-

tiquer la raison de Zenon, qui estimoit ne falloir point edifier des temples, à cause des ouuriers mercenaires qu'il appelloit *Barbaros*, & pensoit *sordida hac & venali arte profanari potius quam commendari sacra*, ainsi que le rapporte Plutarque en son traité de *Stoicorum pugnus*. Vray est que la pluspart de leurs temples estoient bastis par la liberalité des Princes & Seigneurs, ou bien des despoüilles de leurs ennemis, & quelques-fois aussi des biens des condamnez, comme Tite Liue le remarque *lib. 10.* & en plusieurs autres endroits. Mais quand cela manquoit, pour s'acquitter d'un vœu public on vsoit de contribution, & ne reputoient iamais à charge & incommodité, ce qui se leuoit sur eux pour vne tant sainte occasion : au contraire ils estimoient que c'estoit thesauriser que de despendre pour l'honneur de la diuinité, *lucrum esse, pietatis nomine sumptum facere*.

Que sil leur estoit ordinaire de contraindre les personnes de se voüer Vestales, Pontifes, Sacrificateurs & Flamines pour le seruice de leur religion, cōme le dit Aulugelle, & Tite Liue le tesmoigne en la personne d'un Publ. Valerius, qui malgré luy *Flamen inauguratus fuit, adeo ut nō eligi, sed*

P R E M I E R

capi sacerdotes dicerentur. Si mesmes en nostre Eglise, au commencement on tiroit du milieu du monde ceux que l'on iugeoit propres pour le ministere d'icelle, & les contraignoit-on de prendre le sacerdoce, comme il fut conclud *in Concilio Vomaticensi*. Si l'Euesque pouuoit affranchir le serf pour le vouër à l'Eglise malgré son maistre. Si les enfans en bas aage presentez par leurs peres à l'Eglise, & deuouiez aux monasteres deuenuz puis-apres en adolescence, n'auoient la liberté de se tirer de là, comme d'abondant il fut resolu *in Concilio Toletano octauo*: bref si on pouuoit contraindre les personnes se donner au seruice de l'Eglise, quand cela deuoit tourner à son honneur & gloire, *dum Dominus ijs opus haberet*: qui ne iugera qu'à plus forte raison on peut verser de contrainte sur les biens temporels & fortuits, quand vne sainte occasion se presente, comme au cas dont est question?

Certes le meilleur seroit, que nous n'en vinssions iamais en ces termes, ains que nos volontez fussent si franches, nostre zele si ouuert, nostre affection si ardante à la religion, qu'on ne nous fit iamais tirer l'oreille, pour ayder de ce qui nous est superflu, au bien, honneur, & dignité de l'Eglise. Tou-

re la contrainte que nous y desirerions, seroit ceste sainte & loüable emulation tant recommandée par ce sage Consul Leui-nius dans Tite Liue, disant: *Magistratus Senatui, Senatus populo, sicuti honore præstat, ita ad omnia quæ Reipublicæ conducunt subeunda; ducem debere esse.* ainsi que nostre Roy aussi pieux & Chrestien comme genereux & vaillant les y a inuitez par son exemple, ayant donné pour cest ouurage cinq cens escuz, & tout le bois necessaire: que si les opposans sont si froids & glacez en leur deuotion, que ny les preceptes, ny les exemples ne peuuent riẽ sur eux, pourquoy ne sera-il iuste de les y exciter & contraindre?

En la fin de leur plaidoyé ils ont fait vne plainte incidente contre les deffendeurs habitans de Baugé, disans qu'ils ont abatu vne autre Eglise pour rebastir celle dont il s'agist. Et de verité si cela estoit, ils meritoient l'amender d'une peine seuerẽ, d'autant que c'est vne espece de sacrilege si odieux au ciel, que Dieu mesme quelques-fois s'en est reserué la vengeance, comme Nicéphore & autres historiens de l'Eglise le disent parlant de Constantin Auguste, lequel estant venu à Rome du temps du Pape Vithalianus, fit descouurir le temple

P R E M I E R P L A I D O Y E'.

de nostre Dame aux martyrs, & en fit emporter les tuilles d'airain à Constantinople, pour punition dequoy, Dieu permit que peu apres il fut miserablement occis pendant qu'il estoit au bain. C'est pourquoy Lactance touchant ce mesme propos disoit, *in quacunq; religione nihil tale admitti sine vindicta.* ce qui se pourroit exagerer amplement s'il en estoit de besoin, mais nous n'auons veu preuue quelconque de ce fait.

Attendu donc que la construction de ce tēple est necessaire pour le seruice de Dieu en la ville de Baugé, que cela a esté resolu en l'assemblée generale de la ville, auctorisé par le Roy en ses lettres Patentes, confirmé par sa liberalité & permission de leuer six mil escuz pour cest effect, que cela mesme a esté approuué par l'Euesque du Diocese, que les opposans ne sont que sept ou huit, & des plus riches: Nous estimons qu'ils doiuent estre debouttez de leur opposition, & contraincts au payement de leurs taxes, ainsi que les autres. Ce que la Cour ordonna par son arrest du mois de Nouembre, M. D. X C I I I.

SECOND PLAIDOYE.

*Que l'immunité des Ecclesiastiques doit
cesser en temps de nécessité vrgente.*



HILON, cét excellent inter-
prete des sainctes lettres, vou-
lant en son traicté du Decalo-
gue, rédre raison pour laquel-
le Dieu rengea au milieu des
deux tables, le precepte de l'honneur deu
aux peres, dit qu'en la cōdition du pere se
rencōtrent les bornes & cōfins des deux ef-
fences, immortelle & mortelle, en ce que
par la generatiō perpetuant son estre, il re-
presēte l'immortalité: & par la nature mor-
telle de soy, cōmune aux autres animaux il
mōstre ce qui est perissable au mōde. Que
ce seul donc & mesme subiect venant à v-
nir & recueillir en soy ces deux effences,
ainsi que ce precepte assemble ces deux
tables, l'vne des choses diuines, l'autre des
choses humaines. veut monstrier qu'il y a
vne telle liaison entre les choses diuines &
humaines, qu'en reuerant les diuines il fal-
loit aussi faire estat des humaines, & qu'ho-
norant les humaines il falloit par mesme.

S E C O N D

moyen reuerer les diuines : bref qu'en seruant à Dieu il ne falloit delaisser son pere: & qu'en seruant à son pere, il ne falloit abandonner Dieu. Autrement que de negliger l'un, & faire estat de l'autre, c'estoit vne action imparfaicte qui declinoit ou à impieté, ou à inhumanité.

Ce discours de Philon doit seruir d'une suffisante responce aux appellans comme aux autres Ecclesiastiques de France, qui disent que pour estre deuouiez au sacré seruice de Dieu, ils ne doiuent estre astraits & assuiectis aux tributs & charges temporelles de leur patrie: comme si la patrie ne tenoit pas pres de la diuinité, le plus proche degré par dessus noz peres: car non seulement elle nous tient lieu de pere, & mere tout ensemble, dit Hierocles: *sed velut nobis est alter quidam Deus, & primus maximusq; parens*: de sorte que si on iuge estre inhumanité en se voüant à Dieu abandonner son pere: ne dirons-nous pas avec plus de raison, que c'est vne espèce d'impieté d'en vser de mesme à l'endroit de sa patrie? Et à vray dire il y a vne telle liaison & habitude entre la religiō & la patrie, l'Eglise & l'Estat, que comme la grandeur & célébrité de l'un depend de l'autre, aussi nous ne pouuōs man-

quer

quer de seruice à l'vn que nous ne nous rendions coupables enuers tous deux, *integri enim ab utroque probamur genere.*

Charlemagne, que tout le mōde adnouë pour vn sainct personnage, no⁹ en fait preuue en vne siēne loy, qui se lit encores au Capitulaire. 114. liu. 1. par laquelle il defend que personne fust si osé de se voüer aux ordres de Prestrie & Monachisme, sans son congé & permission, disant: *non enim ita Ecclesiæ consulendum ut Respublica deferatur.* Et à semblable S. Cyprian *libro 2. Epistol.* escrit, que de son temps *nemo recipiebatur in clericorum cœtum sine populi consensu*, pource qu'il importoit au bien commun & de la Republique & de l'Eglise, qu'ils fussent tous deux esgalement fournis d'hommes pour leur seruice. Ce grand & sainct Empereur & Roy iugeoit que Dieu luy ayant commis la garde & protection del'Eglise & de l'Estat, il deuoit rendre vn mesme soin au bien & conseruation de tous les deux: autrement que de penser à l'vn, & negliger l'autre, c'estoit hazarder la perte de tous les deux ensemble.

Les Ecclesiastiques donc qui non seulement occupent le tiers des terres de la France, & les plus beaux fiefs du Royaume: mais

B

qui tiennent encores en leur ordre la pluspart de noz hommes, quelle excuse pourront-ils prendre, voyans tant d'ennemis courir au bris & à la ruine de leur patrie, sans y apporter de leur part quelque secours? Ne ressentent-ils point dans le plus sensible de leur ame, cest amour qui naist avec nous à l'endroit d'elle, pour en auoir compassion? Ne iugent-ils point que leur salut est enclos dans le salut du Royaume? que la barque de S. Pierre est flottante dans les mesmes vagues, & court vne semblable fortune? Ceste mesme pieté & charité dont ils font profession, sera-elle si froide & réglée en eux, que de voir deperir & ruiner la belle face de cest Estat, sans contribuer de leur part aux remedes? On ne leur demande en ceste cause que d'ayder avec le reste du peuple ja à demy ruiné, à l'entretenement des garnisons es places de Berry, on y a taxé le Chapitre de l'Eglise de S. Agnan, dont il a appelé, & faict interuenir le Clergé de France, pour donner force à son appel : mais vous voyez le peu d'apparence qu'il y a, veu que ce sont ceux qui deuroiēt faire la planche aux autres, comme y ayans le principal interest, & tenans les principaux biens.

Ouy, mais la dignité de nostre ordre (disent-ils) à la faueur des loix diuines & humaines, nous affranchit de toutes tailles & tributs; Ils nous ont esté remis dès le temps que la religion estoit encores foible au monde, pourquoy les repetera-on de nous en vn temps qu'elle est trop plus ferme & entiere? & pouuoient adiouster ce traict vulgaire de Symmache, en son Epistre à Theodose, pour la defense des priuileges des Prestres & Vestales de Rome, *absint ab ærarij puritate ista compendia. fiscus enim bonorum principum, non sacerdotum damnis, sed hostium spolijs augendus est.* Mais la responce à cela est prompte & facile. Car comme la loy affranchissant les Prestres & les Vestales de la puissance paternelle, au rapport d'Aulugelle *lib. 1.* & de Iustin, *in auth. de dignit.* pour cela elle ne le quittoit pas du deuoir naturel de charité enuers leurs peres: *iura enim sua retinet natura, nec ulli fortunæ cedit,* disoit le Philosophe Taurus d'as ce mesme auteur: autrement ç'eust esté faire que le droict fust deuenu patron & exemple de son contraire. A semblable, bien que la loy pour l'honneur de l'Eglise ait affranchi les Ecclesiastiques des tributs & autres charges de la Republique: si ne faut-il presumer

pourtant qu'elle ait entendu leur faire ceste grace, pour s'en preualoir au desaduantage de la patrie, en l'extremité d'icelle, autrement ce seroit tourner la loy contre elle-mesme, & l'interpreter au preiudice du salut public: mais nous deuons estimer que côme ç'a esté œuvre de pieté louïable d'en honorer l'Eglise en temps de paix: que ce sera aussi vn acte de charité à elle de nous les rendre pour sauuer la patrie, en temps de guerre.

Si que de recourir à leur priuilege d'immunité au milieu de la necessité publique, ne iugerez-vous pas que ce seroit imiter ceste pieté blasmable des anciens Iuifs, qui sous pretexte du priuilege du sabbat demurerent les bras troïsez, & ne voulurent combattre pendant que leur ennemy alloit ruinant leur ville, leur liberté, leurs autels & foyers en ce iour là. A ceste occasion les Papes mesmes, dispensans par leurs decrets les Ecclesiastiques de toutes charges & tributs, ont tousiours excepté le tēps de la necessité vrgente, *cap. peruenit, De immunit. Ecclef. Ne videlicet leuiticæ immunitatis obducto velo, sacerdotes etiam ipsi vna cum communi periclitātis patriæ nauī immergerentur*, dit Boniface 8. en l'vne de ses Epistres: Aussi

Rome se voyant vn iour affligée par les armes iniustes de Sylla, & d'ailleurs toute desnée de moyens, le Senat permit de prendre iusques aux Reliques & despoüilles des Temples, & en faire monnoye pour soustenir la guerre: Et à fin de se purger de ce faict enuers la posterité, il fit glisser au bout de l'arrest ces mots, que refere Valere Maxime, *Non patrum conscriptorum voluntas, sed teterrimæ necessitatis truculenta manus illi Senatusconsulto stilum suum impressit.* Que si les choses sacrées en telle extremité perdent leur priuilege, pourquoy nō les personnes, qui ne l'ont tel que pour seruir à icelles? Aussi combien que les Pontifes de Rome eussent obtenu de la Republique le priuilege d'immunité, si est-ce qu'ils le perdoiēt *in tumultu Gallico*, comme dit Plutarque en la vie de Camille. Telle & si grande est la force de la necessité, que comme vne souveraine deesse n'ayant rien de sacré au monde que la fermeté de ses arrests irreuocables, elle range sous sa dition toutes choses diuines & humaines; rend muettes les loix, fait cesser tous priuileges, & n'a autre but que faire obeir à elle-mesme.

Comme aussi noz Roys ont de tout tēps ce pouuoir & auctorité que d'astraindre les

S E C O N D

Ecclesiastiques, de les secourir pour la defense de leur Estat, quand l'occasion presse, sans attendre ny leur consentement, ny autre permission, & est certain qu'anciennement le tiers du reuenu des Abbayes de France, estoit reserué pour en cas de necessité entretenir les armées Royales; comme tesmoigne Aymoinus *li. 5. cap. 34.* Encores que ce droit la semblast estre d'ailleurs fondé sur deux grandes raisons, l'une pource qu'à l'auctorité Royale est subiect tout le gouuernement du Royaume, duquel les Eglises sont partie: l'autre, pource que les Eglises ne peuuent posseder en iceluy aucune chose temporelle sinon par oëtroÿ du Roy, *tolle regum iura* (dit saint Augustin *super Ioha.*) & *quis audet dicere, hac villa est mea, meus est iste seruus, mea est hac domus.* Vray est que le Pape Boniface VIII. voulut interdire l'usage de ce droit à Phillippes le Bel, mais ce fut lors qu'il se déclara ennemy de la Frâce, qu'il la mit en interdiction, & tenta les moyens de la faire changer de main.

Au demeurant ceste façõ de faire de noz Roys estoit trop plus douce & tolerable, que ce qui fut pratiqué par les premiers Empereurs Chrestiens, qui pour n'auoir subiect d'enfreindre le priuilege des choses

fratres , empeschoient que les Eglises se peussent accroistre en moyens temporels, fondez peut estre sur ce dire de Nicephore Phocas dans Zonare, *aut frequens consecratio impedienda est, ne res hominum commercio eximantur, aut sacris sua sacra reliquenda sunt.* Et à ceste occasion, ils defendoient de rien laisser aux Eglises par testament, dont S. Hierosme se plaint en l'Epistre *ad Nepot. Sacerdotes (inquit) idolorum mimi, auriga & scorta hereditates capiunt, solis clericis & monachis hoc lege prohibetur, & non à persecutoribus prohibetur, sed à principibus Christianis.* Ils ordonnerent mesmes , que les Prestres se voüians à l'Eglise, seroient tenus renoncer à tous leurs biens auparauant que d'y entrer, comme il est porté en la loy 27. C. *Theod. de Episc. & Cler.* & remarqué par S. Ambroise l'Epistre *in Symmach.* en ces mots, *Nobis etiam priuata successionis emolumenta recentibus legibus denegantur, & nemo conqueritur: non enim putamus iniuriam, quia dispendium non dolemus.* Eust il pas mieux valu laisser enrichir l'Eglise, pour du superflu de ses biens nourrir les pauvres en tēps de paix, & subuenir à l'Estat en temps de guerre importante au salut general de tous les deux?

Constantin le grand, & ceux qui suiui-rēt

B iiii

depuis meriterent dauantage enuers l'Eglise que ceux-là, luy ayant ouuert le moyē de posseder des immeubles, & amasser des richesses; mais ils ne firent point pourtant conscience de faire contribuer l'Eglise aux charges ordinaires de la Republique, mesmes en temps de paix. *l. placet. C. de sacros. Eccles.* & appelloient charges ordinaires *que stata erant & canonica*, & dont personne n'estoit exempt, comme Iesus Christ mesmes, bien qu'il fust issu d'un tige royal, neantmoins il paya ce tribut pour luy & ses Apostres.

Nos Princes trop mieux nourris en l'escole de la pieté, n'en sont iamais venus iusques-là; ils n'ont oncques restraint la deuotion enuers l'Eglise, ny limité le nombre des Ecclesiastiques, ny faict renoncer les Prestres à leurs biens, ny les declaré incapables des faueurs testamentaires, ny assubiecty leurs personnes & patrimoine aux tailles & charges ordinaires de leur Estat: ils se sont seulement contentez du droit de decime, qui n'est que fort peu de chose, au regard des grandes possessions qu'ils tiennent, & selon que la necessité est vrgente, ils en leuent quelque secours à l'extraordinaire, bien que depuis le cours de ces guer-

res les plus necessiteuses qui furent iamais, on n'a recherché l'Eglise d'aucun secours extraordinaire, que pour l'entretien des garnisons necessaires aussi bien pour leur conseruation, que pour l'Estat. A quoy nous estimons qu'ils doiuent estre condamnez sans preiudice de leurs priuileges en autres choses, & seulement tant que la guerre durera. Ce que la Cour ordonna, pour ce qui estoit de l'entretien des garnisons des villes, où lesdits Ecclesiastiques seroient residens, & non autrement, & qu'à ce faire ils pourroient estre contraincts par saisie de leur temporel, Par son arrest du mois de Ianuier 1593. Comme autrefois il auoit esté iugé au semblable par plusieurs arrests donnez en ladite Cour, l'un du 18. May 1368. contre le Clergé de Lyon : l'autre, du 2. de Mars 1552. contre l'Euesque & Chapitre de Mascon, & un autre du 10. Iuin 1378. pour les Consuls de saint Flour en Auvergne, contre l'Euesque & Clergé dudit lieu.

T R O I S I E S M E P L A I D O Y E'.

Que les Nobles de profession d'armes qui n'ont fait & ne font service au Roy en ses guerres, sont descheuz de leur privilege.



I Dieu auoit donné à la France vne face & voix humaine pour s'exprimer & faire entendre; Cōme elle auroit tout subiect de hautloïer & priser ceste genereuse & guerriere Noblesse, qui adioustant à la vertu de leurs peres, doubles lauriers & trophées, n'a espargné ny sang ny vie pour la deffendre en l'extremité où elle s'est veüe reduite: Ainsi certes elle auroit trop plus d'ocasion & de matiere de blasmer & accuser quelques vns qui degenerans de la Noblesse de leurs ancestres, sont demeurez froids & languides spectateurs de ses iniures, ruines & miseres, sans luy porter le moindre secours du monde.

Si que pour expliquer son ire tres-iuste enuers eux, elle pourroit vser des mesmes termes que fist vn iour Auguste à l'endroit d'une telle maniere de gens, dans Dion au liure 56. disant, *Miro modo vestrum causa affe-*

Etus sum, ô vos, quos nescio quo nomine compellem; virorum? ac virile nihil exhibetis; cinium? at quantum in vobis situm est, perit ciuitas; Romanorum? atqui hoc nomen vestra nequitia destruire intenditis. Car de les appeller hommes, il semble que la vilité & mollesse de leur courage les en rend du tout indignes, n'ayans honte de demeurer asservis aux delices de leurs maisons, & *in muliebri crocinâque tunica famulantes, sedentésque cum lana & colu inter ancillulas,* pendât que les autres exposent virilement leurs vies pour son salut & conseruation. De les dire aussi du nombre de noz citoyens & François, ce seroit trop plus se mesprendre, veu que d'eux-mesmes ils se bannissent & exilent de ceste vraye vertu, qui est la seule cité & vraye patrie des nobles de la France.

Que si elle pouuoit aussi sôubs la mesme figure, se presenter & faire voir en ce lieu, & que nous puissions faire en son endroict ce que fit vn iour vn ancien Orateur, qui parlât pour vn citoyen de Rome qui estoit luy-mesme present & assistoit au iugement de sa cause, luy retroussa ses vestemens en plain Senat, & descouurit les playes qu'il auoit autresfois receuës en l'estomac pour la Republique, faisant par ce moyé plus de

TROISIEME

force aux yeux qu'aux oreilles des escoutans. Si (dy-ie) nous pōuions faire le semblable enuers la France, & descouurer icy toutes les playes sanglantes, & blessures enormes, qu'elle à receuës non en vne seule partie de son corps, mais en toutes, quel aduantage ie vous prie auroit cela, par dessus toutes ces paroles, pour émouuoir vostre seuerité contre l'insigne ingratitude de ces cœurs faillis, qui n'ont eu le courage de de se mettre au deuant, non pas mesmes de la garentir de la moindre iniure?

Mais puis-que leur demerite nous est assez notoire, obseruōs maintenant de quelle rigueur & seuerité les loix ont couru sus à ceste lascheté, à fin de nous en seruir au subiect de ceste cause. Vlpian nous en fournit vn tesmoignage bien clair, *in l. qui cum vno §. grauius ff. de re milit.* disant, *grauius esse detrectare munus militia, quàm contrarius affectare.* Et ideo qui olim ad edictum non respondebant, ut proditores libertatis in seruitutem redigebantur, voulant dire, que bien que ce fust vn vray brigandage, non vne milice ou hostilité, que d'affectionner vne guerre iniuste & sans occasion; que c'estoit toutesfois vne trop plus lourde & enorme faute, que de refuir le labeur de la guerre, quand elle

estoit entreprise pour le seruice de la patrie, & que partant ceux qui faisoient la sourde oreille au son de la trompette, & n'endossoient les armes en telle occasion, estoient rendus serfs & esclaués, comme indignes de la liberté qu'ils n'auroient voulu deffendre.

Quelquesfois aussi la peine en estoit plus rigoureuse, selon que la necessité des affaires pressoit; comme Tite Liue nous l'apprend. *lib. 7. disant, Acerbitas in delectu, non damno modò ciuium, sed etiam laceratione corporum lata, virgis cæsis qui ad nomina non respondissent, inuisa erat*: Ainsi que Pompeius Strabo semble l'auoir expérimenté apres sa mort. car si tost qu'il eust l'œil fermé, le peuple plain de rage & de furie entra dans son logis, rompit le liét où il estoit gisant, enleua son corps, & l'alla trainant tout déchiré par les ruës, pource que durant la guerre de Cinna il n'auoit daigné *periclitanti patriæ succurrere*, Le mesme autheur exprime encores la rigueur de ceste loy Romaine au liure 4. disant, *nec ultra terror belli est dilatus lege sacrata, quæ maxima apud eos vis cogendæ militiæ erat delectu habito*. Et appelle ceste Loy sacrée, pource que chacun s'obligeoit au seruice de la guerre par vn ser-

ment solennel accompagné d'horribles execrations contre les deserteurs.

Selon aussi que l'occasion n'estoit si vrgente, la peine se pouuoit moderer, comme il est aisé à recognoistre en cest exemple touché par Valere Maxime, disant, *M. Curius Consul cum delectum ageret, & iuniorum nemo respondisset coniectis in sortem omnibus, Pollia, quæ proxima exierat, primum nomen urna extractum citari iussit, neque eo respondente, bona adolescentis hastæ subiecit.* Et en celuy dont parle le Iurisc. in l. 20. ff. comm. diuid. *cuius villa diruta, & arbusta succisa, quod ad delectum non respondisset.*

Mais ceste lascheté se rencontroit peu souuēt parmy ce peuple genereux & guerrier. car il y auoit tousiours presse à qui se feroit enrooller le premier, ce que Ciceron resmoigne en l'vne de ses Philippiques, disant, *re & veritate nobis milites, sine vlla recusatione, summo etiam cum studio nomina dant.* Polybe le dit semblablement lib. 3. αὐτὸς ἐν διδασκίῳ ἀπογράφεται &c. Et le cōtraire quelquesfois aduenant, vous voyez la punition qu'il en tiroient, les degradants de leur liberté, abandonnans leurs corps pour estre deschirez & mis en pieces execroient leur memoire, & (pour le plus doux) confis-

quoient tous leurs biens & fortunes.

A mesme prudence les Perses ne furent en cela moins rigoureux que les Romains, tesmoin l'exemple funeste du fils aîné de ce Pythius Bythinius tant renommé pour ses richesses; car encores que ce pere plus curieux de l'aïse de son fils que de sa gloire, eust rendu à Xerxes tous les bons offices qu'on pourroit desirer en vn subiect pour s'acquérir la grace de son Prince, comme de luy auoir nourry quelques iours ceste populeuse armée, qu'il dressa contre les Grecs, l'auoir accommodé de grâdes sommes de deniers, & luy auoir offert le munir de fromēt pour cinq mois entiers: si est-ce que quand pour recompense de ce il vint à demander au Roy qu'il luy pleust dispenser son fils d'aller à la guerre avec luy, non seulement il perdit en vn coup le fruit & le merite de tant loüables offices, mais irrita encores de telle sorte le courage de ce Prince, qu'il fit arrester son fils, & le condamna d'estre mis en deux parts, qu'il fit puis-apres mettre aux deux costez du chemin, par lequel passa toute son armée. qui fut à la verité vne rigueur extreme: mais ce Roy iugea, que celuy-là ne meritoit plus viure, qui par sa lascheté auoit

perdu l'honneur.

Les Grecs aussi au rapport d'Vlpjan sur Demosthene in *Aristog.* auoient vne action qu'ils appelloient *ἀποτασίς δίκην*, contre ceux qui ne s'estoient venus enrooller au registre de la guerre dans le iour qui auoit esté signifié par le trompette public, & l'issue de cela n'estoit pas moindre que de la mort, comme peu s'en fallut qu'Epaminondas ne l'encourut, pour s'estre tenu coy en sa maison *quandiu dimicatum est inter ciues*, non pour lascheté qui fust en luy, car sa vaillance estoit trop recognüe, mais pour n'auoir daigné l'employer au secours de sa patrie.

Trouuerons-nous donc en l'estat de Rome, de Perse & de Grece des exemples loüables de seuerité contre ceux qui par manque ou de cœur ou d'affection, n'auoient voulu secourir au besoin leur patrie affligée, & parmy nous, n'en trouuerons-nous point de semblables? nostre pays nous est-il moins cher, moins honorable, qu'à ceux-là?

Certes du temps de noz peres il n'estoit point besoin d'une grande rigueur, pour les poindre & exciter à ce deuoir, les grâds faicts d'armes qui les rendirent la terreur & l'es-

& l'espouuantemēt de toute la terre habitable, no⁹ en dōne vn trop clair tesmoignage: ils ne presumoiēt iamais que par défaut de courāge ou d'affection aucun d'entr'eux eust refuy le labeur de la guerre, de sorte qu'aduenāt qu'aucun se trouuaſt absent, ils se persuadoiēt que c'estoit pour autre occaſiō, & ne le mulctoient que d'vne amende, qu'ils appelloient *bannū*, ainſi que Gregoire de Tours le declare *lib. 7.* diſant, *Edictū à iudicibus datum eſt, vt qui in hac expeditione tardi fuerāt, banno damnarentur*, & eſt plus eſclarcy par les loix de Charlemagne *tit. 40. lib. 4.*

Et qu'vn chacun fuſt obligé d'aller à la guerre, le meſme Gregoire l'enſeigne *lib. 5. cap. 26.* quād il en excepte ſeulement les gēs d'Egliſe, les plus ieunes & les vieillards, à la charge encores de payer vne certaine ſomme de deniers qu'il appelle *heribannū*, diſāt, *Chilpericus Rex de ſenioribus & iunioribus Eccleſiæ vel Baſilicæ hominibus heribannos iuſſit exigi pro eo quòd in exercitum non ambulaffent*, cōme meſmes du temps de Cæſar chacun eſtoit tenu *ad delectū dare nomen militiæ*, & n'y auoit que les Druides qui en fuſſēt exēpts, ainſi qu'il remarque en ſes commentaires.

Mais depuis que les tailles ont eſté rendues ordinaires ſur le commun peuple de

C

TROISIÈME

France, on a commencé à le dispenser du service de la guerre, & s'en est on seruy depuis, *tāquam voluntario milite*, n'estât raisonnable que payans les frais de la guerre, ils en portassent encores la fatigue & la peine, si ce n'estoit de leur bon gré & volonté.

La nécessité de ce service en fut dès lors du tout laissée aux Nobles de professiō d'armes, qui à ceste occasion tiennent les fiefs du Royaume, & sont honorez du privilege d'exemption de toutes tailles & impositiōs. C'est pourquoy anciēnement la ieune Noblesse de France, estât paruenue à l'aage en laquelle les Romains prenoiēt la robbe virile, souloit receuoir l'espée des mains de l'Euesque, avec vn sermēt solēnel de l'employer pour la liberté du pays & de l'Eglise. ce que tesmoigne Blesensis epistre 49. disant, *Tyrones enses suos recipiūt de altari, & profitētur se filios Ecclesiæ, atque ad illius tuitionem & patriæ liberationem gladiū accepisse*. Le sermēt aussi qu'ils repetent en l'inuestiture de leurs fiefs, les y oblige tres-estroittemens, la forme d'iceluy estant telle, *Promitto me domino meo & filiis eius fidelem futurum in tota vita, sine fraude doloque malo*: Et ores qu'elle ne soit si rude que celle des vassaux du tēps de Cæsar, iurans à leurs maistres & Sei-

gneurs, *ut si quid eis per vim accidisset. aut eundem casum una ferrent, aut sibi mortem cōfiscerent*, comme il dit *lib. 6.* si est-ce quelle les oblige avec autant plus de religion, comme la personne de noz Roys, & la grandeur & majesté de cest Estat nous est plus auguste & recommandable.

Quant aux autres qui tiennent de leur majesté, la noblesse seulement & sans fief, ils ne luy ont pas moindre obligation, leur ayant fait cest honneur, que de les auoir tirez du rang de la commune, pour les élever en son ordre, & les rendre participans de sa grâdeur & gloire, avec vne pleine immunité de toutes tailles & contributions.

Aceste occasion, si les vns & les autres sont veuz manquer en ce deuoir, l'ordonnance de Charles 6. de l'an mil trois cens nonante deux, suyvie de plusieurs autres semblables, sera elle pas trouuée iuste, voire trop douce, & remise en ce qu'elle les priue & dégrade seulement des priuileges de noblesse? Qui est ce qu'on obiecte en ceste cause à l'appellant, recogneu noble de profession d'armes, & sans auoir toutesfois fait aucun seruice au Roy, durant toutes ces guerres. A quoy il respond qu'il est sexagenaire, & du nombre de ceux, que

Pline au huitiesme de son histoire naturelle appelle *consummatus gladiatores*, qui ne pouuant plus de vieillesse porter leurs armes, les alloient consacrer au tēple d'Hercules, *Veianius armis Herculis ad postē fixis, latet abditus agro*; & que durant le cours de sa ieu- nesse, il a seruy en la guerre les deffundts Roys. Si cela estoit, certes on auroit tort de luy reprocher ce repos; car le public n'exige de nous le seruice, que iusques à cest aage là, & nous remet le surplus pour seruir à nous-mesmes. C'est pourquoy Hesiodé en sa Theogonie, faisant la victoire fille du Styx riuieré ou lac infernal, qui signifie tristesse & ennuy, & luy donnant pour freres le pouuoir & l'effort, vouloit dire que la guerre est toute accompagnée de labeur & mesaise, qui sont choses, du tout insupportables à ceste fresle & caduque vieillesse. C'est pourquoy entre les prudences qui furent loüées en l'Empereur Adrian, celle-cy en estoit vne, qu'il n'obligéoit au seruice de la guerre sinon ceux qui par l'aage & la force, le pouuoient supporter. *De militum etiam atatibus indicabat, ne quis aut minor quàm virtus posceret, aut maior quàm pateretur humanitas, in castris contra morem veterem versaretur*, dict Spartian en sa vie. Si toutesfois apres l'aage.

militaire on recognoissoit encores aux
 vieux soldats vn bon reste de vigueur, *iam
 senior sed cruda viridisque senectus* : en ce cas,
 & lors d'une necessité, on les contraignoit
 de reprendre les armes. Polybe les appel-
 loit *ανακλήτες*, *id est reuocatos*, & desquels
 parle Tite Liue *lib. 10.* disant, *ex his homini-
 bus reuocatorum numerus constitit*. Mais l'ap-
 pellant ne fait apparoir de son aage, dispo-
 sition, & seruices qu'il dit auoir faits par le
 passé.

Partant nous estimons que du moins par
 prouision il doit estre contrainct au paye-
 ment de sa taxe, & au principal s'il plaist à la
 Cour elle reglera les parties; Mais nous re-
 querons estre enioinct aux Lieutenans &
 Esleuz de toutes les Eslections de ce ressort,
 de mander par leurs commissions à tous
 Assesseurs de taxer & cottiser aux tailles &
 toutes autres leuées de deniers, tous les
 Nobles de profession des armes qui n'ont
 seruy & ne seruent le Roy en ces guerres,
 ainsi qu'ils y sont tenus par les Edicts & Or-
 donnances, & dès à present les declarer des-
 cheuz de tous priuileges. Ce que la Cour
 ordonna par son arrest du vingt-huicties-
 me iour d'Auril, l'an mil cinq cens quatre-
 vingts treize.

QVATRIESME PLAIDOYÉ.

Sur la multiplicité des Officiers, spécialement és Eslections de ce Royaume.

NOus demeurons d'accord avec les plus sages & experimentez en la prudence ciuile, que c'est vne maxime tres-vtile en l'Estat Monarchique, *vt continuis & diuisis officijs res gerantur*, que les charges & offices d'iceluy soiét diuisées, parties, & distribuées en plusieurs membres; Et ce pour de grandes & notables consideratiōs: dont l'une & la premiere est propre & particuliere pour les grandes dignitez; de peur que donnant trop de pouuoir & auctorité à vne seule personne, il vienne à en abuser, au preiudice des loix, & desaduantage du Prince souverain. L'Empereur Commode la pratiqua apres qu'il eust ressentý la rebellion de Perennis son grand Preuost & chef des Cohortes Pretoriennes; car recognoissant que c'estoit la grandeur de ceste charge qui luy auoit ensleué le cœur, & enflé le courage, il la diuisa en deux, dit Suetone. Et à semblable raison Alexandre ayant de nouveau conquis l'Egypte, aduisa que le meil-

leur moyen pour le conseruer, estoit de le diuiser en plusieurs gouuernemens. *Alexandro visum est* (dit Arrianus) *Aegyptum defendi posse, si eam in plures praefecturas diuideret.* c'estoit de là aussi que le Senateur Catule disoit souuēt, *non sēpe unum Consulem improbum vidisse, duos nunquā,* pource qu'à la verité la nature & condition des esprits humains, est subiecte à abuser aisément de leurs grandes fortunes. d'où vient que les Poëtes en leurs fictions disent que les premiers hommes ayans esté par les dieux creez Androgynes, furent depuis par eux diuisez en deux, à fin de les rendre plus foibles & debiles, & par mesme moyen plus retenus, modestes & traictables.

Vne seconde raison de ce departement & multiplication d'offices, commune aux grâdes & mediocres charges, est pour faire que le public en fust plus dignemēt seruy, pource que donnant ordre à n'y commettre qu'hommes sages & vertueux, il est certain que plusieurs de ceste qualité employez en vne mesme charge, peuuēt y apporter trop plus d'auctorité que ne peut pas faire vne seule personne: c'est aussi le souhait d'Agamemnon dās Homere, *Τοις-τοι δὲ καὶ μοι συμφέρει μῆρες,* d'auoir tousiours

Q V A T R I E S M E

pres de luy dix Cōseillers semblables à Nestor, conforme à celuy de Darius, *sibi optans tot Zopyros, quot essent grana mali punici.*

Ce nombre aussi d'officiers en mesme charge, peut seruir pour en bannir les abus & maluerfations, les vñs estans aux autres comme tesmoins domestiques, & cōtroolleurs familiers de leurs actions & deportemens. C'est pourquoy Aristote au cinquesme de ses Politiques, vouloit que spécialement en l'administration des finances, ou il y a plus d'armorce à la corruption, il y eust plusieurs officiers, & que rien ne se peust ordonner au fait d'icelles qu'en presence d'eux tous ensemble, qui estoit la loy mesme d'Athenes, comme Ciceron l'enseigne Orat. pro Flacco, disant, *Res mihi est cum ciuitate accerrima & conficientissima literarum, in qua ne numus quidem moueri potest, sine quinque Prætoribus, tribus Quæstoribus, quatuor mensarijs, qui apud illos à populo creantur.*

En diuisant aussi les offices, & donnant à chaque fonction & charge vn honneur & dignité séparée le public en peut estre illustré, & les particuliers seruis avec plus de contentement, pource qu'à la verité les affaires sont tousiours mieux conduites, & plus dextrement traitées par ceux qui y

sont cōtinuellement nourris & exercez. C'est pourquoy Platon au 8. de ses loix de-
fendoit expressement quaucun apprint &
exercaist autre art que celuy qu'il auroit
premieremēt esleu, & auquel il auroit esté
nourry. Et Aristote statuant vne pareille
loy en ses Politiques disoit, *ὃ βέλτιον ἔχαστον
ἔργον τυγχάνει τ' ὀπίμελείας μονοπραγματῆσης
ἢ πολυπραγματῆσης*; aussi ils auoient tous
deux appris de Socrate leur maistre ce
precepte couché in *Theæt. Plat.* *κρεῖττον γὰρ
τὸ μικρὸν σὲ ἢ πολὺ μὴ ἰκανῶς περᾶναι.*

Et tout ainsi que la nature composant le
corps humain de telle & si excellente stru-
cture & symmetrie qu'il se voit, a ordonné
avec telle sagacité à chacun des membres
d'iceluy sa charge & fonction particuliere,
que nous n'en voyōs aucun confusēmēt de-
stiné apres deux diuerses, *nullū esse obelyscoly-
chniū*, cōme dit Aristote *lib. 4. de part. animal.*
alludāt à cest instrumēt militaire, dōt au re-
cit de Pollux, les anciēs soldats de Grece se
seruoient mal cōmodément à deux vsages:
Tout de mesmes peut-on dire, que pour
establir en vn corps politique cest ordre
qui en doit estre l'ame & le lustre, l'hon-
neur & harmonie, les Estats & Offices se
doient tellemēt partir & distribuer, qu'un



Q V A T R I E S M E

seul ne puisse estre employé en diuerses affaires. Qui fut le mesme aduis d'Auguste, quãd il crea plusieurs offices nouueaux, *ut enim plures partem administrandæ reipub. caperēt, noua excogitauit officia*, dit Suet. en sa vie.

Voyla les raisons & maximes sur lesquelles on a fondé la diuision des charges & offices; Belles à la verité & singulieres pour maintenir en gloire & celebrité les Estats & Empires ou elles seront sainement obseruées: Mais d'ailleurs aussi tres-perilleuses & de dāgereuse suite, où on viēdra à en abuser: Comme certes nous l'experimētons en ce Royaume, qui depuis quelques ans est deuenu quasi monstrueux, pour le nombre excessif d'Officiers qui y ont esté prodigieusement multipliez. Car non seulement les principales dignitez y ont esté redoublées, mais les mediocres & infimes augmentées en tel nōbre que de cinq cens Citoyens, il y en a la moitié d'Officiers, & n'y a si petite affaire ou fonction publique qui n'ait deormais son officier à part, *omnia versa sunt in munia*: Dont nous voyons naistre plusieurs grands inconueniens, & qui nous presagent encores à l'aduenir vn trop plus grand desordre, si on n'y remedie. De là est venu le mespris enuers le Magistrat;

lequel comme il est reueré estant soustenu par vn moderé nombre de personnes d'honneur, aussi il vient à estre negligé & rendu vil par vn effrené nombre d'hōmes, qu'on y employe. C'est pourquoy l'Empereur Commede ialoux de l'auctorité du Consulat de Rome, & pour en affoiblir l'honneur, crea vingt cinq Consuls pour vn an, dit Lāpride, & le tesmoigne Xiphilin en l'abregé de Dion, disant, ταῦτα τε ὁ Κλέανδρος ἐποίησεν καὶ ὑπάρχεις ἐς ἐνιαυτὸν πέτεται καὶ εἴκοσιν ἀπέδειξε, ὃ μὴ πρὶν ποτε μὴθ' ὑπερὶ ἐγένετο. Et l'Empereur Auguste voulant restablir la dignité & splendeur du Senat, qui auoit esté autrefois l'ornement d'un si grand Empire, commença par le retranchement & reduction du grand nombre d'hommes que la faueur & l'argent y auoient aduancez. *Senatorum affluentem numerum deformat & incondita turba ad modum pristinum & splendorem redegit, duabus lectionibus: prima, ipsorum arbitratu quo vir virum legit: secunda, suo & Agrippæ.* dit Suetone en sa vie. Car de vray l'auctorité & dignité du Magistrat estant diffuse & espanduë en tant de membres, vient à perdre sa vertu & sa force.

Et du mespris du Magistrat qui est celuy qui ne cognoist que le despect du peuple

Q V A T R I E S M E

enuers le Prince & les loix en soit fort? Car le Magistrat à l'endroit du Prince & du peuple est de pareille force qu'est la clef d'une voute ou arcade, qui est traignant les coupes l'une avec l'autre en une iuste liaison, rend l'ouvrage ferme & durable, & ne permet qu'il se lasche & dementisse. Le Magistrat de mesme rendant le peuple souple & obeissant aux Princes: & moderant d'ailleurs les commandemens & Empires d'iceux, les lie & adstrainct ensemble d'un reciproque & perdurable amour. Si qu'affoiblissant le Magistrat par un trop grand & excessif nombre d'Officiers, qui ne dira que c'est affoiblir & saper l'appuy & fondement d'un Estat?

Un tēps aussi a esté que de se faire officier du public, c'estoit se priver de soy-mesme, pour se dōner au labour & au service d'iceluy; mais aujord'huy nous pouuōs dire que d'affecter un office, c'est rechercher l'oisiueté: Car ce nōbre excessif d'officiers les rend cōme inutiles & sans exercice, ne leur laissant que le simple nom & tiltre d'officier: Si qu'un ancien voyant un tel desordre en son pays, appelloit avec quelque raison les offices *αργος μύμα* *desidia*, un voile & honeste pretexte à l'oisiueté.

Araison dequoy , ne plus ne moins que le ieune Lycurge (dit Aristides en l'vne de ses Panathenaiques) fut chassé de sa ville, pource qu'il auoir augmenté le volume des loix de Lacedemone , & par ce moyen donné suiet à plusieurs differends & procez : comme au semblable Palamedes fut blasmé, dit Varron, de ce qu'adioustant à la langue Grecque quelques nouueaux caracteres, il l'auoit renduë plus parlante & babillarde : Le mesme certes meriteroient ceux qui ont esté cause d'introduire parmy nous ce grand & si ruineux abus de ce nombre immense d'Officiers, qui a causé en la iustice pareils & semblables effects. Aussi voyons-nous qu'en tous les Estats qui se sont tenus en France depuis 60. ans, la premiere clameur & plaincte qui a esté renduë, a esté sur la reduction des offices au nombre qui estoit du temps du Roy Loys douziesme , Prince tres-amateur de son peuple , comme si c'estoit le premier & principal remede pour remettre l'Estat en son ancienne gloire & felicité. Nous desirerions que ceux qui approchent des Roys eussent tousiours deuant les yeux, ce que Lampride à escrit de l'Empereur Alexandre sur vn pareil subiect, *inreiuando* (*inquit*)

Q V A T R I E S M E

constrinxit ne quem ascriptum, id est vacantium, haberet, ne annonis Remp. grauaret, dicens, malū esse Imperatorē qui ex visceribus prouincialium homines non necessarios, nec reipub. utiles pasceret.

Et ne doutōs point que si nostre Roy, tres-auguste & nay pour le biē & salut de la Frāce, auoit mis fin aux grādes affaires qui trauiersent ce sainct & tres-loüable dessein, qu'il a au reglement & reformation de son Royaume, ne cōmençast par la suppression de ce desmesuré nōbre d'Officiers, dōt certes le principal desordre se recognoist au grand nōbre d'Eslections de ce Royaume, & affluence d'Officiers en icelles, dont les deux tiers restent du tout inutiles pour le peu d'exercice qu'il y a en ces charges, & ne laissent pourtāt de tirer de grands gages, & iouyr d'vne immunité, dont toute la charge retombant sur le peuple, le va affligeant & opprimant iusques au desespoir.

Nous auons vſé de ce discours general, à fin qu'ayant recogneu le bien & aduātage, qui peut prouenir du nōbre moderé d'Officiers, & d'ailleur la confusion & desordre que traine & charie avec soy le desfreiglé nombre d'iceux, nous soyons excitez à obseruer & entretenir l'vn, & nous donner garde de l'autre, le plus que nous pour-

rons : Comme au faict de ceste cause en laquelle il s'agist de l'enterinement de lettres contenans l'establissement d'une nouvelle Election en la ville de la Fleſche, contre lesquelles & pour en empescher l'enterinement, vous auez quy ce qu'ont desduit de particulier les Esleuz d'Angers, du Mans & de Baugé : ſçauoir eſt, qu'ils ne ſont qu'à deux ou trois lieuës de la Fleſche, que les parroiffes dont on veut compoſer ceste nouvelle Election ſont aux portes de leurs villes. Que démembrant leurs reſſorts, ſeroit rendre leurs offices inutiles. Que le pays d'alentour iugeant à quelle charge luy pouuoit tourner ceste nouvelle Election, pour les grands gages & immunitéz des Officiers d'icelle, auoit mieux aymé ſecourir les affaires du Roy d'une grande ſomme de deniers : & qu'à ceste occaſion ayant eſté ſupprimée par deux fois, c'eſtoit vne honte publique d'y retourner encores. Ioinct donc à cela ce que nous auons remonſtré du public, & l'importance que vous iugez eſtre aux affaires du Roy, de diuiſer les receptes de ſes finances en tant de diuers Bureaux : Nous requerons qu'il plaife à la Cour debouter les demandeurs de l'effect & enterine-

ment de leurs lettres, & leur faire deffenses, comme à tous autres, de faire à l'aduenir aucune poursuite pour le reſtabliſſement de ladite Eſlectiō, ſur telle peine qu'il luy plaira ordonner. Ce que la Cour ordōna, & fit deffences ſur peine de mil eſcuz, de plus pourſuiure ledit reſtabliſſement: par ſon Arreſt du mois de Marſ 1593.

Les exemptions qui auoient eſté attribuées aux Officiers des Eſlections, furent iugées tellement preiudiciables au public, qu'elles furēt reuokées par Edict du mois de Ianuier quatre-vingts dixhuiſt.

CINQVIESME PLAIDOYE'.

Sur l'Edict interuenu ſur la reduction de la ville d'Orleans.

NO V S apprenons de l'antiquité Grecque vne notable couſtume, que pratiquoient les Atheniens, lors que contre toute eſperāce, ils voyoiēt de retour quelques vns de leurs enfans, qu'ils auoient long-temps tenus pour morts, & *quibus iuſta funerum facta erant*: qui eſtoit de ne les admettre en leur maiſon, qu'apres vn certain ſacrifice qu'ils

qu'ils appelloient *καθάριστον*, propre pour expier la faute de leur trop longue absence: Puis pour tesmoigner au peuple, l'adieu qu'ils en faisoient, la mere les faisoit passer sous le gyron de sa cotte, comme si tout de nouveau ils venoient de renaistre. c'est pourquoy ils sont appelez par Artemidore *δευτερόποτοι* quasi *δευτερογενείς*. Et apres cela les plus proches parens & familiers amis pour leur congratuler de leur retour heureux, venoient les honorer de dons & liberalitez: ce qu'Apulce semble auoir voulu toucher *lib.. xj.* disant, *Confestim familiares, quique mihi proximo nexu sanguinis cohærebant, luctu deposito quem de meæ mortis falso nuntio susceperant, repentino gaudio, variè quisque munerabundi, ad meum festinant illico diutinum reducémque conspectum.*

En oyant la lecture de ces lettres patentes sur la reduction de la ville d'Orleans, il nous a semblé que le Roy, dont l'affection enuers son peuple égale la pieté naturelle des peres, ait voulu observer quasi pareilles ceremonies à l'endroit de ses Officiers & suiets de ceste ville là. Il y a cinq ans (lustre le plus funeste & lugubre qui ait passé depuis que le monde est monde) qu'il les auoit tenus pour perdus, comme abandon-

D

nez sous vn ioug estranger & qui les auoit
 plaints & reiettez comme membres la-
 cerez du corps de son estat : & aujourd'huy
 que preuenans son esperance, ils retournēt
 à luy, vous voyez de quelle façon il les re-
 çoit : *tam pater nemo, tam clemens nemo*. Pour
 toute satisfaction des fautes passées, vous
 voyez que le Roy se contente de ce seul
 changement de volonté en eux : que pour
 expier le demerite de leur trop longue de-
 meure à le venir recognoistre, au lieu de
 ce sacrifice expiatoire des Grecs, il se tient
 satisfait de ce vœu & serment qu'ils font
 de luy estre désormais fideles & obeyssans
 subiects. Vous voyez que pour preuue de la
 pieté & vraye affection dont il les reçoit au
 gyron de sa grace, de combien grands & si-
 gnaletz priuileges il les honore. Vous voyez
 que pour le tesmoigner avec vne verité
 plus celebre, il a commandé ceste publica-
 tion estre faicte, aux lieux les plus augustes
 de son Royaume. Vous auez ouy l'expresse
 inunction qu'il faict à vn chacun de nous :
 de se conformer en cela à sa volonté sa-
 crée, de leur congratuler de leur retour, de
 les aymer & cherir comme freres, que la
 fortune nous rend, apres nous en auoir
 priuez vn si long temps : car certes il n'y a

point de parenté plus proche, ny de plus estroicte alliance, que de mesmes concitoyens, d'une mesme langue & pays, naiz sous l'obeissance d'un mesme Prince, nourris sous de mesmes loix & coustumes, estants par ce moyen tous freres, comme enfans d'un mesme pere qui est le Roy, & qui veut qu'à l'aduenir entr'eux & nous, *sit omnium obliuio, sit fœdus constantis amicitiae, fidésque beneuolentia sempiterna.* Nous pourriõs dire aussi que le Roy en ce faisant a voulu encores imiter ce tres-pieux & charitable pere, dont est fait mention és sacrées lettres, qui prise & fait plus d'estat de celuy des siens qui s'est recogneu après sa faute, & qui s'est recouré apres sa perte, *chariorem censuit quem lucrifecerat.* Qui sont toutes choses biẽ esloignées de la dureté de cest aneïen formulaire, dont on obligeoit les villes desobeissantes à se rendre sous la main de ceux qui en estoient les maistres, & que Sofia exprime dans le Poëte comique, disant, *Ex urbe veniunt flentes, velatis manibus orant ignoscamus peccatũ suum, dedũtque se diuina humanaque omnia, urbem & liberos in ditionem atque in arbitrium pop. Theb.*

En quoy certes la ville d'Orleans a tout subiect de se loüer & estimer heureuse en-

tre les villes, de perduë & abandonnée que n'aguere elle estoit, se voir en vn instant si cherie & priscée: d'orpheline & desolée, *confestim omnibus erasis miseria sua titulus*, se voir si benignement recueillie, & honorablemēt traictée par le plus grand Prince que le Soleil veit iamais naistre, leur Roy & plus que pere ensemble: Car, d'estre gouuernez d'un Roy, c'est vn biē à la verité qui nous est cōmun avec plusieurs peuples: mais d'estre gouuernez par vn Roy si magnanime & genereux, si vtile & vigilant, si pieux, clement & debonnaire que le nostre, & qui *sola maiestate, solo virtutis miraculo tam mira conficit*, c'est vn heur qui nous est peculier, & denié à tout le reste du monde. La France mesme est obligée de le tesmoigner à iamais, qui s'estant veuë prosternée & couchée tout de son long par terre, quasi sans poux & haleine, a esté par luy miraculeusement remise sus, & quasi restablie en sa premiere force, *robustam reddidit ex imbecillissima, potentem ex impotente, felicem ex infelice*.

Chacū sçait que lors que le bon Ange & gardien de ce grand Royaume nous l'amenā par la main, ce n'estoit parmy nous que ruine & desolatiō, que confusion & desordre, que fer, que feu, & guerre brisant & cō-

fumant toutes nos villes : ce n'estoit qu'un Chaos meſſagé d'humeurs toutes contraires, & cōiurées à la ruine les vns des autres: Et vous voyez cōme en peu d'heure par ſa valeur & prudēce il a tantost reſtably & aſſeuré toutes choſes, *cōfuſa digeſſit in ordinem, nouas qualitates rebus indidit, ſimilia fecit ex diſſimilibus, è diuerſis eadem, ex diſſitis cohærentia, ex inæqualibus æqualia, ex obſcuris illuſtria*, qui eſt imiter humainement en ſes œuures la diuinité, dōt il eſt en terre l'image & le portraiçt; Si toutefois nous n'aimons mieux dire de luy, ce que le Senat de Rome diçt & vn ieur en l'honneur de Lemp. Probus, *Genium ſcilicet Reip. Roma. Illius induiſſe perſonam ut deſperatis rebus ſubueniret.*

Cōment donc ne nous eſtimerions-nous heureux de viure ſoubs les auſpices d'une Maieſté ſi digne? Cōment ne luy voueriōs-nous nos cœurs, nos volontez & fortunes, puis que nous les tenōs libres par ſon moyē? Nous dirōs à ceux d'Orleās qu'outre qu'ils y ſont obligez par tant de faueurs qu'ils en reçoient, ils y doiuent encores eſtre excitez par la memoire de la vertu de leurs peres, qui entre les Frāçois ont touſiours eſté tres-affectiōnez à la reputation & honneur de leur patrie: iuſques-là que nous liſons dans


CINQUIESME PLAID.

Cesar *lib. 7. de bell. Gall.* que ceux de ceste ville là qu'il appelle *Genabum*, de son nom ancien, aymerent mieux abandonner leur ville, tous leurs biens & richesses, que de recognoistre vn empire estranger; & apprenons dans l'histoire de Gregoire de Tours, que ce furēt ceux d'Orleās, qui ioincts avec Merouée l'vn de nos premiers Princes, chasserent du milieu de la France Attila ce fleau de la terre qui y estoit venu avec forces admirables, pour la dōpter sous sa puissance. Et (qui est de plus fraische memoire peut-on pas avec verité leur attribuer la gloire, d'auoir autresfois arresté le cours impetueux des cōquestes des Anglois, sous le regne de Charles 7. dont encores leur ville porte les trophées, pour marques eternelles de sa fidelité & valeur?

L'esperance ferme que nous auons qu'ils continueront en ce deuoir enuers le Roy & leur patrie, nous fait requerir qu'il plaise à la Cour ordonner, que sur le reply des lettres sera mis qu'elles ont esté leuës, publiées & registrées, pour iouyr par les Officiers & habitans d'Orleans du contenu en icelles, selon que le Roy le veut & mande. Ce que la Cour ordonna par son Arrest du 2. Mars 1594.

SIXIESME PLAIDOYE'.

*Sur l'immunité des Conseillers des
Cours souveraines.*

 I le tribut (comme disoit vn ancien) est vne redevance ciuile, dont le peuple est obligé enuers le Prince pour le labour & soin qu'il apporte à sa conseruation : N'estimons-nous pas que ceux-la luy payent vn suffisant tribut, lesquels *ut assumpti in partem curarum*, se sont priuez d'eux-mesmes pour se donner à luy, & le releuer d'une partie de ceste fatigue & sollicitude des affaires publiques?

De ceste condition sont les Officiers & magistrats des Cours souveraines de France, desquels *ut sunt summi & Principes administris Regis*, & chargez d'une bonne partie du gouuernement public, le vœu & profession sont de referer toutes leurs actions & contentions d'esprit aux commoditez & aduantages de l'estat, *Rempubicam gubernare, vrbes & quietate tueri, salutem ciuium, vel salu-*

D iij

SIXIESME

bribus consilijs, vel iudicijs grauibus conseruare.

Leur prudence & industrie, leur assiduité & vigilance, leur fidelité & bon conseil, leurs peines & molestes, qu'ils voient, consacrent & employent au bien & salut du public, sont-ce pas les plus riches, amples & vtils tributs qui se puissent payer au Prince ou à la Republique? Car sil est vray de dire avec Diō, *νεῦρα ἡ ἡγεμονίας τὰ χεῖματα εἶναι*, que les tributs & daces sont les nerfs & muscles d'un estat; il est encores plus veritable d'asseurer qu'en l'adresse, bonne conduite, conseil & iustice des hommes sages, est la vraye ame d'iceluy; d'où vient qu'un aduisé Romain disoit que nous pouuions hardiment souhaitter toutes sortes de biens à nos ennemis, excepté la prudence & bon conseil, pource qu'avec ceste seule possession, nous leur pouuons raur & arracher toutes les autres.

Cest ordre donc signalé des Senateurs de France, nous fournissans de ce riche secours au gouuernement du Royaume, merite-il pas tous les honneurs & priuileges pour loyer & recompence de leur seruice si important au salut & repos de nous tous?

Les Romains (qui à tous propos nous

seruent de patron & exemple de prudence ciuile) recognoissans combien d'honneur & de commodité ils receuoient d'un pareil ordre ; leur rendoient aussi le reciproque , les honorans de tout ce qui estoit de splendeur , de dignité , & priuilege en leur estat ; si que mesmes personne ne parloit iamais d'eux qu'aucc vn tiltre de gloire tres-celebre , comme Ciceron en l'oraison de *Arusp. respons.* appelle le Senat de Rome, *Principem salutis mentisque publicæ*, & Symmache en l'une de ses Epistres l'appelle *melio rem partem humani generis*, & Epiçtete sur ce enquis par l'Empereur Adrian , l'appelle *ornamentum urbis, splendorem ciuium*: & l'Empereur Constantius dans Marcellin, l. 16. l'appelle *Asylum mundi totius*, Cassiodore, *sanctissimum ordinem*, & ailleurs, *morum lumina*. Les Empereurs mesmes s'estimoient bien honorez , d'estre dictz *pars Senatus* , & d'appeller ce Senat *participem sui* , comme nous lisons en ceste loy *quisquis. C. ad. leg. Iul. maie.* & in l. 8. C. de dignit. où l'Empereur Aurelian disoit en l'honneur de cest ordre, *Ius Senatorum & auctoritatem eius ordinis, in quo nos quoque ipsos numeramus necesse est ab omni iniuria defendere.*

Entre tant de prerogatiues & loüables

SIXIEME

reconoissances de leurs grands merites, eust-ce pas esté d'ailleurs auillir leur dignité, & *quasi capite minnere*, que de les assubietir aux tributs, charges, & seruitudes populaires? car encores que les tributs soient vtils, voire necessaires, à vn estat, si est-ce toutesfois que ce sont charges ignobles & plebeienes, & indignes d'y asservir les grandes dignitez. A ceste occasion Tertulian in apologet. disoit, *ut agri tributo onusti viliores sunt, sic hominum capita stipendio censa ignobiliora sunt.*

Aussi ne voyons nous point que du tēps de la gloire de Rome, on les ait oncques renduz subiects aux contributions. Bien lisons nous que comme ils estoient choisis & promeus en cest ordre, *ex censu maximo*, qu'aussi ils estoient tenuz à raison de leurs facultez fournir aux frais des jeux, spectacles & pompes publiques, en quoy il leur conuenoit faire vne si grande despense, qu'à ceste occasion la loy 58. C. Theod. de *decurionibus*, vocat *ordinem senatoriū sumptuosum* & apprenons de Dion auli. 60. que du temps de l'Empereur Claudius plusieurs furent tirez du Senat pour ce que leurs fortunes ne respondoient à la sumptuosité de ceste dignité : d'où vient que Sym-

maché lib. 19. *epist.* louë l'Empereur Theodose d'auoir reduit & moderé ceste charge aux Senateurs, *ne (dit-il) aut pares facultate collegas, tenuis decolaret editio, aut viribus maiora conatos effusio inconsulta demergeret.* Mais c'estoit vne despenſe crée avec ceste dignité, & qui en augmentoit le lustre & la splendeur, bien differente des tributs qui par leur qualité ſeruile & roturiere les euſſent des-honnorez.

Et quand ſoubs l'Empire de quelques Princes Romains peu affectionnez à ceſt ordre, comme du temps de Neron, qui comme dit Eusebe *in Chronicis*, & Orose, 7. *hiſt.* força le Senat de luy payer pour vn an centies *sestertium*, ce qui arriua incontinent apres la mort de Seneque, & *cum iam deterior fieri non posset*, on commença à leuer sur eux quelques deniers, encores eut-on honte & pudeur d'appeller cela *tributum*, *sive capitationem*, *sive stipendium*, *sive indiſtinctionem*, *aut superindiſtinctionem*, *sive annonam*, qui ſont tous tiltres de charges viles & abieſtes: mais ils l'appellerēt *Aurum oblatitium*, *sive glebale oblatitium*, pour ce que *oblacionis genere quodam exigebatur*, c'estoit vne eſpece de preſtation volontaire, & non de contrainte, de la meſme ſorte que *εὐλογία* illa

S I X I E S M E

que les Curez payoient par chacun an à leurs Euesques, sont appellées, *inquadræ Constantinop. synodo, oblatitiæ*, pour ce que les Curez n'y estoient adstraincts par forme de taille : mais d'offrande & present gratuit. On l'appelloit aussi *glebale*, pour ce que c'estoit en consideration des terres & possessions qu'ils tenoient, comme nous l'apprenons de Symmache, *in epist. de quæ sit. gleba Senat. & in l. 2. C. de Præt. & bon. præd. & quant à ceux qui ne possédoient aucunes terres, duos folles in ærarium conferebant.* comme nous en voyons vn tesmoignage dans vne constitution de Gratian *C. Theod. lib. 6.* Mais depuis, toutes ces charges là, comme indignes d'estre supportées par si grandes dignitez, furent du tout supprimées, esteintes & abolies, ainsi qu'il se voit au liure dessusdict de prætor. & hono. præd. folliis & glebæ funct. sublata, & furent à l'aduenir les Magistrats souuerains rendus exempts & immunes de toutes charges & tributs.

Nos Senats de France n'ayans pas pres de nos Roys moindre auctorité & pouuoir qu'auoit ce Senat de Rome à l'endroit du peuple, & ne rendans à la France moins de lustre & ornement, moins de secours & de

seruice, ont merit  de leurs Majestez pareils priuileges d'immunit  & exemption. Entre lesquels on ne doibt reuoquer en doute que le Parlement de Bretagne comme estant vn des membres de ce grand ordre dont le Roy est le chef, y doiu  participer, veu mesmes qu'ils nous ont fait apparoir de lettres par eux obtenu s   cest effect, & qui ont est  verifi es en ceste Cour. De sorte que l'appellant nous aiant iustific  qu'il est l'vn des Conseillers de ceste compagnie l , nous ne voyons point que les habitans de la ville de Chinon, ai ent en aucun subiect de l'auoir tax  aux cru s extraordinaires des tailles qui se leuent pour le payement de la gendarmerie, & garnisons des Prouinces: car les Conseillers de cest ordre, en faisant dignement leurs charges, *etiam pro Principe & pro Republica militare dicuntur*, dit la loy 1. C. de priuileg. eorum qui in sac. Palat milit.

Mais quant aux fortifications de la ville de Chinon, esquelles les intimez l'ont compris, nous ne voyons point qu'il ait occasion de s'en plaindre, pour ce que c'est chose qui importe autant   sa conseruation que pour le public. Et ne luy sert de dire que son vray domicile est en la ville de Re-

nes, *vbi meret*, & où est seant le Parlement dont il est officier, suyuant la loy 23. *in ff. ad municip.* Car bien qu'anciennement il ne fust pas loisible aux Senateurs de Rome, ou de Constantinople, *alibi quàm in vrbe morari*: depuis toutesfois leur ayant esté permis, *impetrato diplomate à Principe*, comme il est dit *in leg. filij. §. penult. ff. ad municip.* elle leur assigna par mesme moyé *duplex domicilium*, l'un à Rome à cause de leur dignité, & l'autre où estoit le siege & arrest de leur bien & famille. Et est bien certain que quelque part qu'ils allassent, ils retenoient tousiours le priuilege de leur dignité, pour ce qui estoit des charges personnelles. Mais en cest endroit où il est question d'une charge réelle & patrimoniale, ny le domicile, ny la dignité ne sont considerables: il suffit qu'il a recogneu que sa maison, sa famille & son bien sont enclos, & conseruez dans ceste ville-la.

Et que la fortification soit vne charge réelle, le texte y est formel *in l. restorationi. C. de diuers. præb. urb. & rust. lib. II.* disant, *restorationi mœnium publicorum tertiam portionē eius canonis qui ex locis fundis-ve, annua præstatione confertur, &c.* desquelles charges réelles & patrimoniales, personne ne se

peut dire exempt, si ce n'est que spécialement le Prince luy en eust accordé immunité, comme il est dit *in l. munera & l. sequ. C. de munerib. patrim. ad instar corporalium munerum quæ non censentur remissa, nisi quæ specialiter expressa sunt. l. addita ff. de excusat. tut.* & Capitolin le tesmoigne, disant, *Familia Gordiani hoc Senatus decrevit, ut à tutelis atque legationibus, & à patrimonij necessitatibus, nisi si vellent posteri eius vacarent.* De sorte que leur priuilege n'estant que pour les charges personnelles, il plaira à la Cour, pour ce chef, confirmer la sentence des Esleuz de Chinnon, qui ont ordonné qu'il demeureroit compris au roolle de la fortification, & l'informer en ce qu'ils l'ont condamné à payer, pour la cruë de la gendarmerie & garnison. Ce que la Cour ordonna par son Arrest du mois de Iuillet. Mil cinq cens nonante trois.

SEPTIESME PLAIDOYE.

*Que pour iustifier vne Noblesse du sang,
il faut monstrier que le pere & ayeul
ayent vescu noblement.*

LA question principale qui se rencontre en ceste cause, est de sçauoir si les enfans des Cōseillers du grād Conseil, doiuent estre reputez Nobles pour iouyr de l'immunité & exēption des tailles. Et semble de prime face qu'il n'y a aucū doute en cela, veu le rāg celebre que tient au Royaume ceste cōpagnie, qui est perpetuellement occupée à la suite des Roys, pour les seruir és grandes & importantes affaires de la Iustice; si que nous la pouuons comparer à celle que l'Empereur Auguste auoit establie pres de sa personne, pour se resoudre des plus graues & dignes affaires de son estat: & la changeoit ainsi que celle-cy de six mois en six mois *συμβέλλας ἐς ἑξάμηνων*, comme Xiphilin, Suetone & Zonare le remarquent: qui estoit imiter ce Iupiter d'Hesiodé qui en tous lieux où il alloit, auoit tousiours à son

son costé la iustice *perpetuam παρρησίαν*, pour compagne ordinaire, comme celle qui deuoit donner force & auctorité à ses conseils diuins & irreuocables.

Et ce remarque la dignité de ce grand Conseil dont nous parlons, en ce principalement que le Chancelier de France en est le chef naturel, & lequel (*ut est iuris præfectus*, comme l'appelle Paul Emile, & vn autre, βασιλέων ὀφθαλμός, καὶ ὅρα, l'œil & l'oreille des Roys, & la droicte regle des loix & bonnes mœurs) pour la grande auctorité qui est en luy, y apporte tout ce qui peut estre de souueraineté, de splendeur & de gloire.

De sorte qu'après tant de tiltres d'honneur, reuoker en doute si leurs dignitez sont nobles, ce seroit trop mal recognoistre le merite des choses excellentes; & se rendre en cela grossiers au regard des Romains, qui en l'honneur de la iustice, qu'ils reueroient comme deesse gardienne de leur Empire, annoblissoient ses ministres & magistrats, ce qu'ils appelloient *dare ius imaginum*: bien que les vns n'eussent tant de pouuoir & auctorité en la chose publique, comme a le grand Conseil près de nos Roys.

E

Et si nous leur accordons ceste qualité de noblesse , comme veritablement elle est coëssentielle, ioincte & annexée à leurs dignitez , ainsi que la clarté au soleil , comment la pourroit-on denier à leurs enfans , qui mesmes du viuant de leurs peres , sont censez & reputez par la loy conseigneurs & maistres communs des biens , tiltres , & honneurs de leurs familles , ainsi que dit le Iurisconsulte *in l. in suis*, ff. de lib. & posth. d'ou ce bon Menedemus dans Terence appelloit son fils Clinia *participem suum* , & le Poëte Ausonius print occasion de dire ,

*Iusta quidem series patribus succedere natos,
Esse simul dominos, gratior ordo pijs.*

Et sur ceste raison on a tousiours pratiqué au droit Romain que les priuileges & tiltres d'hôneur, qui se donnent aux Peres , sont entédus aussi par mesme moyen estre concedez à leurs enfans , selon ce commun formulaire, *illi liberisque suis*, ainsi qu'il est resolu *in l. 3. ff. de vetera. in l. nemini. §. filios autem, l. iubemus §. & filios. C. de advocat. diuerso. iudicior.* C'est pourquoy Ascanius disoit à Euryalus dans Virgile :

*Quæ tibi polliceor reduci rebûsque secundis,
Hac eadem generique tuo matrique manebûnt.*

Et Hannibal dans Tite Liue voulant par vne amorce loüable de loyer & recompense exciter ses soldats à bien combattre, promet leur donner *illis liberisque*, plusieurs terres dans Italie, Espagne & Afrique, pour en iouyr avec vne pleine immunité.

Comme à la verité cela semble estre fondé sur le vœu propre de la nature, les Peres estans ordinairement autant ou plus curieux du bien & honneur de leurs enfans, que de leur particulier. C'est pourquoy Vlysse dans Homere, entré qu'il est dans le Palais d'Alcinous, après l'auoir salué & les autres Princes de sa compagnie, le vœu qu'il leur rend, est, que suyuant ce desir qui est nay avec les peres, il plaise aux dieux permettre que leurs enfans puissent leur succeder aux honneurs, dignitez & grandes fortunes qu'ils possèdent, ὅπως δὲ καὶ ἔχουσι Κτήματα ἐν μεγάροισι. Car autrement d'honorer le pere, & puis laisser en obscurité les enfans, certes ce seroit leur rendre la recompense non seulement imparfaicte, mais vile & quasi odieuse : aussi nos textes de droict sont si formels au propos où nous sommes, que l'on ne doit point douter que la noblesse du Senateur ne soit aussi departie à

ses enfans. *l. senatoris filius. l. femina. ff. de senatorib. l. ius senatorum. C. de dignit. lib. 12.*

Et apprenons de l'antiquité, qu'à ceste raison les Senateurs souloient mener avec eux leurs enfans au Senat comme fils eussent eu part à leur dignité, & qu'ores que cela fust intermis du temps de Papyrius, dont l'histoire est recogneuë d'un chacun, & que depuis ils fussent seulement mis en l'ordre des Cheualiers; si est-ce qu'ayants atteint l'aage de vingt cinq ans, ils estoient faits Senateurs, comme le tesmoingne Isidore *lib. 9. disant: quāvis Senatoria quis origine esset, vsq; ad legitimos annos eques Romanus erat: deinde accipiebat honorem Senatoria dignitatis:* Toutefois nous lisons dans Suetone *in Aug.* que cest Empereur recognoissant la Noblesse de ceste dignité, ramena ceste ancienne coustume, & rendit aux enfans des Senateurs l'honneur porté par ces premieres loix, *liberis Senatorum (inquit) quo celerius reip. assuescerent, protinus virilem togam, latum clauum induere, & curia interesse permisit*

Toutesfois il semble que l'usage de ce Royaume n'ait pas esté en cela du tout conforme au droit Romain: Pour ce que par les maximes de tout temps pratiquées en ceste Cour, nous, ne tenons que deux

seuls moyēs pour acquerir la noblesse, l'un par le rescrit du Prince, quand pour recognoistre & signaler la vertu & merites de ceux qui luy ont fait vn seruice notable, par ses lettres patentes, il les honore & leur posterité, du tiltre de noblesse. Cē qui se peut neantmoins aucunement rapporter à ce que les Romains appelloient *natalium restitutionem*, & qui s'obtenoit aussi du Prince comme il est dit en la loy premiere ff. de nat. restitut. Ou bien à ce qu'ils appelloiēt *Quiritibus ascribere*, dont parle Pline le ieune lib. 10. epist. ad Traianum, disant, *Item rogo indulgeas ius Quiritium L. Satrio Abascanto, & D. Cesio Phosphoro, & Panthario Soteridi, &c.* Ce qui valoit pour se tirer de l'ordre plebeien, & se rendre capable des honneurs de la Republique, quelques grands & magnifiques qu'ils fussent.

L'autre moyen d'acquerir la noblesse en France, est par extractiō de race noble, qui se doit prendre de l'ayeul, & du pere, de la mesme sorte, que pour acquerir entre les Romains l'ingenuité, & ce qu'ils appelloiēt *gētilitatē*, il failloit repeter sa race de l'ayeul, cōme Tite Liure le remarque liu. x. disant, *An unquam fando audistis patricos primū esse factos, non de cælo demissos, sed qui patrem ciere*

S E P T I E S M E

auūque possent? hoc est, nihil ultra quā ingenuos.
 Comme aussi ces mots, *gens & genus*, qui signifient en nostre langue race, induisent vne multitude, *quæ plus vno desiderat*. C'est pourquoy Aristote *lib. 3. Politic.* définissant la noblesse, dit, que c'est *ἐν γένει καὶ ἀρετῇ γένεσς*, vne vertu & honneur qui prouient de la race, & ne dit pas du pere seulement, à quoy semble auoir pensé Iuuenal en ce mot de la Saty. 8.

In templis quæ fecit auus

Et Salluste *in Iugurtha*, disāt, *gēs seriẽ maiorũ querit; maiorũque gloria posteris quasi lumen est.*

De sorte que n'y ayant parmy nous que ces deux voyes pour paruenir à la noblesse, il semble que l'on pourroit dire que d'estre Conseiller en vne Cour souueraine, ce n'est pas vn moyen prompt pour aussi tost l'acquérir à sa posterité. Et à la verité bien que ceste dignité soit tres-noble pour le grand merite de sa fonction & honneur de la iustice; *cuius decus ducitur nobilitas*, ce dit Symmache en l'vne de ses Epistres, & qu'elle honore ceux qui en sont reuestus de toutes les marques & prerogatiues de noblesse, si est-ce pourtant que par la rigueur de ceste maxime elle ne la transmet entiere & parfaicte en

leurs enfans & posterité, si ce n'est que l'ayeul & le pere ayent continué leur service en icelle, sans faire aucune acte dérogeant à noblesse; ou bien que particulièrement le Prince leur eust octroyé ces lettres à cest effect; comme mesmes à Rome, bien que le Magistrat Curule eust pour ornement peculier de sa dignité *ius imaginis*: si est-ce que pour l'attribuer à sa famille, il failloit l'obtenir du Senat ou du peuple, ce que Ciceron touche en l'oraison *pro lege Agraria*: disant, *Est hoc in more positum institutoque maiorum, ut magistratus qui beneficio vestro ius imaginum familiae suae consequuti sunt &c.*

Lequel usage nostre, semble auoir esté estably sur deux raisons qui ont de l'apparence, l'une pour ce que la noblesse estant vn loyer de si grand prix, & vn tiltre d'honneur immortel, le public n'a pas trouué bon de la donner à si bon compte, de la trans-ferer du pere à ses enfans, & de là à vne perpetuelle suite de famille; Mais il a desiré ce service continuel de l'ayeul & du pere en telle ou semblables charges; auparavant que leur posterité s'en peust du tout preualloir. Aquoy se peut rapporter ce que respondit vn iour Antigonus au fils d'un signalé Capitaine, qui apres la mort

de son pere luy demandoit estre continué au mesme rang d'honneur & de pension. Je donne (dit-il) à mes gens pensions d'andragathie, c'est à dire de prouësse, comme ie faisois à ton pere qui ainsi l'auoit merité, & tu demandes pension de Patragathie, c'est à dire d'estre preux de par ton pere, & non de ton fait, qui sont choses de diuers merite: mais en te faisant vaillant comme ton pere, & me seruant fidellement comme luy, tu en dois autant attendre de moy. Bref ce droit, dōt nous vsons, semble auoir esté emprunté des constitutions des derniers Empereurs de Rome, & dont nous auons tesmoignage en la loy *1. C. de dignit. lib. 11.* où il est dit, *si ut proponis & auum consulem, & patrem pratorium virum habuistis, claritatem generis retinetis:* & a fait que le mesme s'obserue auuiourd'huy en Italie comme le dit Bartol. *de capua. sing. 72.* & en Espagne aussi, comme il se lit *in l. 7. & 8. tit. 11. lib. 2. re. compil.*

L'autre raison est pour ce que de tout tēps la noblesse naisâte, n'a pas esté en grāde recommandation. De fait à Rome ceux qui les premiers de leur famille estoient honorez d'un Magistrat Curule, estoient appelez *homines noui*. Tite Liue le remar-

quant lib. 23. en ces mots, *finem ante belli habituros quàm consulem verè plebeium, id est novum hominem fecissent* : & ailleurs, liu. 1. disant, *Ancus Martius nobilis vna Numæ imagine* : & estimoient que la vraye noblesse dependoit *ex multitudine imaginum*, qui estoient les marques du service que leurs ancestres avoient fait à la republique és plus grandes & signalées charges. C'est pourquoy Pline le ieune lib. 9. *epistolarum ad Profocerum*, luy voulant designer l'illustre noblesse qu'il se promettoit en ses enfans, disoit, *neque ardentius tu pronepotes quam ego liberos cupio, quibus videor à meo tuoque latere pronum ad honorem iter, & audita latius nomina & non subitas imagines relicturus*.

Et comme nous voyons que la nature ne donne pas à ses œuvres vne entiere perfection, qu'après plusieurs degrez, ainsi que les Philosophes tiennent que l'or le plus noble des metaux change trois fois de substance & qualité avant qu'estre rendu tel: d'où vient mesmes que Pythagore, qui approprioit la vertu de ses nombres aux actions de la nature, faisoit peu d'estat de l'vnité, & n'estimoit gueres plus le binaire; mais il attribuoit au ternaire l'entiere perfection: ainsi pourroit-on dire que la vraye

noblesse ne peut estre réduite en si peu d'heure, & qu'il luy faut plusieurs degrez d'honneur, transféré de l'ayeul au pere, & du pere au fils, auparavant que devenir parfaite. C'est pourquoy saint Hierosme escriuant *ad Helbidiam*, disoit, *nobilitas mundi quid aliud est quàm antiqua gloria?* & de là aussi estoit qu'entre les anciens on faisoit si peu de compte de ceux qui estoient faits riches de nouveau, que les Grecs appelloient *νεοπλῆγτες*.

Ces raisons certes sont belles & specieuses; mais nous eussions désiré qu'elles neussent eu tant de force que de donner auctorité à cet usage au preiudice des enfans des peres qui ont esté esleués en dignitez si notables; veu que l'honneur même nous oblige à en auoir cure & soing; entât que la memoire de leurs peres decedez en seruât le public, nous doit estre sacrée & recommandable. Seneque disant excellemment à ce propos, *non sine ratione sacra est magnarū virtutū memoria, & etiam plures bonos inuat, si gratia bonorū non cum ipsis cadit. Ciceronē enim filiū quæ res consulē fecit nisi pater, &c.* Et tout ainsi que les ruines & restes d'un temple poiuent estre tousiours saintes & honorables, pour la reuerēce de la diuinité, qui y a

esté seruié: de mesmes les enfans des grands & signalez personages, doiuent estre cheris & honorez, pour le respect de la vertu & dignité de leurs peres, iusques là que Demosthene *orat. de corona*, disoit, βέλπιον ὅτι τὸς ἀξίους πρῶτον καὶ τὸς ἀναξίους, ἢ τὸς ἀξίους σποτερῆν τὴ προσκεύσῃς ἀλλὰ τὸς ἀναξίους, que l'honneur & la memoire des hommes dignes nous deuoit estre si chere & precieuse, que de peur d'y manquer, nous deuions mesmes en leur consideration honorer les indignes.

Mais les appellans pour se garantir de la dureté de ceste maxime, ont allegué en plaidant vn moyen qu'ils n'auoient point ouuert par deuant les premiers Iuges, sçauoir est que leur ayeul estoit decedé Secretaire du Roy, si qu'ayans eu pour pere vn Conseiller du grand Conseil, & pour ayeul vn Secretaire du Roy, on ne pouuoit reuoquer en doute leur noblesse, ny les taxer & comprendre aux tailles & autres charges plebeiennes.

Si cela estoit ainsi qu'ils disent, certes leur cause n'eust eu aucun doute. Car combien que la dignité de Secretaire du Roy, ne soit si noble & splendide que l'autre, si est-ce neantmoins qu'elle peut donner fonde-

ment, principe & origine à ceste noblesse de race dont nous parlons : d'autant que comme les Secretaires sont *ἡ ἀπορρήτων γραμματεὺς*, dit Procope aussi ils ont cest hōneur que d'estre officiers de la maison & Courōne de France, tenus au rang des domestiques des Roys, & iouyssans des mesmes droicts, exēptions, immunitēz & priuileges que ceux qui y tiennent les premieres dignitez : iusques là mesmes qu'ils disent que le Roy se tient le premier Secrétaire de la Couronne, & qu'à cause de ce, on luy doit la premiere bourse des profits & emolumens attribuez à leur ordre. De maniere que nous ne deuons douter que cest office soit Noble & assez digne pour commencer à acquerir à la posterité de celuy qui en est pourueu vn auantdegré de vraye & entiere Noblesse : comme aussi ceux que Iustinian appelle *Primicerios* & *Secundicerios*, & Cassiodore *Proceres chartarum*, & Suetone *in Nerone, Amanuenses*, de pareille charge & fonction que sont les Secretaires en France, estoient honorez en l'Empire Romain de tout priuilege d'immunitē, qui est vne demie noblesse. Nous ne dirōs pas le mesme des Secretaires d'Estat, semblables à ceux que *Vopiscus in Au-*

reliano appelle *Notarios secretorū*, & qui soufcriuoient aux Loix, Edicts & Ordonnances, comme estoient en Grece ceux qu'ils appelloient *Regum ὑπογραφεας*, & qui tenoient les premiers rangs en leurs conseils, ainsi qu'on l'a escript d'Eumenes Cardianus, Secrétaire de Philippe, puis d'Alexandre Roy de Macedone : ensemble de ce Lartis Secrétaire de Porsenna, qui fut prins par Scæuola pour son maistre : car comme nous voyons que le Soleil aussi tost qu'il est nay fait paroistre sa force & sa lumiere, ainsi ceste dignité grande & excellente, si tost que quelqu'un en est pourueu, elle le rend Noble, & sa posterité à iamais d'une Noblesse tres-signalée & tres-remarquable. Comme le semblable se doit dire de toutes les dignitez du Conseil Priué des Rois, ensemble des premieres charges des compagnies souueraines qui sont honorez du tiltre de Cheualerie, & qui representent la grandeur & auctorité des Roys, en l'administration de la Iustice, *quique Senatus Principes sunt & dicuntur.*

Mais les inthimez en ceste cause repliquent, que les appellans n'ont rien en main pour iustifier ceste qualité de Secrétaire en leur ayeul. disent plus, qu'ayans esté cō-

prins au rolle de la taille & autres charges, l'espace de trois ans, ils ont payé volontairement : que partant ayant renoncé d'eux-mesmes au priuilege d'immunité, quand bien ils en auroient, qu'ils n'ont occasion de se pleindre des iuges qui ont ordonné qu'ils demeureroient comprins en iceux. A quoy toutesfois les appellans semblent auoir satisfait, ayans iustificié que ce payement qu'on leur obiecte auoit esté fait par leur tuteur pendant leur minorité, & que ayant esté faict depositaire & gardien des biens, tiltres & honneurs de leur famille, pour les conseruer & maintenir, il n'auoit rien peu faire au preiudice de leur priuilege: Et pouuoient aussi adiouster, qu'en matiere de priuileges d'immunité, les payemens particuliers, bien que volontaires, ne preiudicient point, sinon pour ce qui a esté payé, ne se pouuant plus repeter, comme il est traicté *in l. 2. ff. de priuileg. veterano. l. 2. & 3. C. de his qui spont. mun. sub. lib. x. l. voluntaria, C. de excusat. Tutor.* Pource que tous priuileges qui consistent en actiōs reiterables, comme est l'immunité qui se repete plus que tous les ans, ne se prescriuent que par trête ans, dit le *C. de accedentibus.* Et le *C. fide terra. de priuileg.* comme au contraire le pri-

uilege qui ne consiste qu'en vn seul acte, & non reiterable, se prescrit & esteint par vn seul acte contraire, *ut dicitur in C. cum accessissent, de const. & in l. 2. C. de iure dom. impetr.*

Mais pource que le iugement de ceste cause depend de la iustification de ceste qualité de Secretaire de l'ayeul des appellans, dont ils disent n'auoir peu rapporter la prouision pour estre en lieu de difficile accès à cause de l'iniure du temps, aussi qu'il est necessaire qu'ils nous iustifient leur extraction: Nous requerons qu'il plaise à la Cour ordonner, qu'auant que proceder au iugement de la cause d'appel, les appellans articuleront leur genealogie, & feront preuue d'icelle. Ce que la Cour ordonna, & depuis ayans verifié que leur ayeul estoit Secretaire du Roy, & leur Pere Conseiller au grand Conseil, ils furent declarez comme Nobles, exempts de toutes tailles, par arrest du mois d'Auril, 1593.

H V I C T I E S M E P L A I D O Y E ' .

*Sur l'Edict de reſtabliſſement de la Cour,
en ceſte ville de Paris, apres la
reduction d'icelle.*

L'ESTAT heureux où ſe voit maintenant reſtablie ceſte ville de Paris, cy-deuant comme deſormais l'ornement de la terre habitable, nous oblige avec vne tres-juſte occaſion rēdre à iamais celebre le iour auquel Dieu tres-grand & fauorable proteſteur de ce grand Royaume , non ſeulement par ſa ſaincte grace l'a ſecouruē en ſon extremité: mais pour luy reparer ſon heur, ſon honneur & ſa gloire, y a diuinement ramenē & remis les deux puiffances gardiennes d'icelle, le Roy, & ſa Juſtice.

Car comme ceux qui déplorans nagueres ſes calamitez & infortunes, dont la ſouuenance nous fait encores fremir & tranſir, en referoient avec verité la ſource & origine à l'abſence forcée de ces deux, diſans avec le Poëte,

Exceſ-

Excessere omnes adytis arisque relictis

Dij, quibus imperium hoc steterat.

Ainsi nous qui celebrons en ce lieu l'heur-
& le repos où elle se voit reduite apres tāt
de tourmentes, ne pouuons en attribuer
apres Dieu la cause, qu'à la presence du
plus accomply & mieux fortuné Roy qui
soit au monde; & au retour en icelle de la
plus graue, sincere & parfaicte iustice qui
soit entre les hommes.

Si que tout ainsi que les plus celebres
villes des siecles anciens auoient certains
Genies ou deitez locales protectrices de
leur bonne fortune, comme celle de Rome
au rapport de Varron estoit *Ops conciuia*, ou
selon les autres, la Deesse Vesta avec ce feu
perpetuel, que le Poëte appelle *aterni pig-
nus imperij*, & celle de Troye estoit ce si-
gnalé *Palladium*, que les Grecs enleuerent
par ruse, iugeants qu'autrement leurs la-
beurs & efforts au siege d'icelle leur feroiēt
inutiles. Ainsi pouuons nous dire que les
vrayes deitez assistantes, tutelaires & gar-
diennes de la grandeur & gloire de Paris,
sont le nom auguste de nos Roys, & l'au-
torité tres-illustre & venerable des Cours
souueraines de sa iustice.

Et de fait n'y a personne parmi nous qui

F

ne tesmoigne que tant que ces deux astres de tres-heureuse influence y ont reluy en leur plenitude, ç'a esté lors que Paris s'est accruë en telle felicité & splendeur, que les estrangers mesmes, bien qu'ordinairement ialoux & enuieux de la gloire des autres, admirans toutesfois ce qui estoit de surexcellent en elle entre toutes les villes, estoient quasi contrains de la reuerer cōme vn miracle du monde : mesmes de luy donner par leurs escrits tous les plus signalez titres & eloges d'hōneur dont on pourroit decorer la plus parfaicte chose, les vns l'appellās le domicile naturel de toutes les vertus, les autres le Theatre de l'vniuers, le magasin de tout le monde, la Ville des villes, & *veluti mulieris monile, vel in aurem in cætero mundo* : les autres la mere de toutes dignitez, le puiot de toutes les Gaules, & la vraye patrie de la liberté.

Comme c'est aussi le propre des bons Roys tels que Dieu de tout temps beneuole au bien de ceste nation nous a quasi tousiours dōnez, d'apporter avec eux aux lieux où ils sont honorez & chers, le bō heur & felicité, l'vtilité & profit, ensemble vne vie de paix, de douceur & de tranquillité, qui est ce que dit Platon en ce beau mot de sa

Repub. *εὐδαιμονίας ποιῶσι τὰς ἀρχαίους.* Car vn bõ Roy est à l'endroit de son Royaume, ce que Dieu Roy des Roys est à l'endroit du monde, sçauoir est, Pere tres-debonnaire, Prouide & sage modérateur, Gouverneur vigilant, bening & gracieux aux bons, austere & terrible aux meschans, & n'ayant autre but, soing & sollicitude, que de rendre la vie de son peuple bien heureuse, *opi-bus firmam, copius locupletem, gloria amplam, virtute honestam.* A ceste raison Democrite disoit veritablement que de toutes choses bonnes, la meilleure, la plus parfaite, & la plus desirable estoit vn bon Roy, comme chef d'œuvre du Dieu viuant tiré sur le patron & modelle de sa propre diuinité.

Mais de toutes les proprietéz & vertus qui donnent cest heur aux Roys de rendre leurs peuples cõtens & en leur aise, la principale & plus necessaire est la Iustice, qui à ceste occasion estoit reuerée par les anciẽs sous le nom de la Deesse Themis, que Pindare appelle dorée, *Χρυσταί παιδὶς εὐβέλαι Θίμιος.* Et qu'il dit estre sœur *Eunomia*, de l'ordre de la paix, vnion & concorde, qui sont tous les plus souuerains biens des hõmes: & qui est appellée aussi par les Philosophes Royale, nõ seulemēt pour ce qu'elle

est vraiment la Royne & Dame de toutes les autres, le Poëte Theognis, disant,

Εἷ δὲ διχαιοσύνη σὺ ληβδύω πᾶσ' ἀρετὴ' εἶ.
Mais aussi pource que c'est le plus propre, & le plus vtile instrumēt qu'ayent les Roys pour bien & heureusement regner.

A ceste raison mesme Homere le plus sage des Grecs, feint que Iupiter n'attribuë point aux Roys pour regner, des foudres, des machines de guerre, ou galaires, mais biē vne cognoissance des choses iustes, par le moyen de laquelle ils puissent se maintenir, & conseruer heureusement les autres: Et à semblable intention Hesiode *in Theogonia*, feignoit ceste mesme Deesse Themis avec Dicé, estre les assistantes ordinaires de ce Dieu, disant:

Ζεὺς δὲ θεῶν βασιλεὺς πρῶτῳ ἄλορον γέτο μῆτιν
Et en vn autre endroict,

Δεύτερον ἡγάγετο λιπαρὴν Θέμιν, ἣ τέκεν Ωρεας
Εὐνομίην τε, Δίκην τε, καὶ εἰρήνην τε θαλάσῃ.

Voulant ce grād Poëte faire entēdre que non seulement les hommes ne pouuoient estre Roys sans la iustice, mais que ce Dieu mesmes ne pouuoit pas estre tel sans l'ayde d'icelle: ce qui n'est pas fort esloigné de ce que nous voyons qu'en l'Ecriture saincte Dieu ce vray & eternal Archetype des

Roy se plaist d'estre appellé *iustitia*, *lex* & *ratio*, comme du plus noble & plus nécessaire organe dont il se sert en l'administration & regime de ce grand vniuers.

Aussi apprenons-nous qu'apres qu'il eut puni l'impieté des hommes, & effacé toute la terre par ce deluge effroyable, desirant la reparer & remettre en son premier estat, il ne fit point chois du plus vaillant de tous les hommes pour le reseruer, & s'en seruir à cest effect, mais de Noé le plus zelé à la iustice qui fut au monde, comme de la plus propre & nécessaire vertu pour donner pied & fondement à de nouuelles societez, Estats, & Republiques.

Et est fort remarquable entre nous, que de ce que de tous les enfans de ce iuste personnage, Iaphet se rendit plus curieux observateur de la iustice de son pere, il merita de luy ce vœu excellent & priere enuers Dieu, dont est faict mention au Genese en ces mots, *Dilatet Deus Iaphet*, &c. de sorte que Dieu acquiesçant à ce desir paternel, il esleua & dilata son Empire iusques à nos Gaules, où il peupla le premier & donna origine à la plus heroïque, plus iuste & accomplie nation du monde, ce qui est tesmoigné par l'ancien Berosé, & Metasthe-

nes, & apres eux par Iosephe *lib. I. Antiq&.*
par Zonare mesme *to. I. Annal.*

En quoy nous deuons non seulement recognoistre l'efficace de ceste grande vertu; mais sōmes encores obligez de la reuerer, puisq̃ue sous les diuins & bien heureux auspices d'icelle, nos premiers peres se sont dilatez & accreux en gloire & reputation par dessus tous les peuples de la terre: & d'autant qu'à leur exemple & imitation, leur posterité iusques à no^r a eu ceste vertu en tres-singuliere recommandation, faisant tousiours estat d'elle, comme du plus assieuré appuy de leur felicité, notamment en ceste ville de Paris, où elle a tousiours esté exercée avec vne integrité parfaite: à ceste raison nous luy auons à bon droit attribué le titre de protectrice & gardienne d'icelle; comme à la verité c'est elle, avec la faueur des Rois, meritée & acquise par vne deuë obeissance enuers leurs maiestez, qui l'ont agrandie, conseruee & maintenüe en telle gloire & celebrité, où elle s'est veüe par vne si longue suite de siecles.

Si que ne plus ne moins que comme vn iour Cambyse alloit courant & gastant tout le pays d'Egypte, en intention de le ruiner & perdre, il y eut vn citoyē de The-

bes qui mōté au haut de la muraille de ceste ville la luy mōstra d'une main vne motte de terre, & de l'autre vn vase plein d'eau du Nil, voulāt luy designer, que tant qu'il ne pourroit enleuer la graisse de leur terroir, ny diuertir ailleurs le cours de ce fleuve tres-riche, il ne seroit en sa puissance de ruiner son pays : Ainsi pouuōs dire que tāt que Paris a peu meriter & retenir cēt heur que d'auoir la faueur des Rois, & l'assistance des Cours venerables de sa iustice, il n'y a eu force ou puissance ennemie, ny aucun autre accident qui luy ait peu porter le moindre dommage & preiudice.

Aussi toutes les fois que la mauuaise fortune, qui tient sous sa dition aussi bien les grands Empires & citez, comme les plus petites choses, à voulu alterer l'heur & la grādeur de Paris, son approche & premier effort a tousiours esté, de la distraire & priuer de ces deux, comme de sa plus forte & seure garde & defense, imitāt ceste Proserpine de Sophocle, laquelle voulant faire mourir Elyse, & ne le pouuant toutesfois pour le craind'or fatal qu'elle portoit, trouua moyē de le luy arracher, & puis apres la priuer de la vie. Ou bien faisant cōme ces anciens, qui taschoient de desrober & sou-

strere ces Dieux protecteurs des villes dõt nous parlions cy deuant, auparauant que de les assaillir, se persuadans qu'autrement ils n'en pourroient venir à bout.

Paris en auoit certes vne trop notable & chere experiëce, dès le temps que les Anglois lors ennemis coniurez de la France s'en firent maistres, apres en auoir arraché le nom sacré de nos Rois, banny & exilé la iustice des Cours souueraines iusques à l'extremité du Royaume: l'estat miserable où elle se veit lors reduite deuoit seruir à iamais à la posterité d'vne terreur & crainte, de plus retomber en telles fautes: Car si tost que ce Soleil y eclipsa, les tenebres y furēt redoublées, Paris deuint vn desert solitaire, vn tōbeau de ruynes, vne ombre de ville, vuide & vague, pour la fuite & la mort de la pluspart: pource que c'est vne de ses proprietiez, *nō alienigenis sed patriis regi auspiciis*, ainsi que Valere le disoit de Rome.

Mais cōme l'Aigle, au rapport des Philosophes, se sentāt chargé d'infirmité & maladie, se guinde & esleue au plus pres qu'il peut du Soleil, afin que de l'impression viuue des rayons de ce grand astre, il puisse recouurer sa guerison & sa force: Ainsi Paris qui est entre les villes, ce que l'Aigle

est entre les oiseaux, fut comme forcée par l'extremité de ces angoisses, de hasarder si peu de force & de fortune qui luy restoit, pour s'affranchir de ioug étranger, & se redonner à son Roy, comme seul capable de luy rapporter son heur & sa felicité. Et à la verité tout ainsi que Dieu est le seul protecteur des Roys, & sans lequel toute leur puissance est fresse & vaine; aussi les Roys sont les vrayx gardiens & saluateurs des villes, & sans lesquels il leur est impossible de se maintenir & conseruer.

Et ne plus ne moins que ceux qui deuenoient malades dans les deserts, receuoient guarison à la seule veüe du Serpēt eleué, dit l'Escripture sainte: Ainsi est-il des villes qui se sentent attaintes de maladies ciuiles; car elles peuuent aisément estre guaries à la seule veüe de la Majesté Royale, pourueu qu'elles la reuerent, & la tiennent hautement esleuée au tēple de leur obeïssance.

Que si nous osions rafreschir la memoire des calamitez & miseres n'aguieres souffertes & endurées pour auoir manqué en ce deuoir, cōbien ie vous prie se trouueroiēt-elles plus grandes & déplorables que celles du temps des Anglois? Mais comme l'on a escrit, que lors qu'Alexandre entra dans

l'Asie avec son exercite pour debeller les Perses, la statue ou simmulacre d'Orphée qui estoit *in Libetris*, fut veüe plorer & espandre des larmes, voulāt, signifier que les Muses, qui auroient à descrire les diuerſes accidens de ceste grande guerre, seroient souvent excitées aux larmes par le ressouuenir funeste de tant de ruines qui en deuoient prouenir : Ainsi certes nous ne pourrions entrer en ce discours lugubre de noz afflictions, sans passion semblable, tant est sensible & cuisante la memoire des choses si dures & lamentables; aussi que peut-estre toutes noz larmes ne seroient suffisantes pour en deplorer la moindre partie : *maiora enim quæque sunt quàm ut possim deſlere sermo rei magnitudine superatur.* Nous le laisserons seulement aux pensées de nous tous, à fin que l'amertume de la souuenâce d'icelles; nous aigrisse le courage pour refuir & abhorrer à iamais les vices qui en ont esté cause; c'est à dire, la des-obeïſſance enuers le Roy, le mespris enuers la iustice.

Auiourd'huy donc que Paris reuoid en elle son Roy & saluateur apres Dieu, & que nous oyons en ce lieu auguste la lecture de ses lettres tant desirées par lesquelles il y rappelle & reſtablit sa iustice, que la

violence & malice du temps en auoit for-
banie, auons-nous pas tres-iuste occasion
de hien-heurer ce iour à iamais, *clade illa tam
citò in fecilitatem mutata*, la paix y estant par
ce moyen renduë au lieu de la guerre, la lu-
miere au lieu des tenebres, l'ordre au lieu
de la confusion, la iustice au lieu de l'iniu-
re, l'assurance au lieu de la crainte, les na-
turels citoyens au lieu d'estrangers enne-
mis, le plaisir & le contentement au lieu de
la tristesse & mes-aise, l'abondance au lieu
de la sterilité de toutes choses, bref la vie au
lieu de la mort?

Et en recognoissance de ceste faueur di-
uine, auons-nous pas occasion d'imiter ce-
ste loüable coustume des Anciens Grecs,
qui toutes les fois qu'ils se voyoient garan-
tis & deliurez de quelque mes-aduenture
ou infortune publique, faisoient plusieurs
vœuz solennels, & repetoient leurs sacrifi-
ces introduits *pro salute & incolumitate vr-
bis*, comme nous en voyons les marques
dãs Aristide, *in palinodia in Smyrnam, in orat.
in Romam*, & en plusieurs autres liures, qui
estoient ceremonies fort approchantes
de celles que pratiquoient les anciens He-
breux appellées *Encaïniane*, & qu'ils cele-
broient le iour que leur sainte ville fut

bastie, le iour qu'elle fut deliurée de la fureur d'Holoferne, & le iour qu'ils furent rappelez de ce long & ennuyeux exil mentionné aux saintes lettres.

Mais le plus agreable sacrifice que nous pourrions faire, & le plus saint vœu qu'on pourroit desirer de nous en ceste occasion, est de nous fermer à ceste resolution, de ne plus donner pied sur nous à ce monstreux vice de désobeïssance, & despect enuers noz Roys & la Iustice, puisque noz plus grâdes miseres & infortunes tirēt de là leur source & origine; & nous souuenir à tousiours, que comme c'est le deuoir des Roys de se conformer au conseil de Dieu: que c'est aussi le deuoir des subiects de se ranger à la volonté des Roys, & rechercher de là seulement toute leur gloire & felicité.

Ce vœu saintement iuré & resolu, vaudra aussi pour consacrer de nouveau ce lieu saint & auguste, & aura mesme effect qu'eut ce diuin parfum que l'Angé enseigna à Thobie, à la senteur duquel l'esprit immunde qui auoit fait tant de maux fut relegué iusques au desert du haut Ægypte; car ceste obeyssance que nous voüons au Roy & à la iustice, chassera loing de nous l'esprit de diuision, qui nous va rui-

nant depuis vn si long-temps.

Paris, comme toute la France, se peut aujourd'huy vanter de n'auoir iamais eu Prince plus capable de satisfaire aux desirs d'icelle, que nostre Roy, à la clemence duquel elle est dés-ja redeuable de son salut & conseruation. acquerons-luy encores ce tiltre d'honneur & de gloire, d'estre desormais reputée la plus obeyssante ville du monde, à fin que le Roy heureusement commandant de sa part, & nous bien obeïssans de la nostre, nous puissions faire renaitre parmy nous vne entiere felicité. Et en vn mot nous dirons à tous comme le sommaire de ce propos *discite iustitiam moniti, & non temnere reges*. Aprenons desormais comme instruits par noz propres miseres, à reuerer leur voyx & craindre leur iustice, car en ce seul point consiste le salut de nous tous.

Au demeurant le tesmoignage honorable, que le Roy mesmes a rendu par les lettres dont lecture vient d'estre faicte, de la fidelité de ceste Cour au bien de son seruice, l'obligera d'y perseuerer, & donner de foy comme elle a fait tousiours vn tres-digne exemple d'integrité parfaite, de synccre iustice, & genereuse constance & ferme-

NEVFIESME PLAID.

té, au seruice de sa Majesté & soulagement de son peuple. A ceste assurance nous requerrons qu'il luy plaise ordonner que sur le reply de ses lettres sera mis, qu'elles ont esté leuës, publiées & registrées. Ce que la Cour ordonna par son Arrest du mois de Nouembre, mil cinq cens nonante quatre.

NEVFIESME PLAIDOYE.

Que les heritiers des comptables, ne se peuvent ayder de lettres de benefice d'inuentaire, contre le Roy.

EN TRE les remedes qui ont esté quelquesfois excogitez pour obuier aux fraudes & abus qui se font és finances publiques, l'un des meilleurs, selon nostre iugement, est celui de l'ordonnance du Roy Charles neufiesme, par laquelle il defend qu'aucuns se puissent porter heritiers par benefice d'inueniaire des Officiers comptables pour les deniers deuz au Roy, d'autant que souuent on a veu qu'un Tresorier ou Receueur mourât ne laissoit quasi point d'he-

ritiers qu'à ceste condition, ou pour ce que de leur vivant ils auoient mal mefnagé les finances du Roy, ou pour ce que leurs heritiers apres leur mort ayans secrettement enleué les deniers, & laissé par ce moyen vne succession chargée de restes, à fin de se garentir de toute recherche, se portoient heritiers par benefice d'inventaire. Pour à quoy obuier fut faicte ceste Ordonnance tres-iuste & raisonnable astraignant l'heritier d'accepter purement & simplement la succession, & payer en ce faisant les deniers deuz au Roy, ou bien y renoncer du tout. qui est certes vne loy trop plus douce que celle qui fut faicte à Rome contre la veufue & les enfans du Primipile Receueur des viures de la gendarmerie, comme il se cognoist *in l. 3. & l. 7. C. de cohort.* Car sil n'y auoit assez en la succession & aux biens de son fideiussieur & caution, pour satisfaire au fisque, la femme estoit priuée de son dot, & les enfans mesmes obligez aux restes de leur pere, bien qu'ils eussent renoncé à la succession, *l. 3. & l. 4. C. de Primipilo. l. satis notum. C. ex quibus caus. pig. vel hypoth. tacit. cont.*

Comme au semblable à Athenes, aussi

toft qu'un comptable estoit mort, *illius hereditas deuoluebatur ad ὑποτάκτας*, qui estoient certains Magistrats deputez pour recouurer les restes deuz à la Republique par les Fermiers & autres Officiers des Finances, comme le remarque l'interprete d'Æschynes *in Ctesiph.* & ne rendoient rien des biens de la succession, que premierement le fisque ne fust payé & satisfaiët du tout ce qui luy estoit deu. Ce qui auoit esté introduit par vn singulier priuilege des Finances publiques.

Mais la loy des douze tables fust bien plus rude & plus vniuerselle : car elle obligeoit les enfans qui se trouuoient en la puissance de leurs peres, lors de leur deceds, d'accepter, soit qu'ils le voulussent ou nō, la succession d'iceux, *unde sui & necessarij dicebatur*, à fin que par ce moyen ils fussent tenus d'acquitter toutes leurs debtes, dont ceste mesme loy feust si soucieuse, que pour ce manque qu'on y faisoit elle abandonnoit aux Creanciers, le corps propre de leurs debiteurs.

Le benefice d'inventaire dont parle nostre Ordonnance, est vne grace du Prince, introduicte du commencement par l'Empercur Gordian en faueur des gens-d'armes,

mes, comme il se voit *in l. 8. C. de test. mil.* & depuis faicte commune par Iustinian, *in l. f. C. de iure de lib.* à la charge d'y observer certaines formes & reigles par luy prescriptes : car autrement par la disposition du droit commun, la succession ne se peut recueillir & accepter que purement & simplement, *cùm aditio hæreditatis actus sic legitimus, qui diem non recipit neque conditionem,* & qu'il est de la nature & substance de ce nom (heritier) *ut necessario in ius omne succedat, & æri alieno defuncti obnoxius sit, ut eadem verè persona cum defuncto & eorundem bonorum idem perpetuò hæres,* comme dit Feste Pompée. De sorte que se pouoir dire heritier avec ceste condition, de n'estre point tenu des debtes, que iusques à la concurrence del'inventaire, c'est vne grace dependante du Prince, qui peut seul, dispenser de la Loy.

Or il ne seroit raisonnable, qu'ores que ce benefice soit desormais tourné quasi en vn droict ordinaire, pour n'estre refusé, & denié à personne, que le Prince fust astrainct, de l'octroyer à son desaduantage, mesmes aux enfans de ceux qui ont mal ménagé les Finances publiques, & contre lesquels y a presumption de les

G

auoir eux mesmes diuertis & esgarez : car si celuy qui en debte priuée seulemēt, *voro to patrimonio creditoribus fidem non præstiterat*, estoit rendu infame & indigne de toute faueur publique, mais encores ses enfans *Etī erant insignes*, notez d'ignominie, entre les hōmes, si par leur faute & mauuais mesnage ils venoit à estre contrainsts *foro cedere*, comme Ciccrō le remarque *in Antoniana*. II. disant, *Tenes-ne memoria prætextatum te decoxisse? Patris (inquires) ista culpa est. Concedo. etenim pietatis est plena defensio. Illud tamē audaciæ tuæ, quod sedisti in xiiij. ordinibus, cū esset lege Roscia decoctoribus certus locus constitutus quāuis fortunæ vitio, non suo, decoxisset*. A plus forte raison certes, ceux la doiuent estre moins fauorables, qui par leur vice presumé, ou celuy de leurs peres, cuidēt frustrer le Roy de ce, dōt ils luy sont redeuables, cōsideré d'ailleurs que la pluspart de ceux qui demeurent en reste, ne sont point exempts du crime de *residuis*, *quod & heredem sequitur, cum in eo quæstio principalis pecuniæ ablata moueatur*, dit la Loy *fin. ff. ad leg. Iul. peculat.*

De maniere que si doreſnauant nous voyons des heritiers d'un comptable estre porteurs de lettres de benefice d'inventaire, nous debuons prendre garde à ne les

receuoir au preiudice du Roy, ne plus ne moins que si sa majesté octroyoit lettres d'estat ou de repit à vn sien debiteur, debiteur aussi d'autres particuliers, on ne presumeroit pas qu'il eust entendu se nuire & preiudicier, *cum in generali locutione non intelligatur persona loquentis*, disent noz docteurs sur la loy, *inquisitio . C. de solut.* si ce n'estoit que par clause particuliere & pour iustes considerations il eust expressement derogé à la disposition de ceste ordonnance.

Bref, ce droict priuant les heritiers des Comptables de ce benefice, vaut du moins pour tenir en bride & deuoir les Officiers, sous la crainte que toutes personnes d'honneur doiuent auoir, que par ce moie leur succession demeure sans heritiers, & que les biens qu'ils ont eu de leurs ayeuls ne s'en aillent en vne main estrangere par vne honteuse distraction & subhastation publique. *ut enim aditione hereditatis fama defuncti conseruatur*, dit Scæuola in l. primo gradu ff. de his quæ in fraud. cred. au contraire aussi *repudiatione hereditatis defunctus afficitur iniuria*, dit Iustiniã, §. i. instit. qui ex quib. caus. afin que de leur viuant ils taschent de donner tel ordre à satisfaire au Roy,

& si bien conseruer ses Finances, que leur memoire apres leur mort soit exempte de ceste ignominie , & que leurs enfans par l'apprehension de leur mauuais mesnage, ne soyent contraincts renoncer à leur succession.

Toutesfois est à remarquer que le Roy, par cest Ordonnance excepte de la iuste rigueur d'icelle les mineurs de vingt cinq ans , en consideration de leur bas aage, moins suspects de fraude & de malice, comme à la verité l'innocence de cest aage infirme & imbecille , a tousiours esté en la sainte garde & protection des loix , à ce qu'ils ne puissent tomber en aucun peril & inconuient. Et est de la bonté & clemence des Princes, de ne vouloir que sous pretexte de priuilege de leurs finances il leur soit fait aucun preiudice & dommage , & que ce benefice d'inventaire; *quod est veluti naufrago leuis tabula*, leur soit denié, afin qu'ils peussent, pour secourir la foiblesse de leur aage, sauuer quelque chose de la substance de leurs peres, au lieu des fraiz que le Roy seroit tenu supporter pour les saisies, établissement de Commissaires, criées & decrets des heritages de la succession qui seroit demeurée

iacente & sans heritier : ce qui se doit entendre , pourueu que contre eux il n'y ayt aucune suspicion de fraude , & d'auoir aydé à distraire ou diuertir les deniers du Roy car en ce cas ils se rendroient indignes de tout secours , & seroient subiects à semblables peines & seueritez que les majeurs , leur malice venant à suppléer au deffaut de leur aage ; ainsi que les Romains pour assubietir le mineur qui auoit forsaict , aux mesmes peines que les autres , le contraignoient de prendre la robe virile , & puis l'abandonnoient à la rigueur de la Loy , comme remarque Dion lib. 47.

Ces choses ainsi premises & entendues , le iugement de la cause qui s'offre , doit estre , sous correction , rendu trais-aisé & facile , les intimez estans demeurez d'accord que feu leur pere , Receueur des Aydes & Tailles à Touars , estoit decedé redeuable enuers le Roy de six mil escuz à cause de sa charge , & que pour s'asseurer contre ceste grande debte , ils auoient obtenu lettres de benefice d'inventaire , qui leur auoient esté enterinées par le Bailly dudit lieu , dont l'appellant caution du defunct , & qui en ceste qualité est poursuuiy de payer ce-

ste somme au Roy, a interiecté l'appel qui est à iuger.

Et lequel se doit resoudre par la seule distinction des personnes, d'autant qu'on nous a fait voir en la communication, que entre les intimez les vns sont mineurs & en bas aage, & les autres maieurs. car pour le regard des mineurs, la question est sans aucune difficulté, attendu que le Roy les a acceprez de l'ordonnance, comme a esté dit cy-dessus, ne voulant que la consideration des finances publiques, rompe en ce cas l'humaine pitié & commiseration qu'on doit auoir de ce bas aage. Et quant aux maieurs, aussi elle doit estre sans doute, veu que là mesme ordonnance les priue de ce benefice d'inventaire, pour ce qui est des debtes du Roy: de sorte que si d'une part le iuge a fait son deuoir, d'auoir enteriné lescdites lettres pour le regard des mineurs, d'ailleurs aussi il s'est mespris d'auoir faict le semblable pour les maieurs, en ce qui estoit des debtes du Roy.

Et quant à l'incident des lettres obtenues en cause d'appel par les intimez tant maieurs que mineurs, pour estre releuez de l'adition qu'ils ont faicte de ladite suc-

cession de leur pere, & estre receuz à y renoncer du tout, il semble qu'il se doit décider par la mesme distinction : car il est certain que les mineurs en ce cas, comme en tous autres où ils peuvent courir fortune, sont tousiours restituables de droit, comme il dit *in l. 1. & ult. C. si minor se ab heredit. abstin.* Et bien qu'ils ne le puissent, quand l'heredité est suffisante pour acquitter les charges, ainsi que l'appellant a soutenu estre ladite succession : si est-ce que où il y a du litige, & des procez quelquefois trop plus ruineux, que n'est aduantageux le bien qui en peut prouenir, le droit les reçoit à ce remede, dit la loy *minoribus 25. ann. ff. de minorib. & Innocent. in c. causam, qui filij sunt legit.* comme au fait qui s'offre, où vous oyez parler d'une successiō broüillée & chargée de grandes debtes, qui ne se peuvent esclarcir qu'avec de tres-grands frais, ny acquitter qu'en vendant le fonds mesme, ce qui seroit trop à charge & incommodité pour les mineurs. Mais quant aux maieurs, nous ne voyons point qu'il y ait aucune apparence en leurs lettres. car dès l'heure qu'ils ont fait acte d'heritier, & accepté ladite succession, ils ne s'en peuvent plus departir, suyuant la reigle.

commune, *semel hæres factus, nullo inde modo potest, iure quidem civili, hæres esse desinere, nec eam quam induit personam defuncti exuere*, qui est fondée sur la loy des douze tables. par laquelle *nemo poterat partim testatus decedere, partim intestatus*, ce qui aduiendroit s'il estoit permis renoncer à vne heredité, apres l'auoir recueillie, & fait acte d'heritier pour quelque temps: *pars enim etiam in tempore dicitur.*

Et ne faiçt rien au contraire, de dire que ceste maxime ne peut auoir force cōtr'eux: d'autant que l'heritier ne peut estre dit tel, sinon *postquam adiit*, & que de leur obiecter vne adition ou acceptation de ladite heredité, il n'y auoit point d'apparence, d'autant que tout ce qu'ils ont faiçt & geré en icelle, n'a esté que sous le benefice d'inventaire, duquel tant s'en faut qu'on puisse induire vne adition, qu'au contraire il produit vn effect tout dissemblable: car se porter heritier par benefice d'inventaire, c'est en effect se porter heritier *sub hac conditione, si hereditas soluendo sit, quæ aditio certè ipso iure nulla est. l. cum qui. §. i. ff. de acquir. heredit.* & que pour preuue tres-claire de ce on voit tous les iours qu'un heritier simple exclud l'heritier par benefice d'inventaire, bien

qu'en ceste qualité il eust fait plusieurs actes en la succession, ce qui ne se pourroit faire, si estre heritier par benefice d'inventaire estoit vne vraye adition & acceptation d'heredité, selon la maxime susdite, *semel adita hæreditas, &c.* Bref que tous les Docteurs parlans de l'heritier par benefice d'inventaire, le comparoient *curatori bonis dato*, estant contraint garder tous les biens aux creanciets avec inventaire & caution, qui sont qualitez bien differentes d'une adition ou acceptation d'heredité, & que partant ceste maxime, *semel hæres*, ne faisoit rien contr'eux, d'autant qu'elle se doit seulement entendre de l'heritier simple.

Mais à cela on peut respondre en vn mot, que toutes ces raisons seroient par adventure considerables en celuy qui auroit esté vraiment heritier par benefice d'inventaire: mais de dire que ceste qualité ait peu reposer es personnes desdits maieurs, ce seroit contrevenir à l'Ordonnance qui les priue de ce benefice, de sorte qu'il est vray de dire, que ce qui a esté par eux fait & geré en ladite succession, sont vrais actes d'heritiers pur & simples. Ioinct que pour le regard des enfans l'adition d'heredité n'est requise, pour les rendre heritiers de leur

pere: car la loy ciuile, mesme la coustume les faist du droit vniuersel d'icelle, voire mesme aucunement du viuât du pere. c'est pourquoy Vlpia *in l. i. §. largius ff. de successorio edict.* dit que *penè ad propria bona veniunt*, & Pline *in Panegy.* dit *ut sua semperque possessa capiunt.* En sorte que l'adition n'est necessaire qu'à l'heritier estranger.

Mais de s'estre par lesdits maieurs immiscé dans les biens de ladite succession, comme d'auoir dressé & présenté aux Thresoriers generaux l'estat de la recepte & despesse de feu leur pere, auoir rendu compte à la Chambre, auoir poursuiuy la descharge des deniers saisis à la requeste du Substitut de Monsieur le Procureur general, en auoir eu main-leuée, en auoir disposé, puis vendu les meubles, certes le moindre de tous ces actes est suffisant pour les obliger à l'heredité de leur pere, & payer les debtes du Roy: car quant aux autres creanciers, on ne peut empescher qu'ils ne se seruent contr'eux de ces moyens ordinaires. Attendu donc l'Ordonnance, ioinct le priuilege des Finances publiques, nous estimons qu'il a esté mal iugé par le Bailly de Thouars, en ce qu'il a entheriné lesdites lettres de benefice d'inuentaire, pour le regard des maieurs pure-

ment & simplement, sans distinguer les debtes du Roy, d'avec celles des autres creanciers, & que le surplus de la sentence, en ce qui concerne les mineurs d'ans, doit sortir son plein & entier effect. Et quant aux lettres obtenues en causes d'appel par tous les intimez, tant maieurs que mineurs, pour estre receuz à renoncer du tout à ladite succession, qu'il y auoit de l'apparence de les enteriner pour le regard des mineurs d'ans, & en debouter les maieurs. Ce que la Cour ordonna par son arrest du mois d'Aoust, 1594.

Est à noter que par autre arrest du mois de Novembre 1602. donné au profit de Maistre Charles le Comte Receueur general de la ville de Paris, il fut iugé que ladite Ordonnance du Roy Charles auoit lieu, tant contre les heritiers des Officiers comptables, que contre les heritiers de leurs commis,

DIXSIESME PLAIDOYE.

*Que la prinse des deniers du Sel affectez au
payement des rentes, n'est entendue re-
mise par les traictez des villes, sil
n'y en a articles exprez.*



OMME de toutes les loix les plus
sainctes & inuiolables sont celles
qui sont faictes pour la garde, tui-
tion & deffence d'icelles, d'où Ci-
ceron *lib. 2. de Legib.* loüant entre les institu-
tions de Solon, celle, par laquelle il ordon-
na l'action qu'il appelle *πατριον*, contre
ceux qui y contreuiendront, dit que les A-
theniens se persuadoient, que de là princi-
palement dependoit tout le salut & repos
de leur ville: Ainsi pouuôs-nous dire qu'en-
tre toutes les loix gardiennes & protectri-
ces des autres, les plus augustes & sacrées
sainctes, sont celles, qui apres vne grande
guerre & diuision nous reparent & asseu-
rent la paix & la concorde publique, qui est
la vraye mere & tutrice de toutes autres
loix, maistresse tres-sage de toutes bonnes
mœurs & disciplines, nourrice tres-vtile &

tres-propre des villes , citez & Republiques, & sans laquelle toutes ces choses sont manques & imbecilles , sans vertu & sans force : car ce sont les belles proprietiez que Pindare luy donne *in Pithys* , disant :

φιλόφρον Ἡσυχία, δίχας

ὦ μεγίστο πολι

θύγατερ, βελῶντι κ' πολέμων

ἐχρίσα κλαΐδας

ὑψοῦ παῖδας. ---

A ceste occasiō nous lisons que les anciēns ne faisoient iamais loix où ils apportassent plus de religion & de ceremonies pour les rendre fermes & durables , qu'en celles de pacification : car outre qu'ils les arrestoient au milieu du sacrifice , & sur le sacré corps de la victime , ils faisoient encores des execrations pleines d'horreur , contre ceux qui y contreuendroient , comme Polybe l'enseigne *lib. 3.* Et puis ils les faisoient graver en tableaux de Bronze ou Airain , dans les temples de leurs principaux Dieux. *atque etiam fastis & annalibus condebantur , tanquam aternitati sacrata monumenta* , comme remarque Tite Liue *liu. 2. Dec. 1.* à fin que celuy qui attenteroit au contraire d'icelles , se peust assurer d'auoir encouru la peine & la seuerité indiète à l'encontre de ceux qui

DIXIESME

se rendent rebelles & à Dieu & aux Loix. Et a cet effect ils souloient deputer certains Commissaires qu'ils appelloient *Assertores pacis*, pour se transporter par les villes & Provinces, à fin de les faire entretenir.

A l'exemple desquels, le Roy par son Edict de Pacification, interuenu sur la reduction en son obeyssance de la ville de Sens, a, selon sa bonté & clemence ordinaire, non seulement en termes generaux commandé vne oubliance des torts & iniures passées, & particulierement prohibé de faire aucune recherche pour raison des deniers prins en ses coffres, ou és maisons des particuliers, pourueu qu'on en eust rendu compte en la Chambre. Mais aussi a defendu tres-estroitement, sur peine de desobeyssance, & d'estre tenu comme perturbateur du repos public, d'en faire à personne le moindre reproche.

Ayant sa Majesté tres-prudemment aduisé qu'il n'y auoit point de remede plus propre pour recōcilier ses subiets avec luy, & pacifier les vns avec les autres, que par la pratique de ce mot solennel *ἀμνηστιας*, qui emporte non seulement vne oubliance, mais vne abolition & remise de tout ce qui s'est passé en la guerre.

Qui fust le mesme remede practiqué par les anciens Grecs & Romains pour recouurer leur Republique quelques fois perduë, par le desordre de leurs guerres ciuilles, d'où Cicerō (que la bōne fortune de l'Empire Romain luy auoit reseruë pour conseruer sa liberté apres la mort de Cesar) print occasion de dire vn iour deuant le peuple, *Ieci fundamenta pacis, Atheniensium que renouauui vetus exemplum, Græcum etiam verbum usurpauit, quod tum in sedandis discordijs usurpauerat ciuitas illa, atque omnem memoriam discordiarum obliuione sempiterna delendam esse censui*: mais pource que ce siecle là corrompu d'ambition, se rendit indigne du bon conseil de ce grand personnage, la Republique changea d'estat, & fut priuée à iamais de son ancienne liberté.

Et en cela consiste le principal moyen des demandeurs, habitans de la ville de Sens, requerans, attendu leur Edict si recommandable, que non seulement deffenses soient faiçtes aux deffendeurs, de se seruir de quelques Arrests qu'ils ont obtenus contr'eux par surprise, ny faire aucune poursuite, pour raison des deniers prouenus de la vente du Sel, & qui par licence de la guerre ont esté prins en leur ville, atten-

du que selon & au desir de l'Edict, ils ont rendu compte en la Chambre; mais encores qu'ils deuoient estre repris, comme infracteurs du repos public, d'auoir osé remuer ceste pierre, contre le texte formel d'un Edict si precis; ainsi que nous voyons dans Isocrates vne oraison entiere contre Callimachus, pour auoir intenté vne semblable poursuite apres les confederations faictes, *post reditum à Pyraeo*.

Les demandeurs adioustent pour vn autre moyen de leur requeste, *aliam hodie urbis esse mentem, aliūque geniū*, que leur ville a changé de face, & qu'elle est toute autre qu'elle n'estoit lors que les deniers dont est question furent prins, d'autant qu'en ce temps-là elle estoit toute remplie de gens de guerre pour la Ligue, qui y auoient vsurpé tout le commandement, *ceteri autē ciues seruiebant*: si qu'ayans esté forcez d'accomplir en cela comme en autres choses, la volonté des plus forts, on ne deuoit rien leur imputer de tout ce qui s'estoit fait en icelle *sub labe tyrānici illius temporis*, à quoy se pouuoit rapporter ce que dit l'Empereur Honorius in l. C. Theodos. de infirmā. his quæ sub Tyrānis aut Barbaris gesta sunt, en ces mots, *habeant omnium criminum impunitatem qui eandem*

dendi forsitan non habuerunt facultatem : non enim crimen ducitur quod adegit impulsus.

Ce qui approche aussi de ce qui fut répondu par les Atheniens à la demande qui leur fut faicte par les de putez de Lacedemone, de leur rendre certaine somme de deniers qu'ils auoiēt emprunté d'eux, pendāt que leur ville estoit occupée par les Tyrans, sçauoir est que leur obligation estoit esteinte, *mutatione ciuitatis*, leur ville estant deuenüe libre de serue & esclauē qu'elle estoit auparavant sous le ioug de la tyrannie.

En dernier lieu les demādeurs disent que les pertes, ruines & rauages que la guere traine avec soy, sont semblables *diluuibus, gradientibus, siderationibus*, & autres cas fortuits, pour lesquels empescher cōme la puissance des hōmes est vaine & inutile, aussi apres qu'ils sont aduenus, seroit vne temerité; voire folie d'en faire plainte ou instance.

Toutes ces raisons ont vrayement de l'apparence, mais cōferées avec celles des defendeurs, nous estimons qu'elles doiuent perdre toute leur force & energie : car de ceste part on soustient que par l'Edict de pacification de la ville de Sens, sa Majesté n'a remis que les actes d'hostilité, & non ceux *quæ natura suaque sponte apud has aut illas*

H

partes turpia sunt, & que la prinse des deniers dont est question, deuoit estre iugée de ceste qualité, attendu que par declaratiōs expressees faictes en l'un & l'autre party dès le cōmencement des troubles, les defendeurs marchands adiudicataires des Greniers de France, & chargez par contract public & solennel de receuoir les deniers des Gabelles, auoient esté mis *in tutela & fide publica*, avec deffenses tres-expresses de part & d'autre, aux Gouverneurs, gens de guerre, & habitans des villes, de toucher en façon quelconque aux deniers du sel : sur les peines seueres qui y sont contenuës.

Ces deffenses fondées tant sur le merite des deffendeurs, qui n'ont rien espargné pour secourir le public de chose si necessaire pour la commodité de la vie commune; qu'aussi pour le priuilege des deniers de ceste qualité affectez au payement des rentes que le public a autrefois vendues aux particuliers, pour estre secouru en sa necessité.

De sorte que d'estēdre l'Edict de Sens sur le faict dōt est question, outre que ce seroit l'interpreter trop au desaduantage du public, seroit encores cōtre toute raison cōprēdre en l'hostilité les vesues & orphelins, & autres personnes impuissantes qui ont leur biē assigné sur ceste nature de deniers.

Et n'est à propos d'esleuer en cest endroit le merite de nos loix de pacification, veu qu'elles ne sont autrement dignes de recommandation, que pour seruir de foy & tesmoignage de la grande bonté & clemence du Prince enuers son peuple, estās d'ailleurs honteuses & pleines de vergongne de nostre part, comme marques eternelles de nostre desobeyssance. *Inhonestā etenim atque illegitima omnis ea pāctio est, quā inter patrē & filium, maritum & uxorem, dominum & seruum, regem & subditum celebratur, cū dicto oporteat audientes eos esse, non pacisci.* Non toutesfois que nous voulussions donner aduis aux Princes de negliger leur foy, biē qu'extorquée d'eux par la reuolte de leurs subiects: au contraire nous leur dirons tousiours avec ce Poëte.

----*neu rumpite fœdera pacis,*

Nec regnis postferte fidem.----

Car comme la foy est la principale vertu tant des dieux que des hommes, le mesme Poëte disant d'elle,

Ante Iouē generata, decus diuūmq; hominūque,

Qua sine non tellus pacem, non aequora norunt:

Iustitiæ consors, tacitūque in pectore numen.

& qu'à ceste occasion les Rotmains la tenoient au mesme rang d'honneur que leur

H ij

grand Dieu du Capitole ; ainsi estimons nous qu'il n'y a rien qui importe plus à l'honneur de Dieu & gloire des Roys, que de garder religieusement leur parole, & la tenir sacrée & inuiolable à l'endroit mesmes des plus indignes de leurs subiects.

Si estimons nous pourtant que les loix ou traictez de Pacification d'entre les Rois & leurs peuples, ne se doiuent iamais interpreter avec faueur, & que l'abolition promise en icelles ne se doit estendre indifferemment sur tous actes faicts & perpetrez durant la guerre : mais au contraire, qu'il la faut restraindre le plus estroitement que faire se peut, *adeò ut ne quid remissum censeatur, nisi quod præcisè remissum sit*, cõme Ciceron nous en donne vn exemple fort approchant de ceste cause, en vn lieu de ses oraisons assez vulgaire, disant que combien que L. Flaccus crée Interrex durant la diuision de Sylla & Marius, les troubles'estans cessez, & pour preuenir à nouvelles rumeurs, eust fait loy ratifiée par le Senat, portant abolition generale de tout ce qui s'estoit passé au fait de ceste guerre: Depuis neant moins M. Cato estant Questeur fit rendre l'argent qui auoit esté prins au thresor public, & cõdamner les coulpa-

bles comme attaints du crime de peculat. *M. Cato* (inquit) cum *Questor* esset, pecuniā istam quā de *erario* accepissent, ad collegas repoposcit, ut & damnati sunt peculatus, & *Gn. Octavius* quæ *Syllani* homines per vim & metum abstulissent, coëgit reddere, d'autant que ces actes là n'estoient point specialement compris en la loy generale de *L. Flaccus*.

Le semblable se peut dire en ceste cause, que le Roy par l'Edict de Sens, n'ayant remis particulierement la prinse de deniers du sel, si priuilegiez pour les raisons cy-dessus deduites, les deffendeurs auoient toute raison d'en faire poursuite pour les recouurer, & conuertir au payement des rentes, & descharger la foy publique enuers les particuliers qui ont depose en icelle le principal de leurs biens & fortunes.

Aussi nous apprenons de noz liures, que bien que la Loy de *Thrasylule* & d'*Amnestie* fust assez ordinaire à Rome apres les guerres ciuiles, si est-ce que les Empereurs iugeans n'estre raisonnable que les foibles & impuissans fussent priez de ce que les plus forts & violents leur auoient rauy durant la guerre, auoient coustume de deleguer certains iuges pour faire rendre ce qui auoit esté prins de ceste sorte,

comme Vlpian le remarque in l. i. §. *Adrianus ff. de iure fisci*, & Suetone in *Vespas.* disant *finito bello civili, recuperatores sorte elegit, per quos bello rapta restituerentur.*

Et bien que nous ne viuions sous les mesmes loix & Empire, si est ce que recognoissans la mesme raison & equité, qui de sa nature est tousiours vne & semblable entre tous peuples, nous la deuons ensuiure en telles occasions, & signamment en ceste cause, qui n'appartient seulement aux deffendeurs, mais à vn infiny nombre de personnes pitoyables qui ont leur vie assignée sur les deniers dont est question, & dont si la pauureté se pouuoit représenter deuant vos faces, nous ne doutons point qu'elle feroit plus de force à voz iugemens, que toutes les raisons qu'on pourroit deduire & ramener.

Toutesfois pour ne laisser rien sans response, nous n'obmettrons à satisfaire à ce que les demandeurs ont dit, pour vn autre moien de leur requeste, que leur ville aiant changé d'estat, & de condition, ils estoient quittes & deschargez du faict d'oïl il s'agit. Comme, si changer d'vn mauuais conseil à vn bon, si de fouruoyez qu'on estoit, on reprend la voye pour se remettre en deuoir

euers le Prince : bref si vn simple changemēt d'vne volonté à autre, estoit vn moien suffisant pour amortir & supprimer en nous l'obligation à laquelle nous nous sommes attachez par noz comportements.

Car bien que certains Philosophes ont soustenu, que l'homme estant composé d'atomes, changeoit à tous momens de matiere, si qu'il n'entroit iamais au bain deux fois vn & semblable à soy mesme, si est-ce que c'eust esté à eux vne plus grande folie, de dire, que ce changemēt alterast en l'homme son estre. C'est pourquoy ce nauire de Thesée qui fut trouué entier au temps de Demetrius Phalereus, fust iugé estre le mesme, bien que toutes les tables d'icelui eussent esté changées de temps en temps, d'autant que sa forme estoit tousiours demeurée vne & semblable; de la mesme sorte que nos Iurifconsultes ont arresté, qu'ores qu'une cité change de citoyens de cēt en cent ans par la mortalité commune & naturelle aux hommes, elle demeure neantmoins tousiours vne par subrogation ou substitution des vns aux autres, si que les obligations & actiues & passives d'icelle se perpetuent & transmettent de siecle en autre sans aucune alteration.

H iij

En toutes ces choses toutesfois, il y a quelque apparence de douter, attendu le changement de matiere & subiect en elles; mais au faict de ceste cause, rien ne se peut remarquer de semblable, veu que ceux qui ont prins l'argent d'ot est question, sont les mesmes qui sont demandeurs en requeste, tous habitans de la mesme ville, & qui ne peuuent pretendre autre mutation en eux que celle que décrit Feste Pompée parlât de *populo sanato*, qui fust dit ainsi, *quia post bella ciuilia sanata mente redierat in gratiam pop. Rom.* de mal conseillez citoyens, estre deuenus tres-bons & tres-fideles seruiteurs du Roy. Mais ce changement là n'efface point noz obligations: au contraire, se reduire en l'obeyssance de son Roy, c'est se submettre à l'auctorité de ses loix, & se ranger à sa iustice pour en attendre les effects selon qu'on l'aura meritée & deseruie.

En somme ceste cause ayant esté iugée par arrest donné entre les mesmes parties, & sur les mesmes merites, durant que ceste ville de Paris & celle de Sens estoient encores occupées par la Ligue, par lequel les demandeurs furent condamnez à rendre les deniers dont est question, vous iugerez sil y a de l'apparence de demander

aujourdhuy que defenses soient faictes de l'executer , veu qu'on ne rapporte rien denouveau qui puisse varier le iugement de la Cour. Attendu donc le priuilege des deniers du sel , & que par l'Edict de Sens la prinse d'iceux n'a point esté nommément remise & abolie, que les Edicts de Pacification ne se doiuent estendre outre leurs termes : Que les deffendeurs par declarations expresses de l'un & l'autre party auoient esté mis en la garde & protection de tous les deux. Que le changement de l'Estat & condition des villes, ne les deliure point des obligations auxquelles ils se sont attachez par leurs deportemens, & que ceste mesme cause a esté iugée par Arrest contradictoirement donné entre les mesmes parties, qu'il ne seroit raisonnable casser sur vne simple requeste mal fondée. Nous estimons que les demandeurs doiuent estre deboutez de leur requeste , & en ce faisant ordonné que l'arrest cy - deuant donné sera executé selon sa forme & teneur : & requerons en outre que deffenses soient faictes de rechef à tous Gouverneurs, Capitaines de places, Villes & Chasteaux, Maires, Escheuins & habitans des villes, de toucher aux deniers du sel, sur

L'ONZIESME

peine de crime de Peculat. Ce que la Cour ordonna par son Arrest du mois de May, mil cinq cens quatre vingts & quinze.

L'ONZIESME PLAIDOYE.

Sur les lettres patentes , par lesquelles le Roy confirme les assignations des rentes deuës sur la ville de Paris , & defend le diuertissement d'icelles.

NOz Roys recognoissans que le plus certain & asseuré controolle de leurs finances, pour en chasser les abus & corrupteles, estoit d'establiſſir vn ordre inuiolable tant en la recepte, qu'employ & despense d'icelles, ont ordonné plusieurs belles & bonnes loix à cest effect: Mais entre toutes est louïable, celle du Roy Henry deuziesme, Prince de tres-heureuse memoire, par laquelle il defend sur les peines seueres qui y sont contenuës, de diuertir les finances, & les appliquer à autre vsage, qu'à celuy auquel elles ont esté par luy affectées, *ut videlicet ratio questuum & necessitatis erogationum inter*

se congruant, à fin que toutes les charges publiques ayans leur subuention arrestée, puissent estre plus dignement accomplies au bien & seruice de leurs Majestez, & aduantage de leur Estat.

Car autrement de pouruoir & subuënir à vne des charges d'iceluy, & negliger les autres autant ou plus necessaires, seroit trop se mesprendre en l'œconomie publique, & se rendre semblables à vn corps desreglé, dont l'vne des parties tirant à soy plus d'aliment qu'il ne luy en appartient, rend les autres fresles & debiles; ou plustost se conformer au peu sage & prouide pere de famille, qui pour appliquer tout son sōing à vne partie de son mesnage, delaisse & abandonne l'autre, tramât par ce moyen sa perte & ruine.

C'est pourquoy les Atheniens (qui en beaucoup de choses seruent d'exemple de tres-bonne police) si tost qu'ils auoient leué les quatre sortes de subsides accoustumez entr'eux, & qu'ils appelloient *τέλη, φόροι, εισφοραί & τιμήματα*, les affectoient chacun à son vsage particulier, & acquit des charges plus necessaires de la republique, sçauoir est au payement des gages des Officiers, aux fraiz de la guerre, & à

L'ONZIESME
peine de crime de Peculat. Ce que la Cour
ordonna par son Arrest du mois de May,
mil cinq cens quatre vingts & quinze.

L'ONZIESME PLAIDOYE.

*Sur les lettres patentes , par lesquelles le
Roy confirme les assignations des rentes
deuës sur la ville de Paris , & defend
le diuertissement d'icelles.*

NOz Roys recognoissans que le
plus certain & assésuré controolle
de leurs finances, pour en chasser
les abus & corrupteles, estoit d'e-
stablir vn ordre inuiolable tant en la rece-
pte, qu'employ & despense d'icelles, ont
ordonné plusieurs belles & bonnes loix à
cest effect : Mais entre toutes est louable,
celle du Roy Henry deuziesme, Prince de
tres-heureuse memoire, par laquelle il def-
fend sur les peines seueres qui y sont con-
tenuës, de diuertir les finances, & les ap-
pliquer à autre vsage, qu'à celuy auquel
elles ont esté par luy affectées, *ut videlicet
ratio questuum & necessitatis erogationum inter*

se congruant, à fin que toutes les charges publiques ayans leur subuention arrestée, puissent estre plus dignement accomplies au bien & seruice de leurs Majestez, & aduantage de leur Estat.

Car autrement de pouruoir & subuenir à vne des charges d'iceluy, & negliger les autres autant ou plus necessaires, seroit trop se mesprendre en l'œconomie publique, & se rendre semblables à vn corps desreglé, dont l'vne des parties tirant à soy plus d'aliment qu'il ne luy en appartient, rend les autres fresles & debiles; ou plustost se conformer au peu sage & prouide pere de famille, qui pour appliquer tout son sōing à vne partie de son mesnage, delaisse & abandonne l'autre, tramāt par ce moyen sa perte & ruine.

C'est pourquoy les Atheniens (qui en beaucoup de choses seruent d'exemple de tres-bonne police) si tost qu'ils auoient leué les quatre sortes de subsides accoustumez entr'eux, & qu'ils appelloient *τέλη, φόροι, εισφοραί & πηρήματα*, les affectoient chacun à son vsage particulier, & acquit des charges plus necessaires de la republique, sçauoir est au payement des gages des Officiers, aux fraiz de la guerre, & à

L' O N Z I E S M E

l'entretènement des sacrifices, jeux & spectacles publics. Et de ceste destination ils les changeoient de nom, les appellans $\tau\acute{\alpha}$ διοικήσεως, τὰ στρατιωτικὰ, τὰ θωρηικὰ, comme nous l'apprenons de Plutarque *in decreto de honorib. Lycurgi*.

Et auoient en outre certains Magistrats pour empescher que les deniers ainsi affectez, ne fussent diuertis ailleurs, sur les peines portées en leurs loix, qui n'estoient pas moindres que de la mort, comme le remarque Vlpian sur l'oraison *in Nearam*, disant qu'Eubulus fust autheur, que le Senat fist loy expresse sur peine capitale, de diuertir à autre vsage les deniers qui par l'estat public estoient destinez aux sacrifices, jeux & spectacles: & Demosthene en ceste mesme oraison, enseigne combien de peine & de fatigue eut Apollodorus, pour faire ordonner que les deniers τῆς διοικήσεως *fissent* στρατιωτικὰ, bié que les necessitez de la guerre fussent lors tres-vrgentes: mesmes nous lisons dans Aristote en ses Politiques, que pour empescher le diuertissement de leurs finances, vn chacun du peuple estoit auctorisé de s'en formaliser, & s'y rendre comme Controolleur legitime, disant, τὸ μὴ εἶναι κλέπτειν τὰ κοινὰ

ἡ παρέδοσις γινέσθω, παρόντων τῶν πάντων τῶν πολιτῶν, καὶ ἀντίγραφῃ φραγείας καὶ φύλλῳ πηρέασαν. Ce qui est conforme à ce que dit Demosthene *contra Androtion*. en ces mots, ἕκαστος ἀντιγραφὺς ἐμελλεν ἔσεσθαι εἰσ-ελεγχότων, tant ils estoient curieux de l'ordre de leurs finances, & que les charges de leur Estat fussent bien & deuëment acquittées.

Les Romains du temps de leur nom plus celebre ne furent en cela moins loüables que les Atheniens : Car comme ils diuiserent les deniers de l'Empire en deux natures, *avarij* & *fisci* : ils les affecterent aussi aux charges d'iceluy, sçauoir est le premier aux charges ordinaires, comme pour l'entretienement des forces, tant par mer que par terre, le deffroy des Magistrats, & autres Officiers establis au gouuernement des Prouinces, & pour administrer la Iustice, reception des Ambassadeurs, celebration des jeux & festes solempnelles, réparation des grand chemins, tuyaux de fontaines, temples & autres edifices publiques.

Et quant au Fisque qui dependoit des parties casuelles, amendes, confiscations, aubeines, loix testamentaires, presens qui

se faisoient aux Princes à leurs adoptions, & assumption à l'Empire, aux iours de leurs natiuitez, aux estrenes, ou quand il leur naissoit vn enfant, ou pour vne victoire & le triomphe qui s'en ensuyuoit, ou en autres dons gratuits, & mesmes en l'or qu'ils appelloient *aurum coronarium & negotiatorium*. toutes lesquelles finances extraordinaires estoient destinées pour l'entretienement de la Cour imperiale, despen-
se de bouche & autres menuz plaisirs, mesmes aux donatifs que faisoient les Princes aux soldats, & aux largesses & distributions enuers le peuple, és bien-faits de leurs domestiques & fauoris, & autres semblables parties plus de plaisir que de nécessité.

Et aduenoit fort rarement que les deniers *erarij* ou du thresor public fussent destournez & diuertis ailleurs qu'à l'acquit des charges publiques & ordinaires : au contraire, quand il venoit à manquer, souuent les bons Princes y employent mesmes leur patrimoine & cheuance particuliere, comme Suetone le rapporte d'Auguste, *c. ult. disant, quamuis xx. proximis annis quater decies millies ex testamentis amicorū percepisset : quod pene omne cum duobus paternis*

patrimonii caterisq; hereditatibus in rempublicam assumpsisset. Et Capitolin dit le semblable, d'Antoninus Pius, *patrimonium privatum in filiam contulit, sed fructus reip. donavit.* Et en vn autre lieu, *cōgiarium militibus ac populo de proprio dedit:* Aussi Pline le ieune voulat en son Panegyrique celebrer les loüanges de Traian, dit entre autres choses, qu'il estoit fort scrupuleux & exact à la cōservation du thresor public, *at fortasse non eadem severitate (inquit) fiscum qua ararium cohibes; imò tanto minore quanto plus licere de tuo quàm de publico credis.* Et de-là aussi le mesme Capitolin attribüë à grande loüange, de ce que l'Emp. Pertinax, *obeundis cunctis imperij muneribus par fecerat ararium*, il auoit eu soing qu'il y eust tousiours vn fond suffisant pour acquitter les charges & necessitez publiques.

Et outre cela, ils auoient encores vne espargne sacrée, qu'ils appelloient *aurum sanctius*, qui estoit reserué aux necessitez extremes, & reputoient à sacrilege d'y toucher en aucune sorte pour le diuertir à autre effect. D'où se peut inferer qu'en tous Estats & Republiques bien regies & policées, ceste maxime a tousiours esté tres-estroittement obseruée, de ne diuer-

tir l'ordre des finances publiques, & de les employer à l'acquit des charges, auxquelles par les loys publiques elles sōt affectées & destinées. Suyuant laquelle nostre Roy, Prince tres-amateur de son peuple, a fait l'Edict dont presentemēt lecture a esté faite, par lequel sa Majesté apres auoir renouvelle & confirmé les assignations de rentes deuës par le public sur la ville de Paris, fait tres-expresses deffenses, sur les peines y contenuës, de diuertir ailleurs les deniers d'icelles, & les appliquer à autre effect qu'à leur acquit & descharge.

Et comme cest Edit est vn acte tres-digne de ceste bonté immense, & grand amour du Roy enuers son peuple, luy donnant par ce moyen vne esperance de respirer apres tant de miseres; aussi vous auez ouy le commandement preciz qu'il fait par iceluy, à tous ses Officiers, de l'entretenir estroittement; comme d'ailleurs ils y sont inuitez par plusieurs considerations tres-vtiles à l'Estat: l'vne generale, & pour euitier aux grands abuz qui peuvent naistre de l'infraction de l'ordre des Finances: l'autre, afin que conseruants le credit de l'Estat, nous obligions aussi vn chacun à le secourir en son extremité, car
c'est

c'est de là principalement que despend le plus assure fond des richesses des grands Empires & Royaumes : Ce qui est designé par Xenophon *libro. 7.* en la personne de Cyrus , quand pour luy monstrier le moyen d'auoir de ses subiects tout ce qu'il voudroit, l'admoneste sur toutes choses , de garder & entretenir la foy publique ; disant ce sage precepteur des Roys, que la parole d'un Prince curieux de ceste partie, faict tousiours plus enuers son peuple, que la contrainte, les menaces, ou les punitions des autres ; & gaigne plus par sa simple promesse, que les autres, par dons & liberalitez.

De fait, noz peres nous tesmoignent, quel credit ont eu à ceste occasion par toute l'Europe , les grands Roys François, & Henry II. Et se remarque en noz histoires de quelques autres de noz Roys, comme on l'a aussi escrit de l'Empereur Frideric II. que pour auoir acquis ce credit enuers leur subiets, ils leur firent quelquefois receuoir de la monnoie de cuir au lieu d'or.

Mais il semble que les Romains ayent voulu en cela remporter l'honneur par dessus toutes autres nations, comme Tite

Liue nous le tesmoigne, *lib. 3.* par vn exemple notable, disant, que lors que le Consul Sulpitius Galba s'appareilloit pour l'entreprise de la guerre Macedonique, ses amis l'aduertirent que son office l'obligoit deuant toutes choses, à donner ordre que le peuple fust payé de ce qui luy estoit deu par la Requublicque, de l'argent qu'il luy auoit presté quelque temps deuant, pour subuenir aux fraiz de la guerre Punique. Et combien que ceste affaire se peust remettre à vn autre temps, pour ce que leur estat estoit lors agité de tous endroits, *aliis ex aliis orientibus bellis*, nãntmoins pour ce qu'il y alloit de l'entretienement de la foy publique, & conseruatiõ du credit de l'Estat, *Et ut postea summis tēporibus reipublice subuenirent*, le Consul, toutes autres choses cessantes, fist en sorte qu'vn chacun fust satisfait: & au lieu d'argent qui estoit lors necessaire pour les affaires de la guerre, fust assignée à chacun à proportion de son deub vne part *agri illius publici qui intra quinquagesimum lapidem erat*, & qui depuis fust appellé *trientius*, pour ce qu'il leur fust baillé en payement de la troisieme partie, qui leur restoit à acquitter.

Aussi nous apprenons qu'vn chacun de

ce pleuple prenoit à grand plaisir, voire à honneur, de secourir le public en ses necessitez, iusques là, que les veufues & les pupilles y alloient allegrement portans tout leur argent & substance, *nusquam videlicet ea tutius sanctiusque deponere credentes, qui deferebant, quàm in fide publica*; mesmes qu'il se remarque dans ce mesme auteur, lib. 25. quelors de la seconde guerre Punique: la Republique s'estant trouuée en necessité, chascun y contribua vn tel secours qu'il y auoit. presse à qui bail-
leroit le premier son argent, *tanto certamine iniecto* (inquit) *ut prima inter primos nomina sua vellent in publicis tabulis esse, ut nec Trium-
viri mensarij accipiendo, nec scribæ referendo sufficerent*, assurez qu'ils estoient, ne le pouuoir colloquer en lieu plus seur & plus sacré qu'en ceste foy publique, que Valere lib. 6. appelle à ceste occasion *tutissimum pignus*.

Ceste Republique florissâte iugeoit, que si elle estoit tenuë de la foy, que ses citoiës se donnoient entre eux, pour ce qu'elle leur deuoit la Iustice; iusques là qu'il se lit d'elle en ce mesme Tite Liue, que voyant vn iour le peuple reduit en telle neces-
sité, qu'il ne pouuoit payer ses creanciers,

solutionem æris alieni in publicâ curam vertit, afin qu'une autrefois il ne fust abandonné d'iceux, & *ne adimeretur temporaria inopiæ subsidium*, comme dit Cæcilius dans Aulugelle; A l'exemple peut estre d'Alexandre le Grand, qui au rapport de Iustin & Quinte Curce, fit don & largesse aux siens de vingt trois mille talens à cest effect; Elle iugeoit di-je, que si elle estoit garande de celà, qu'à plus forte raison, elle l'estoit de ceste foy publique, sous le sacré gage de laquelle les debtes publiques d'icelle auoient esté contractées, comme ont esté les rentes dont est parlé ausdites lettres.

Toutefois vne partie de l'honneur de routes ces belles actions, en peut estre referé aux commoditez publiques qu'auoient lors ceux qui les ont executées. Et ne faut point que nous doutions, que si le Roy, nostre bon Prince, les auoit semblables, qu'il ne fist encores enuers son peuple plus que tous ceuz-là ensemble; n'y ayant eu oncques Roy qui ayt resmoigné aux siens plus d'amour, de zele, & d'affection. Mais nous deuons considerer l'estat miserable auquel estoit ce Royaume, lors que Dieu l'y appella. Il n'estoit point seu-

lement denué de tous moyens, mais encores affligé de deux grandes guerres, l'une civile & intestine, & l'autre estrangere, qu'il a soustenuës pour nostre salut, & aux despens de son propre Domaine; Et outre cela chargé de debtes si immenses de ses predecesseurs, que toutes ces choses ensemble luy ont iusques icy du tout osté le moyen de faire ressentir à son peuple, vn tel fruit de sa bien-vueillance qu'il a tousiours désiré; comme aussi elles sont suffisantes pour le descharger enuers nous tous, du manquement qui par le passé a esté en ceste part. Et pout l'aduenir sous l'esperance qu'il a que Dieu luy fera la grace le descharger de la guerre, & de l'extreme despenſe qui y est necessaire, vous voyez l'assurance certaine que sa Majesté debonnaire nous donne par vn Edict si louable, mesme que pour tesmoigner le desir extreme qu'il a qu'il soit estroittement obserué, vous avez ouy en la lecture d'iceluy, vne clause digne de sa bonté ordinaire, par laquelle il defend expressément à ses principaux Officiers, d'auoir aucun esgard à tous mandemens, commissions & autres lettres qui leur pourroient estre adressées de sa part contre la teneur d'iceluy. Car par icelle sa Majesté, bien que

sa puissance soit entierement parfaite & absoluë, toutesfois elle se lie & astraint foy-mesme à l'entretienement de ce sien Edict : si qu'en telle rencontre nous pouuons dire de luy ce que Pline dit vn iour en la louiange de Traian, *Quid ego nunc primum audio, nunc primum disco? non est Princeps supra leges, sed leges supra Principem.*

En somme cest Edit estant si honorable au Roy, si vtile à l'Estat, bref si commode & profitable au peuple, nous requerons qu'il soit dit, que sur le réply des lettres sera mis, qu'elles ont esté leuës, publiées & enregistrées au Greffe de la Cour, & que coppies collationnées seront enuoyées en tous les Buteaux des Thresoriers de France, & aux sieges des Elections & Groniers à Sel de ce ressort, à ce qu'aucun n'en pretende cause d'ignorance. Et soit enioinct aux Officiers desdits sieges & bureaux de tenir la main à ce que la volonté du Roy portée en icelles soit executée. Ce que la Cour ordonna par son Arrest du vingt-deuxiesme Decembre, 1594.

DOVZIESME PLAIDOYE.

*Sur les lettres de declaration du Roy touchant les Priuileges de ceux qui se disent
yffus de feu Eude le Maire, dict
Chalo saint Mas.*

COMME le Soleil se leue & se couche pour tous en cōmun, & qu'vn chacun participe également aux tenebres, aussi bien qu'à la lumiere du monde; Ainsi doit-il estre des loix d'vn estat, & est de raison qu'elles distribuent également leurs charges, aussi bien que leurs graces à ceux qui leur sont subiects; Pour ce que de ceste egalité naist la concorde, de celle-cy la puissance, & de la puissance, l'eternité des Estats & Empires; Comme au contraire, de l'inégalité naist l'enuie, de l'enuie, la sedition, & de celles-cy la guerre, qui est le Demon conjuré à la ruine des Republicues.

A ceste raison nous lisons qu'aux lieux les mieux policez, les priuileges ont tousiours esté fort rares, pour ce que ce sont

I iiij

autant d'efforts, qui se font aux Loix, & qui rompent ceste sacrée regle de l'égalité que nous recommandons. Solon, qui fut vn oracle celebre de tres-bonne police, lez reprouua du tout en son Estat, quand apres auoir distribué tout le peuple en quatre ordres, *in Quinquemodiales, Equites, Zeugitas, & Theticos*, & auoir estimé les biens & facultez d'eux tous, il ordonna qu'vn chacun à proportion d'icelles, porteroit les charges d'iceluy. Et de peur que souz pretexte d'vne moindre fortune, aucun voulsit refuyr à y contribuer, il introduisit ce remede qu'il appelle *ἀντίδοσις*, qui est à dire vn eschange de sa fortune & de sa charge à celle d'vn autre.

Et comme les bonnes loix aussi bien que toutes autres choses sont subiectes à l'instabilité humaine; Ainsi ceste Republique venant depuis à changer ce premier ordre, & à se remplir d'vn effrené nombre de priuilegiez & exempts, ce fut lors qu'elle se vit tant de fois partroublée par les seditions des plus petits, qui portoient toutes les charges.

Qui fut cause que Leptines fit faire loy, que dorefnauant personne ne iouyroit de l'exemption des charges ordinaires, (ce

qu'ils appelloient ἀπίλαι λειτουργῶν) que les dix premiers Magistrats, & la posterité d'Harmodius & d'Aristogiton, en memoire de ce que ces hōmes illustres, les auoient autrefois deliurez du ioug de la tyrannie. Et combien que ceste loy fust accusée, comme trop vniuerselle, si est-ce que celuy qui en fut l'accusateur, fit depuis arrester, que personne ne seroit exempt des trierarchies, & autres necessitez de la guerre, qui estoient les principales charges, non pas mesmes les enfans desdits Harmodius & Aristogiton, comme il est traité és oraisons *in Leptinem, & de Trierarchia.*

A mesme prudence les Romains, reconnoissans, que ceste egalité estoit la base & le fondement de leur concorde publique, lors que sous le Consul Publicola, & apres l'extermination de la tyrannie, ils reformerent leur Estat, entre autres choses ils ordonnerent, qu'à l'aduenir on ne pourroit ostroyer à personne aucun priuilege, qu'en l'assemblée generale du peuple, qu'ils appelloient *centuriata comitia*; ce qui fut depuis redigé dans les douze tables, & obserué fort religieusement, comme Ciceron le tesmoigne *lib. 3. de leg. disant, admirandum, tantum maiores in posterum prouidisse,*

ut in priuatos homines leges ferri noluerint, id est enim priuilegium, quo quid est iniustius? cum legis hæc vis sit, scitum esse & iussum in omnes. Et de faict tous les Historiens qui ont parlé du priuilege qui fut conserué à la famille des Gordiens, ut à tutelis atque legationibus, & à publicis necessitatibus immunes essent, ils l'appellent, rarum priuilegi exemplum.

Ouy, mais (dira quelqu'un) en ostant les priuileges, c'est à dire la recompense que le public donne à la vertu des hommes excellens, seroit-ce pas oster la vertu mesme, qui demeure tousiours fresse & languide, si elle n'est recogneuë? Car qui est celuy, qui se voudroit monstrier passionné, apres vn beau dessein, & vn genereux acte? Qui voudroit courir à tant de sortes de dangers & de labeurs? Qui se voudroit consacrer à l'exécution de tant de difficiles & courageuses entreprises? si son ame ne se promettoit rien de la recognoissance de son siecle, voire de ceux aduenir. Il y a ie ne sçay quelle effigie de la gloire qui reside dans l'esprit des personnes vertueuses, cōme dedans vn temple, & dans vn sanctuaire, qui les admoneste perpetuellement, de mesurer leurs actions au pied seulement de l'honneur & de la recognoissance, la-

quelle si vous ostez, quel besoin auroiër-ils de se consumer par tant de veilles & de trauaux, ny de s'exposer à tous propos, à tant de sortes d'accidens & fortunes?

Certes nostre intention n'est pas de rien persuader contre le prix de l'honneur: au contraire, nous tenons que les deux principales colonnes d'un Estat, sont les recognoissances des merites, & bons deuoirs: Et le chastiment des mauuais & pusillanimes comportements: Et que sans elles il n'est pas possible qu'il puisse aucunement subsister. Mais ce que nous en disons est pour monstrier quelle doit estre ceste recompense de la vertu, pour deuenir plus honorable à ceux qui la meritent, moins prejudiciable au public, qui la confere, & moins subiecte aussi à l'enuie de ses concitoyens.

Le plus riche loyer, à nostre iugement, que la vertu se peut promettre, c'est celuy qui prouient d'elle-mesmes, & celuy encores qui est le plus esloigné du profit questuaire. *vilia enim sunt quæ pretium habent: itaque non vendere operam, nec tanti beneficij auctoritatem eleuare, magnificentius est;* dit Seneque lib. 3. de benef. C'est pourquoy aux siecles anciens, les plus genereux actes se recognois-

soient, nō en or ou argent, mais en des simples coronnes d'herbes. Telsinoin ce que le fils d'Artabāne dit vn iour à Xerxes , oyant racompter que les Grecs estoient occupez aux jeux Olympiques, ou le prix de ceux qui s'exposoient à de si d'angereux & peril-leurs combats , quand ils obtenoient la victoire, estoit vne guirlande d'Oliuier sau-uage: O Dieux (va-il dire) contre quelles gens nous as-tu icy amenez, qui ne combattent pas pour l'argent ny pour les richesses, ains seulement pour la vertu !

Quelquefois aussi selon que le merite y estoit , on leur apposoit en public des statues , comme on fit à Horatius Cocles dans Tite liue, *lib. 2.* Mais comme c'estoit la recompense la plus honorable de toutes; aussi estoit-elle fort rare au premier temps. ce que ce mesme autheur tesmoigne, *lib. 8.* disant, *additus triumpho honos, ut statuæ equestres eis, rara illa ætate res, in foro ponerentur:* lesquelles sortes de recompenses, estoient d'autant plus recommandables, qu'elles n'estoient aucunement à charge au public: Et n'estoient aussi subiects à l'enuie; car ne se conferans qu'aux plus signalées vertus, elles laissoient de soy trop plus d'admirateurs que d'enuieux.

Que fils iugeoient l'action digne d'estre signalée dans la memoire des siecles futurs, & d'en faire passer la recognoissance en la posterité de ceux qui l'auoient meritée & acquise, cela ne se faisoit encores, qu'en choses qui n'estoient aucunement incommodes au bien de leur public. Comme lors que le Senat de Rome voulut eterniser la memoire de tant de biens-faits, qu'elle auoit receuë de Publicola, il ordonna seulement, que ceux qui descendroient de luy, pourroient estre enterrez en vne certaine contrée, qui s'appelloit *Velia*. Et quand ils voulurent recognoistre ce loüable & pieux office, que Timasitheus chef de l'Isle de Lipare, auoit rendu à leurs deputez allans à Delphes, pour acquitter les vœux de leur Republique, & offrir quelques presens à Apollon: ils arresterent seulement, que luy & les siens venans à Rome, seroient logez & defrayez aux despens du public. Et de ce que telles recompenses, estoient plus à la gloire qu'au profit de ceux à qui elles estoient conferées, elles en deuenoient aussi d'autant plus durables: Car nous lisons, que tant qu'il est resté aucun de la posterité de ces deux, on ne leur a onques retranché ces honneurs.

Mais depuis que la vertu des derniers siècles, s'est associée de la conuoitise, & que le Poëte a eu occasion de dire, *aurea nunc verè sunt secula*, & qu'aujourd'huy le vray prix de l'honneur, a esté mis aux richesses, ou aux immunités qui en sont les protectrices; c'est contre ces priuileges-là, & contre ces recompenses que nous nous eleuons, j'entends quand elles sont trop generales & trop frequentes; Car en ce faisant le nerf de l'Estat en affoiblit, ou bien estans contraincts renuoyer la charge sur les autres, est-ce pas se porter aux inconueniens que nous auons remarquez au commencement de ce discours?

A ceste occasion Saluian, qui recogneut ce desordre dès son temps, *lib. 4. de guber. Dei*, disoit, *Ecce remedia pridem nonnullis data, quid aliud egerunt, quàm vt diuites cunctos immunes redderent, miserorum tributa cumularent, vt illis demerentur vectigalia vetera, istis vt adderentur noua, illos vt decessio etiam minimarum functionum locupletaret, istos vt accessio maximarum affligeret?* Que s'il viuoit encores aujourd'huy, cōbien ie vous prie, auroit-il plus d'occasion de se plaindre, veu que ce desordre est tellement accru parmy nous, que de tous les subiects du Roy, il n'y en a pas la

quarriesme partie qui portent les charges du Royaume?

Aussi les recompenses de ceste qualité, sont ordinairement subiectes à estre reuouquées, comme trop plus odieuses, que recommandables au public, tesmoing ce qu'en dit l'Empereur Valentinian *in l. priuilegia, C. Theod. de ann. & trib. priuilegia omnia* (*inquit*) *quibusdam concessa personis, in perniciem plurimorum, in irritum deuocentur, omnesque eiusmodi immunitates ad æquale ius prouincialium ceterorum reducantur.*

Ce sont les considerations, sur lesquelles le Roy a decerné les Lettres patentes, dont lecture vient d'estre faite, par lesquelles sa Majesté iugeant le grand preiudice qui luy est fait, & à son peuple sous pretexte de l'immunité de ceux, qui se disent issus de feu Eude le Maire, dit Chalo saint Mas, declare sa volonté estre, que ledit priuilege soit restraint aux termes de sa premiere concession, & auoir lieu seulement és impositions qui estoient lors.

Et de verité le texte dudit priuilege ainsi qu'il est couché és lettres du Roy Philipès premiere, montre clairement de quelles choses il se doit entendre; car il dit seulement, *ut in tota terra Regis nullam consuetudi-*

nem præstent, estant ainsi, que par ce mot de coustume, sont entendus les tributs ordinaires qui se leuoient en ce temps-là. Car c'est vne locution tirée de la loy Romaine, laquelle pour dire *tributum præstare*, yse de ces mots, *consuetum præstare*, in l. 9. §. *earum*, ff. de public. De faict, quand nous lisons en quelques anciennes coustumes, *hommes francs & coustumiers*, cela se doit entendre des exempts, & des tributaires.

Or les droicts qui se leuoient lors, n'estoient que certains peages, acquits, barraiges, pontenages, trauers, & telles autres redevances domaniales, de peu de suite & importance à ceux qui y contribuoient. Car d'aides, de tailles & taillon, de solde des cinquante mil hommes, d'equivalent, d'imposition de douze deniers pour liure, & autrestelles contributions, il n'y en auoit point encores, n'estans toutes ces charges renduës ordinaires, que depuis le Roy Iean, & Charles V I.

Si que d'estendre ce priuilege sur icelles, ausquelles ne pësa oncques le Roy Philippes, vous iugez le peu d'apparence qu'il y auroit : autrement ce seroit rendre la recompense aux successeurs trop plus ample qu'elle ne fut oncques à celuy qui la leur
auroit

auroit acquise par son labour, & la faire semblable aux fleuves qui deuiennent plus larges & profonds à mesure qu'ils s'eslongnent le plus de leurs sources : car ce priuilege iroit tous les iours s'augmentant à mesure que les charges accroissent, & que la posterité dudit le Maire se multiplie & augmente.

A ceste occasion le Roy François premier, & le feu Roy dernier decedé que Dieu absolue, bien informez des inconueniées que le public en pouuoit ressentir, decernerent semblables lettres à celles-cy, qui furent verifiées tant en la Cour de Parlement qu'en la Cour de ceans, & longtemps depuis tres-estroitement obseruées, comme de verité quand l'abus se vient à mesler parmy le priuilege, & *dum incipit nociuum esse*, c'est lors qu'on le doit reuoquer, disent nos Docteurs *in l. ex facto, ff. de vulg. & pup.* & sur le chapitre *suggestum, ext. de dec.* Et peut estre qu'il ne le presenta iamais vne plus vrgente occasion pour le reuoquer qu'à present, veu la necessité publique, qui tient le Roy oppressé d'une infinité de debtes; si que nous pouuons dire avec ce Questeur, *ararium non posse pati largitionem tantam*; & encores cecy,

avec Cassiodore, *licet sola hæc laudem mereantur, astamen salutis, publicæ causæ referenda & coercenda.*

Toutesfois le Roy n'en peut pas venir insques-là, bien qu'il le puisse faire, n'estant en rien attaché aux loix de ses predecesseurs; au contraire il desire qu'il soit religieusement entretenu selon sa premiere cōcession, comme certes il le merite, pour ce qu'il vaut d'un tesmoignage de l'insigne pieté de ce bon Roy Philippes, & qu'il est au lieu d'une pyramide, que les anciens erigeoient, pour eterniser la memoire des actes louïables de leurs Princes: Aussi qu'il est, pour signaler à tousiours le seruice vrayment deuotieux de ce defunct Eude le Maire, qui pour acquitter son maistre du vœu qu'il auoit faict au saint Sepulchre, entreprit ce voyage à pied & armé de toutes pieces: la singularité mesmes de ce priuilege le rend recommandable. Car c'est l'vnique que nous ayons en France de ceste sorte. Celuy d'Iuetot qui luy estoit semblable, estant deormais finy avec la posterité de ceux à qui il fut premierement donné: bref son antiquité nous le doit rendre aussi plus honorable, y ayant cinq cens tant d'ans, qu'il est en estre, estât

le propre des choses vertueuses d'estre
 tousiours teniës d'autant plus religieuses
 & venerables , qu'elles sont plus vieilles
 & anciennes, & d'oresnauant encores qu'il
 sera repurgé des abus & vsurpations qui
 le rendoient odieux , nous ne doutons
 point qu'il ne dure bien-auant dans l'e-
 ternité des siecles à venir , pourueu qu'àu
 cours de sa durée il ne s'attribuë plus d'au-
 torité que celle qui luy a esté donnée à sa
 naissance.

Et d'autant que ceux qui se disent yslus
 dudit Eude le Maire , pouroient mettre
 en auant, qu'ils sont en possession & iouys-
 sance de l'immunité des Aydes & tailles,
 aussi bien que de tous autres droicts , vous
 auez ouy comment le Roy declare par ses-
 dites lettres, ceste possession estre plustost
 vne vsurpation que legitime iouyssance,
 voulant sa Majesté faire entēdre , que l'ex-
 emption des aydes & tributs est vne des
 choses qui ne se peuuent acquerir par la
 possession , tant longue & inmemoriale
 qu'elle puisse estre , comme aussi les Do-
 cteurs le resoluēt *in l. cum sponsus. §. in vecti-*
gal. ff. de public. & in l. i. §. f. C. de fund. limi-
tro. pource que estre subiect du Roy, & luy
 estre tributaire, sont choses inseparables,

DOVZIESME PLAID.

tesmoin ce qu'en dict mesme saint Ambroise *in epist. ad Rom. C. 13. Ideo tributa præstari (inquit) ut subiectionem præstent , per quam sciant non esse liberos , sed sub potestate degere , quæ ex Deo est* , si ce n'est que le Roy nous dispense de ce lien , en consideration de seruices qui importent autant au bien public , que pourroient faire les tributs & les daces.

Attendu donc l'vtilité publique de cest Edict, Nous requerons estre mis sur le reply des lettres, qu'elles ont esté leuës, publiées & enregistrées. Ce que la Cour ordonna par son Arrest du mois de Mars, 1596.

TREZIESME PLAIDOYE.

Qu'il n'est permis aux personnes priuées de s'entremettre d'eux-mesmes au maniement des affaires publiques, & faire aucunes leuées de deniers : & de l'ordre qui se peut tenir es leuées de deniers necessaires pour secourir promptement vne armée.

EN TRE les loix & belles institutions qui iadis rendirent Rome la plus auguste cité du mode, celle à nostre iugement estoit des plus recommandables, qui defendoit à toutes personnes, s'il n'estoient Magistrats, de s'attribuer aucun pouuoir & auctorité au maniement & conduite des affaires publiques: Autrement si entre les priuez aucun eust esté si hardy & temeraire de s'entremettre en icelles, ceste loy ne le reputoit pas moins coupable que du crime de leze majesté, comme le tesmoigne le Iurifconsulte Marcian, disant, *si quis priuatus, pro potestate, ma-*

gistratūque quid sciens gesserit, lege Iulia maiest. teneatur, l. 3. Iul. maiest.

A ceste occasion bien que Martius eust beaucoup merit  de la republique , pour auoir autresfois remis sus les affaires d'Afrique , qui estoient deplor es apres la d faicte des deux Scipions, neantmoins il ne peut euit r vne haine irreconciliable du Senat & du peuple, de ce que sans leur adueu & permission il auoit vsurp  l'autorit   s affaires publiques, *Titulum honoris, quod imperio, non populi iussu, nec auctoritate Patrum dato. Propr tor Senatui scripserat, magnam hominum partem offendeat*, dit Tite Liue, lib. 26.

Et estoit ceste loy fond e sur des raisons r tes-notables, l'vne peculiere pour la ville de Rome, d'autant que les affaires publiques d'icelle se gouernoient principalement par auspices, & n'estoit permis   aucun de les obseruer sinon aux Magistrats, qui auoient  t  cr ez &  tablis souz iceux, *auspicari de c lo in peragendis public  negotiis nemini ius sit pr ter magistratum*, dit Varron d s Nonius, & le rep te Ciceron 2. orat. Philip. De sorte qu'ils estimoient, que c'eust  t  deshonnorer leur religion, auilir la grandeur de l'Empire, & malheurer par m me

moyẽ les affaires publiques, que de voir manier choses si graues & importantes, à personnes priuées. Vne autre raison plus generale de ceste loy, estoit qu'ils iugeoient que comme toute l'auctorité en la Monarchie appartient au Roy, & en la Republique au peuple ; ainsi que d'en vsurper la moindre, sans leur adueu & ordonnance, outre que c'estoit entreprendre sur leur grandeur & maiesté, *adeo vt apud Persas solio regio infedisse capitale erat* ; c'estoit encores faire ouuerture à vn tres-ruineux desordre, & tel dont l'histoire de nos miserables iours nous fournit vn exemple trop remarquable à iamais : noz ruines & infortunes ne tirans d'aillieurs leur origine, que de l'vsurpation iniuste de l'auctorité publique, trop temerement entreprise par les priuez sur ceux qui en estoient les vrais ministres & gardiens.

Et en cela consiste le principal argumẽt pour faire paroistre iuste la plainte des opposans, disans que bien qu'en leur ville y ait vn nombre notable de Magistrats & officiers, que toute fois ceste grande leuée de deniers, departement d'iceux, taxes & contrainctes dont il s'agist en ceste cause, auoient esté faiçts de l'ordonnance des

deffendeurs , personnes du tout priuées, n'ayans dignité, pouuoir, & auctorité legitime de ce faire , & que partant outre la reprehension qu'ils en doiuent attendre de la rigueur des loix, ils doiuent encores estre condamnez à la restitution des sommes qui ont esté leuées.

Mais d'autre part, vous voyez l'excuse qu'on y apporte, disans les deffendeurs, que la necessité en laquelle estoit lors reduitte leur ville, par l'oppression des ennemis, renans garnison és places voisines d'icelle, les auoient contraincts au deffault de leurs Magistrats , à entreprendre ce dont on se plaint , afin de subuenir promptement à l'armée du Roy , & l'obliger au secours de leur ville , pour la deliurer des calamitez & ruines quelle alloit tous les iours endurant : & qu'en telles occurrences, les plus prôpts & diligens à seruir le public, doiuent estre vraiment ceux qui meritent d'entreprendre les affaires publiques, leur vertu les auctorisant assez à cela.

Qu'à ceste occasion les Stoïciens disoiēt, que l'homme sage & vertueux en la Republique, estoit *perpetuus Dictator*, *perpetuus Cōsul*, dont Cicerō *lib. 4. Tuscul. quæst.* nous en donne vn exemple notable de Scipion le

Grand, *qui in rebus aduersis Consulem languentem reliquit, ac ipse priuatus, ut si Consul esset, qui Rempublicam saluam esse vellet, se sequi iussit.* qui fust lors que le Consul Sceuola se rendit lent & trop formaliste, pour reprimer les sedicieux comportemens de Tiberius Gracchus. Plutarque recite le séblable de Philopœmen, disant que Nabystyran de Lacedemone, estant desia descendu avec vne forte armée en Missene, & le Preteur des Acheiens froid & lent à y dōner ordre, Philopœmen, bien que lors homme priué, monta à cheual, & commanda à ses concitoyens de le suyure, & fit en sorte qu'il chassa l'ennemy du pays : Et qu'apres ces belles actions, c'eust esté quasi *citare in ius virtutem*, que de les appeller en contrauention de la loy, pour auoir sauué leur pays de danger, n'estans que personnes priuées.

Bref qu'en telles necessitez le public n'a point d'intrest par qui il soit secouru, & ne recognoist pour magistrats que ceux qui y dōnēt le meilleur ordre, & n'aduoie pour loix que celles qui sont propres pour son salut, qui est ce que dit Cicerō en l'vne de ses Philippiques, *qui in tanto periculo rectè & fortiter sentiūt, erunt consulares.* ce qui n'est esloigné de ce qu'il dit ailleurs en vne autre

de ces mesmes oraisons, *hoc ius Iupiter ipse sancit, ut omnia quæ Reipublicæ salutaria sunt, legitima & iusta habeantur*, & qui est conforme au dire de l'Augur Fabius, *optimis auspicijs ea geri, quæ pro Reipublicæ salute petuntur*: quæ verò contra *Rempubicam*, fieri contra *auspicia*.

Disent donc les deffendeurs, que n'ayans eu autre but en cest affaire, que le salut & repos de leur ville, c'est leur tenir tort & faire iniure, de tourner à blasme, ce dont le public leur est obligé & redeuable; & que c'est se rendre coupables d'une ingratitude insigne, que redemander ce qu'ils scauent auoir esté bien employé pour le seruice du Roy & de leur ville.

De sorte qu'ayans en ceste cause à contrepeser la rigueur des loix, avec la necessité du temps, il semble qu'il ne seroit hors de propos d'imiter au iugement d'icelles les Spartiates, qui aymerent mieux faire pour vn iour taire leurs loix, qu'en les escoutant leur obeyr contre le bien du peuple. Ou bien faire comme les Macedoniens, qui ayans vne coustume de ne commencer la guerre au mois qu'ils appelloiēt Dozien, & toutesfois Alexandre estant pressé de la necessité souueraine maistref-

se du monde, de mettre sus quelque nouvelle entreprise, luy donnerent auis, ne perdre ny l'ordonnance, ny le temps, comme mieux ayment oster du tout la chose sacrée, qu'en la retenant, la profaner.

Ainsi puis qu'il nous appert, que ce qui a esté geré par les deffendeurs au fait de ceste cause, a esté comme y estans portez par la nécessité, qui, comme sourde & aveugle née, ne void & escoute autres loix que celles qui sont pour elle; & que d'ailleurs on nous a iustifié que les deniers dont est question, ont esté entierement employez pour le service du Roy; Nous estimons que pour ce iourd'huy nous devons tourner le tableau des loix qui defendent aux personnes priuées de s'entremettre d'eux-mesmes aux affaires publiques, ny d'entreprendre aucune leuée de deniers sans auctorité legitime, leur laissant neantmoins pour l'aduenir leur puissance entiere & absoluë.

Mais les opposans se plaignent encores, de ce qu'en procedant à la taxe, on a faict choix de leurs personnes pour les charger de la pluspart des deniers; & que puisque toute la ville se deuoit ressentir de la chassé des ennemis, qu'il estoit aussi raisonna-

ble d'en faire porter la despense à tout le peuple d'icelle.

Et à la verité le meilleur seroit en toutes leuées obseruer vne telle égalité, qu'un chacun portast sa charge selon ses facultez, & *ut omnes eadem equitate continerentur*: car en obseruant le contraire, c'est introduire l'enuie, puis la discorde entre concitoyens, estant le propre d'une commune, *pari dolore aliena commoda quam suas ferre iniurias*, comme dit Tacite. Mais où il est question des affaires de la guerre, attendu qu'on ne peut y apporter la moindre dilation, qu'avec un grand peril, il est d'ordinaire de s'adresser aux meilleures bourses pour en tirer le plus present secours, sauf à en faire puis apres sur tous un departement égal, & des-interesser ceux qui auroient trop payé.

Qui estoit la mesme obseruance d'Athenes, dit Isocrate en l'oraison *πρὸς τὴν ἀντιδοσίαν*, & le monstre plus particulièrement Demosthene, en l'oraison, *πρὸς συμφορῶν*, *id est*, de *decurijs munera obœtium*, laquelle fut par luy faite lors que le Roy de Perse s'aduançoit avec ceste armée memorable pour leur courir sus, & à toute la Grece, & fit en sorte par son discours, que pour s'opposer

promptement à ce grand orage , on tria les plus riches , dont furent faites cent dixaines , qui furent chargez d'auancer les fraiz de la guerre, *iisque dicebantur Trierarchia*. Le semblable fut aussi par eux obserué lors que tenans le siege deuant Mitylene, le thresor public vint à s'espuiser ; car ils leuerent deux cens talents sur cinq cens de leurs citoyens, comme le remarque Thucydide *lib. 3*. Ainsi à Rome ceux qui estoient *maximi census* , portoient en telles extremités la principale despense ; dit Halicarnasse *lib. 4*. Mais ceste plainte des opposans doit sembler inutile, veu que le Roy par lettres patentes qui sont par deuers la Cour , après auoir validé tout ce qui s'est fait en ceste leuée , a pourueu à leur remboursement.

Attendu donc ce que dessus, & que ce different tirant plus outre pourroit causer vne diuision publique entre concitoyens : Nous estimons les parties deuoir estre enuoyées hors de Cour & de procez : Et neantmoins defenses tres-expresses estre faites aux deffendeurs, comme à tous autres , de faire desormais telles leuées sans auctorité & pouuoir legitime, sur les peines contenuës aux Edicts & ordonnan-

Q V A T O R Z I E S M E
ces. Ce que la Cour ordonna par son arrest
du mois de Mars 1593.

QVATORZIESME PLAIDOYE.

*Sur l'immunité des excellens
ouvrages.*

DOVT ainsi que l'homme est composé de l'ame & du corps; aussi a il eu besoin de deux principales facultez, l'une intelligente pour l'ame; l'autre agente & effectrice pour le corps; de celle-la sont forties comme d'une diuine source les sciences intellectuelles, qui valent à l'embellissement & souverain bien de l'ame; & de celle-cy sont prouenez les arts, pour seruir aux necessitez & plaisirs du corps, si que l'une se peut appeller la splendeur & la gloire de l'ame. Et l'autre le secours, le plaisir & le contentement du corps: toutes deux au demeurant si necessaires à l'homme, que sa vie ne peut aucunement subsister sans l'usage d'icelles.

De sorte que nous nous sommes souvent esbays de ce qu'Herodote lib. 2. es-

crit des anciens Scythes, Lydiens & Perses, qu'ils chassèrent du milieu d'eux, toutes sortes d'arts & disciplines, iusques à faire deffenses tres-expresles d'en apprendre aucune, sinon celle des armes, pour neuen encores que ce fust de la main de son pere: car en se priuant des arts & disciplines ciuiles & liberales, qu'est-ce ie vous prie autre chose que d'aveugler son entendement, d'espouiller l'homme de soy-mesme, & rendre sa vie, sans vie, l'estre de l'homme n'estant different du non estre, que par l'vsage des arts & disciplines, sans lesquelles ce n'est rien de luy sinon un fraiz inutile sur la terre.

Et ores que le subiect de ceste cause ne nous permette parler que de ceste faculté effectrice mere des arts & ouurages, si est-ce que tout ce que nous pourrons dire en sa recommandation; doit redonder à la gloire de l'autre, pour ce quelle luy sert de premier instrument & organe: ce que voulut signifier Anaxagore, quand il mit la cause de la sagesse & sapience de l'homme en la main. Et Galien encores apres luy, qui voulant parler de l'vsage des parties de l'homme, commença par la main, comme de la plus digne, & qu'il appelle

l'organe deuant tous organes, & l'outil deuant tous les outils : car par la main ils entendent ceste faculté agente, ministre necessaire de l'intellect qui est en nous.

A mesme prudence Pindare Od. 7. & les autres Poëtes (qui sous le voile de leurs fictions courent quelquesfois de grands mysteres) disent que Minerue ayant pitié de la rudesse & barbarie qui estoit aux premiers Rhodiens, fist tomber sur eux vne nuë d'or, dont premierement ils reçurent les arts, puis apres les sciences intellectuelles, entendans par l'or vne gentillesse, pureté & subtilité d'esprit, au mouuement de ces facultez dont nous parlons: Comme de verité ils ne pouuoient choisir à qui mieux parangonner ceste diuine partie, qui est en nous, regardans son commencement, son estre & sa fin : car bien que l'or à son origine semble naistre de la terre, siest-ce que c'est de l'influence du Soleil dont il est fils, & comme c'est son propre d'esclairer: ainsi est-il de ceste parcelle du souffle de Dieu qui vient du Ciel, bien qu'elle semble naistre avec le corps; & esclaire aussi en nous toutes les especes intelligibles, entre l'especeur de nos corps. A raison dequoy les Hebreux appellent

appellent de mesme nom l'or & la clarté du ciel, siege des ames; Il n'a point de fini, car il est immortel, dit Sophon, comme estant fils de Iupiter, & l'intellect qui est en nous, l'est-il pas aussi? Bref commel'or est le commencement de tout dit le mesme Pindare à l'entrée de son œuvre, ceste mesme diuinité qui est en nous, est-elle pas aussi le commencement & la reigle de toutes nos actions?

Mais en oyant ce compte des Rhodiens, ne vous est-il ressouvenu de ce qui se lit en Exod. ch. 31. du pauvre peuple d'Israël, qui pour la longue seruitude ou l'auoit detenu le cruel Pharaon, estoit deuenu si rude, grossier, & inhabile, que l'une des choses qui plus augmenta sa misere au desert, fust l'ignorance des arts & ouurages, qui fust telle parmy eux, que quand il fut question de faire l'Arche, le Tabernacle, l'Autel, les courtines, & autres choses requises pour l'honneur de la religion, il ne se trouua personne qui en fust capable, dont Dieu (qui est l'eternelle source de toutes sciences & disciplines) ayant compassion, inspira en l'ame de quelques vns d'étreux, & les rendit en vn moment instruits en toutes sortes d'artifices & ouurages.

L

Comme certes il faut que l'homme recognoisse l'imbecillité de sa nature, & advouë quand & quand, que s'il n'eust eu la Diuinité pour pedagogue, il luy eust esté impossible de paruenir aux inuentions admirables des plus excellens arts, comme de l'agriculture, qui est la nourrice de nostre vie, de l'architecture, qui nous apprend à nous deffendre de l'inclemence de l'air. l'escriture, & l'Imprimerie, qui nous faict presens és lieux ou nous ne pouuons estre, & malgré la mort, rend la vertu des hommes eternelle : la peinture, & statuaire qui comme emulatrice de la nature pour le plaisir del'hōme, luy represente en vn seul subiect toutes les perfections, que l'autre peut mettre en plusieurs. Bref de tous les autres de semblable merite, ou la foiblesse humaine n'eust iamais peu atteindre sans ceste faueur diuine.

De sorte que les Arts tenans leur origine du ciel, & nous estans autant de dons facrez, dont la Diuinité a voulu rendre nostre vie à l'aïse & bien-heureuse : qui est celuy qui ne dira avec nous, que ce seroit vn sacrilege, de les assubiectir en leurs ouurages, aux seruitudes des daces & tributs?

Maïstant s'en faut que cela se soit fait és

Estats bien ordonnez; qu'au contraire on sy est tousiours efforcé, par tous moyens honnestes, d'esleuer le merite d'iceux, en faisant compte extrême des excellents ouuriers. & prisant leurs ouurages plus que l'or & l'argent.

De faict, il se lit que pour recognoistre l'industrie, qu'apporta Polignotus, à peindre le tēple d'Apollon de l'Isle de Delphes, les deputez des Estats de Grece, dictz anciennement Amphyctions ? luy establirent des logis gratuits, par toutes les villes de la Grece, sans que de son costé il fust tenu recevoir chez soy ceux desdites villes, qui passioient pres de sa maison; ce que ces anciens reputoient à vn fort grand priuilege.

Et se peut-il remarquer vn plus grand honneur qu'Apelles reçeut d'Alexandre ? iusques à auoir eu part au fruit de ses plus cheres affections; Et quant à ses ouurages, il en fit telle estime, qu'vn iour il acheta à boisseaux d'or sans le compter, vn tableau où il estoit figuré, tenant vn foudre à sa main; iugeant ce grand Prince que ç'eust esté luy faire tort, de luy payer vne certaine somme, pour chose qu'il tenoit inestimable.

Le semblable se dit du Roy Attalus, qui

L ij

prisa tant les ourages de Nicias, qu'il voulut vn iour achepter de luy vn tableau de la Necromantie d'Homere, c'est à dire, de la descente d'Vlysse aux enfers, par luy descrite en vn endroit de l'Odyssée, pour vne masse d'or d'un prix inestimable; ce que toutesfois il refusa, & en fit don à son pays, comme vn chef d'œuvre de son art, qui ne se pouuoit assez priser.

Les Romains du temps de quelques Empereurs, ne se monstrent moins curieux, que ceux-là, des ouuriers excellens, iusques à les auoir honorez de plusieurs priuileges, mesmes de l'immunité des daces & tributs, comme on le recognoist au tiltre de *Excus. Artif. C. Theod. lib. 13.* ou l'Empereur Constantin disoit en l'honneur des Architectes, *ut tua sublimitas ad hoc studium eos impellat, tam ipsos quàm eorum parentes ab his quæ personis iniungi solent volumus esse immunes*; Et l'empereur Valentinian, à l'honneur aussi des excellens Peintres disoit, *Picturæ professores si modò ingenui sunt, placuit neque sui capitis censione, neque uxorum, aut etiam liberorum nomine tributis esse munificos*, & adiousté à la fin par forme de sanction tres-seuere, *quæ omnia sic concessimus, ut si quis circa eos statuta neglexerit, ea se-*

neatur pœna qua sacrilegi coercetur. Le semblable fut aussi concédé par l'Empereur Constantius à tous autres ouuriers de merite: comme il appert *in l. 2. & 3. eiusd. tit.*

Et est à croire que ceste perfection des Arts, ou les anciens auoient atteint, ne pouenoit d'ailleurs que de cest honneur public, qu'on rendoit aux bons ouuriers, & de l'estime qu'on faisoit de leurs ouurages, d'autant que l'honneur est le pere des Arts, & belles actions, comme au contraire, la seruitude & le mespris, en sont la mort & la ruine: Ainsi qu'au rebours de ces Princes dont nous venons de parler, l'experimenta l'Empereur Michael Paphlago, lequel au rapport de Cedrenus, abolit presque les Arts en son Estat, pour auoir forcé les artisans luy payer vn tribut de la dixiesme partie de leur gain ordinaire; Car il n'y a rien de plus infeste à vn gentil ouurier, ny qui plus abastardisse en luy le courage, que de sentir la main du Publicain venant gabeller sur son ouurage.

Et ne faut recercher d'ailleurs, pourquoy nous ne voyons plus és ouurages de nostre temps tant d'artifice & de d'exterité, qu'en ceux de ces anciens siecles, d'autant qu'en

ce temps-la comme ils estoient honorez, aussi ils trauailloient pour la gloire, & à ceste heure comme ils sont mesprizez, aussi ils ne trauailent plus que pour le profit & le gain, dōt Pline mesme se plaingnoit des son temps, comme il appert en ce lieu du li. 34. disant, *quondam æs confusè auro argentiq; miscbatur, & tamen ars pretiosior erat; Nūc incertum est, peior hæc sit, an materia; mirūque cum ad infinitum operum pretia hæc creuerint, auctoris artis extincta est. Quæstus enim causa ut omnia exerceri cœpta est quæ gloriæ solebat.*

Toutesfois, comme la France se peut attribuer la gloire de l'inuention de plusieurs Arts; aussi se peut-elle vanter d'auoir tousiours esté tres-curieuse de leur honneur; & n'auoir iamais permis que les daces & impositions ayent rauallé la dignité des excellens ourages.

De faict, lors que le Roy Charles V I I. pressé de la necessité des guerres de son temps, mit sus vne imposition grande, de douze deniers pour liure, sur toutes denrées & marchandises, qu'elles elles fussent, & pour tant de fois qu'elles feroient vendues & eschangées: La Cour se souuenant de ce qu'elle deuoit au public en telles occasions, apporta à l'Edit qui en fust fait, deux

exceptions dignes du grand soing qu'elle a tousiours eu de l'honneur & vtilité publique. L'une, qu'il n'auroit lieu sur les menuës denrées qui se vendent par pieces & en detail és marchez ordinaires, pour ce que le trafic de ces petites choses, estant réservé aux pauvres, c'eust esté vne extreme rigueur, de les assubiectionner aux daces. De fait Pline *li. 19. ca. 4.* recite que comme vn iour, on eust estably à Rome pareil tribut sur ces menuës denrées, il y eut vne telle clameur du pauvre peuple, qu'on fust cōtraint le reuocquer aussi tost. *Nullum (inquit) macelli vectigal maius fuit Romæ, clamore plebis incusantis apud omnes Principes, donec remissum est portorium mercis huius: compertumque non aliter quæstuosius, aut tutius, ac maiori fortunæ iure, cum credatur pensio ea pauperum,* qui est certes vn lieu digne de remarque & d'estre tousiours deuant les yeux des Officiers & Ministres des Roys.

L'autre exception dudit Edict, fut qu'il n'auroit lieu és choses, dont le prix consistoit plus en l'artifice qu'en l'estoffe & matiere d'icelles: comme par exemple és horloges & tableaux, aux liures, menuseries, marqueteries, & instrumens de Musique, bref en tous autres ouurages *quorum ars*

L iij

preciosior materia, iugeant prudemment que ç'eust esté vn tribut *verè temerarium*, que d'y afferuir l'industrie & subtilité des esprits des hommes, qui est la chose la plus recommandable au public, pour l'honneur, profit & vtilité qu'elle luy porte.

Et est en cest endroit, qu'il est raisonnable de dire, que la matiere doive ceder à l'art, & qu'à son respect elle ne doit estre comptée à rien : Car si le maistre pert son estoife, pour laisser le tout à l'ouurier qui l'a mise en œuvre, dit l'Emp. *in §. cum aliena*, & le demonstre Ciceron en ce beau lieu de l'oraison, *pro Roscio Comædo* disant, *Panurgum tu Saturi, proprium Fannij dicis fuisse: at ego totum Roscij fuisse contendo. Quid erat enim Fannij? corpus. Quid Roscij? disciplina. Facies, non erat: ars erat preciosa. Ex qua parte erat Fannij, non erat H---s liij. Ex qua erat Roscij, amplius erat H---scclij. nemo enim illum ex trunco corporis spectabat, sed ex artificio comico æstimabat. Si dis-ic l'art efface la matiere, & la substraiet à celuy qui en estoit le maistre : pourquoy ne feroit-il le semblable pour la garentir de la main impure d'un Publicain? *res enim abesse dicuntur, cum sunt transfiguratae, quoniã plerumque plus est in manus pretio, quàm in re*, disoit Vlpian, *in l. res abesse. ff. de verb. sign.**

Bref cest Edict eut lieu seulement sur les estoﬀes demeurées en leur essence, ensemble sur les ouurages grossiers, *quæ videlicet plus habent naturæ & materiæ quàm artis*, comme encores aujourdhuy il s'observe en tous lieux où ceste imposition a esté continuée: car en quelques lieux elle a esté du tout reuocquée, & en quelques autres conuertie en ce que nous appellons equiualent.

Ce qu'estant ainsi, vous voyez en ceste cause le peu de raison que l'intimé fermier de ceste imposition en la ville de Meaux, a eu de faire saisir le bastéau de l'appellant, pour estre payé de ce droit pretendu estre deu pour le fer qui est entré en la structure d'iceluy: car nous ne tenõs point pour grossier & vulgaire l'art de construire nauires & bastéaux, au contraire l'inuention en est des plus diuines, pour estre celle qui nous a ouuert les thresors de la mer, & nous a donné l'accez que la nature mesmes nous auoit denié, vers les peuples & nations estranges. C'est pourquoy le Poëte parlant de l'inuention de l'ancien *Argo*, disoit aussi, au premier *Ἀργοναυτ.*

Νῆα δ' ὀπίκρατε' ὡς ἄργε' ἐποθημοσιώῃσιν
Ε'ζωσαν πάμπαρτοι εὐτρεφεῖ ἐκδοῖεν ὀπλῆ.

QVATORZIESME PLAID.

Aussi ils disent que la figure d'icelle en est demeurée au ciel pour vne marque eternelle de son excellence. Nous accordons bien que ceste imposition se peut leuer sur le fer qui est encore en essence, mais non sur celuy qui est reduict en ouurage de prix & de merite.

A ces causes la Cour sera suppliée declarer ladite saisie tortionnaire: & faire defenes à l'intimé, comme à tous autres Fermiers de ceste qualité, leuer d'oresnauant ladite imposition sur les ouurages, spécialement sur ceux dont le prix consiste plus en l'artifice qu'en leur matiere, suyuant les arrests & anciens reglemens. Ce que la Cour ordonna, par son Arrest du mois de Iuin, 1596.

QVINZIESME PLAIDOYE'.

Que pour le payement de la Taille, il n'est licite vser de contrainte solidaire contre les particuliers, pour le commun de leurs paroisses, ny d'emprisonner leurs personnes, ny saisir leurs immeubles, bœufs & cheuaux, si ce n'est en cas cy exprimé.

L'ORDONNANCE du Roy François, verifiée l'an 1543. est tres-digne de recommandation, pour laquelle il defend aux Receueurs, que pour le payement de la Taille, ils n'ayēt à vser de contrainte solidaire contre les particuliers pour le commun de leurs paroisses, ny d'emprisonner leurs personnes, ny saisir leurs immeubles, bœufs, cheuaux & autres instrumens rustiques, pour l'acquit de leurs taxes; Iugeant ce Prince debonnaire, que les tributs & les daces aigrissent assez les esprits d'un peuple, qui est de sa nature auare, & qui n'ou-

ure les yeux que pour voir & enuier ce qui se leue sur soy, sans exercer encores sur luy toutes ces especes de rigueur & violence.

Comme à la verité il se peut dire n'y auoir rien entre les incommoditez publiques, qui plus tire les Roys & Princes à l'enuie de leurs peuples, ny qui excite plus de haine & mal-vueillance contre eux que quãd non contens de prendre humainement sur iceux ce qu'ils peuuent, mais pour les y forcer, y apportent trop de seuerité & de rigueur; d'où ce sage Romain disoit par forme d'instruction aux Roys, *li. 3. histor. Multi principum pecunijs acerbè conquirendis plus inuidia sibi, quàm virium attulerunt.*

C'est pourquoy l'Empereur Antonin est loué de ce qu'il auoit soing sur toutes choses que ses Procureurs & Receueurs se portassent doucemēt en la leuée de ses tributs: ce que Capitolin tesmoigne, disant, *Procuratores suos & modestè suscipere tributa iussit, & excedentes modum, rationem factorum suorum reddere præcepit, nec unquam latatus est lucro, quo prouinciales opprimerentur: A quoy se rapporte ce que disoit le bõ Roy Theodoricus dans Cassiodore, Opes nostras cupimus augeri thesauro pietatis, commoda execramur vexato-*

vñm calamitatibus conquisita. Illatio quæ defletur molesta est clementiæ nostræ : voulant signifier que toutes ces violentes & rigoureuses exactions, *quasi tyrannicas esse grassationes :* & qu'au contraire, *tributorum illam necessariam postulationem, quæ oratione fit & humaniter, magnificendam esse quasi curationem & tutelam,* comme il se lit dans Suidas, en quelque endroit de son œuvre.

Et est fort remarquable au propos où nous sommes, ce que Tite Liue recite de Fabius Propreteur en Espagne, que pour auoir trop exactement leué sur ceste Province là le tribut ordinaire du bled, & en auoir enuoyé à Rome plus grande quantité qu'e n'auoient fait ensemble plusieurs de ses deuanciers : il en fut asprement repris en plein Senat, d'autant qu'un si grand amas ne pouuoit auoir esté fait, qu'avec beaucoup de violence, *& nisi ab inuitis, nisi pignoribus captis, nisi adhibita auctione :* Et fust à ceste occasion ordonné sur la poursuite & suasion de C. Gracchus, lors Tribun, que tout ce bled seroit vendu, & que l'argent qui en prouiendroit, seroit rendu & restitué à ceux, de qui il auoit esté exigé. C'est pourquoy Cicéron en l'oraison *pro Plancio*, voulant designer vn bon & louïable

Questeur ou Receueur , luy donne ces qualitez, *Negociatoribus comis, mercatoribus iustus, municipibus liberalis, socijs abstinens & in omni officio diligentissimus*. Et à mesme fin Tacite parlant des peuples tributaires à l'Empire de Rome, disoit, *iniuncta imperij munera impigrè obibunt si vis & iniuriæ absint*.

Ce sont les raisons & exemples sur lesquelles est fondée ceste Ordonnance, dont nous auons parlé, & qui ont valu pour la faire estroittement obseruer iusques aujourdhuy ; Mais reprenons par le menu tous les chefs d'icelle, à fin de la rendre plus claire & plus facile. Et en premier lieu ne iugerez-vous pas, que de contraindre vn particulier au payement de la taille pour le general de sa paroisse, ce seroit commettre contre la propre nature & condition de la Taille, ayant esté ainsi diète, du mot François, Tailler, qui vient de l'ancien verbe Latin, *taleari*, don vse Pline *lib. 17. cap. 17.* & Colum. *de re rustica*, *pro partiri & diuidere*, qui estoit pour monstrier que la taille se deuoit asseoir, cueillir & leuer, *diuisim & per partes*, & que l'vn ne pourroit estre contraint de payer pour les autres.

De la mesme sorte que le *tributum* des Romains estoit ainsi dit à *verbo tribuo*, qui

est prins par Varron en sa premiere signification *pro diuido*, pour ce qu'il se leuoit sur les particuliers *diuifim & per partes* ce que Dion exprime *lib. II.* disant, κατ' ὀλίγον ἐν ταῖς τάξεσιν ὀφείλουσιν ὅσα εισφέρειν. Mais la raisõ principale de cecy, est que la taille est vne debte de chasque paroisse, & non des particuliers habitans d'icelle. *quod autẽ debet vniuersitas, singuli nõ debent. l. sicut in f. ff. quod cuiusq. vniuers.* ce que semble auoir entendu Seneque *lib. 3. de benefic.* disant, *si quis patriæ meæ pecuniam credat, non dicam me illius debitorem, nec ex eo æs alienum profitebor aut candidatus aut reus: ad exoluendum tamen hoc, portionem meam dabo;* A quoy aussi se refere ce qui est traicté au tiltre, *ne vnus ex vicaneis pro aliorum vicaneorum debitis conueniatur.*

Et quant au second chef de ladite Ordõnance, defendant d'vser d'emprisonnemẽt contre les particuliers pour le payement de leurs taxes elle semble auoir esté aussi empruntée de l'vfrage des Romains, comme il se lit *in l. nemo carcere, C. de exactor. tribut.* conforme à celuy des Grecs, comme on le coniecture de l'histoire de Xenocrates, recitée par Dion, lequel estant en chemin pour estre amené en prison par faute de payer le tribut que deuoient les estrangers habitans

en la ville d'Athenes, & qu'ils appelloient *μετοίκιον*, l'Orateur Lycurge voyant que les Receueurs le conduisoient, leur osta par force d'entre les mains, & outre cela les poursuivit si viuement en Iustice, qu'il les fist condamner en vne amende seuer.

La deffense pareillement faicte par ladite Ordonnance, de saisir & executer les cheuaux, bœufs & autres instrumens rustiques, pour le payement de la taille, & qui a esté depuis peu repetée par autre Edict solennel, semble auoir esté aussi tirée sur le patron de la loy Romaine, comme il se lit, *in l. executores, & in l. pignorum, C. quæ res pign.* & qui fust semblablement obseruée en Grece, au rapport de Diodore *lib. 2. cap. 3.* & de Varron *in lib. de re rust.* si mieux toutesfois nous n'aymons dire, qu'elle est puisée de la loy propre de la nature; d'autant que ces choses là, sont les vrais instrumens de la vie commune des hommes; d'où le Poëte *Aratus in Phænomenis* feignoit que la Iustice n'auoit abandonné la terre pour autre subiect, *quàm ob bonem casum aratorem.*

La deffense aussi de saisir l'immeuble, pour le payent de la taille, est pareillement fondée sur la condition & qualité d'icelle, estant

estant vne charge plus personnelle que réelle, & à laquelle l'immeuble ne peut estre asservi & obligé.

Ensomme le Roy par ceste Ordonnance a voulu s'esloigner de ces dures extremitez, que Tacite dit estre à refuyr par tous bons Princes en matiere d'exaction, de tributs & de daces, *ne boues (inquit) mox agros; postremò corpora pœnæ tradant vel seruitio*, comme aussi elles seroient du tout aliènes & abhorrentes de la douceur & moderation dont noz Roys ont tousiours vsé en leur Empire, s'estants contentez de tout temps, que pour le payement de la taille on vst seulement de saisie & arrest sur les biens meubles.

Et de fait, n'y a que les Collecteurs qui puissent par les Edicts estre contraincts par corps s'ils ne payent aux termes de l'année; par ce que les deniers leuez par iceux, sont reputez Royaux au payement; & desquels sont obligez par corps ceux qui les recoiuent & manient. Et combien mesmes que les Collecteurs soient esleuz par les habitans, & à leurs perils & fortunes, si est-ce qu'un particulier qui auroit esleu le Collecteur, ne pourroit estre contraint par corps à payer ce que ledit Collecteur

M

deuroit. car il n'y a que le Collecteur qui puisse estre emprisonné, par faute de payement.

Toutesfois on obserue, que si toute vne paroisse estoit refusante de payer la taille, en ce cas pour punition de leur cōtumace, le Receueur peut vser de contrainte par corps contre le premier des refusans, non seulement pour ce qui est de sa taxe particuliere, mais aussi pour le general de la paroisse, comme les Docteurs l'ont resolu sur la Loy 1. §. *quod si nemo. ff. quod cuius. vniuersit. & sur la Loy missi. C. de exact. tribut.* C'est pourquoy Themistocle (dit Plutarque en savie) estant enuoyé vers les Andriens pour leuer sur eux quelque secours, leur dit qu'il venoit vers eux assisté de deux puissantes Deesses, la persuasion & la violence, *κομίζων πειθῶ καὶ βίᾳ*, voulant dire que où contre la raison & l'vtilité publique ils seroient refusans de payer, qu'il y apporteroit la contrainte & la seuerité.

Mais auparauant que le Receueur en puisse venir là, il doit faire ses diligences contre les manans & habitans, afin de les exciter à leur deuoir, & puis où il n'en pourra cheuir, doit rapporter aux Esleuz

ses exploits, & leur demander que pour les contumaces notoires des habitans, & pour euitier au retardement des deniers du Roy, il luy soit permis s'adresser au premier d'iceux, & le contraindre par corps pour tout le deub de la paroisse, qui est la regle ordinaire, & qui se doit exactement obseruer en telles matieres.

Laquelle tant s'en faut que le Receueur intimé, ait fuiui & pratiqué en ceste cause, qu'au contraire, vous auez entendu cōme de plain fault sans permission aucune de Iuge, sans faire apparoir de diligence de sa part contre les habitants, sans auoir discuté le Collecteur, il a fait emprisonner l'appelant, qui est vn pauvre particulier de sa paroisse, & non content de tenir sa personne, mais encores *ut rem auferret cum puluisculo*, comme dit le Comique, a saisi ses meubles & ses cheuaux, dont il souloit labourer sa terre; qui est vne contrauention notoire à l'ordonnance, arrests & reglemens donnez sur icelle; Pour raison de quoy le Receueur doit estre déclaré auoir esté bié intimé en son nom, pource qu'il importe à l'honneur du Roy, comme de tous bons Princes que tels officiers excedants le deu de leurs charges, à la foule & oppression

M ij

des peuples, ressentent la rigueur de la Justice, & qu'il soit permis à vn chacun d'en poursuiure la reparation. Ce que Pline a voulu signifier *in laudat. Traiani*, disant, *Dicitur aëtori atque etiam Procuratori tuo, in ius veni, sequere ad Tribunal*. Et Saluian à mesme propos, *pauent quippe aëtores, pauent silentiarij, pauent procuratores: prope ut inter istos omnes, nullorum minus serui sint quàm dominorum suorum*.

Et partant nous supplions la Cour faisant droict sur l'appel dudit emprisonnement & saisie, declarer tout ce qui a esté fait par ce Receueur iniuste & tortionnaire, & le condamner en tous despens dommages & interests dudit appellant. Et d'autant que la pluspart des Receueurs commettent ordinairement pareilles fautes, dont on a veu plusieurs pauvres familles ruinées de fond en comble, nous requerrons leur estre de rechef enioinct d'observer exactement ladite Ordonnance, & anciens arrests de la Cour, sur peine d'amende arbitraire, & de suspension de leurs charges. Ce que la Cour ordonna par son Arrest du Mois de Ianuier, 1596.

Depuis lequel Arrest, ayans recogneu l'extreme negligence des habitans des pa-

roiffes au faict de la collecte & leuée de la taille: & les fraudes & abus dont aucuns particuliers se seruent pour rendre illusoires les executions & contraintes qui se font contr'eux pour le payement de leurs taxes: mesmement plusieurs maluerfations que les Receueurs & Sergents commettent ordinairement en cest endroict, au grand preiudice du seruice du Roy, & de son peuple; & à fin d'y pouruoir à l'aduenir, & faciliter la leuée des deniers de sa Majesté, auons supplié la Cour donner le reglement qui ensuit.

Reglement sur le faict de la collecte des tailles.

LA Cour, les Chambres assemblées, pour deliberer sur les articles presentez par le Procureur general du Roy, pour le reglement de la leuée & perception des Tailles, Taillon & Cruës.

A ordonné & ordonne que d'oresnauant & dès le commencement de l'année, suyuant les Arrests par elle donnez, les manans & habitans des parroisses en chacune election, seront tenus

QVINZIESME

ſ'assembler à ſon de cloche, yſſuë de Meſſe parochiale, ou de Veſpres, pour proceder à l'election de deux ou quatre Aſſecurs, ſelon la grandeur & eſtendue desdites paroiſſes, & d'un ou deux collecteurs pour faire le departement & la leuée de tous les deniers qu'il conuiendra leuer pour le ſeruiſe du Roy, pendant & durant ladite année.

Que lesdits Aſſecurs qui auront eſté nommez d'experience, probité & integrité requiſe pour faire ledit departement, ſeront tenus dedans la huiſtaine apres que les Commiſſions des Preſidens & Eſleux auront eſté portées à ladite paroiſſe, & leur auront eſté deliurées pour toutes preſcriptions & delaiſ, de faire l'aſſiette, & à faute de ce faire, tenus payer en leurs propres & priuex noms.

Qu'auiſſi toſt que l'aſſiette aura eſté faite, ils ſeront tenus porter les roolles auſdits Preſidens & Eſleux pour les ſigner: ce que ladite Cour leur enioinſt faire promptement & ſur le champ, ſans prendre autre ſalaire que celui qui leur eſt ordonné, à peine de concuſſion.

En uertu dudit roolle ledit collecteur ou collecteurs feront diligence de faire la leuée & collecte des deniers ſur chacun des particuliers habitans de quartier en quartier, & ſans remiſe ou delay aucun, & les porter és mains des Receueurs des Tailles, & dedans le temps des Ordonnances.

Ordōne ladicte Cour, qu'à la diligence de l'ancien Procureur Syndic dans la huiétaine apres l'enuoy des Commissiōns sera procedé à l'election des Affseurs & Collecteurs, & d'un nouveau Procureur Syndic, à la diligence duquel dedans la huiétaine apres ensuyuant, lesdits Affseurs serōt tenus d'asseoir, & les Collecteurs tenus leuer & payer dedans le temps de l'ordonnance: Autrement les refusants ou dilayants, à faute de ce faire dans ledict temps, & iceluy passé seront contraincts en leurs propres & priuez noms, & emprisonnemens de leurs personnes au payement desdites Tailles, Creües & Taillon, pour toute la parroisse, sans leurs recours contre les habitans.

Et parce qu'en procedant à l'Election desdicts Affseurs & Collecteurs, les habitans pourroient eslire des nō idoinēs & solubles, & des plus pauvres de leurs paroisses; qui seroit, en ce faisant, rendre les executions & contrainctes illusaires à l'encontre d'eux.

Ordonne ladicte Cour, que lesdicts habitans seront tenus de nommer & eslire des plus aisez ou mediocres, resseans & solubles de leurs paroisses, & dedans trois iours apres leurs elections enuoyer au Greffe des Elections les noms, surnoms, qualitez & demeurances: & à faute de ce faire, ou en cas d'insuffisance, apres une simple sommation faite à leurs personnes ou domiciles,

& deüë perquisition des meubles, seront lesdits habitans & chacun d'eux seul & pour le tout contrainsts par saisie & vente de leurs biens, sauf leurs recours contre les corps des manans & habitans.

Et pour obuier aux fraudes, abus, maluersation & concussions, que les sergens des tailles commettent au fait de leurs charges avec la retardation, & le plus souuent perte entiere des deniers du Roy, Ordonne ladite Cour que lesdicts Sergens auront leur departement des paroisses, lequel sera changé tous les ans: & si tost qu'ils auront receu les contraintes des Recenseurs, seront tenus dans trois iours se transporter és parroisses de leursdits departements. & y faire le deu de leurs charges, & rapporter dedans un mois du iour & datte que les contraintes, & quittances leur auront esté baillees, leurs procès verbaux & exploicts, & les deliurer ausdicts Recenseurs. Et en cas de negligence, cōniueñce, maluersation ou concussion, seront par les Presidens & Eleus suspendus ou priuez de leurs estats, & leur procès faicts & parfaicts, punis exemplairement & corporellement, sil y eschet.

Et parce qu'il n'est raisonnable que lesdites poursuites soient faictes aux fraix, despens & diligēce des Recenseurs, qui sont assez empeschez à faire venir les deniers du Roy, sans s'occuper en procès:

Ordonne la Cour, qu'en remettant par ledit Receveur les procès verbaux, bien & deüement faiëts, desquels il se voudra plaindre, ensemble sa plainte signée, memoires & instructions ès mains des Substitus dudit Procureur general en chacune duscites Elections, ledit Substitut sera tenu faire informer, & faire toutes les poursuites qui sont necessaires iusques à sentence definitive inclusiuement & seront les fraiz aduancez sur les deniers destinez aux frais de iustice, sauf à les repeter sur les manans & habitans ou particuliers, lesquels en cas de negligence ou faute y seront condamnèz.

Et à faute de rapporter par lesdits Sergens les procès verbaux dedans ledit temps, sera procedé extraordinairement contr'eux à la diligence desdits Substitus, & seront condamnèz iceux Sergens à payer en leurs noms, & à ce contrainct par saisie & vente de leurs estats & biens, & emprisonnements de leurs personnes, sauf à eux leur recours pour les deniers du Roy : & neantmoins les Eleus pourront commettre en leurs lieux audit cas personnes suffisantes & capables, le Receveur de l'Election pour ce faire appellé.

Pour obuier à l'abus que peuuët commettre toutes sortes de personnes pour l'aduen du bestial trouué en la possession des contribuables aux tailles : La Cour a ordonné & ordonne que de tout

Q V I N Z I E S M E

qui sera baillé à croist ou autre profit, sera fait & passé contract par deuant Notaires, sans que ledit bail puisse estre prouué par escritures pures priuées ny tesmoings, ausquelles on n'aura aucun esgard, & sera signé des Notaires, tesmoings & parties suyuant l'Ordonnance.

Et où le bail se trouuera ainsi deüement fait, contenant la quantité du bestial & le poil, aduenant qu'il soit saisi, sil y a aucune augmentation de profit, ladite augmentation partagée suyuant le bail, la portion appartenant au fermier pourra estre saisie & vendue pour les tailles tant seulement. Et ce qui se trouuera plus entre les mains & possessions dudit fermier que le contenu audit bail.

Fait la Cour inhibitions & deffenses à toutes personnes de prester leurs noms pour ayder à la simulation & deguisement des contrats, ou en faire & passer aucuns en fraude des Tailles du Roy, à peine de confiscation du bestial & de punition exemplaire : & enioinēt aux Substituts dudit Procureur general de tenir la main pour descouurir lesdites fraudes, & qu'elles soient exemplairement punies.

Ordonne aussi la Cour que d'oresnauāt les Receueurs des Tailles ne pourront bailler aucunes quittances à ceux qui sōt assignez sur eux pour s'en faire payer, ains feront les poursuittes & diligences

eux-mesmes pour ne constituer les habitâs des paroisses en fraiz: & quant à celles qu'ils ont baillées par le passé, nō payées & acquittées sur lesdites paroisses, serōt tenus lesdits Receueurs de les reprendre, sans neantmoins que ceux qui les ont eues se puisset pour le payemēt adresser à l'encōtre d'eux, mais se retirerōt si bō leur semble par deuers le Roy en son Conseil, pour leur estre pourueu de nouvelle assignation selon son bon plaisir, desquelles quittances rendues desdits Receueurs des Tailles pourront faire reprise en leurs comptes, & pour cest effect se pourueoir en la Chambre.

Et quant aux maluersations commises par les Huissiers ou Sergens employez au recouurement des sommes portées par lesdites quittances, Ordonne la Cour qu'à la diligence des substituts dudit Procureur general, il sera informé contr'eux, & des insolences, violences & excez commis par les gens de guerre qui leur ont assisté, sans que lesdits Receueurs en soient tenus, sinon que lesdits excez, forces & violences fussent authorisées de leur presence ou aduen, ou que l'on pretendist qu'il y eust de leur fait.

Enioinēt ladite Cour à toutes personnes de quelque qualité & conditiō qu'ils soiēt, de faire ouuer-ture de leurs maisans ou chasteaux aux Serges qui seront commis & deputez pour cōtraindre les habitans redeuables desdites tailles qui s'y seront reti-

rez, à peine d'estre tenuz au payement des deniers du Roy en leurs propres & priuez noms.

EnioinEt aussi ladiete Cour aux Preuosts des Marechaux de faire de trois mois en trois mois avec leurs Archers vne cheuauchée par les paroisses de leurs Eslections, sans prendre aucun salaire, à peine d'amende arbitraire, & d'estre descheux de leurs priuileges. Fait en la Cour des Aydes le 17. May, 1596.

SEIZIESME PLAIDOYE.

Que toutes personnes de quelque qualité ou condition qu'ils soient, mesmes les Ecclesiastiques, doiuent contribuer aux fraiz qui se font pour honorer les premieres entrées des Roys es villes de leurs Royaumes.



OMME entre les charges publiques, les vnes sont du tout onereuses, viles, abiectes & roturieres; & les autres au contraire, quoy qu'incommodes d'une part, sont toutesfois d'ailleurs accompagnée d'honneur

& de merite : Ainsi a on iugé par vne bien-
seance ciuile, qu'on deuoit asservir seule-
ment a celles là les hommes mechaniques,
roturiers & ignobles : Mais qu'a celles-cy
vn chacun sans acceptation de personne, y
deuoit estre comprins; qui est vne differen-
ce notable cottée en gros *in l. maximarum,*
C. de excus. mune.

Et bien que nostre but ne soit pas de les
distinguer maintenant, si dirons nous que
toutes les charges & fonctions qui regar-
dent principalement l'honneur & le res-
pect que nous deuons à la Majesté des
Roys, sont du nombre de celles, qui sont
plus honorables qu'onereuses à ceux qui
y contribuent, d'où Seneque print occa-
sion de dire *lib. 3. de Benef. impensæ adiectio ob*
efficiū, personam non minuit, sed auget & co-
honestat. & plus à ce propos l'Empereur
Const. in l. 5. C de dignit. en ce seul mot, *sit*
namque dignitas quod nobis iubentibus sustine-
tur, voulant signifier que de despendre
pour honorer son Prince, c'est acquerir,
& que luy seruir, c'est vne dignité.

Or entre les charges qui se supportent
pour honorer les Princes, il n'y en a point
dont vray-semblablement ils soient plus
curieux & ialoux, que des dons, fraiz &

impenses qui se font *benè ominandi gratia*, & pour illustrer leurs premieres entrées és villes plus celebres de leurs Royaumes: Comme de faiët nous apprenons des liures de l'antiquité, que rien ne se faisoit avec plus de deuotion, & d'emulation: *Quinte Curce* le tesmoigne *lib. 5.* parlant de l'entrée d'Alexandre dans Babylone, *plures obuiã egressi sunt, inter quos Bagophanes artis & regie pecunie custos, ne studio à Maxeo vinceretur, totũ iter floribus, coronisque constrauerat, argenteis altaribus utrõque latere dispositis, quæ nõ thure modo, sed omnibus odoribus cumulauerat.* Ammian Marcellin au semblable parlant d'une entrée de l'Empereur Iulian *lib. xxj.* *Eũmque (inquit) suburbanis propinquantem amplius nimiumq; protentis, militaris & omnis generis turba cum lumine multo, & floribus votisque faustis Augustum appellans & dominum, duxit in curiam:* Philostrate *lib. 5.* en dit autant des entrées que fit l'Empereur Vespasian és villes de l'Egypte, & en ces termes, *πρὸς ἰόντι δὲ τῷ αὐτοκράτει, τὰ μὲν ἱερὰ πρὸς πυλῶν ἀπέντα, καὶ τὰ τῇ Αἰγύπτῳ τέλη, καὶ οἱ νόμοι καὶ ἡ Αἰγύπτου τέλμηται φιλόσοφοί τε ὡσαύτως, καὶ ἡ σοφία πᾶσα.* Polybe dit le mesme parlant de la reception que firent les Atheniës d'Attal⁹ en leur ville, sçauoir est qu'un

chacun du peuple luy fut au deuant, n'espargnant rien pour l'honorer: que les Prestres ouvrirent les temples, & immolerent les victimes. Plutarque *in Dione*, Suetone *in Calig. & Galba*, disent la mesme chose.

Et semble que ces anciens peuples auoient emprunté ceste obseruance, sur ce qu'ils souloient faire quands ils transportoient les Idoles de leurs Dieux d'une ville en autre, dont Ciceron nous fait preuue *lib. 10. in Verrem*, disant, *Quid hoc tota Sicilia est clarius, quam omnes Segestanas matronas & virgines conuenisse, cum Diana asportaretur ex oppido? unxisse unguentis? complexisse coronis & floribus? thure odoribusque incensis usque ad agri fineis prosecutas esse?*

Or combien que les dons qui se faisoient par les villes pour honorer les entrées de ces Empereurs, *non imperarentur, sed sponte & gratuito præstarentur*, dit la Loy vnique, *C. de auro coron.* Et que la despenſe qui se faisoit *dum sacri Imp. vultus per vrbes deferabantur*, se leuaſt aussi sur les volôtaires seulement, comme il est porté *in l. unica C. publicæ lætitiæ nūciatores ab inuitis ne quid accipiant. lib. 12.* de la mesme sorte que *munus aduentitium* qui se donnoit par les Prouinciaux aux Consuls, ou Proconsuls, *in introi-*

tu prouincia, dependoit de la pure volonté des villes, d'où Vlpian *in l. solet. ff. de off. Procons.* l'appelle *Xenium*. & Cicéron en l'oraison *in Pison. honorarium* ; Toutes-fois il vous appert de ce que dessus, qu'il n'y auoit charge & fonction en l'Empire, qui se payast avec plus d'allegresse & de volonté.

Et de fait c'estoit vne des choses qui en-
floist plus l'espargne & le thresor public,
tesmoin ce que dit Appian Alexandrin, au
2. des guerres Ciuiles, que Cæsar pour vne
seule fois mit en l'espargne trois mille
marcs d'or en deux mille sept cens vingt-
deux couronnes, qu'il luy auoient esté en-
voyées pour l'ornemēt d'une entrée triom-
phale qu'il fist en la ville de Rome. Qui est
bien pour monstrier que peu s'excusoient
de ceste cōtribution, & qu'ores qu'elle fust
remise à la volonté, que de la neantmoins
les peuples s'y estimoient d'auantage obli-
gez ; Comme aussi c'estoit vne des choses
dont la despense estoit plus profuse & im-
mense que de toutes autres actions solen-
nelles qui se faisoient en l'Empire, ainsi
qu'on le recognoist dans Orose, qui s'est
pleu entre les autres historiens à en des-
crire quelques vnes. Iusqueslà, qu'il se lit
que

que saint Augustin desiroit sur tout d'auoir veu ou de veoir trois choses, Iesus-Christ en face, saint Paul preschant, & vn Empereur faire son entrée dans la ville de Rome. Mais vne des plus remarquables despeses qui se faisoient en icelles, c'estoit que ils rompoient les murailles de la ville ou l'Empereur entroit, comme Suetone le rapporte *in Nerone*, disant, *reuersus Neapolin, albis equis introijt disiecta muri parte, ut mos hieronicarum est*: ce qui se faisoit toutesfois par forme de flatterie, ou adulation enuers leurs Princes, dit Plutar. 2. *sympo.* pour signifier que les villes n'auoient que faire de forteresses & de murailles, où entroit vn Prince genereux & vaillant, De sorte qu'estant ceste despenfe si sumptueuse & excessiue, il n'est point à presumer qu'un chacun n'y contribuast.

Comme en toutes autres choses qui concernoient l'honneur des Empereurs, ce peuple là, y estoit extremement affectionné & deuotieux: ainsi qu'on le recognoist és vœux qu'ils celebroident par chacun an pour leur prosperité, & dont Plin le ieune fait mention, *lib. 10. epistol. ad Traianum*, disant, *solemnia vota pro tua incolumitate, qua publica salus continetur, suscepimus Domine,*

N

pariter & soluimus. & ailleurs, vota Domine priorum annorum nuncupata alacres latique persoluimus, nouâque rursus curante commilitonum & provincialium pietate suscepimus, appellant ceste fonction vne pieté, & tesmoignant que les plus notables de la Prouince, mesmes les prestres & les gens de guerre priuilegiez en toutes autres choses, y contribuoient fort volontairement.

Et depuis ces mesmes Empereurs monstrent bien qu'ils estoient deuenus ialous de cest honneur, quand ils ordonnerent par vne loy expresse, qu'vn chacun contribueroit pour faire la liure d'or qu'ils appelloient *libram auri obrizi*, qu'on souloit leur presenter tous les ans, lors de la celebration de ces vœux, comme il se lit *in l. unica C. de oblat. voter.* en ces mots, *statuentes vt deinceps sequentibus annis vniuscuiusque sedulitas principibus suis talia inferat semper & deferat.*

De la mesme sorte que les Roys de Perse ayans eu à singulier plaisir de voir que leurs subiects par vne loüable coustume leur alloient offrans des dons à toutes rencontres qu'ils faisoient de leurs majestez, de peur qu'avec le temps ils ne vinsent à y manquer, firent loy expresse portant de-

fenses à toutes personnes de quelque qualité ou condition qu'ils fussent, de se trouver deuant la face du Roy, sans luy faire present de quelque chose, tesmoin ce qu'Elian escrit, *lib. I. var. hist. cap. 31.* de ce rustique Synetas, qui s'estant de fortune rencontré deuant le Roy Artaxerxes, n'ayant rien pour luy en faire don, de peur de contreuenir à la loy, puisa dans le creux de ses mains, de l'eau d'un prochain fleuve, & la luy vint presenter; ce que le Roy trouua si agreable, qu'il fist receuoir & garder ce present en vne phiole d'or; qui est pour dire que les Princes sont tres-desireux qu'en telles actions qui tesmoignent & font paroistre le zele & affection qu'on leur porte, vn chacun s'en acquitte au mieux qu'il luy sera possible.

Toutes lesquelles raisons & exemples doiuent suffire, pour vous faciliter le iugement de la question agitée en ceste cause, sçauoir si le Clergé de Troye, doit estre astraint contribuer aux fraix & despenfes qui ont esté faictes par les habitans d'icelle, lors que le Roy y fist sa premiere entrée: Car la Majesté de noz Roys ne nous estant moins auguste & venerable, qu'estoit celle des Empereurs de Rome

à l'endroit de leurs peuples , il est certain que personne ne se peut dispenser, qu'avec reproche & infamie de contribuer à l'honneur qui leur est decerné , non seulement en telles occurrences : mais aussi en toutes autres choses qui concernent le cult & le respect qui leur est deu.

N'est à propos faire force en cest endroit, sur le priuilege des Ecclesiastiques : car nous en demeurons d'accord, & recognoissons que par toutes les loix anciennes , les Prestres & autres superintendans de la Religion (quelle elle fust) ont tousiours esté priuilegiez en plusieurs choses, mesmes par la loy des Iuifs , comme au *Leuit.* 27. voire par celle des Idolatres , comme il se remarque de Pharaon au *Gen.* 47. Les Romains mesmes affranchissoient de toutes charges & seruitudes leurs Pontifes, Augures, Prestres & vierges Vestales : comme il se lit en Tite Liue , Fenestella , & Valere Maxime : Et qu'il est trop plus raisonnable , que ceux qui seruent à la religion Chrestienne, comme seule veritable , soient plus priuilegiez que les autres.

Mais ce priuilege des Ecclesiastiques , se doit appliquer seulement , comme nous auons dit cy-dessus , aux charges qui sont

de leur nature viles , roturieres & abiectes, comme aux tailles & peages, *atque etiam paraueredis, angarijs, temonis necessitati, ὄρεσι καὶ ὑμῶν, & autres telles charges plebeiennes, desquelles sont exemptes, supremæ omnes dignitates, dict. l. Maximarum, & l. I. C. Theod. de Episco. & cleric.* Et ne se doit estendre aux autres fonctions qui apportent plus d'honneur & de merite que d'incommodité à ceux qui y contribuent, comme au fait dont est question, auquel on ne demande aux Ecclesiastiques qu'une legere contribution de deniers, pour en acquerir la gloire d'auoir tesmoigné le deuotieux respect qu'ils ont au seruice de leur Roy. Et de fait nous lisons au I. de Machabées ch. 13. que le grand Prestre de Hierusalem ne s'exempta point d'honorer comme les autres l'entrée du Roy Demetrius, lors qu'il se fit maistre de la Iudée, & luy enuoya en don & present de sa part vne couronne d'or. *sancta enim apud omnes debet esse persona Principis, & quouis patrimonio sanctior,* disoit vn ancien.

Le semblable se doit obseruer en toutes choses qui regardent la gloire & la grandeur de sa patrie & conseruation d'icelle, ainsi que Cicéron nous en donne en exem-

ple in Lucullo, d'un prestre nommé Veratius, disant qu'en son honneur fust faicte vne telle inscription, *Veratie A. F. Pal. qui cum privilegio sacerdotij Cœnifensis munitus potuisset muneribus excusari, præposito honore patriæ, ædilitatem laudabiliter administravit: & à mesme raisõ Gregoire 9. deffendit que personne sub prætextu sacrae fûctionis eust à s'exempter du guet & garde de la ville où ils seroient demeurans, c. peruenit. de immunit. Eccles.* Car outre que les Ecclesiastiques sont obligez à cest office honorable, comme subiects du Roy, ils y sont encore plus astraits pour tant de fiefs, chasteaux, censives, rentes nobles, & iurisdicctions qu'ils tiennent de leurs Majestez, estans fondateurs de la pluspart des Eglises, & patrons naturels de toutes, specialement de grandes & principales Eglises, comme Eueschez, Abbayes, Priorez, ainsi que l'auouent mesmes les Canonistes sur le c. *lectis. distinc. 63.* & entre autres l'Archeuesque de Panor. au c. *veniens, numer. 4. tit. de accusat.*

A ceste occasion le Clergé de France ne fist aucune difficulté de contribuer de ses moyens pour payer la rançon des feüz Roys Iean & François: & apprenons des registres de la Chambre des Comptes,

qu'il a tousiours contribué aux dons qu'on souloit cy-deuant faire aux Roys pour les fraiz de leur couronnement, & des funeraillles de leur predecesseur : & specialement pour le faiët dont est question, on nons a iustifié par les extraits des comptes rendus en la chambre par les Receueurs de ladite ville de Troye, que le Clergé d'icelle auoit autresfois volontairement contribué aux mesmes fraiz & despenses qui furent faites en ladite ville lors que les Roys Loys douziesme & François premier y firent leurs premieres entrées : comme aussi ce seroit hors de toute raison, se vouloir seruir & preualoir de son priuilege, à l'endroit de celuy qui en est l'auteur & le protecteur tout ensemble.

Partant nous supplions la Cour, faissant droict sur l'opposition formée par lesdits Ecclesiastiques, les debouter d'icelle, & ordonner qu'ils seront contraincts par saisie de leur temporel au payement des taxes auxquelles ils ont esté cottisez pour les fraiz & despense de ladite entrée. Ce que la Cour ordonna par son Arrest du mois d'Avril 1596.

N iiij

DIXSEPTIESME PLAIDOYE'.

Sur la translation du domicile des contribuables aux tailles.



OMBIEN que l'arrest de Decembre 1592. donné par la Cour sur la translation des domicilles des contribuables aux tailles ait semblé à plusieurs rude & extraordinaire, pource qu'il oblige contre la liberté naturelle les subiects du Roy, ou de demeurer perpetuellement en vne mesme paroisse, ou d'y contribuer à toutes les charges, tout ainsi que fils y estoient demeurans : toutesfois comme le Marinier a des quadrans pour la nuit, & pour le iour, pour la bonace, & pour la tourmente : le Magistrat au semblable a des loix propres pour la paix, & d'autres pour le temps de guerre, l'Arrest dont nous parlons est vne d'icelles; d'autant qu'à cause des troubles aucuns ayans recherché les chasteaux & places fortes, soit en l'obeyssance du Roy, ou tenuës par ses ennemis;

& les autres s'estans retirez és villes fortes ou franches, pour à la faueur d'icelles s'exempter des charges : les paroisses du plat pays se feroient trouuées si desnüées, & les terres en la pluspart si desertes, qu'il n'y auoit moyen d'y asseoir, cueillir & leuer les tailles; ce qui eust tourné au grand preiudice de l'Estat, si on n'y eust donné ordre par le moyen dudit Arrest, comme estant vn propre & ancien remede contre tels inconueniens: car nous apprenons des registres de la Cour, que Charles 7. & deuant luy le Roy Iean, durant le cours des guerres de leur temps, firent des ordonnances semblables, & à mesme intention: & Tite Liue nous enseigne que jadis les Latins le practiquerent entr'eux, quand apres auoir ressentý pareilles incommoditez de la trop libre translation de domicile de leurs concitoyens, en la ville de Rome, ils enuoyerent leurs deputez pour s'en plaindre au Senat, & vendiquer ceux qui s'y estoient retirez, disans qu'autrement *per paucis lustris futurum erat, ut deserta opida, deserti agri nullum militem dare possent*, & que suyuant ce la charge ayant esté commise au Preteur Terentius pour en faire perquisition & recherche, ils firent ordon-

ciuit. rus habit. Par ce moyen aussi leurs villes demeuroient tousiours fornies d'hommes de moyens & facultez pour secourir l'Estat, & subuenir aux charges d'iceluy, estant vrai ce qu'un ancien disoit, *urbis habitata preciosa admodum possessio est: quæ autem caret hominibus, caret etiam bonis.*

Ils n'estoient pareillement moins curieux que le plat pays ne demeurast degarny d'hōmes, car ils le remplissoient en la pluspart de ceraines personnes qu'ils appelloient *adscriptitios* pour ce que *addicti glebæ, cultui agrorum perpetuò incumbabant*, & ne pouuoient transferer de là leur domicile pour quelque occasion que ce fust, *l. 2. C. de agric. & censit.* & estoient ces hommes la *interiecti inter seruos & liberos*, pour ce que comme ils estoient francs à l'endroit des hommes: aussi on les reputoit serfs de la terre ou heritage *cui erant adscripti*, d'où l'Empereur les appelloit *terræ membra*, in *l. f. cod. tit.*

Et furent ceux à qui la culture des chāps fust commise depuis que l'Empereur Adrianus, au rapport de Spartian, eust osté *ergastula ista*, ou ils enfermoient la nuit les serfs & esclauues *qui in id operis damnati erant*, & desquels entend parler Colūmelle

au commencement de son œuvre, disant, *rem rusticam pessimo cuiq; servorum velut carni-fici noxæ dedimus, quam maiorum nostrorum optimus quisque optimè tractavit* : car comme jadis les plus grands personnages s'occupoient à ceste vacation, depuis aussi *labente florida illa felicitate*, elle fust laissée aux plus vils & misérables esclaves, dont Pline se plaint lib. 8. disant, *ipsorum manibus Imperatorum coli solitos agros, ut par est credere, gaudente terra vomere laureato & triumphali aratro, nunc eosdem vineti pedes, damnata manus, inscripti vultus exercent* ; ce que l'Empeur Tibere (dit Suetone) voulut reformer de son temps ; mais nous n'en recognoissons le changement, qu'au dernier temps de l'empire, & lors qu'ils establirent par les champs *adscriptitios illos*, dont nous parlons, qui estoient libres en toutes leurs actions, sinon en ce qu'ils ne pouvoient changer de demeure, ny de laisser la terre & le fonds auquel ils estoient destinez.

Et valoient ces hommes là à deux effets, l'un afin que la terre, quelque guerre ou autre incōmodité publique qui peult survenir, fust tousiours cultivée, qui est l'un des plus grans soins que l'on doive avoir

en tous Estats & Republiques comme de chose tres-necessaire, & sans laquelle rien ne peut subsister : l'autre, afin que l'Estat fust payé & seruy de ses tributs ordinaires, dont la pluspart se leuoit sur les terres, mesmes en especes de fruiçts, comme l'enseigne Iustinian en sa Nouvelle xvij. & autres Emp. au tiltre *de annonis & tributis* : & deuant eux les Iurisconsf. au tiltre *de censibus* & Appian *lib. 1. ἐμφυλίων*, & Cicero *Ac. 5. in Verrem*. car cela fut perpetuellement obserué en l'estat de Rome.

A l'exemple desquels noz ancestres se seruoient ainsi estroittement de leurs colons, que Sidonius 5. *epist. ad Prud.* appelle *originales inquilinos*, *vel personas colonarias*, dont nous voyons encores quelques restes en ces censiers de main morte és Coustumes des Champaigne, Bourgogne, & Auvergne, qui ne peuuent changer de domicile, & sont tenus de cultiuer & entretenir perpetuellement les terres qu'ils detiennent, & quelquepart qu'ils aillent demeurer, peuuent estre vendiquez par leurs Seigneurs.

Ces exemples donc bien que seueres, mais ioints avec l'vtilité qui en est proueuë, ont deu faire trouuer iuste l'arrest

dont nous parlons comme ayant esté nécessaire pour la qualité du temps qui a couru : car ne plus ne moins que l'intemperance du malade force quelquesfois le medecin à des remedes rudes & cruels : ainsi les mauuais deportemens d'un peuple peuuent & doiuent , selon que la necessité y est , exciter le magistrat à des ordonnances seueres & extraordinaires lesquelles pour ce qu'elles sont vtils, seront aussi estimées iustes.

Mais aujourd'huy qu'il a pleu à Dieu par sa bonté & misericorde, vertu, & prudence singuliere du Roy, ramener la pluspart des Prouinces & villes de ce Royaume à son obeyssance, reduire les cœurs de ses subiects en leur deuoir, & que par ce moyen les paroisses parauant desnuées d'habitans se treuuent repeuplées & remises en leur premier estat, sinon du tout, à tout le moins pour la plus grande partie, certes la seuerité de l'arrest dont est question doit cesser, comme est cessé le subiect sur lequel il estoit fondé. *vt enim quæ cõstituta sunt in pace, bellum plerunque abrogat; sic quæ in bello, pax sæpius,* disoit vn ancien; le magistrat estant tenu faire en cela ainsi que le Medecin, qui apres la maladie dis-

pèse & affranchit son malade de la rigueur de ses reigles & ordonnances, & le remet en la premiere liberté; n'estant raisonnable de laisser sans autre occasion ceste servitude entre les subiects du Roy si contraire & abhorréte de la liberté, dont les François ont tousiours esté extrêmement jaloux & curieux.

Car tout ainsi que les Romains ont triomphé en cela sur les autres nations, estant ainsi que presque en tous autres Estats la reigle *de populi fundis*, estoit exactement obseruée, par la quelle il estoit defendu de changer de cité, sans l'adueu & consentement de tout le peuple d'icelle, cela neantmoins ne fust oncques obserué en la ville de Rome, où il estoit libre de changer de cité & domicile, sans congé ou permission du pleuple d'icelle: ce que Cicéron demontre en l'oraison *pro Cornelio Balbo*, disant, *Curcui Romano liceat esse Gaditanum, sine exilio, sine postliminio, sine reiectione Romanæ ciuitatis, ubi se dicarit alienæ, cur Gaditano, sua deserta, Romam venire non licebit?* Pource qu'ils tenoient entr'eux pour maxime ordinaires *ius omne mutandæ ciuitatis non in legibus positum esse, sed in arbitrio & voluntate priuatorum.*

Les François au semblable ayants de tout temps constitué le plus hault point de leur gloire en la liberté dont ils ont prins leur nom, ont retenu & pratiqué ce mesme droit, & ne furent iamais astraits au preiudice d'icelle de demeurer perpetuellement en vn mesme lieu, & a esté de la bonté de noz Roys, de ne les auoir oncques forcez à cela contre leur naturel, sinon lors que pour frauder leurs droits, & se garentir ingratement des charges de leur patrie affligée, on a recogneu qu'ils abusoient de ceste liberté en la translation de leurs domiciles, qui est le mesme cas, où la Loy veut que celuy qui a changé de domicile porte les charges en deux lieux.

l. ult. C. de municip & origina.

Attendu donc ce que dessus, & que cest arrest n'a esté donné que par forme de reiglement prouisional, tant seulement, & pour la necessité du temps, laquelle par la bonté de Dieu est tantost cessée quasi en toute la France, & que d'ailleurs vous voyez naistre infiniz procez sur lesdictes translations & mutations de domiciles diuersement interpretées, qui apportent à plusieurs plus d'incommodité & de despenſe, que ne monte leur taxe de la taille.

taille. Nous supplions la Cour d'y pourueoir par reuocation, ou moderation de son arrest, ou tel autre reiglement que par sa prudence elle iugera propre pour le bien & soulagement des subiects du Roy. Surquoy,

L A C O V R, la matiere mise en deliberation, les Chambres assemblees, ordonna que pour l'aduenir, à commencer du iour saint Remy prochainement venant, l'arrest dudit vingtdeuxiesme Decembre, mil cinq cens quatre vingts douze, n'auroit plus de lieu pour les Elections entierelement reduites en l'obeissance du Roy, & qui ne sont ou seront exposees à la violence & force de ses ennemis, semble que tous les demeureans, es paroisses desdites Elections qui de present sont libres & reunies en l'obeyssance du Roy, seroient tenuës dans le premier iour d'Octobre prochain faire signifier aux habitans desdites paroisses, aux presnes des Messes parrochiales, ou issuë d'autre seruice diuin, la translation de leurs domiciles, & le lendemain en faire declaration à l'un des Marguilliers, ou Procureur Syndic de la paroisse, & dans trois iours apres l'insinuer

O

DIX SEPTIESME

& enregistrer au Greffe de l'Eslection en laquelle ils veulent & entendent demeurer. En quoy faisant ladite Cour declaroit ladite translation bonne & valable: & a enjoint aux Presidens, Lieutenans & Esleuz des Eslections, procedans au departement des tailles de leurs paroisses, y auoir esgard, & en descharger les paroisses dont ils seront departis, ainsi qu'ils aduiseront bon estre, sans vser de faueur & conuiuece. Et quât aux paroisses des Eslections du ressort de ladite Cour exposées à la violence des villes & places fortes occupées par les rebelles, ordonna ladiète Cour, que iusques à ce qu'elles fussent reduictes en l'obeyssance du Roy, le reglement dudit 22. Decembre y auroit lieu par maniere de provision: & apres ladite reduction, retourneroient au droit ancien, iouyroient & vseroient du reglement contenu au present Arrest, lequel à ce qu'aucun n'en pretende cause d'ignorance, seroit leu & publié à son de trompe & cry public en toutes les villes, bourgs & bourgades contribuables aux Tailles des Eslections du ressort de ladiète Cour, & encores leu, publié, & enregistré aux sieges de toutes lesdictes Eslections, à la diligence des Substituts, &c. Lequel Ar-

rest fut leu, publié & prononcé en l'audience en ladite Cour, le dixneufiesme iour de Iuillet, mil cinq cens quatre vingts quinze.

Il sera à propos de laisser icy pour memoire deux reigles nouvellement introduictes sur la translation des domiciles: l'une, qu'à ceux qui se retirent és villes franches, y demeureront cinq ans auant que pouuoir iouyr du priuilege d'icelles: comme il est contenu en l'Édict de Ianuier, 1599. l'autre, que ceux qui changent de paroisse, seront cottisez au lieu de leur ancienne demeure, iusques à ce qu'ils ayent demeuré par an & iour au lieu auquel ils ont faict publier qu'ils se vouloient retirer, comme le contient l'article 22. de l'Édict de Mars, 1600.

DIXHVICTIES^{me} PLAIDOYE'.

*Que les Esleuz ne peuuent de leur aucto-
rité & office diuifer les paroisses de
leurs Eslections.*



EST E question ne deuoit estre mise en controuerse, attendu les Arrests notoires donnez en cas semblables, & qui ont tousiours defendu telles diuisions, cōme preiudicia- bles au public, pour les raisōs qui ensuiuēt: L'une pource que diuisant les paroisses, ce feroit rompre & alterer l'ordre qui de tout temps a esté obserué au departement des tailles & autres charges de l'Estat: car tout ainsi qu'anciennement à Rome les tributs & autres leuées de deniers, s'esgaloient sur les trente cinq tributs, ainsi que dit Varron li. 4. en ces mots, *Tributum ductum à tribubus, quod ea pecunia quæ à populo impetrata erat, tributim à singulis pro portione census exigebatur:* ou bien sur les centuries, cōme le veut dire Denys d'Halicarnasse lib. 4. en ces termes:

Populo ita distributo, militum descriptionem per centuriarum diuisionem faciebat, ac tributum ex censu per easdem centureas imperabat. & peu apres, tum inita ratione pecuniarum quæ opus essent exercitui alendo, vestiendo, aut alia ratione ducendo, hic rursus populus diuidebatur in centum nonaginta tres centurias, & quid quamq; centuriam conferre oporteret, imperabat. Et quant au dehors de la ville de Rome, nous apprenõs de nos liures, que les tributs estoient leuez & departis par iurisdiccions, cõme il se voit in l. forma ff. de censib. in l. omne territorium C. eod. & in l. qui ex vico. ff. ad municip. où il est dit, villas, vicos, agrõsq; in solutione tributorum ijs subiectos fuisse ciuitatibus, quarum iurisdictioni suberāt. Tout de mesme en ce Royaume, le peuple ayant esté diuisé en Eslections, puis subdivisé en parroisses, les tailles & autres charges publiques ont esté tousiours departies & leuées sur icelles, dont est procedé ce qui se dit parmy nous par forme de maxime ordinaire (la Taille suit le clocher) qui est à dire que pertonne ne peut estre distraict ny se distraire de sa parroisse, pour payer à part & separément la Taille & autres charges : ce qui a esté entendu non seulement d'une personne ou d'une maison, mais de tout vn village, faisant

part ou membre d'une paroisse.

Et peuvent noz paroisses se rapporter à ce que ces mesmes anciens appelloient *curias*, qui fut vne autre subdiuision du peuple faicte par Romulus. & de faict ledict d'Halicarnasse *lib. 2.* parlant de ces curies, les décrit quasi de la mesme sorte que nous pourrions faire nos paroisses, disant, *Sacra sua singulis curijs constituit, suis cuique diuis, quos venerari semper debebant, assignatis, atque etiam una cum suis Sacerdotibus, sacris suis solennibus peragendis curiales adesse oportebat, eratque singulis curijs communis veluti focus consecratus: haud secus quàm apud Græcos in ὀπυταρείοις*, iusques là aussi que quelques vns voulans designer ces curies les appelloient *παροικίας*, id est *accolarum cōuentus*, & *accolatus*: *παροικοί enim propriè sunt accolæ, qui fanum aliquod accollunt, eiusdem scilicet fani consortes.* Qui est la mesme chose que ce que les Grecs appelloient entr'eux *φρατρίας*, qui estoient certaines compagnies d'hommes, demeurans en mesme lieu, tenans mesme religion, & vfans du mesme puits, qu'il appelloient *φρέαρ*, vnde & *φρατρίαι* dictæ. A fin donc d'entretenir cest ordre de tout temps obserué au departement & assiette des tailles du Royaume, les diuisions & desmembre-

mens desdites paroisses ont tousiours esté prohibées & deffendus.

Vne autre raison aussi de ceste deffense est, d'autant que l'enceinte & confinages des paroisses, ainsi que des autres territoires, *iuris sunt publici*; & comme ils ont esté limitez & reglez par auctorité publique: ainsi on ne peut rien innouer en iceux, que par la mesme puissance, c'est à dire du Prince, par le moyen de ses lettres, & verification legitime d'icelles. A ceste occasion nous lisons dans *Frontinus lib. de Colon.* que les bornes & limites qui terminoient & confinoient les colonies, les prefectures, les tributs & curies, estoient appelez *limites Augustei*, & le continent de leur territoire, *ager limitibus Augusteis diuisus & assignatus*, comme la mesure d'iceluy est appelée dans *Siculus Flaccus*, *certa & legitima agrorum limitatio siue pertica*, de laquelle si l'aduenoit different, ce mesme auteur veut, que pour le decider on eust recours aux loix publiques, disant, *de quibus territorijs, si quando quaestio mouetur, respiciuntur leges ciuibus datae, id est colonijs, municipijs, praefecturis, &c.* Qui est pour monstrier, que toutes ces choses estoient establies & réglées par l'auctorité du Prince & de la loy, & que

rien ne se pouuoit changer en icelles, que par la disposition expresse de ces deux : cōme mesmes deuant le temps d'Auguste, ils eurent les loix dictes, *Peducea*, *Alliena*, & *Flauia*, en singuliere recommandation, cōme gardiennes des limites de tous ces territoires. De faict Tite Liue & Dionysius nous apprennent, que pour augmenter le nombre des tributs par le démembrement des trois premiers l'interuention du Roy Seruius fust necessaire; Et que depuis souz le Consul Appius Claudius ayant esté trouué expedient d'en croistre de rechef le nombre, il fust besoin d'en auoir vn arrest du Senat : Ainsi pouuons nous dire par mesmeté de raison, que noz parroisses ayans esté d'ancienneté bornées & limitées en certain territoire, ne se peuuent partir & démembrer que par lettres du Prince, données sur cognoissance de cause, & verifiées en la Cour.

Il y a encores vne autre raison; qui a tousiours empesché que telles diuisions & démembrements ne se fissent si aisément, c'est qu'on a recogneu que le plus souuent elles estoient recherchées & poursuuies par les plus riches, pour s'affranchir du tout ou de partie des tailles : ou par Sei-

gneurs de pouuoir & de port, tafchans par ce moien faire defcharger leurs fubieçts, à la foule, oppreffion & furcharge des autres plus foibles & impuiffans; qui eft vne chose de dangereufe confequence, & fur laquelle fust faicte iadis la loy des Empe- reurs, deffendant qu'aucun eust à receuoir en fa protection les villages & habitans d'i- ceux, pour les faire exempter des feruitu- des & contributions publiques. *Qui in fraudem publicæ functionis in patrocinium suum collatores receperint, centum librarum auri condemnationem subire cogantur. l. i. C. ut nemo ad suum patrocinium suscip. vicos & rustic. eorum.* Que si nous auions cest heur que d'en a- uoir vne semblable & auffi bien obseruée, nous ne voirions tant d'inegalité au de- partement de la Taille, & pour vne paroisse sauuées dix autres perdues & ruinées.

bb Toutes ces raisons, ioint le redoublemēt qui aduiendroit des fraiz, charges & in- commoditez des personnes, d'autant qu'au lieu d'vne commission & d'vne assiette, en faudroit deux, au lieu de deux Affecurs & Collecteurs, il en faudroit quatre : ont faict que de tous temps telles diui- sions ont esté reprouuées; Et pour les- quelles la cause des habitans de Boissi

sera trouuée iuste, ayants interiecté appel de ce que les Esleuz d'Estampes, sans lettres ny verification, & sans autre cognoissance de cause, de leur propre mouuement ont desmembré de ladite paroisse le village de Crecy, ores que de toute memoire ils ayent contribué ensemble, comme n'estans qu'une mesme communauté, v sans ensemblément *ijdem sacris, eodem templo, foroque & ceteris communibus*. Partant nous supplions la Cour faisant droit sur ledit appel, casser & annuler tout ce qui a esté fait en cest endroit par lesdits Esleuz; Et leur faire deffenses, comme à tous les autres Esleuz des Eslections de ce ressort, de diuiser & desmembrer les paroisses de leurs Eslections, sans lettres Patentes du Roy, bien & deuëment verifiées en la Cour, sur peine de suspension de leur charges. Ce que la Cour ordonna par son Arrest du mois de Feurier, 1596.

Le Roy à voulu confirmer ce reglement par son Edict du mois de Mars 1600. dont voicy l'article. Les hameaux qui ont esté distraits & separez du corps des paroisses, encores que ce soit à leur requisition & sur leurs plaintes, pour ce qu'ils estoient surchargez par les Bourgs & Villages prin-

cipaux, ausquels les paroisses sont assises, y seront reioints & reunis par les Esleuz au premier departement qu'ils feront : & n'y aura plus qu'un seul enuoy pour la paroisse entiere, y compris lesdits hameaux ; Et pour faire cesser les causes, qui auoient meue lesdits hameaux à poursuiure ceste separation, adiousteront les Esleuz en leur commission & au departement de la somme qui debura estre leuée sur toute la paroisse, de laquelle somme un tel hameau payera tant, sans neantmoins que leudit hameaux soient responsables de la Taille les uns des autres, ou du corps de la paroisse, ny pareillement la paroisse de celle desdits hameaux.

DIXNEVFIESME PLAIDOYE'.

*Sur l'immunité des gens de
guerre.*

DE toutes professions qui importent le plus au bien public, la militaire semble meriter un des premiers rangs, pour ce que toutes les autres (dit Ciceron, *orat. pro Mur.*) *latent in illius tutela* &

præsidio, & que comme dit Valere, *in illius sinu serenus tranquillûsque beata pacis status acquiescit*, c'est elle qui deffend & maintient le repos & estat de toutes choses, d'où cest ancien Poëte eut raison de dire,

---*Duo sunt quibus extulit ingens*

Roma caput, virtus belli & sapientia pacis.
 preferant la force des armes, à la sagesse de la paix, d'autant qu'à la verité c'est par le moyen de celle-la que les Empires s'accroissent, là où celle-cy ne vaut que pour conseruer plus aisément les conquestes de l'autre.

A ceste occasion les Grecs appellans ceste vertu militaire, ἀρετὴν, ἀπὸ τοῦ ἀρεός, à *Marte*, qui estoit le Dieu assistant d'icelle, & conferans puis apres ce mesme nom aux autres vertus, vouloient monstrier, dit Apulée, & Marcellin, qu'elle meritoit principalement ce tiltre, & que toute l'energie des autres dependoit de sa force. De la mesme façon que les Latins, pour designer la force & la vaillance vsent souuent en leurs liures, de ce mot simple de vertu, comme Cicéron en l'Epistre 3. ad *Plancum* : *omnia summa (inquit) consequutus es virtute duce, comite fortuna.* Et Saluste in *Cat.* *nisi virtus atque fides vestra satis spectata*

mihi foret, & cat. & le Panegy. de l'Emper. Theod. *Nam cum duo sint (ait) quæ claros duces faciunt , summa virtus , summaque felicitas :* voulans signifier , qu'elle seule merite ceste prééminence , puis que non seulement elle conserue les autres , maintient la liberté & la patrie, deffend & garde les citoyens, voire les Roys : mais fait encores que par son ministere on peut aisément raurir & enleuer tout ce que possèdent noz ennemis de rare & excellent. C'est pourquoy Lampride discourant des loüanges de l'Empereur Alexandre met entre les premieres, l'honneur qu'il portoit aux gens de guerre & de ce que souuent il disoit, *militēs se magis seruare , quàm seipsum , quòd salus publicā in his esset.*

Et combien que viuans soubz les heureux Auspices du plus sage & vaillant Prince qui fust iamais , nous pouuons esperer, ce qui fust dit par effect soub le regne de l'Empereur Probus, *Breui necessarios milites non futuros ;* si est-ce qu'il n'y a personne qui ne confesse que sans l'ayde de ceste vertu qui a tousiours esté propre & peculiere à nostre nation , que nous eussions souuent courru de grâds hazards; n'y ayant Royau-me au monde qui pour sa gloire & félicité

ayt esté plus enuié de ses voisins, que cestuy-cy, ny qui ait esté plus vertueusement deffendu à la cōfusion de tous ses ennemis.

A ceste cause les hommes de ceste profession militaire, ont de tout temps merité d'estre honorez entre tous autres de plusieurs beaux & signalez priuileges, signamment de l'exemption & immunité de tous tributs & autres charges, ainsi qu'il se recognoist en plusieurs endroits vulgaires de noz liures: comme à la verité ils payent à la Republique vn assez grand tribut, que de luy consacrer leur sang & vie, pour son seruice, estans tous les iours exposez à l'extremité des hazardz & perilz, & subiects d'ailleurs à toutes ces fatigues & mes-aises de guerre que descrit ce soldat Percennius dans Tacite, disant, *militiam ipsam grauem quis non videt, infructuosam, denis indiem assibus animam & corpus aestimari? hinc vestem, arma, tentoria, hinc scuitiam centurionum, & vacationes munerum redimi: si que de les assubiection avec toutes ces peines & incommoditez, aux charges & contributions, certes outre que ce seroit des-honorer le merite de ceste vacation, seroit encores leur oster le courage & l'affection de bien seruir le public.*

Ce que les Romains recogurent lors que sous le Consulat de Fabius & de Virginius , ils affranchirent leurs soldats de plus faire la guerre à leurs despens : car voyants que ceste seconde charge les alloit ruinants , & que plusieurs à ceste occasion n'alloient à la guerre qu'avec regret, ils arresterent, *ut stipendium milites de publico acciperent , tributum in id conferentibus qui domi remanerent*, dit Tite Live lib. 4.

Mais ce priuile ne duroit que tant qu'ils estoient en la suite des armées: car estans de retour chez eux , ils estoient renduz subieçs aux contributions comme les autres ; si ce n'estoit toutesfois qu'ils eussent serui en la guerre le temps ordonné par la loy : car en ce cas ils acqueroient vne franchise & immunité pour tousiours, comme il se lit *in l. 2. ff. de priuileg. veteran. & in l. f. C. de excusat. veteran.* lequel temps n'a pas tousiours esté semblable, veu que Isidore li. 9. *etymol. cap. 1.* & Seruius in 2. *Acneid.* disent qu'il estoit de vingt cinq ans, & Dion neantmoins dit qu'il n'estoit que de douze ans pour le regard des soldats Pretoriens, & de seize ans pour tous les autres. Tacité d'ailleurs dit que Tibere restitua les seize ans aux cohortes Pretoriennes,

aussi bien qu'aux autres, & les derniers Empereurs l'arrestèrent à vingt ans, comme il ce lit in l. f. C. de his qui non impl. stip. lib. 10. en ces termes, *veteranis ita demum onerum & munerum vacatio iure conceditur, si post vigesimum annum, militia quam in legione, vel vexillatione militauerunt, honestam vel causariam missionem consecuti esse ostendātur.* Aquoy l'usage de ce Royaume a esté & est quasi conforme : comme aussi la vertu militaire de ces deux nations n'a pas esté fort dissimblable : car tous gens de guerre pendant qu'ils sont en seruice seulement, sont tenuz exempts de toutes charges quelconques, mais quand ils ont serui vingt ans entiers, & qu'ils se veulent rendre au repos de leurs maisons, au lieu qu'à Rome la loy leur assistoit, en France le Roy s'est reserué ce pouuoir, de les gratifier de ceste immunité, selon que leur vertu la peu meriter.

Ce qui se doit entendre de toutes sortes de gens de guerre, mesme des hommes d'armes des ordonnances du Roy : Car combien que le Roy Charles 9. par vn Edict exprez les ait declarez exempts apres auoir serui le Royaume en ceste qualité dix ans entiers, cela toutesfois n'a esté obserué,

seruë, pour ce que depuis iceluy on a admis en ces compagnies toutes sortes de personnes indifferemment, mesmes les roturiers, lesquels fils fussent deuenus exempts apres dix ans, on n'eust quasi plus personne pour payer la taille, estant remarquable, que lors de l'institution de ces compagnies faite par le Roy Charles 7. il fut nommément ordonné, que personne n'y seroit admis qu'il ne fust noble d'extraction : de la mesme sorte que par les loix de Rome ces cheualiers *qui equo publico merere dicebantur*, quasi en tout semblables à ceux-là, ne pouuoient estre tirez d'ailleurs, *quàm ex equestri ordine*, qui estoit le second rang du peuple Romain par dessus le plebeien : ce qui fut faict avec vne grande raison, pour ce que la principale force des armées reposant ordinairement en ces hommes-là, elle deuoit vray-semblablement estre plus asseurée en la main de personnes de ceste qualité, dont le courage par suite de la nature doit surpasser les autres en vaillance & generosité. Et cela mesme fut cause de faire reuiure ceste vieille ordonnance és Estats penultiesmes tenus à Blois, mesmes de donner subiect à l'Edict du Roy Charles, dont nous auons parlé cy-dessus, qu'il fust

P

receu facilement en l'honneur de cest ordre, pour ce qu'on n'y admettoit encores les roturiers taillables, qu'avec grande difficulté.

Mais depuis que la guerre ciuile va comme vne Parque sanglante ruinant ce grand Royaume, & qu'une bonne part de nostre Noblesse y est demeurée esteinte, & deperie, & que force a esté se dispenser de ces belles loix, & d'admettre en ces compagnies toutes sortes de personnes indifferemmēt; ne plus ne moins quores que par la loy Romaine personne ne peult estre receu aux legions, qu'il ne fust ingenu, si est-ce qu'auenant penurie d'hommes, ils y admirent les libertins, voire les serfs, cōme il aduint il aduint lors de la guerre Punique & celles de Sannites. Depuis dis-je que les compagnies d'ordonnance ont esté composées en la pluspart d'hōmes roturiers & taillables, on a du tout delaislé l'Edict du Roy Charles, & ont les hommes d'armes esté contraincts de seruir vingt ans, & au bout prendre lettres du Roy adressées à la Cour, pour avec cognoissance de cause les faire iouyr du priuilege d'exemption, autrement le grand nombre de priuilegiez eust du tout perdu les tailles & les aydes.

De sorte que rapportant ces choses au fait particulier de la cause, le iugement en sera tres-aisé & facile : car pour l'un des appellans, qui nous a iustificié par les roolles des monstres signées du Commissaire & Thresorier de l'extraordinaire, qu'il est encores au seruice, il n'y a aucun doute qu'il ne soit exempt de toutes charges tant & si longuement qu'il sera couché audit roolle : mais quant à l'autre des appellans, vous voyez qu'il n'y a aucune apparence de l'en exempter : car ce n'est assez d'auoir iustificié qu'il a quelquesfois seruy le Roy en quelques compagnies de ses ordonnances, d'autant que pour acquerir l'immunité, dont il se veut preualoir, il faut qu'il monstre vn seruice continuel de vingt ans entiers, & qu'il apporte lettres de concession de ce priuilege.

Et ne luy peut valoir de dire, que l'aage sexenaire où il est paruenü, le dispense de continuer plus outre ce seruice : car ores qu'en ceste consideration le gendarme obtienne vn honneste conge, si est-ce qu'il ne remporte vn pareil priuilege, que ceux qui ont seruy tout le temps legitime, qui est ce que dit l'Empereur Diocletian in l. 2. C. de his qui non implet. stip.

en ces mots, *cum ob prouectæ ætatis senium sis dimissus, honestam missionem consecutum te esse ambigi non potest, non tamen ea priuilegia, quæ his competunt, qui pleno iure stipendiorum numero funguntur, usurpare te ius permittit.*

Mais outre ce moyen, il y en a encores vn autre qui rend sa cause déplorée (qui est comme on nous l'a iustifié par plusieurs contracts faits par luy en diuers temps) qu'il a presque tousiours suiuy le train de marchandise, qui est vne vacation si abhorrente de la profession des armes, & de son priuilege, que nous ne voyons rien plus particulièrement defendu par la loy au soldat, comme il se voit au tiltre, *Negotiatores ne militent. lib. xij. C.* d'où S. Ambroise lib. 1. *Offic. disoit, Is qui imperatori militat, à suspensionibus litium, actu negotiorum forensium, venditione mercium prohibetur humanis legibus;* à quoy se rapporte ce que dit Vegece li. 2. en ces mots, *Nec priuata ijsdem negotia mandabantur, siquidem incōgruum videbatur Imperatori, militem qui veste & annona publica pascerebatur, utilitatibus vacare priuatis.* & à raison dequoy Sidonius 1. *epist.* voulant représenter le desordre de son temps, disoit, *Vigilantes fures, dormiunt potestates, fœnerantur clerici, student pilæ senes, alex iuuenes, armis eunuchi,*

negociatores militant, milites negotiantur.

Attendu donc le peu de service fait en la guerre par cest appellant, & que par le continuel traffic de marchandise il a dero-gé à tout priuilege, Nous estimons qu'il a esté bien iugé par les iuges à *quo*, d'auoir ordonné qu'il demeurera comprins au rool-le de la taille : Et pour le regard de l'autre qui a iustifié par preuues authentiques estre encores au service du Roy, qu'il a esté mal iugé, & qu'il doit iouyr de l'exemption de toutes tailles, tant & si longuement qu'il continuera ce service. Ce que la Cour confirma par son Arrest du mois de Feurier 1596.

Depuis il a pleu au Roy par son Edict du mois de Mars 1600. regler plus précisémēt l'exemption des gensd'armes. Voicy la teneur de l'article. Ceux qui ont porté les armes & esté enroollez és compagnies d'ordonnances, parmy les gens de pied, en charges de Capitaine en chef, Lieutenant ou Enseigne l'espace de vingt ans, dont ils font deuëment apparoir, n'ayans pendant ledict temps ny depuis fait acte dero-geant, iouyront d'exemption, & y seront conseruez tant & si longuement qu'ils feront le service, & non plus auant, sinon

V I N G T I E S M E

qu'apres auoir seruy vingt-cinq ans és ordōnances, ou parmy les gēs de pied és charges susdites, ils ayent obtenu noz lettres verifiées en noz Cours des Aydes pour estre dispensiez dudit seruice, & iouyr de ladite exemption leur vie durant, en signe & recognoissance de leur vertu & merite.

V I N G T I E S M E P L A I D O Y E'.

Sur l'immunité des villes capitales, & qu'il est licite aux habitans d'icelles faire valoir leurs terres par leurs mains, sans estre pource subiects à la taille.

V I T R V V E recite vne chose notable de l'Architecte Dimocrates, qu'un iour estant présenté à Alexandre en habit d'Athlete, tenant de sa main droite vne massüe, & de l'autre le mont Athos souz la figure d'un homme portant sur ses bras vne ville, ce grand Prince trouua cela estrange, & luy demanda si on pouuoit bastir sur ceste haute montagne vne ville, & y attirer des hommes,

veu le pays d'alentour si sterile & infructueux. A quoy il respondit, que c'estoit chose fort aysée à faire par le moyen des priuileges. Et bien que depuis Alexandre print aduis d'en faire construire vne ailleurs dans l'Egypte, qu'il nomma Alexandria, toutesfois il practiqua à l'endroit d'icelle ce conseil de Democrates, car il osta tous les priuileges des autres villes voisines pour les conferer à celle-là; & de faict elle deuint en peu de temps par ce moyen, la plus peuplée ville du monde, ainsi que l'escriit Strabon *lib. 14. disant, Alexandria omnium artium scholas habet, & ante alias populosa, atque etiam metropoleos nomen retinet.* Comme à la verité si nous voulions rechercher quelles ont esté les sources & origines des principales villes, nous trouuerions indubitablement que ç'ont esté les priuileges qui leur ont donné l'estre, l'accroissement & la conseruation.

Mais d'autant que de tous priuileges, la liberté & exemption des daces & tributs a esté tousiours la plus desirable & plausible au commun peuple, qui ordinairement *obsurdescit ad vocem tributi*, dict Cicéron *in epist. ad M. Brutum*; aussi a elle

esté plus affectionnément recherchée, & plus opiniâstement débattuë qu'aucune autre, signamment és villes capitalles, comme si elle en estoit quasi la mere & naturelle tutrice.

Mais outre les commoditez notoires qui la font désirer, ces villes-là en ont encores esté plus ialouses pour l'honneur qu'elles s'en attribuent par dessus les autres; comme aussi nous apprenons de noz liures, que de tout temps les villes plus celebres (que les nostres à l'exemple des Grecs appellent *μητρόπολεις*) ont esté honorées de plusieurs grands priuileges & prerogatiues sur les autres, iusques là que quelques vns referent ceste denomination au deuoir & seruice dont les villes inferieures leur estoient redeuables, comme à leurs meres & progenitrices; ce que Thucydide exprime clairement en ce passage, disant, *Σποικία ἑμὴν πάχιστα πᾶσι τὰ μητρόπολιν, ἀδικεμένη δὲ ἀλλοτριεῖται*, pour ce que c'estoit d'elles que toutes les autres receuoient leurs loix & institutions, ensemble leur protectiō & sauuegarde. Et le mesme authœur remarque ailleurs, que les Co-cyrenses encoururent la disgrâce de Corinthe pour auoir manqué au respect qu'ils

luy deuoient, comme à leur ville matrice & capitale.

Et à vray dire, si entre les priuez on repute ceux-là dignes de quelque priuilege special, qui ont vne vertu eminente, & laquelle ils employent au seruice de la chose publique : pourquoy ne seroit-il plus feant d'en honorer les villes capitales, veu qu'elles sont les principales colonnes & fondemens d'un Estat & Empire? A ceste occasion les Empp. Arcad. & Honorius voulans mettre sur les villes de leur Empire quelque nouuelle imposition, ils en excepterent la ville de Rome, & encores auec un eloge de tres-grand honneur, disans, *excepta scilicet aeterna vrbe, quam ab huiusmodi munere reuerentia propria maiestatis excusat, l. 3. Cod. Theodos. de collat. donat. & releuat.*

Aussi de tout temps ceste ville auguste pour la reuerence de sa grandeur fut renduë exempte de tous tributs & daces, fors & excepté durant la guerre, & lors que les contributions des autres villes ne pouuoient suffire aux charges de leur Estat, comme Ciceron le demonstre assez manifestement es preceptes qu'il donne à son fils es liures de *Officijs*, disant, *Danda opera est ne (quod apud*

maiores uostros saepe fiebat) propter ararij tenuitatem, assiduitatēque bellorum, tributum sit inferendum: idque ne eueniat multo antè erit prouidendum, &c. Et si tost que la necessité estoit passée, & que l'espargne publique commēçoit à se remplir, on faisoit cesser le tribut sur la ville de Rome; ce que Pline tesmoigne aussi lib. 30. disant, Intulit & Aemylius Paulus, Perseo Rege Macedonico deuictō, prædam pondo trium millium, à quo tempore pop. Romanus tributum pendere desiit.

Le semblable priuilege fust conferé à Constantinople, comme il est aisé à reconnoistre in l. 6. C. Theod. de extraord. muner. Et en plusieurs autres endroits de noz liures. Et nous seroit à plaisir de parcourir en cest endroit les priuileges notables qui furent iadis octroyez aux villes capitales, si nous n'estions ennemis de la prolixité, & du discours inutile.

Nous dirons donc seulement, que noz Roys non moins reconnoissans le merite des premieres villes de leur Royaume, les ont honorez de pareilles & semblables faueurs & priuileges; & entre autres, ceste ville de Paris, comme celle qu'ils ont choisi pour leur demeure ordinaire, pour le siege de leur Iustice souueraine, & pour y faire

florir les plus celebres escoles, bref comme celle qui est le cœur de la France, l'ame de l'Estat, & la mere de toutes les autres villes.

A ceste consideration les Citoyens d'icelle, ont iouy de tout temps, & iouyffent encores par ceste liberalité de leurs Majestez, outre plusieurs autres signalez priuileges, de l'immunité & exemption de toutes tailles, laquelle certainement leur doit demeurer autant sacrée & inuiolable, comme elle a esté vn des moyens de la gloire & grandeur où elle est paruenüe.

Ce qui a esté besoin de permettre auant que de toucher la question de ceste cause, qui est de sçauoir si les citoyens, ou Bourgeois de Paris priuilegiez comme dit est, renans en leurs mains leurs terres & seigneuries, & les faisans labourer par leurs seruiteurs domestiques, derogent à leurdit priuilege, & se rendent en ce faisant contribuables aux Tailles des paroisses, esquelles sont sises & situées leursdits heritages. Ce que toutesfois ne deuoit estre mis en controuerse, attendu les Arrests notoires donnez en cas semblable, & que cela mesmes n'a iamais esté obiecté aux Nobles, aux Ecclesiastiques, & autres

priuilegiez de quelque qualité ou condition qu'ils fussent : Au contraire, ce sont actions si louables , qu'elles meriteroient mesmes vn particulier priuilege , pour y exciter d'auantage les habitans des villes : Car de là procederoient deux choses, qui peut estre, seroient suffisantes de nous ramener l'heur ancien de noz peres : l'vne, que nous ne voirions plus tant de faineâts dedans les villes, qui sous le manteau de quelques offices que la misere du temps a faict esclorre en si grand nombre, vont perdant inutilement tout le cours de leur vie : Nous ne voirions plus tant d'vsuriers en noz banques, qui vont sucçant la plus claire substance d'vn peuple : Nous ne voirions plus tant de marchandises & negociations pleines de ruses, de larcins & trôperies, & qui vont tous les iours corrompant la bonté & droicteure de noz mœurs ; Car au lieu de cela, venans à s'appliquer à la culture de leurs heritages, comme à la plus innocente vacation qui soit au monde, on ne peut douter que bien tost on recognoistroit parmy nous vn tres-heureux changement.

L'autre fruit qui en prouiendroit , seroit, que nous ne viurions plus en telle pe-

nurie & cherté de toutes choses, comme nous faisons depuis vn si long temps: car il ne faut point que nous attribuons cela au vice ou vicilleſſe de la terre, pour ne nous rendre ce qu'elle faisoit au temps de noz ayeulz, d'autant qu'elle nous est aussi bonne & fecunde mere comme à eux: mais il nous faut pleindre à nous de nous-mesmes, qui auons abandonné la culture d'icelle à personnes mercenaires, qui ne s'en acquittent comme si nous y estions presens. C'est pourquoy Pline disoit excellemment sur ce subiect, lib. 18. *profectò opera non impensa cultura constat, & ideo maiores fertilissimum in agro oculum domini esse dixerunt.*

A ce propos est remarquable ce que dit Plutarque en la vie de Themistocle, que ce grand personnage desirant ramener ses Concitoyens à ceste vacation que nous recommandons, leur alla disant, que Minerve, qui fust la Deesse protectrice d'Athenes, lors du concert qu'elle eust avec Neptune, à qui feroit naistre deuant les Iuges la plus vtile choses pour les habitans d'icelle, elle fist paroistre aussi tost vne olive, designant que l'articulture estoit la plus necessaire & vtile profession pour le

V I N G T I E S M E

bien & durée de ceste ville là, comme aussi la victoire luy en fust adiugée, & baptisa Athenes de son nom, & se retint à tousiours tutrice de sa fortune. Et de fait, les Atheniens se donnerent depuis vne loy, dont fait mention Aristote *lib. polit.* qui commandoit que chasque Citoyen eust vn certain fond de terre pour le cultiuer soy mesme, & y employer vne partie de son temps, *iique agri dicebantur, κληροι*, & ne leur estoit permis les vendre & engager, pour quelque occasion que ce fust.

Les Romains au semblable n'eurent au commencement l'agriculture en moindre recommandation, veu que Denys d'Halicarnasse, *lib. 4.* escrit que Romule leur auoit interdit & defendu toute autre vacation, fors celle des armes & la culture des champs : de forte que si quelqu'un laissoit par negligence deserter son heritage, il estoit noté d'infamie, par le Censeur.

Ce qui approche de ce que Xenophon rapporte de Cyrus, que si l'on trouuoit en vne contrée bien cultiuee, il souloit louer le soing, la diligence & industrie des Seigneurs d'icelle : & au contraire quand il en trouuoit de desertes & incultes, il les

reprimoit aigrement & les mulctoit d'amendes feueres. Et à mesme propos Plutarque en la vie de Numa dit que ce Prince proposoit des loyers & recompenses à ceux qui se rendoient plus experts en cest exercice : iusques là que les Patrieïens & hommes Consulaires n'estoient point reputez faire acte des-honorable que de labourer eux-mesmes leurs terres. ce que Ciceron tesmoigne en l'oraison *pro Roscio*, disant, *Næ tu Erucci accusator esses ridiculus, si illis temporibus natus esses, cum ab aratro accerserentur qui Consules fierent : etenim qui præesse agro colendo flagitium putes, profecto illum Attium, quem sua manu spargentem semen qui misserant inuenerunt, hominem turpissimum, atque inhonestissimum iudicares?* Ce qui nous est encores confirmé par l'exemple de P. Nasica, celuy qui fust chef de la guerre contre Iugurtha, qui auparauant que se donner aux charges de la chose publique, auoit employé vne partie de sa ieunesse apres le labour de sa terre, comme Valere l'enseigne, disant, *cum adilitatem curulem adolescens peteret, manumque cuiusdam rustico opere duratam, more candidatorum tenacius apprehendisset, Ioci causa interrogauit eum, num manibus solitus esset ambulare.*

Et n'y a'perfonne fi peu verfé en l'hiftoire qui ne confeffe que ces deux Republiques ne furent iamais plus heureufes, ny fournies d'hommes plus aimans le public qu'en ce temps là, & que quand elles font defcheuës de leur premiere felicité & grandeur ç'a eſté lors qu'apres auoir abandonné l'agriculture, elles font adonnées aux delices des villes, & à autres vacations contraires à l'integrite des mœurs.

Toutes lesquelles chofes iointes à la cōfideration du temps qui a degarni d'hommes la pluspart du platpais, & la neceſſité qui va encores preſſant vn chacun, nous doiuent faire trouuer iuſte l'appel de l'appellant, qui ne laiſſant comme Bourgeois de Paris & officier en la maifon d'icelle, de ſeruir le public en ſa vacation ordinaire, employe le reſidu de ſon temps à faire labourer ſon heritage par ſes ſeruiteurs domeſtiques, pour ſubuenir à ſa famille ainſi qu'il eſt permis aux Nobles, aux Eccleſiaſtiques & autres priuilegiez: Et toutesfois il a eſté mis à la taille de la paroiffe où ſont ſiſes ſes terres, contre le priuilege d'immunité octroié aux habitans de ceste ville, cōtre la diſpoſition de voz arreſts donnez en cas ſemblables, & contre l'vtilité qui reuiët au public

public de ceste vacation. Partant nous estimons qu'en faisant droit sur l'appel à convertir en opposition, il doit estre dit, qu'à bonne & iuste cause l'appellât s'est opposé à la taxe qui a esté faite de sa personne, & qu'il sera rayé des rooles des tailles de ladite paroisse, mesmes ses seruiteurs domestiques par luy employez au labour de sondit heritage. Ce que la Cour ordonna par son Arrest du mois de Feurier, 1596.

Mais comme l'vtilité à vn Empire grand & puissant; Aussi voyons-nous qu'elle maistrise & domine souuent sur les reigles & maximes d'Estat; Les change & les varie ainsi que bon luy semble. Nous en auons vn exemplaire par deux reiglemens qui ont esté faicts depuis l'Arrest susdit; Et qui contiennent deux choses toutes contraires à ce que nous auons dit cy-dessus, estre necessaire pour la conseruation de la grandeur & force des villes capitalles, l'une, que ceux qui iront demeurer és villes franches: ne pourront iouyr des priuileges & exemptions d'icelles, qu'ils n'y ayent esté dix ans entiers: l'autre, que les habitans d'icelles ne pourront faire valoir leurs heritages par leurs mains ou de leurs seruiteurs, ains seront tenus les bailler à ferme sur peine d'e-

Q

V I N C T I E S M E

estre mis à la taille , aux lieux où leurs biens sont assis. Le premier est aucunement excusable, d'autant qu'il ne semble raisonnable que les nouveaux venus aux villes franches, iouyssent des mesmes priuileges que les anciens citoyens; ce que Pline le Jeune *in Paneg.* remarque auoir esté obserué à Rome, en parlant de *tributo vigesima*, dit que l'on mettoit vne difference entre les anciens, & nouveaux citoyens, *hæc mansuetudo legis (inquit) veteribus ciuibus seruabatur: noui seu per Latium in ciuitatem, seu beneficio principis venissent, nisi simul cognationis iura impetrassent, alienissimi habebantur, quibus coniunctissimi fuerant.* Toutesfois nous estimerions qu'il seroit dommageable au public, de garder estroictement ceste reigle, apres que par vne mortalité aduenüe aux villes capitales, soit par pactes, seditions, ou autres infortunes publics, il seroit necessaire de les repeupler bien tost de nouveaux citoyens; car qui est celuy, qui s'y voudroit retirer, pour y employer sa vertu & son industrie, s'il voit qu'en ce faisant force luy soit, de laisser sa liberté engagée pour dix ans à la haine & à l'enuie du lieu d'où il seroit sorty? Aussi nous auons veu que la Cour à ja soubs le bon plaisir du Roy reduit ce ter-

me à cinq ans. Quant à l'autre article, les raisons que nous auons amplement deduites au prochain plaidoyé, font aussi paroistre, que c'est plustost vne reigle de finance que d'Estat : & que le retranchement de la liberté de cultiuer la terre nostre mere commune, importe beaucoup plus au public, que ne fait la diminution de quelque petite partie de la taille, aussi la Cour en a dispensé les nobles & les priuilegiez, & spécialement les habitans de Paris, tant pour le respect inuiolable de ses priuileges, que pour ce que les heritages que les citoyens d'icelle tiennent, sont plus de despense & de plaisir, que de reuenu & de profit.

VINGTVNIESME PLAIDOYE'.

*Sur l'immunité des Officiers domestiques
des enfans de la maison de France.*

IL est notoire par les Edits & Ordonnances, que les enfans de la maison de France & signamment les plus proches à succeder au Royaume, ont ce priuilege particulier, que tous leurs Officiers & seruiteurs

Q ij

domestiques sont exempts de toutes tailles & contributions, ainsi que ceux de la propre maison du Roy: Estant ceste prerogative fondée, principalement sur l'honneur & reuerence qui est deuë au sacré sang de ceste famille auguste, en laquelle consiste la principale force d'un Estat, d'où Tacite disoit, *lib. 6. hist. non classes, non legiones, perinde firma imperij munimenta, numero liberorum praeferas*. Pource que de là, comme d'un vray seminaire des Roys, on se peut promettre vn assuré successeur, qui est le plus grand heur à desirer és Royaumes: à raison dequoy les anciens Romains auoient ceste coustume, dict Herodian, *lib. 5. que de deifier seulement (qu'ils nommoient $\Sigma\theta\epsilon\iota\omega\sigma\iota\varsigma$) ceux de leurs Empereurs, qui leur laissoient apres leur mort des enfans & successeurs, in quibus nomen imperatorium remaneret*.

Aussilifons-nous és liures de ces anciens, que les enfans des Empereurs estoient à ceste considération honorez de plusieurs beaux tiltres & priuileges. car tantost on les appelloit, *Regulos*, tantost *Principes iuuentutis*, comme on le voit dans Tacite, Lampride & Suetone; Et ceux qui estoient les plus proches à succeder à l'Empire, estoient

de leur premiere ieunesse honorez mesmes du tiltre de Cæsar, comme Spartian le remarque *in Aelio Vero*, disant, *huic naturalis pater fuit L. Aelius, qui ab Hadriano adoptatus, primus Cæsar est dictus, id est quasi designatus Augustæ Maiestatis hæres*; Et quand l'Empereur Constantin *in l. 2. C. de maléf. & Mathem.* use de ces mots, *in comitatu meo vel Cæsaris*, cela se doit entendre de son fils & successeur: de la mesme sorte que les premiers fils des Empereurs de Grece, *dicebantur δεσποται*, ainsi qu'en France nous appellons celuy qui en ligne collaterale est le plus proche à succeder au Royaume, *Monsieur*, & le plus proche en ligne directe; comme le fils aîné; est honoré du tiltre de Dauphin.

Et quant aux priuileges dont iouyssoient ces ieunes Cæsars, & Premiers Princes du sang, il est certain qu'ils estoient tres-grâds & signalez, comme les explique Capitolin, & plus particulièrement Iustinian, *in const. tricesima*, & les Empp. Arcad. & Honor. *in l. unica C. Theod. de priuileg. do. Aug.* iusques là qu'il leur estoit permis *uti sella Imperatoria*, & de faire porter deuant eux *ignem ipsum qui Principibus præferri solitus erat*, comme le remarque Herodian, *in Commod*, qui estoient

deux des plus singuliers ornemens qu'eussent mesmes les Empereurs: Au semblable en ce Royaume, les enfans de la maison de France, sont honorez par les Roys, outre tant d'autres priuileges notoires, de celui encores que nous venons de dire, de rendre leurs officiers & seruiteurs domestiques exempts & immunes de toutes tailles & contributions, ne plus ne moins que ceux de leur propre maison.

Comme aussi cela fait part de l'honneur & respect, qui est deu à leurs excellences, entant que le maistre est tousiours honoré es personnes de ses seruiteurs: Et est remarquable à ce propos, ce que l'Emp. Iust. en la loy premiere, *C. de protect. & domest.* faisant estat des priuileges de ses officiers domestiques, leur donne ceste prerogative, que de pouuoir saluër autrui *cum iure osculi*, sur peine de sacrilege à celui qui leur auroit denié cest honneur, *Domestici (inquit) osculandi, cum salutauerint, habent potestatem. pœna enim sacrilegij similis erit, si his honorificentia non deferatur, qui contingere nostram purpuram digni sunt visi*; En quoy on reconnoist deux grandes faueurs que confere ce Prince à ses domestiques, l'vne d'auoir *iure osculi*, en leurs salutations, ce que les

Empereurs s'estoient reserué particulièrement, depuis que Tibere par loy expresse l'eust defendu aux autres, comme le dit Suetone : L'autre en ce qu'il punit de la mesme peine de sacrilege ceux qui se seroient mespris à leur rendre l'honneur, ne plus ne moins que si c'estoit à l'endroit mesmes de leurs Majestez.

A ceste occasion ils reputoient de ce temps-là à vn fort grand honneur, voire à vne dignité, que d'estre fait domestique d'un Prince, comme il se remarque *in l. 109. Theod. de decurionib.* & dont parlant Cassiodore, *in formulis*, disoit, *inter protectores & domesticos sacram purpuram adoraturus accedat*, surquoy estoit aussi fondé le priuilege d'immunité & franchise dont ils iouyssoient, comme le dit l'Emp. Honor. *in l. 1. C. de prepos. labor.* en ces mots, *nam & immunitate digni sunt quos nostri lateris comitatus illustrat.*

Toutesfois tous ceux qui se maintenoient officiers des Empereurs & ieunes Cæsars ne iouyssoient pas pourtant de mesmes & semblables priuileges: car comme il y en auoit quelques vns qui seruoient actuellement, *quique ζωοι, id est vacantes erant & dicebantur*, & d'autres qui estoient

seulement honoraires; & qui ἀζωτοι, dicebantur, ainsi qu'il est deduit in l. 2. C. ut dign. ord. seruet. Aussi ils estoient bien differens en droits; prerogatiues & priuileges: d'autant que ceux qui seruoient actuellement, *cingulum gestare poterant, eis que dabantur annona*: mais ceux qui n'estoient qu'honoraires, & qui ne seruoient point, n'auoient neque *cingulum neque annonas*, & ne iouyssoient mesme de l'immunité, comme l'explique Lampride, *ad instar* de ces gens-d'armes que ce mesme Autheur in *Seuero*, appelle *Ostensionales*, qui ne seruans que *ad apparatus regium*, ne iouyssoient des priuileges que meritoient les vrayz soldats qui seruoient actuellement la Republique en ses guerres.

Tout de mesme en ce Royaume, nous ne tenons pas exemptstous ceux qui se disent domestiques des Roys & des enfans de la maison de France, quelque prouision ou lettres qu'ils puissent auoir, & de quelque office ou fonction que ce puisse estre: ains seulement ceux qui sont coucheés és estats desdites maisons, payez de leurs gages à vingt escuz ou au dessus, & seruans actuellement, ainsi qu'il est nommément porté en l'Edict d'Orleans, au-

trement si tous ceux qui nous apportent des lettres de prouisions d'offices esdites maisons, estoient rendus francs & exēpts, on ne verroit autre chose, veu qu'il n'y a rien qui s'obtienne plus aisement, & d'où prouiendroit l'entiere perte & ruine des tailles & aides du Roy.

Mais d'autant que l'appellant n'est de ceste condition, ains recogneu auoir esté vray officier seruant actuellement en la maison de feu Monsieur, frere du Roy, en qualité d'Huissier de salle, couché & employé en l'estat des retenus signé de la main de sa Majesté, ainsi qu'il nous la iustifié, nous ne voyons point surquoy les Iuges à *quo* se sont fondez, d'auoir ordonné qu'il demeureroit comprins aux roles de la taille: si ce n'est d'auenture sur ce qu'on luy a obiecté, & dont il semble qu'il demeure d'accord, qu'il exerce à present l'estat & office de Sergent, presupposans que par ce moyen il derogeoit à son priuilege: Comme de vray la fonction d'un sergent a tousiours esté estimée du tout vile, abiecte & roturiere: Iusques là qu'anciennement ils la tenoient pour ignominieuse, tesmoin ce qu'escriuent Feste Pompée, & Aulugelle, *li. 10. c. 3.* des Brutiens, qui pour s'estre

alliez d'Hannibal & rebellez cōtre le peuple Romain, entre les peines qu'ils en encoururent, celle-cy en fust vne, *ut ignominie causa fierent apparitores Magistratum cum in prouincias proficiscerentur.*

Pour resoudre laquelle obiection, il sera remarqué qu'il a grande difference, entre ceux qui ont priuilege d'exemption & vne dignité annexée à iceluy; & ceux qui n'ont aucune dignité, & ne laissent neantmoins d'auoir priuilege: car ceux-là venās à cōtaminer leur dignité par vne functiō seruite, & comme de Sergent, de Procureur, ou de Notaire, mesme de marchandise, perdent aussi tost leur priuilege; Mais ceux-cy peuuent faire toutes ces charges là, sans crainte de le perdre. Ainsi qu'il a esté iugé par plusieurs Arrests dōnez en cas sēblables, mesmes au profit d'un Archer des gardes du Roy, auquel on obiectoit, qu'estant de retour en sa maison apres son quartier finy, il faisoit trafic de marchandise. Or nous ne dirōs pas qu'un office d'Huyssier de sale de la maison d'un Prince, ait plus de dignité en soy que celuy d'un Archer des gardes du Roy: consequēment, de luy obiecter non plus qu'à l'autre, aucune de ces choses pour le priuer de son priuilege, vous voyez qu'il

n'y auroit aucune apparence: Ce qui se rapporte à l'ordre anciē de la Cour des Empp. de Rome; ainsi que le tesmoigne Lāpride, parlant de l'Empereur Alexandre Seuerē;
Antiquū ministeriū in id construxit, ut essent tot homines in singulis Officijs quot necessitas postularēt; ita ut annonas, non dignitatem, acciperent fullones, & vestitores, & pictores, & pincerna, omnes quidem castrenses ministri. Comme s'il vouloit dire, que tous ceux, dont la functiō n'estoit qu'en vn vil ministere; bien qu'ils eussent gages & appoinctemens cōme les autres & qu'ils feussent couchez sur l'estat des officiers de l'Empereur, pour cela neātmoins ils n'auoient aucune dignité; & ne leur estoit interdit de commencer & faire actes mecaniques; comme il estoit aux autres qui auoiēt dignité ainsi qu'il est traicté in l. nobil. l. de comment. & mercat. Partant nous requerons estre dit qu'il a esté mal iugé par ledit Iuge à quo, & qu'en emendant il soit ordonné que l'appellant iouyra de son priuilege, & ainsi qu'il a faict cy-deuāt. Ce que la Cour ordonna par son Arrest du mois de may, 1596.

VINGTDEVXIES^{me} PLAIDOYE.

Que la disposition du droict Romain, touchant le priuilege des Medecins, n'a lieu en ce Royaume.



OMBIE N que la profession de Medecine soit tres-honorable, & de grande estime, pour estre l'instrument de la santé des hommes, qui est le plus desirable bien qu'ils puissent posseder au courant de leur vie: si est-ce, qu'elle n'a esté en tous lieux, ny tousiours receuë & honorée selon le merite d'icelle; Car de ce que la malice humaine va ordinairement abusant des plus parfaites choses, & en faict naistre des effects du tout contraires à leur propre nature, est aduenü que les vns pour crainte du danger & peril qu'il y a en mal-vfant de la medecine, l'ont fuyé & abhorrée sur toutes choses. Entre lesquels furent jadis les Arcadiës, Babylo niens, & Lusitaniens, voire mesmes les Romains du temps de Caton le Censeur,

qui tous au rapport d'Herodote, Plin & Strabon, chasserent de leurs Estats & Republiques, tous ceux de ceste profession; Et les autres au contraire, la iugeans par son propre merite & le grād fruct qui en peut prouenir, l'ont recueillie entr'eux, cheric & honorée de plusieurs priuileges. Entre lesquels furent principalement les Atheniens, qui en faueur d'icelle firent autant d'honneur à Hippocrate, comme s'il eust esté du nombre de leurs Dieux, luy decernans jeux publics, offrādes & sacrifices; Iusques là qu'arriuant vn iour en la ville d'Athenes, pour visiter Democrite tous les habitans d'icelle luy furent au deuant pour le saluer, l'appellans Sauueur & Pere du pays, & n'y eust iamais homme en toute la Grece, dōt ils fissent plus d'estat & estime.

Les Romains au semblable depuis Iules Cæsar, embrasserent la medecine, avec tant d'affection & honneur comme ils l'auoient auparauant auilie & reiettee, & ne se remarque point qu'il y ait eu entr'eux aucune profession plus priuilegiée que celle là: ce que volontiers nous représenterons en peu de paroles, puis qu'aussi bien le subiect de ceste cause nous y inuite.

Le premier donc qui commença à honorer les Medecins à Rome, fust Cæsar, qui au rapport de Tranquille leur donna droit de Cité & de Bourgeoisie Romaine. Et fust fuiuy en cela d'Auguste son successeur, qui pour recognoistre le soin, sollicitude & industrie qu'apporta Antonius Musa son Medecin pour le guarir d'une maladie chronique & perilleuse où il estoit tombé, apres l'auoir honoré de grands presens, mesmes du droict de porter anneau d'or, donna par mesme moyen en sa faueur, à tout l'ordre des Medecins le priuilege d'immunité & exemption de toutes charges; & fust ce priuilege confirmé depuis par les Empp. Vespasian & Hadrian, comme il se lit *in l. ult. in f. ff. de munerib. & honorib.*

Toutesfois comme pour gagner ceste immunité, à laquelle ordinairement vn chacun aspire, trop de personnes s'alloient appliquans à ceste profession, & qu'on commença à veoir que le public en resentoit vn fort grand preiudice: cela fut cause aussi que le nombre des Medecins fut restraint & limité, & qu'on ordonna que de là en auant il n'y auroit en chascque cité qu'un certain nombre qui iouyroient

de ce priuilege ; ce que Modestin attribué à l'Empereur Antonin *in l. 7. ff. de excusat. tutor. & est plus à plain tesmoigné in l. 1. ff. de decret. ab ord. faciend. l. 1. & 5. C. de profess. & Med.* où par mesmes moyen ce Prince donne pouuoir & faculté au Decurions & Escheuins des villes & citez, de faire choix & eslite d'iceux, & leur departir ce priuilege ; Auquel depuis fut adiousté par l'Empereur Commode, en faueur de Galien, qui florissoit de son temps, que les Medecins seroient gagez & stipendiez du public. ce qui fut aussi confirmé par Alexandre Seueré, dit Lampride, & long temps depuis par les Empereurs Constantin, Honore, & Theodose, dont les loix & constitutions sur ce subiect se lisent encores au Code de Iustinian & Theodose.

Mais est à noter qu'entre ces Medecins, les vns auoient quelques preeminences par dessus les autres, *ii que dicebantur Archiatri, id est, Principes Medici*, qui estoient destinez pour la personne du Prince, de sa famille & pour les pauvres, comme il est remarqué *in l. Archiatri. C. de profess. & Medic.* du nombre desquels fut ce tant renommé Andromachus, qui est appelé

par Erotian *in dedic. Onomast.* Νέπαρος ἀρχα-
 τρὸς; & celuy d'entr'eux qui estoit le pre-
 mier, *dicebatur comes Archiatrorum*, & a-
 uoit superintendance sur les autres, com-
 me Cassiodore le tesmoigne *lib. 6. variar.*
 & iouyssoit d'une pleine immunité, mes-
 mes des charges reelles & patrimoniales:
 ce qui n'estoit octroyé qu'à bien peu de
 personnes.

Voilà donc comme en ces deux republi-
 ques les plus florissantes qui furent onc-
 ques, les Medecins ont esté recogneuz &
 priuilegiez. mais soit que la Medecine n'ait
 esté tant prisée parmy nous: ou que l'hon-
 neur qu'elle peut meriter n'ait esté si consi-
 derable que l'vtilité que le public rempor-
 te d'estre seruy de ses aydes & tributs par
 vn plus grands nombre de personnes, ou
 pour quelque autre raison que ce soit; nous
 ne voyōs point qu'en ce Royaume les Me-
 decins ayent oncques iouy de ce priuilege
 d'immunité, attribué à leur ordre par l'an-
 cien droit de Rome: car ils ne iouys-
 sent d'aucune exemption sinon de quelques
 charges personnelles, cōme de l'affiette &
 collecte des tailles, estant au reste asseruis
 & subiects au payement d'icelles, ne plus
 ne moins que tous autres roturiers & tail-
 lables,

lables, & dont seulement sont exceptez les Medecins du Roy, non encores pour estre Medecins, mais comme seruiteurs domestiques de la maison Royale.

De sorte que bien que ce que nous auons cy deuant rapporté de l'antiquité en leur honneur, soit inutile, pour l'immunité que l'appellant pretend en ceste cause, si auons nous bien voulu le dire, pour à l'exemple de ces anciens les rendre aucunement fauorables, & monstrier que du moins ils ne doiuent estre traictez si rudement que le reste du vulgaire, ny si chargez que ceux qui ne font aucun seruice à la chose publique.

Mais l'appellant a dit vne chose, que si elle estoit veritable, certes sa cause en seroit trop plus recommandable que de tout ce qu'on pourroit deduire & ramener en faueur de son ordre, sçauoir est que ceste faculté & science qu'il dit auoir de remettre les os & membres rompus & disloquez, luy est prouenuë, non d'instruction qu'il ait eüe d'homme quelconque, ains d'une grace speciale de la nature, qui depuis plus de deux cens ans par vne discipline occulte & secrette l'auoit infuse à ceux de sa race, & transmise com-

R

me de main en main & par succession de
 ses ancestres, en leurs fils aînés iusques à
 luy. Et pour le tesmoigner, il nous rap-
 porte des attestations authentiques des
 Gouverneurs & Escheuins des villes de
 Berry, affermens qu'en ceste prouince &
 autres circonuoisines, luy & ces ancestres
 ont tousiours esté tenus en ceste estime, &
 que de tout temps, ils ont exercé ceste
 profession, au grand bien & contentement
 d'vn chascun.

Et ores que cela soit de difficile persua-
 sion, pour estre rare & extraordinaire, si
 est-ce pourtant qu'il n'est impossible ny
 nouveau tesmoing ce que Strabon *lib. 27.*
 a escrit d'une certaine lignée d'Afrique
 qu'il appelle *Psyllorum gentem*, qui auoit ce
 benefice de nature, que de guarir des mor-
 sures de serpens, mesmes des plus vene-
 neuses & incurables, & qu'Auguste ayant
 prins Cleopatre, & veu que pour luy oster
 la gloire qui se promettoit, de l'emme-
 ner viue en triomphe à Rome, elle l'auoit
 preuenu s'estant fait piquer par vn aspic,
 il enuoya querir en diligence vn de ces
 Psylles pour la guarir, mais elle mourut
 deuant qu'il fust arriué. Le semblable a
 escrit Aulugelle *lib. 6. chap. 2.* d'une autre

lignée d'Italie qu'il appelle *Marforium gentem*, extraicte de cest ancien Marseus fils de Circe, qui, auoient aussi vne pareille faculté de nature, de guarir tous venins & poisons. Plutarque aussi en la vie de Pyrrhus, recite le mesme de ce Prince, disant que par le seul attouchement de son pied dextre il garissoit ceux qui estoient malades de la rate : ce que Pline liure septiesme attribué à vne certaine vertu qui estoit latente au gros orteil de son pied, & que de faict son corps estant bruslé, ceste partie fust tirée toute entiere du milieu du braisier. Le semblable se remarque en la personne de noz Roys Treschrestiens, qui depuis Clouis ont eu du ciel ce priuilege, de guarir par leur attouchement des escrouelles, qui est vne maladie presque incurable aux Medecins. Et est aussi estrange ce que Tacite *lib. 29. Annal.* raconte de l'Empereur Vespasien qui restitua la veuë à vn aueugle avec vn peu de salie seulement, dont il luy frota les iouës & les yeux.

Vray est que toutes ces choses se faisans par vn simple attouchement, & sans ministère d'aucun art, monstroient bien vn euident miracle, & que c'estoit la diuini-

té seule qui les operoit ; Mais cestuy-cy au contraire s'aydant en toutes ses cures, des maximes & reigles de la medecine osteologique, inuentée par les anciens, & descrite par Hippocrate aux liures *περὶ ὀστεολογίας* & *περὶ ἀγμῶν καὶ περὶ ἄρθρων*, & qui est practiquée par tous ceux qui en font profession, faiët que ce qu'il fait de luy, nous est rendu fors douteux & incertain : bien toutesfois que nous estimions y auoir eu en luy vne tresgrande inclination de nature apres ceste profession, & qu'avec la discipline domestique que des son enfance il a recueilly de son pere, l'ayant veu icelle practiquer toute sa vie il a peu s'aduançer en tel degré de perfection où il est aujourd'huy.

Cecy toutesfois semblera encores superflu, pourcee que quelque vertu & merite que l'appellant puisse pretendre en luy, cela n'est assez pour luy attribuer ce priuilege d'immunité, si ce n'estoit qu'il eust lettres du Roy à cest effet. Car c'est de luy seul que dependent tous priuileges : & n'y a vertu, tant meritoire soit elle, qui puisse nous acquerir ce priuilege, si ce n'est par le moien du Roy qui seul tient en sa main les lauriers & couronnes de re-

compense pour ceux qu'il en iuge dignes ; & en cela est different nostre droit d'avec celuy de Rome, par lequel, comme nous auons dit cy deuant de la loy premiere *ff. de decret. ab ord. fac.* il estoit licite aux Decurions & escheuins des villes, d'otroyer ce priuilege d'immunité à leurs Medecins & autres professeurs des arts & sciences liberales, sans qu'il fust necessaire de recourir au Prince.

De sorte que l'appellant n'ayant aucunes lettres du Roy nous ne voyons point qu'il puisse pretendre aucune immunité ; Mais quant à la surtaxe, dont subordonément il se plaint, sa cause sous correction, nous semble raisonnable, d'autant qu'il nous a iustifié par extraicts des roolles depuis plus de trente ans qu'il n'a oncques esté taxé à plus haut qu'à vn escu, fors en l'année presente, que les intimez l'ont haussé de cinquante escuz, & auons apprins par vn acte d'assemblée solennelle de tous les habitans de la parroisse où il est demeurant, que la plus grande & plus saine partie d'iceux ont recogneu qu'ils s'estoient contentez de ceste legere taxe, en consideration des grands seruices par luy faits au pays, par le moyen de sa

profession qu'il a exercée, & exerce encores gratuitement : de mode que ceste petite taxe luy tenant lieu de recompense de ce service qu'il continuë au public, vous iugerez le peu de raison que les intimez ont eu de l'auoir haussé d'une somme si immodérée.

Aussi que sa cause semble estre iugée par l'arrest qui fut dernièrement donné au profit du Medecin de Beaumont, contre les habitans de ladite ville, lesquels au preiudice d'une promesse publique & solemnelle qu'ils luy auoient faite, de ne le taxer en leur roolle que iusques à dix escuz par chacun an, l'auoient neantmoins haussé de quarante escuz, & fut enioint par ledit arrest ausdits habitans, d'entretenir leur paction tant & si longuement que ledict Medecin leur continueroit le service de sa profession.

Verité est que nous ne voyons point en ceste cause vne semblable paction entre l'appellant & les intimez, mais nous estimons que n'ayant esté taxé par eux depuis plus de trente ans qu'à ceste somme de soixante sols, la prescription d'un si long-temps luy a peu autant acquerir qu'une paction expresse, pour ce que par la disposi-

tion de droict la paction & la prescription sont de pareille force, & produisent des effets du tout semblables, mesmes en matiere de priuileges, comme le traittent les Docteurs sur ceste loy vulgaire, *hoc iure, §. ductus aqua, D. de aq. quot. & estius.*

Partant nous concluons à ce qu'il plaise à la Cour, faisant droict sur l'appel dudit appellant, ordonner qu'il demeurera compris aux roolles des tailles comme les autres contribuables à icelles : & neantmoins eu esgard aux seruices par luy faits au public, & tant qu'il continuëra, qu'il ne sera taxé à plus haut qu'à soixante souls. Ce que la Cour ordonna par son Arrest du mois d'Aoust. 1595.

R. iiij

VINGTROISIEME^{me} PLAIDOYE.

Sur les lettres Patentes , par lesquelles le Roy mande à la Cour quelle ait à rechercher & punir les abus & malversations de ses Receueurs & autres Commis en ses finances.



E n'est point pour représenter l'utilité que le public attend de l'exécution de ces lettres , que nous nous leuons : car elle s'exhibe & manifeste assez d'elle-mesme ; ny pour monstreauec quel zele & affection elles sont receuës d'un chacun : car ceste alegresse notoire, que le seul bruit qui a couru d'icelles, à fait naistre par la France ; & ce murmure plausible que vous oyez encores parmy ceste assistance, tesmoignent assez euidentement, qu'il y a long-temps qu'on n'a reçu , ny ouy en ce lieu, aucun Edict ou mandement plus au gré & contentement de tout le monde.

Et de verité comme c'est le naturel des peuples de porter aigrement sur toutes choses , que les finances publiques , qui prouiennent du plus clair de leur substance, soient mal regies & conseruées ce qu' Aristote exprime fort bien *lib.3. Polit.* disant, *ὅτι γὰρ ὅπως ἀγανακτῶσιν, ἐρηρόμενοι τῷ ἀρκεῖν οἱ πολλοί, ἀλλὰ καὶ χαίρουσι ἐὰν τις ἐὰν ποῖς τοῖς ἰδίοις κολάζειν, ὥς ἐαν οἴονταί τι κοινὰ κλέπτεν τὸς ἀρχοντας.* Ainsi doit-on estimer qu'il n'y a loy, ou sanction, iugement ou arrest, qu'ils escoutent plus volontiers, que ceux qui se donnent pour reprimer les abus & maluersations qui se commettent en icelles.

Nostre but n'est pas aussi de ramener en ce lieu toutes les sortes de fautes & delicts qui sous la faueur du temps qui a couru, se sont faicts & commis en cest endroiçt. Car le nombre en est si grand, que nous ferions trop plus empeschez par où nous pourrions finir, que par où nous deurions commencer. Ny pareillement de vous rapporter combien à l'occasion d'iceux le Roy & toute la France ont receu cy-deuant, & reçoient tous les iours de trauerses, desaduantages, torts & iniures : car elles sont si notoires, voire si sensibles, qu'il

n'y a celuy qui ne les recognoisse : iusques là mesmes que plusieurs auoient, & peut estre avec verité, que ce grand defect qui se retrouue és affaires publiques ne procede d'ailleurs que de là.

Mais nous nous sommes leuez, pour en toutes ces choses si claires & manifestes, & *veluti in re expedita*, esmouuoir à l'encontre d'icelles la seuerité iuste de la Cour & des loix dont elle est gardienne, & la supplier de prendre garde que si tous ces abus, larcins, & malefices qui se font par quelques vns és finances publiques, ne sont bien tost refrenez : il sera à craindre qu'ils ne facent esclorre de soy des effects grandement perilleux, & dommageables.

Comme à cela, certes la seule condition du delict doit plus que toute autre chose exciter sa iustice : car elle recognoist que c'est le seul venin qui engendre la paralysie au corps d'un Estat où il est toléré, le priuant de l'usage de ses muscles & nerfs, c'est à dire des finances publiques, sans l'ayde desquelles sa vigueur s'amortit, & ne peut rien executer d'utile & de commode, estans à raison de ce appellées par Cicéron *belli subsidia & ornamenta pacis*.

Aussi nous lifons qu'à ceste cause il à tousiours esté , & en tous lieux , detesté comme vne peste publique , & contre lequel les loix ont principalement tiré les plus poignans traits de leur rigueur : car ceux mesmes qui du commencement le mulâterent seulement d'amende pecuniaire , ayans depuis esprouué que c'estoit vn moyen trop foible pour refrener son impudence ; ains au contraire que ce luy estoit vn esguillon pour le pousser à vne rapacité plus grande, veu que de là il trouuoit le remede à sa peine, vserent de deportation contre ceux qui en estoient conuaincus, comme d'une peine plus intolérable à personnes de cœur que la mort mesme.

Et est fort remarquable , que lors que Rome estoit en sa pleine gloire, le peuple d'icelle fit de l'office de finances vne pierre de touche pour esprouuer l'integrité d'entre eux; estant ainsi que par la loy Cornelia, il n'estoit permis à personne d'aspirer à aucune dignité , que premierement il n'eust passé par la Questure , & exercé l'estat de Receueur. ce que Ciceron tesmoigne en l'une de ses oraisons, disant, *maiores magistratus petere non poterat, nisi qui prius*

Quæstor fuisset : en sorte que si on venoit à descouvrir qu'aucun se fust mespris en cest endroit , où les loix desiroient avec la vigilance , vne probité & preud'homme entiere , ils faisoient vn iugemēt pour tout le reste de sa vie. car apres l'auoir comblé d'opprobre perpetuel , le priuoient à iamais de toutes dignitez.

Mais pour empescher que le manie-
ment libre de l'or & l'argent public ne les
amorçast à quelque corruption : (*aurum et-
enim præstringit oculos*, diēt le Satyrique) ils
l'ostoient fagement de leur puissance , &
le mettoient en depost au temple de Sa-
turne , comme en la garde de ce Dieu,
qui apporra cest heur en Italie , que tant
qu'il y habita , aucun vol ou larcin n'y fut
commis , ainsi que dit Macrobe au 1. de
ses Saturnales : comme aussi c'estoit afin
que celui qui seroit si hardy que d'en des-
rober , se peust asseurer d'auoir encouru
la peine du sacrilege. Aussi nous appre-
nons par leurs liures , que tant qu'ils ont
pratiqué estroittement ces choses , ce cri-
me a esté si rare parmy eux qu'il ne se
treuve par routes leurs histoires , qu'au-
cun en ait esté accusé , iusques au temps
des douze tables . tant eut de pouuoir sur

eux la crainte de la honte & infamie.

Les Grecs eurent bien entr'eux pareil les loix à celles là : mais ils ne se peuuent vanter en auoir eu vne pareille crainte, témoin le reproche que leur fait Ciriſophus dans Xenophon, que ce crime leur eſtoit ſi commun & familier, qu'à peine ſe trouuoit-il entr'eux aucun homme de marque qu'on ne l'en peuſt reprendre, & ce que dit Polybe lib. 6. *rarò apud Græcos inueniri qui publicis abſtinerent*, ce qu'ils attribuent à l'auarice extreme qui eſtoit ſi naturelle à ceſte nation, qu'à toutes rencontres elle fouloit l'emporter hors le reſpect de l'honneſte deuoir : eſtant ce vice de la nature de l'aigle & autres oiſeaux rauifſans, qui commencent touſiours par les yeux à deuorer leur proye. car la premiere choſe que fait l'auarice à ceux qu'elle poſſede, c'eſt de leur arracher les yeux de l'ame, & les rendre aueugles d'un aueuglement ſpirituel, pour ne plus voir la lumiere de la iuſtice, ny apprehender la rigueur de ſes loix; d'où vient qu'un ancien diſoit d'elle, *mille pœnarum indagine include, erumpet.*

Mais reuenant à nous, certes ie crains qu'on nous iuge n'eſtre fort diſſemblables

de ces Grecs anciens : car combien que nous ayons des loix pleines de rigueur & de feuerité contre ce crime, & qu'elles ayent esté autresfois suyues & confirmées par des arrests & iugemens celebres, mesmes contre des plus grands du Royaume, comme vn Pierre de la Berche. Anguerand de Marigny, le sieur de Giac, le Camus de Beaulieu, conuaincus d'iceluy sous les regnes de Philippe, de Loys son fils, & de Charles septiesme : si est-ce toutesfois que dés ce temps là, iusques à nous, la conuoitise d'aucuns a esté autant affrenée, cōme si c'eust esté gloire & honneur de faire sa fortune aux despens du public.

Vray est que si on eust tousiours tenu les loix en mesme force & vigueur, & qu'on ne les eust renduës muettes vn si long-temps, on n'eust peut estre veu ce crime si frequent & ordinaire, comme assurément nous nous promettons que par l'affiduë & seuerie iustice que le public attend de vous, il deuiendra d'oresnauant plus rare que iamais.

Or d'autant que la malice humaine est deuenüe plus rusée & accorte qu'elle ne fut oncques : nous ne doutons point que vous ne trouuiez en ceste recherche beau-

coup de difficulté à esclarcir les desguisemens & artifices dont les mauuais comptables se seruent pour couvrir & pretexter leurs fautes : car c'est à eux que s'adresse ce vers du Comique disant,

--homines genere Geryonaceo :

Quos si Argus seruet, qui oculus totus fuit,

Is nunquam seruet.

Toutefois il seroit aisé d'en venir à bout, par le moyen qu'autresfois pratiqua l'Empereur Vespasian , qui se faisoit rapporter les inuentaires & partages des biens escheus à ses Receueurs, des successions de leurs parens, ensemble tous les contrats, tiltres & enseignemens des acquisitions par eux faictes, depuis qu'ils estoient entrez en charge : puis arbitrant l'honneste profit, qu'ils auoient peu faire en le seruant, il imputoit à larcin tout le reste, & les contraignoit le luy rendre, faisant d'eux tout ainsi que d'esponges, *quæ exprimuntur postquam affatim biberunt*, dict Suetone en sa vie.

Et fut sur ce moyen que Censorinus fonda son accusation contre Sylla, luy obiectant qu'ayant eu peu de biens de son pere, iusques à auoir logé en maison d'autrui à petit loüage, il estoit deuenu fidef-

mesurémēt riche. Et de faiēt comme à son retour de la guerre d'Afrique, il alloit glorifiant ses triomphes, il y eut vn personnage d'honneur qui luy dit : Et comment seroit il possible Sylla, que tu fusses homme de bien, ayant tant de quoy comme tu as, veu que ton pere ne t'a rien laissé?

Et à ceste rencontre, nous ramenerons vn compte naïf, qui se trouue dans Pline, *lib. 18. cap. 6.* d'un C. Furius Cresinus, qui estant accusé deuant Spurius Albinus Curule, sur ce que n'ayant qu'un petit champ de terre, neant moins il recueilloit plus de fruiets, que ne faisoit tout le voisinage, biē que d'une grande estendue & espace : & qu'il estoit à presumer que par venefice ou sortilege, il attiroit la graisse du champ de son voisin, pour rendre le sien plus abondant & fertile : Ce bon homme vint paroistre au iour de l'assignation, & amena avec luy deux grands & puissans bœufs, à l'aide desquels il souloit labourer sa terre, puis exhibant tous ses instruments rustiques, faits d'un artifice tres-propre pour l'agriculture, commença à dire, *Hæc sunt veneficia mea, Quirites, nec possum vobis ostendere, aut in forn adducere lucubrationes, vigilias, sudores.* ce qui fut trouué si conuenable pour sa
iustifi-

iustification, qu'il fut enuoyé absous d'une commune voix de tous ses Iuges.

Supposons au semblable, que vous ayez dés-jà deuant voz faces quelque mauuais riche de Receueur & accusé de maluerfaction en sa charge: Et que vous luy demandiez comment se peut faire que n'ayant eu de ses ancestres qu'un petit heritage, il soit toutefois en si peu d'heure paruenue au comble de richesse? quelle responce ie vous prie pourroit-il faire à celà? de quel art ou industrie pourroit-il se preualoir, pour empêcher qu'on ne presumast que ceste siene fortune fust faicte de malice, & prouenuë du larcin de son maistre veu mesmement que par les Edicts & Ordonnances toutes sortes de negociations & marchandises sont deffenduës & interdites à tous ceux de cest ordre? A ceste occasion vn sage de cest aage qui cognoissoit les mœurs des Financiers, appelloit leurs Estats, *Ditis officinas*, pour dire que c'estoit de là seulement où les grandes richesses se pouuoient bien tost amasser.

Toutesfois nous ne serions d'avis qu'on vst de ce moyen contre tous indifferement, ains seulement contre ceux, de qui l'improbité seroit dés-jà conuaincuë par

VINGTROIZIESME PLAID.

autres arguments : Car comme entre ceux de ceste vacation , y a bon nombre de gens de bien , tres-dignes de manier les Finances publiques , & dignes encores de posseder les biens , que leur vertu & bons seruices leur ont acquis : Aussi ne seroit-il iuste & raisonnable exercer sur eux ceste rigueur , veu que les hommes d'honneur & leur fortune , sont tousiours en la protectiõ des loix : & que les graces , faueurs & benefices qu'elles contiennent , sont tous pour honorer leur vertu & merite : comme d'ailleurs , l'aigreur , la seuerité & les peines d'icelles , sont seulement pour punir les meschans qui les ont deseruies. Ce n'est aussi que cõtre ceux cy que le Roy a decerné lesdites lettres : Sur lesquelles il plaira à la Cour ordonner qu'il sera mis , qu'elles ont esté leuës , publiées & registrées : & la supplions de vacquer diligemment à l'execution d'icelles , comme de nostre part nous y apporterons tout le deuoir que nos charges requierent. Ce que la Cour ordonna par son Arrest du neufiesme Aupil, 1596.

VINGTQVATRIES^{me} PLAID.

Qu'après l'adiudication legitimement faite des fermes des Aydes, personne n'est receuable à y mettre enchere.

NOUS apprenons des liures des anciens Grecs; qu'un iour Eurycratides Lacedemonien, estant enquis de quelqu'un, d'où venoit que les Ephores estoient si curieux à faire exactement entretenir la foy que leurs Citoyens se donnoient les uns aux autres, respondit que c'estoit à fin que plus aisément ils s'accoustumassent à obseruer la foy publique: mesmes celle qui se donnoit à l'ennemy.

Mais si au contraire, quelqu'un nous demandoit pourquoy en toutes noz actions nous allons recommandans la foy publique: le dirois certes que c'est à fin de nous rendre plus proclives & capables d'obseruer celle que nous nous donnons en priué. Car comment pourrions-nous estre fideles entre nous, si en public (sur le modelle

S ij

duquel chacun forme ses actions) la foy est negligée, spécialement celle qui se donne en iugement, c'est à dire, en l'autel & sacraire de la iustice, où tout ce qui se resoult & contracte, doit estre tenu pour verité & certitude : *Fora etenim non magis quam templa dici debent, propter quæ valent leges & iudicia;* disoit Quintilian en l'une de ses Declamations.

Or comme rien ne se traite en iugement où le droit requiert plus de poids, de longueur & de formalité, qu'és adiudications des Fermes fiscales, *quæ fide locantur publica.* Ainsi pouuons-nous dire que quand en icelles toutes les formes ont esté accomplies au desir de la loy; n'y auoir rien plus digne de foy, ny qui doieue demeurer plus ferme & inuiolable.

A ceste occasion l'Empereur Theodose intitulant le traitté de ce subiect qui est en son Code, *De fide & iure hæstæ*: vouloit dire qu'il n'y auoit acquisition que l'on puisse faire, ou l'on deust se promettre plus de foy, de droit & d'assurance, qu'en celles qui se font de ceste façon. Ce que confirme l'Emp. Valent. in l. i. eiusd. tit. disant, *quæcunq; fisco auctore locatur, ut penes eos sint iure cōductionis, quibus res huiusmodi sub hæ-*

Iste solemnis arbitrio, fiscus addixerit, & si quid unquam, ut à fisco facta locatio possit infringi, auctoritate rescripti fuerit impetratum, nullus obtemperet. A quoy se rapporte ce que l'Emp. Gratian escriuant *ad Pancrat. Comit. V. Pr. in l. 3. C. Th. de locat. fund. Reip.* disoit, *semel conductas possessiones, nulla ratione ad alios transferri patiaris, sed penes eos iugem permanere iubeas possessionem, quos conductionis iure eandem meruisse constiterit.* Autrement s'il y auoit si peu de foy & fermeté en ces contractz publics & solempnels, de quel front ie vous prie, pourroit la Iustice employer la rigueur de ses loix, contre ceux qui violent leur foy; veu qu'elle mesme seroit si incurieuse d'entretenir la sienne? *certè cauendum est ne inde nascatur iniuriarum occasio, unde iura nascuntur,* dict sur ce propos vn de noz auteurs.

Mais (comme disoit Plinc *in Paneg.*) *nūquam Principibus defuerunt qui graui fronte & supercilio utilitatibus fisci contumaciter adescent,* les Princes n'ont iamais manqué d'hommes qui leur ont plustost conseillé l'vtilité, que l'honneur; Ainsi trouuons-nous quelques vns qui preferas à la foy, l'aduantage du fisque, luy ont attribué ce priuilege, de se pouuoir departir de son con-

traicté, *oblata meliore conditione*, comme il est traicté in l. 1. & 2. C. de vend. reb. civit. lib. mais ie desirerois que pour les faire changer d'avis ils se misent deuant les yeux, ce que faisoit en pareilles remōstrāces l'Emp. M. Antoninus l'un des plus grands Empe-reurs qui porta oncques sceptre; *fisco in cau-sis compendij nunquam indicans fuit: sane quā-vis esset constans, erat etiam verecundus* dit de luy Iulius Capitolinus. Iusques-là, qu'ayant vn iour esté contrainct de vendre *sub auētio-ne* les plus precieux meubles de l'Empire, pour subuenir aux fraiz de la guerre Ger-manique; neātmoins la necessité estant pas-sée, il ne voulut en rien violer la foy de ces contracts, n'y en retirer vne seule piece cō-tre le gré des acheteurs; bien qu'elles n'euf-sent esté vendues, ce qu'elles valoient, *sed rātum potestatem dedit emptoribus, ut si quis vel-let empta reddere atque aurum recipere, sciret lice-re. Nec molestus ulli fuit, qui vel non reddidit em-pta, vel reddidit*, dit ce mesme Autheur.

Aussi voyons-nous que les plus sages ont tousiours reſtraint ce priuilege és contracts que le Fisque ou la Republique d'une cité pouuoit faire en priué: Et ne luy ont donné lieu à l'endroit de ceux qui se faisoient *sub hasta* & en public, pourueu qu'on n'y eust

apporté aucune precipitatiō, & que le tēps ordōné pour les encheres, eust esté entiere-
mēt obserué: Qui est la resolutiō de l'Emp.
Diocletiā *in l. 4. C. de fide instr. lib. 10.* disāt, *si*
tēpora quæ in fiscalibus hastis statuta sunt, patiun-
tur, ad rationalem nostrū, ut iustā vberioris pre-
tij oblationem admittat: car le tēps estant expi-
ré, personne n'estoit plus receuable à en-
cherir sur celuy qui estoit adiudicataire le-
gitime, la loy ne se voulāt persuader qu'on
eust peu vser d'aucune fraude en ces actes
si publics & solempnels, comme le Poëte
semble toucher *lib. 4. de Ponto*, disant,

Aut populi reditus positam cōponet ad hastam,
Et minui magnæ non sinet urbis opes.

d'où vint que du temps de la Republique il
fust expressēmēt deffendu, que les Fermes
du reuenu du public, fussent autremēt bail-
lées qu'en ceste sorte, *nisi videlicet in urbe, ni-*
si in concilio frequenti, nisi in conspectu populi
Rom. & nisi præconio publico, comme disoit
Ciceron, *contra Rullum*, estimās avec verité
que le plus asseuré controolle des Officiers
qui auoiēt la charge de telles affaires, estoit
cest œil vniuersel du peuple.

Et tout ainsi que ce leur fust vn iour,
gloire non petite (dit Tite Liue sur le dis-
cours de Caton le Censeur) de reuocquer

les adiudications qu'ils auoient faictes : pour ce qu'ils virent que leurs Fermiers picquez d'enuie les vns contre les autres, les auoient encheries à vn prix excessif, iugeans avec raison , *non oportere ita præfractè ærarium & vectigalia defendi*, que sous pretexte de leur faueur & aduantage, on vint à ruiner ceux qui s'estoient precipitez pour les faire valoir : A semblable prudence ils reputerent tousiours à honneur, de conseruer la foy entiere à leurs Fermiers, & ne retracter iamais leurs baux, sous pretexte d'une offre plus aduantageuse & profitable. Ce que l'Emper. Theodose voulut estre practiqué de son temps, disant, *Sed nec locabitur alteri possessio, licet ingenti videatur superari augmento. l. ult. C. de locat. præd. civil.* Comme de verité, l'honneur public sous vn bon Prince, est tousiours preferable à l'vtilité de son Fisque.

Nos loix de France n'ont esté moins curieuses de l'entretienement de ceste foy & honneur, en telles & semblables affaires. Car par toutes les Ordonnances, mesmes celle de l'an cinq cens cinquante trois (qui est suyuie aujourd'huy pour la forme des baux des Fermes) depuis que l'adiudi-

cation en a esté faicte, personne n'est plus receu à y mettre enchere : pourueu que le temps & les formes requises, y ayent esté entierement obseruées: qui sont telles, que premierement les baux se doiuent faire le premier iour de Iuillet, à la chandelle, au plus offrant & dernier encherisseur, & ce pour vn an, à commencer du premier iour d'Octobre ensuyuant, sur lequel dernier encherisseur on ne peut encherir, que par tiercemens qui valent cinq encheres, & dure le temps des tiercemens iusques au dernier d'Aoust, apres lequel temps on n'est plus receu à encherir, que par doublemens, qui valent dix encheres, & dure ce temps, iusques au dernier de Septembre ensuyuant & inclus, apres lequel nul n'est plus receu à y mettre enchere, fors & excepté ceux à qui lesdites Fermes par tiercemens ou doublemens, auroient esté ostées, lesquels peuuent icelles recouurer en mettant vne enchere sur celuy qui les auroit tiercées ou doublées, & ce dedans huietaïne apres lesdicts doublemens & tiercemens, laquelle expirée, la Ferme doit demeurer au dernier encherisseur, sans qu'en apres elle luy puisse estre ostée en aucune façon.

Or nous auons reconnu qu'au bail faict à l'intimé de la Ferme dont est question, les premiers Iuges ont exactement obserué toutes ces formes. & sans aucune precipitation : comme mesme l'appellant l'a assez aduoué, n'ayant donné autre couleur à son appel, que de l'enchere de mil escus par luy mise, & qu'il soustient auoir deu estre receuë, puis que la condition du Roy en estoit renduë meilleure, encores que son offre eust esté faicte, *decurfis hastis*, apres l'adiudication parfaicte, & le temps des encheres expiré.

Mais si cela auoit lieu, vous voyez que ce seroit renuerser les Ordonnances & les Arrests confirmatifs d'icelles : vous voyez que ce seroit violer la foy publique, & que pour le peu de seureté qui seroit en icelle, seroit oster le courage à toutes personnes de venir plus encherir les Fermes du Roy : vous iugez que si le Prince practiquoit en ses Fermes, le mesme priuilege que par les loix du Royaume il a és ventes d'icelles, & de son autre Domaine, la pluspart demeureroient sans trouuer aucun encherisseur, pour la crainte qu'auroit vn Fermier que le premier enuieux les luy vinst tollir, sous pretext-

te d'une surenchere. A ces causes, nous estimons auoir esté bien iugé par les Iuges dōt est appel, ayans debouté l'appellant de sadi-
te enchere. Ce que la Cour confirma par
son Arrest du douziesme Octobre, mil cinq
cens quatre vingts & quinze.

VINGTCINQVIESME PLAID.

*Sur l'immunité des Religieux
& Mendians.*



DIODORE au 19. liu. de sa Biblio-
theque, faict mention de certains
Arabes Nabarrois, qui de toutes
les terres qui furent en leur puis-
sance, se reseruerent seulement & honore-
rent du nom de leur patrie, non celle qui e-
stoit la plus riche & delicieuse: mais la plus
pauvre & sterile, qui n'estoit arrousee de
fleuve ou riuere, d'où la moindre armée
ennemie eust peu se rafraichir & abreuuer
Et qu'en outre ils se dōnerent entr'eux vne
loy portant deffense de ne semer fourmēt,
ny de planter aucun arbre fruietier, ny de
bastir maison sur peine de la mort; Iugeant

ceste nation estrange, que le plus assuré fondement de leur tranquillité, estoit ceste pauvreté publique; comme celle qui pouuoit seule les garentir de l'enuie de leurs voisins, & de l'ambition & auarice de leurs citoyens: qui sont les trois demons coniurez à la ruine de tous les Estats & societez du monde: Comme celle aussi qui pouuoit seule combattre pour eux à la barriere, & empescher que les voluptez, & autres telles passions vraies ennemies des Republiques, n'entraissent sur eux pour remuer leur repos general & priué. Et comme celle qui n'estant aucunement subiecte à la fortune, acquiert aux hommes ceste perfection que Democrite appelle ἀσφαλεία, vne fermeté & assurance d'esprit contre tous accidents des choses humaines: Bref comme celle qui trefçauante d'elle mesme nous sert d'un diuin pedagogue, pour nous apprendre à preferer au vice la vertu, & negliger la terre pour acquerir le Ciel.

De ces mœurs & loüables coustumes de ces Arabes, nous dirions que ce saint & religieux ordre des Cordeliers, fust deuenü imitateur, fil n'eust eu Iesus Christ pour vn exemple trop plus auguste de ce-

ste pauvreté & temperance : car bien que tout le monde fust sien, & les thresors & richesses de la terre en sa puissance, toutesfois sa natiuité, sa vie, sa mort, ne fust qu'un saint & continuel exemple de pauvreté extreme. Si qu'il disoit en l'Evangile, que les regnards auoient des repaires & cauernes pour se retirer, & les oyseaux des nids pour se reposer mais quant à luy il n'auoit ou recliner son chef. Et afin de rendre la pauvreté autant honorable par ses diuins cōseils & sacrez preceptes, comme par sa vie & exemple, il dit à celuy qui s'informoit des moyens pour s'acquérir vne vie parfaicte, *vende omnia quæ habes, & sequere me.*

C'est là le fondement de la vie, vœu & profession des opposans, lesquels comme contempteurs du monde, imitateurs de Iesus Christ, ont eschangé le temporel pour le spirituel, le transitoire pour l'eternel, & les biens & thresors de la terre, pour ceux du ciel. Si que viuans souz les priuileges & merites d'une pauvreté si recōmandable; Qui ne diroit avec raison que ce seroit vne espece de sacrilege, de les aïrainer aux tributs & impositiōs? La pauureré n'estant autre chose qu'une pleine liberté, & affrā-

chifement de toute servitude : Comme le signifiâ ce Philosophe, lequel renonçant à ses biens, vſa de ces termes, *Crates, Cratetens libertate donat.* Et à ceste occasion Symmaché eſcriuant pour l'immunité des pauvres Veſtales de Rome, diſoit, *nudum quidem immunitatis nomen acquirunt, quoniam paupertate à diſpendio tutæ ſunt.* Ce qui approche de ce que Dio Chriſoſt. diſoit, *orat. 7. paupertatem rem verè ſacram eſſe tutamque : quia nemo ferè pauperes iniuria afficiat, non magis quàm quæ caducea ſerunt.* auſſi le Philoſophe Epiète reſpondit fort bien à l'Emp. Hadr. que le pauvre eſtoit *inſtar putei vacui & deſerti, quem omnes aſpiciunt, & ſuo loco relinquunt.*

Mais ce qui augmente la faueur de leur cauſe, eſt qu'ils diſent que la contraincte du Fermier dont ils ſe plaignent, a eſté pour payer l'impoſition de l'entrée du vin qui leur a eſté auſſi moné és villages voiſins de ceste ville de Tours eſtant la honte & le blaſme tref-grand, d'aſſervir aux charges prophanes choſes ſi ſainctes & ſacrées comme ſont les aumouſnes, que Tertulian *in Apolog.* appelle à ceste occasion *deposita pietatis,* & Sainct Paul au. 1. des Corinth. *collectas quæ ſunt in gratiam ſanctorum, &*

Sainct Cyprian en ses Epistres, *sacras pauperum pensiones*, & le vulgaire, *Eleemosynas*, du Grec *ἐλεος*, qui signifie misericorde ou commiseration. Qui sont toutes saintes marques, pour monstrier en quel honneur les aumosnes doiuent estre tenuës parmy nous. Veu mesmes que les Ethniques, bien que priuez de l'exercice de la vraye religion, les ont euës en vne si estroicte recommandation : iusques là qu'Arnobee remarque, que la formule des pauvres mendiants Romains en demandant l'aumosne, estoit (*per Deum*) au singulier, combien qu'en toutes autres choses ils ysoient de pluralité de Dieux : Et certes comme l'aumosne, dit Sainct Gregoire en l'une de ses Homelies sur Sainct Iean, est le plus agreable deuoir que Dieu puisse remarquer en ses creatures, pour autant qu'il symbolise & se rapporte à la pitié qu'il a de nous : Aussi doit on estimer que la plus desplaisante action que les hommes pourroient faire deuant sa face, seroit de rendre tributaires les aumosnes qui se font en son honneur.

Que si l'Empire de Pescennius Niger fust deshonoré; dit Spartian, de ce qu'en iceluy l'auarice publique fust telle qu'on

leuoit vn tribut, *non tantum pro solo, sed & pro celo*, pour l'air que l'on respiroit: Et si la posterité, dit Cedrenus, blasme la conuoitise de Michaël Empereur d'Orient, de ce qu'il exigea la dixiesme partie, *ex diurnis artificum questibus*, rendant par ce moyen la sueur des hommes tributaire. Si Octauius deshonna l'entrée de sa principauté, dit Dion au 46. de ce qu'il contraignit les Senateurs de luy payer six asses, pour chascue tuille de leur maison, donnant à sa conuoitise vne si extraordinaire mesure. Bref si le regne de Lysimachus, dit Athenée au 3. *δελιπποσφ.* sera notté à lamais, pour auoir le premier introduit la gabelle sur le sel, & festre la nature mesme bandée contre son auarice, faisant tarir & desecher ses marais iusques à ce qu'il eust aboly l'impôst: comme si elle eust abhorré toute seruitude és choses qu'elle nous donne liberalement: Certes noz Chroniques auroient trop plus de subiect & occasion de donner blasme & deshonneur perpetuel à ce siecle, si on en estoit venu là, que de rendre les aumosnes tributaires. Car en effect ce seroit contre toute pudeur Chrestienne, assubiectir la charité & la misericorde aux seruitudes, *satius enim est inopem rempublicam obtinere, quam*

quàm ad diuitiarum cumulos per dedecorum vestigia peruenire, disoit Pertinax dans Spartian.

Cóme aussi nous auons vn Prince trop pieux & debónaire, pour auctoriser cela en son téps, veu que iamais il ne fut practiqué, & au contraire nous lisons *lib. 1. leg. Franco. cap. 45.* vne loy de noz anciens Rois; portát vne peine seuiere contre ceux *qui ob res Clericorum, quas domum ducerent sua usu, vestigial portoriumq; exigent*, tant s'en faut qu'on ait oncques approuué en ce Royaume aucune imposition sur les aumosnes, non plus que sur les dixmes destinees pour la nourriture des Prestres en la maison de Dieu; dequoy se doit entendre ce qui est escript *in legibus Boiariorum*, au tiltre de *ecclesiast. donationib. §. 1.* en ces termes: *oblata res religioni eripi mortalium potestati debent, & in tutelare ecclesiæ patrociniū transire, atque ad ecclesiasticam libertatem à profana omni seruitute sunt asserenda.*

Mais le fermier de l'imposition a soustenu contre les opposans, qu'avec le vin d'aumosne ils auoient aussi faict entrer du vin prouenant de leur creu, & que du moins pour raison de ce ils doiuent l'imposition de l'entrée: comme à la verité il semble que lesdits opposans n'ayant denié ce fait, il y

T

auroit apparence de les y astringre, attendu que les Cordeliers ne peuuent *ex regula & voto*, posseder aucuns biens, ny en propre ny en commun, & qu'ils sont *veluti aduena & peregrini in hoc seculo*, comme dit le Pape en la Clementine *Exiuit de parad.* En quoy on les a distinguez d'auec les autres Religieux mendiens, lesquels bien qu'ils ne peuuent retenir vn immeuble, toutesfois ils le peuuent receuoir pour le vendre, & conuertir l'argent en leur vsage, *c. quod ingredient. xix. quæst. 3.* Mais les Cordeliers ne peuuent ny receuoir, ny retenir aucuns biens, *nudi nudam sequi debent crucem*, de sorte qu'à la rigueur tant s'en faut qu'ils puissent pretendre aucun priuilege pour le vin de leur creu : qu'au contraire ils se rendent coupables en ce qu'ils contreuient à leur vœu & profession, mesmes aux Conciles qui les ont establis.

Toutesfois nous considerons, que leur reigle commença en vn temps que la charité estoit plus grande entre les Chrestiens qu'elle n'est, & que les aumosnes estoient le plus assésur bien, comme fruiçts d'une ferme pieté qui estoit lors : Mais auourd'huy que toutes ces vertus sont presque mortes en la terre, aussi que ceste desrei-

glée guerre remplissant la France de pauvreté vniuerselle, oste le moyen & la faculté de les exercer commodément, à ceste occasion il semble qu'il y auroit quelque raison d'vser en cest endroiçt de pareille benignité & faueur, veu mesmes que le Pape leur predisant ce refroidissement de charité en ceste constitution, *Exiuit qui seminat*, dit que cela aduenant, *nouis malis noua erunt adhibenda remedia.*

Nous ne pouuons obmettre de toucher vn dernier moyen allegué par le défendeur ; Que les opposans ne doiuent pretendre aucun priuilege pour le vin à eux aumosné, attendu que l'usage du vin leur est interdict par leur reigle : mais ceste obiection est faite de gayeté de cœur ; car leur reigle n'en parle point du tout. Bien est vray qu'au commencement de l'Eglise les Chrestiens, non seulement les Prestres, mais le peuple s'abstenoient de vin & de chair durant les iours destinez pour le ieusne, tesmoin ce que nous lisons de *xerophagijs Christianorum* dans, Tertullian *lib. aduers. Physicos*, il ne beuuient que de l'eau pour tout breuuage, & vn peu de sel & d'hysope *pro pane & opsonio, quorum tenuitas ut mortem prohibeat, sic vires non augebat*, cō-

me remarque Eusebe *lib. 2. ecclef. hist.* Mais hors les iours de ieufne & continence, tant s'en faut que le vin fust interdit, qu'au contraire nous lisons au cinquante & vn canon des Apostres compilez par S. Clement, que *abstinentia à vino improbabatur, nisi tempore ieiunij.* Sans s'arrester donc à telles friuoles obiections, nous estimons qu'à bonne & iuste cause les demandeurs se sont opposez, & qu'en faisant droit sur leur opposition, ils doiuent estre declarez exempts de toute imposition pour l'entrée de leur vin aumosné, ensemble pour le vin de leur creu ceste fois seulement, attendu la misere du temps, & sans tirer à consequence. Ce que la Cour ordonna pour le regard du vin aumosné seulement, mais que pour le vin de leur creu, ils payeroient, attendu l'ordonnance qui ne dispense personne de ceste contribution, par son Arrest du mois de Iuin, 1593.

VINGTSIXIESME PLAIDOYE.

Sur l'immunité des Hospitaux, & comment se doit entendre ceste clause accoustumée aux lettres de creation de subsides, Ausquels seront contraincts exempts & non exempts, priuilegiez & non priuilegiez.

LE Roy pour accommoder quelques Seigneurs qui l'auoient secouru durant ces guerres, a créé vn subside à prendre sur le vin entrant en la ville de Noyon; Et ce à l'exemple de ces anciens Roys & Princes, qui assignoient à leurs Capitaines, & chefs de guerre, *satrapis & dynastis suis*, certaines villes pour en prendre les subsides, comme à Pitarche fut assignée Percota & Pilescopsis, *εις γραμνικὸν ἔματισμόν*, & à Themistocle, Lampface *εις οἶνον*, Myns *εις ὄψον*, Magnesia *εις ἄρτον*, comme remarquent Athenée *lib. I.* & Strabon *lib. I.*

T iij

Ce subside donc crée, & verifié en la Cour, ces Seigneurs l'ont fait bailler à ferme; & comme l'avarice n'a rien de sacré au monde: ainsi celuy qui en tient le bail, y a voulu contraindre les administrateurs de l'Hospital de ceste ville là, par saisie du vin qu'ils faisoient entrer pour la prouision & fourniture de ceste maison sainte, lesquels s'y seroient opposez, attendu la qualité, & le mérite du lieu & de la chose. Et neant moins les Elcuz sans s'y arrester, les auroient condemné à payer, se fondants sur la clause portée par les lettres de creation de ce subside, qu'au payement d'ice-luy, toutes personnes y seroiēt contraincts exēpts, & non exempts, priuilegiez & non priuilegiez, mesmes les Ecclesiastiques.

Dont ils auroient interietté l'appel qui s'offre à iuger, lequel, sous correction, ne doit recevoir aucun doute, pour ce que si le dire d'Ulpian *in l. i. ff. de excusat. muner.* est veritable, que chascque exemption de droit *sua equitate nitatur*; c'est principalement de celle, qui a esté octroyée aux Hospitaux par les loix diuines & humaines, cōme il se voit *in l. omnia priuilegia, & l. Orphanotrophis. C. de sacros. Eccles. & cap. ad hac, de relig. domib.* pour ce que (ainsi que disoit

vn saint personnage) *hinc subleuantur miseri, curantur infirmi, saturantur famelici, tristes cōsolantur, nudi vestiuntur, expositi recipiuntur, uirginitas custoditur, dispersi cōgregantur, peregrini hospitantur*, qui sont toutes actions lesquelles par les mesmes loix, nous ont esté plus estroitement recommandées, apres l'honneur de Dieu. Et à fin de nous y exciter d'auantage, elles nous appellent les pauures, les temples du Seigneur, les membres de Iesus-Christ, ses enfans & heritiers; Et quant aux Orphelins & enfans trouuez, elles nous les vont nommans les Thresors de l'Eglise, les pelerins, & les vefues, les obiects de la charité, en saint Luc 18. & saint Math. 25.

C'est pourquoy le premier soing, qu'eurent anciennement les plus sages Gouverneurs des villes, pour en acquerir reputation, fust à l'endroit des Hospitaux, qu'ils nous appelloient *Xenodochia*, & *Xenones*, vnde & *Iupiter Xenios dictus, ut hospitij præses & vindex*. Et quant aux lieux destinez pour les Orphelins & enfans trouuez, ils estoient aussi par eux appelez *ἄρστροφῆα*, & *ὀρφανοτροφῆα*; & les personnes deputez du public pour en auoir l'administration & sollicitude, dicti *Orphanotrophi*,

T iiij

Xenodochi, Xenoparochi, dont est fait mention es loix cy-deuant cõtées, & in l. 16. & l. 18. C. de sacros. eccles. & l. ult. ff. de muner. & honorib.

Athencee lib. 4. dit que specialement en la Grece, ils estoient tres-curieux de ces choses, & qu'en la pluspart des villes d'icelle y auoit deux lieux ou maisons publiques, l'une dicte ἀνδρεῖον & l'autre κοιμητήριον, ou les pauvres Pelerins estoient reçus pour repaistre & se reposer; En Athenes le lieu qu'ils appelloient στυπιεῖον, seruoit à cela. D'où vient que Dion Chrysost. orat. 50. le met *inter loca sanctiora Græciæ*; Et souloient pour l'entretienement de ces lieux là, & la despense qui sy faisoit, leuer sur eux vne certaine collecte, qu'ils appelloient ἐργον, dont fait mention Platon lib. 11. de legib. Demost. orat. Midiana, & in Nicostrat. & dans Antiphon, vous en voyez vn, qui se glorifie dy employer vne partie de son biē: λαμάρῳς, (inquit) χορηγῶντα, πολλὰς δὲ ἐργαζόντα, &c.

Et parmy nous il se voit que comme les plus anciens temples que nous ayons, estoient autres-fois des Hospitaux; qu'aussi la premiere marque, que donnerent noz peres de leur pieté, fust à l'endroit des

· pauvres, des vefues & Orphelins. Ce qu'estant ainfi , qu'elle apparence y auroit-il d'affubieétir aux daces & subfides les prouifions qui fe portent pour la fourniture de ces faints lieux?

On a dict, que par les lettres de creation de ce subfide, il eftoit porté par exprés, qu'un chacun y contribueroit, mefmes les Ecclesiastiques: Mais ceste obiection ne merite qu'on s'y arrefte: car d'inferer la reuocation du priuilege des Hofpitaux, par celle des Ecclesiastiques, feroit vne conclusion impertinente, pour ce que le priuilege des Hofpitaux eft beaucoup plus grand & plus recommandé, que celui des Ecclesiastiques. De fait les Roys de France leuent les decimes fur les Ecclesiastiques, & non fur les Hofpitaux, comme il fe voit aux Edicts de l'an 1544. & 45.

Et combien que par le Conseil de saint Augustin, la donation faicte à l'Eglise se reuoque par la furvenüe des enfans *C. in presentia, de probat.* conforme à la loy ciuile *Nam & si parentibus ff. de inoffest.* toutesfois le mefme n'est permis pour le regard des donations faictes aux Hofpitaux, *c. quicunque 16. quest.* Et à semblable

si vne donatiō a esté faicte à deux pies causes incertaines, l'executeur testamentaire le doit plustost deliurer à l'Hospital, qu'à l'Eglise, dit l'Emper. *in auth. de Ecclesiast. tit. 6. si quis in nomine magni Dei.*

Bref les priuileges des Hospitaux, doiuent estre d'autant plus excellens, que les aumosnes ont tousiours esté estimées de plus grand merite, que les ieunes & les prieres. *Date eleemosynam*, dit Iesus-Christ, & *omnia munda sunt vobis*; à ceste occasion le Pape Gelase, ayant distribué en quatre portions le reuenue de l'Eglise, il met au premier rang celuy des pauvres, *c. quatuor 12. quæst. 2.* combien toutesfois, que par la corruption de ces derniers siecles, les pauvres en effect, en soient des-heritez, qui est peut estre le principal subiect de l'ire de Dieu sur nous.

Encores donc, que par lescdites lettres, le Roy ait voulu que les Ecclesiastiques fussent subiects à ce subside, pour cela on ne peut conclure, que les Hospitaux desquels le priuilege est plus ample, y doiuent estre soumis: comme de faict en vne pareille occasion, le Roy creant ces subsides nouveaux qui se leuent sur toutes marchandises entrans aux villes, il en a no-

tamment excepté les Hospitaux , bien toutesfois que les Ecclesiastiques y contribuent.

Et quant à la clause generale, par laquelle il est dict , que toutes personnes contribueront à ce subside, exempts & non exépts, priuilegiez & non priuilegiez : on ne peut non plus inferer , que par celà soit fait aucun preiudice au priuilege des Hospitaux : car c'est vne reigle en droit , que par telles clauses generales , on ne desroge point aux priuileges inferez au corps de droit , s'il n'en est faicte mention expresse, disent noz Docteurs sur la loy 1. ff. de constit. princ. & y est le texte formel in l. decurionibus C. de silentiar. De sorte que ceste clause vault seulement comme les priuileges particuliers, & *quæ non sunt inserta in iuris corpore* : comme par exemple & en autre subiect, le Iuriconsulte in l. hæres absens. ff. de Iudic. dit que l'heritier doit respondre au lieu , où le defunct auroit promis payer, *nec proprio priuilegio excusatur*, il parle là d'un priuilege particulier, *de priua lege, id est priuato lata*, comme dit Aulugelle lib. 10. cap. 20. Et au contraire en la loy 1. §. legatis. de ce mesme tiltre, il dit que les Ambassadeurs en pareil cas, pourroient decliner, & *domum reuocare*, pour

ce que leur priuilege en cest endroit, est general, & fondé en droit commun, auquel on ne peut deroger, que par loy expresse à cest effect, *quo enim iure quid sacram, eodem refecrandum.*

Partant nous concluons, à ce que l'appellation & ce dont a esté appellé soient mis au neant, & qu'en emendant il soit dit, que les appellans seront enuoyez absous, & que defences soient faictes tant audit intimé, qu'à tous autres, de leuer aucun subside sur les Hospitaux, sinon qu'il leur fust permis par lettres expresses du Roy, & les Arrests de la Cour. Ce que la Cour ordonna par son Arrest du mois de Decembre, 1600.

VINGTSEPTIESME PLAID.

Si les Cheualiers de saint Iean de Ierusalem font part du Clerge, & s'ils sont contribuables aux deniers qui sont imposez sur iceluy.



EST E question sera facile à iuger, si deuant toutes choses nous vous faisons souuenir de l'origine, progrès, & reigle des Cheualiers de saint Iean de Ierusalem. Les histoires, & specialement celles d'Orient nous enseignent, que leurs premiers autheurs, furent vne certaine troupe de citoyens de la ville d'Almaphie en Lombardie, lesquels se stans addonnez par quelques années à conduire & escorter les Chrestiens d'Occident, allans visiter la terre Sainte, & ayans practiqué par presens ou autrement la faueur du Soudan d'Ægypte, qui lors tenoit toutes les regions depuis Laodicée de Syrie, iusques à Alexandrie, ils eurent de luy permission de faire construire dans

la ville de Ierusalem vn temple en l'honneur de la saincte & sacrée Vierge, qu'ils apellerent de *Latina*, pour ce que Dieu y fust serui à la mode de l'Eglise Latine.

Et depuis leur deuotion s'estant accruë avec le nombre des estrangers, allans honorer le sainct Sepulchre, firent encores bastir en ce mesme lieu en l'honneur de sainct Iean, dit *Eleemon*, vn Hospital celebre pour y heberger les pauvres & les infirmes : & pour rendre leur zele plus religieux & recommandable ; ils s'en firent eux mesmes les Hospitaliers, & deslors ils perdirent le nom d'Almaphitains, pour estre appelez *Xenodochi* ou Hospitaliers.

Ils vescuient neantmoins sans reigle, iusques au temps que ceste saincte Cité fust leuée des mains des Barbares par Godfrey de Bouillon ; & lors y eust vn Gerardus plus ancien de ceste bande deuote, qui exhorta ses compagnons de s'obliger par vœu à observer obeissance, pauvreté, & continence, & de seruir avec humilité aux pauvres pelerins ; mesme de se signaler entre les autres Chrestiens d'une Croix blanche sur leurs habits : & à cest effect, il redigea par escrit, quelques statuts, & sanctions, contenans les peines, que de-

uoient deseruir ceux qui y contreuiendroient.

Ils continuerent quelque temps ceste vacation humble & seruiable, iusques à ce qu'accrus en biës & moyens, & que voyās la terre Saincte affligée des armes Barbares de Saladin, ils se resolurent de changer non leur vœus, mais leur vacation, & de prendre les armes pour la defense du nom Chrestien ; à lexemple des Templiers, & des Teutons, qui estoient de mesme profession, & rendirent tant de preuues de courage & de prouesse, que la garde des principales villes & forteresses de la terre Saincte, leur fust commise, & qu'un grand nombre de Noblesse, se vint rendre en leur compagnie.

Ils dresserent lors de nouuelles loix & reigles, conformes en la pluspart à la discipline militaire des anciens ; mesmes de recognoistre pour leur chef & souuerain, le grand maistre de l'Ordre, luy redre obeissance, subir ses iugemens & censures, se rendre à sa suite à son premier mandement ; n'en partir sans son congé, employer toute leur vie contre les infideles, faire valoir le bien de l'ordre, selon les charges qu'ils en auroient, dire par cha-

cun iour quelques prieres à Dieu , & de communier trois fois l'année : lesquelles reigles & statuts furent depuis louées, confirmées & approuuées par les Papes Adria quatriesme, Celestin, Clement septiesme, Paul troiesme, & Pie quatriesme. Et est remarquable, que par les bulles qu'ils en firent expedier, ils declarerent ces Cheualiers francs & exempts de la iurisdiction Ecclesiastique, les laissant seulement souz la seule dition & puissance de leur grand Maistre.

Et depuis, ils se sont monstrez en toutes occasions tant affectionnez au bien & aduancement commun de la Chrestienté, qu'ils ont non seulement merité d'estre recueillis par tous les Royaumes & Empires Chrestiens, faicts successeurs en la pluspart des biens des Templiers abolis soubs le regne du Pape Clement cinquiesme, pour les impietez qui leur furent mises sus : mais encores en consideration des exploits admirables par eux faicts en la deffense des Isles de Rhodes & de Malte contre les armes sanglantes de Soliman & autres amplement descriptes *ab Henrico Panthaleone, in historia Iohannitarum*, ils acquirent telle reputation qu'ils furent nommez

nommer le bouclier de la Foy, le fort de la Chrestienté, & le fleau des infideles.

De ce discours donc nous pouuons apprendre, qu'ores que le vœu de ces Cheualiers soit du tout à la pieté, & conforme en cela à celuy des Ecclesiastiques, leur vacation neantmoins en est fort dissemblable, veu que leur deuoir est de porter perpetuellement les armes, de tremper leurs glaiues victorieux au sang infeste des mescreans, & de faire gloire du nombre d'ennemis par eux occis pour la querelle de Iesus Christ : Là où l'vsage des armes, est du tout interdict & defendu aux Ecclesiastiques, sur les peines & censures portées par les saints Canons, iusques là qu'il se lit dans Zonare, que sous Constant fils de Leon, il arriua qu'un certain Prestre nommé Themeleus estât au Temple fust aduertý de la venuë de quelques Sarrasins, & que s'estant fait bailler des armes par le portier, il fist si courageusement, qu'il defendit l'entrée du Temple, & le preserua des mains impures de ces infideles; Et que neantmoins (dit cest auteur) il fust à ceste occasion destitué du sacerdoce, & ne peust oncques obtenir vn reestablisement, pour ce qu'il auoit

contreuënu aux defenſes faiçtes aux Eccleſiaſtiques de porter les armes, & au Canon qui dit, *qui militat Deo, non militet hominibus.*

Qui fuſt la meſme occaſion, qu'eurent les peres au Concile de Latran tenu ſoubz le Pape Innocent troiſieſme, de deffendre aux Eccleſiaſtiques l'vſage de la Chirurgie, pour ce que la pluſpart des cures & remedes de ceſt art, conſiſtent principalement, à couper & cauteriſer. *quomodo igitur occidere, cui nec ſanare fas eſt?* Et en vn autre Concile, il fuſt pour le meſme ſubieçt deffendu aux Eccleſiaſtiques d'aſſiſter aux iugemens criminels; combien que d'ailleurs les ſainçtes Lettres diſent, qu'il n'y a ſacrifice ny viçtime plus agreable à Dieu, que faire iuſtice d'vn meſchant homme. Ces fonctions donc ſi abhorrentes l'vne de l'autre, vous doiuent faire iuger que ces deux fortes de perſonnes ne peuuent faire membre d'vn meſme corps.

Et à vray dire nous ne deuons mettre au rang des Eccleſiaſtiques, ſinon ceux qui ſeruent au miniſtere Euangelique, & à l'adminiſtration des ſainçts Sacremens, comme ſont les Preſtres, les Diacres, les Soudiacres, les Acolytes, Exorciſtes, & au-

tres, avec lesquels ces Cheualiers n'ont aucune participation. De faict les anciens qui en ont faict mention par leurs liures, ne les ont oncques comprins en l'ordre des Ecclesiastiques. Voicy comme S. Bernard en parle *in serm. exhort. ad milit. temp. Ita denique miro quodam ac singulari modo viuunt ut agnis mitiores, & leonibus ferociores: adeo ut penè dubitem quid potius censcam appellandos, monachos videlicet an milites, nisi quod utrumque forsan congruentius nominarim, quibus neutrum deesse cognoscitur, nec monachi mansuetudo, nec militis fortitudo.* Le Cardinal de Vitriaco en son hist. orient. chap. 65. en dit le semblable, *strenui isti milites, verè in bello Leones, agni mansueti in domo, in expeditione asperi, in Ecclesia velut Eremitæ & monachi, Barbaris duri & feroces, Christianis autem benigni ac mites.* Ce qui approche aussi de ce que le Pape Innocent au chap. *deputati*, de *Iudit.* les appelle *milites orantes.* Ce mesme Cardinal neantmoins au chap. 63. de sa dite histoire semble les vouloir mettre au rang des laïques quand il dict, *terra illa melle & lacte fluens non solum Clericos, sed etiam laicos, tam milites, quam alterius conditionis, ut in ea relictis parentibus, & proprijs patrimonijs regulariter viuerent, incitauit, attraxit & illexit, quorum quidem fra-*

tres hospitales sancti Ioannis, alij fratres militiae templi, alij fratres sanctae Mariae Theutonicorum in Ierusalem nuncupantur.

Et combien qu'ils soient veuz participer en l'une & en l'autre condition, nous les deuons pourtant attribuer à celle *quæ in eis præualet*, suyuant la maxime commune de la loy, *Queritur hermaphroditū, de stat. hom.* qui sera indubitablement à la laïque, veu leur principale profession, ioint que les Papes, qui ont confirmé leurs priuileges, l'ont ainsi estimé, en ce qu'ils les ont vniuersellement affranchis & exemptez de la puissance & iurisdiction des Prelats Ecclesiastiques, comme il est disertement porté par leurs bulles, & dont les marques se voyent aux chap. 3. 7. 10. & 20. *de priuileg.* bien que la glose sur le C. *duo sunt genera*, 12. q. 1. les range avec les Ecclesiastiques; mais elle n'est soubz correction considerable, puis qu'elle n'est assistée d'aucune auctorité. Aussi que cela mesme a esté autresfois iugé solennellement, & par Arrest contradictoirement donné, au consistoire de tous les Cardinaux, soubz le Pape Adrian 4. sur le debat qui fust entre ces Cheualiers, & Fauleher Patriarche de Ierusalem, qui se vouloit faire recognoistre par eux, & les

contraindre luy payer quelques droicts pour raison de leurs biens ; le Pape prononça pour les Cheualiers, declarant leurs personnes & biēs, francs, libres & exempts de la puissance, auctorité, & iurisdiction dudit Patriarche, & de tous les Prelats de l'Eglise : & n'y eust que deux Cardinaux qui furent de contraire aduis : ores que l'Archeuesque de Tyr, qui racompte en son histoire le progrès de ce iugement, die que tous les autres furent corrompus par les presens de ces Cheualiers : car il n'est aucunement croyable en cela, pour ce qu'il estoit de ceux qui accompagnerent pour ce subiect le Patriarche iusques à Rome, & qui estoit interessé en la mesme querelle.

Le semblable a esté aussi iugé pour les Cheualiers Teutons, les Cheualiers Porteglaiues, les Cheualiers de Iesus-Christ, les Commandeurs de saint Anthoine, & de saint Lazare, qui sont en Allemagne, Espagne & Italie, comme le discourent amplement, Raphaël Volaterran, Æneas Sylvius, & plusieurs autres.

Et apprenons de ces mesmes auteurs, que les Princes temporels, qui ont prins en leur protection ces Cheualiers, en ont

tousiours ainsi vſé en leur endroit, & les ont en toutes occurrences distingué & séparé du clergé : mesmement au faict des leuées de deniers, qui se font sur les Ecclesiastiques, pour subuenir à la necessité de leurs Estats. Nous laisserons toutes les autres, pour parler seulemēt de noz Roys, desquels les declarations sont fort expressees à cest effect, sçauoir est de François premier, de l'an trente trois, de Henry second de l'an cinquante deux, de Charles neufiesme, de l'an soixante trois, toutes presque cōceuës en ces termes, *Ordonnons que d'oresnauāt ceux de l'ordre de saint Iean de Ierusalem, leurs Commissaires, Commanderies, Bailliages, Prieurez & autres leurs biens & reuenus, sont & seront à tousiours francs & exempts de toutes charges, aydes, contributions, dons, secours, subuentions, que nous ou noz successeurs, pourrions cy-apres demander, prendre, leuer sur le Clergē & biens Ecclesiastiques pour quelque cause quē ce soit, ne sous quelque nom, tiltre: ou nomination, ains, s'ils y estoient par erreur ou inaduertence nommez & compris, voulons qu'ils en soient exempts.*

Lesquelles declarations sont sous correction le iugement & decision de ceste cause, en laquelle vous auez ouy qu'il s'agit d'une leuée de vingt mil escuz, que le

Roy a commandé estre faicte sur les habitans & clergé de la ville de Laon, apres la reduction d'icelle en l'obeissance de sa Majesté, en laquelle ceux du clergé ont compris l'appellant, l'vn des Cheualiers de saint Iean de Ierusalem, à cause de la commanderie qu'il tient en laditte ville; dont il auroit appellé, se fondant sur les raisons & exemples sus-dicts, qui l'affranchissent & tous ceux de son ordre du pouuoir & auctorité du clergé; ensemble sur lesdictes ordonnances Royales, qui les exemptent de toutes leuées de deniers, mesmes de celles, qui se font sur le clergé, & gens Ecclesiastiques.

Ce nous seroit vn labeur superflu, de remonstrer sur quelles considerations ceste exemption est fondée: car si on l'octroye au simple Soldat, pendant qu'il est en la guerre, pour deffendre les limites de l'Estat de son Prince: à combien plus forte raison ceux cy la doiuent meriter? qui ont faict veu de chasteté, paureté & continence perpetuelle, pour estre tousiours plus prompts, & plus prest aux expeditions militaires, qui se font continuellement pour arrester le cours des ennemis communs de la Chrestienté: &

qui ne resident en leurs commanderies que pour se releuer de leurs labours, tousiours prests de retourner à Malte où est leur vray domicile, ou ailleurs, selon le mandement de leur grand Maistre. Et pouuons rendre ce tesmoignage public en leur honneur par les histoires qui ont esté escriptes des guerres saintes, qu'il ne se trouue point qu'ils ayent oncques manqué de deuoir & de courage, en toutes occasions qui se sont presentez pour le seruice de la Religion.

Mais il y a vne autre raison plus particuliere & speciale, pour laquelle ceste exemption leur doit estre exactement conseruée; qui est, qu'ils ne possèdent pas leurs biens, comme font les Ecclesiastiques: car ils ne les tiennent, que tant qu'il plaist au Maistre del'ordre, en sorte qu'ils peuuent dire comme il est escrit au Panegyrique, *tenuimus quoad voluit, tenuimus quoad licuit, precarij possessores sumus*. Et oultre ce ils sont tenus d'en rendre à leur ordre, la pluspart du reuenu, ce qu'ils appellent responsions, & qu'ils doiuent faire tenir à Malte à leurs propres cousts & despens, & en payer les changes & rechanges, qui est pour l'entretenement de leurs galleres & autres

frais de la guerre ; & ne font en ce faisant que Fermiers honoraires de leur ordre. Quand mesmes ils viennent à deceder, tous leurs biens iusques aux meubles & pecule retourne au profit de l'ordre, *moriuntur ut serui.*

De maniere que n'estans que simples Oeconomies, & mesnagers de biens affectez du tout aux impenses & fraiz des guerres Sainctes, quelle apparence y auroit-il de les afferuir à autres leuées & contributions ? Cela certes seroit de trop grande importance au bien commun de la Chrestienté : là où tout au contraire, les Ecclesiastiques ne peuuent estre depossedez de leurs benefices, quand ils en sont bien & legitiment pourueuz : ils en iouyssent avec plain vsufruit, & n'en payent que les decimes, qui est bien peu de chose : mourans ils laissent leurs fruiçts, acquisitions, meubles & cheuance à leurs heritiers : de sorte qu'ils n'ont aucun subiect d'enuier l'exemption de ces Cheualiers, si ce n'est qu'ils voulussent contribuer avec eux pour faire la guerre au Turc, & autres ennemis du nom Chrestien : mais puisque ils ne sont recherchez de cela, il faut aussi qu'ils vsent de mesme iustice enuers eux, signam-

VINGTSEPTIESME PLAID.

ment en la leuée dont est question en ceste cause, dont le subiect a esté la rebellion des habitans de la ville de Laon, à laquelle ils ne peuuent dire que l'appellant ait contribué, estans demeurez d'accord de son absence, durant toutes ces guerres.

Nous concluons donc, à ce que la Cour conuertissant l'appel en opposition, & y faisant droict; elle dise qu'à bonne & iuste cause, ledit Cheualier s'est opposé, & qu'il sera rayé des roolles de ladicte contribution, & faire deffenses tant au Clergé de Laon, qu'autres de les troubler en la iouissance de l'exemption, qui leur est attribuée par lesdites ordonnances. Ce que la Cour ordonna per son Arrest du mois d'Auril, 1598. Le semblable a esté iugé pour le Cōmandeur d'Auxerre contre le Clergé dudit lieu, par Arrest donné en ladite Cour au mois de May, 1601.

VINGTHVICTIESME PLAID.

*Sur le privilege des Marchans des villes
Imperiales d'Alemagne.*

LE Roy François 1. & ses successeurs Roys iusques à present, desirans gratifier les villes Imperiales d'Alemagne, leur ont permis de commercer librement avec leurs subiects, de faire entrer en ce Royaume, & tirer d'iceluy toutes sortes de marchandises, excepté les illicites & defenduës, en payant seulement les anciens subsides, & sans qu'ils soient tenus payer aucune chose des nouveaux, comme il est plus à plein contenu par leurs lettres, & chartes du mois de Mars 1515. de Decembre 1547. d'Aoust 1561. de Mars 1579. & de Novembre 1596.

Et sont ces lettres fondées sur l'ancienne alliance & confederation, qui a tousiours esté entre ceste nation & la nostre: Car d'alliance, voire de cōsanguinité, n'en peut-on voir de plus grâde, si nous croyons aux hystoires, qui font descendre les François d'Alemagne, & tirer leur origine

des anciens Germains, iusques là que Strabon *lib. 7.* & Eustath. *in Dionys.* disent, que les Germains furent ainsi nommez, comme estans frere ou cousins des François en mœurs, en loix & en langage.

De confederation au semblable n'en peut-on remarquer de plus ancienne, & plus estroite, veu que les mesmes historiës, c'est à dire Appian, Dion, Xiphilin, Cæsar, & les autres de plus grand nom, font les Alemans compagnons des Gaulois, aux conquestes qu'ils firent tant en la premiere sortie de leur pays, sous la conduite de Bellouise fils d'Ambigat Roy des Biturigeois, qui auoient lors la prerogative de nommer & eslire de leur corps le Roy de toute la nation Celtique; & en laquelle ils conquerirent l'Italie, firent bastir Milan, qui fut leur capitale & metropolitaine, dit Plutarque en la vie de Camille, puis fondèrent Paue, Come, Bresse, Veronne, Bergame, Trente, Vincence, Mutine, Parme, Boulongne, Laude, & la pluspart des villes de la Lombardie, de la Ligurie, Romagne, & Toscagne: qu'aussi en la seconde, qui se fit sous la conduite de Brennus, & Belgius, en laquelle ils prindrent Rome, subiuguerent la Pannonie, couru-

rent la Grece & la Mecedoine.

Toutesfois nous ne demeurerons d'accord avec aucuns escriuains Alemans, qui disent que ce Brennus estoit du pays de Suaue fils du Roy des Angilons Suaues: d'autant que Iustin, & tous les anciens ont escrit le contraire, & qu'il estoit chef des Senonois. De faict Beatus Rhenanus bien qu'Alemand le dit ainsi, & adiousté, *Satis laudum habere Germaniam, etiam si suas Gallis non suffuretur.*

De sorte que comme les Romains se persuadans estre descendus *ex Illo*, rendirent ceste ville franche & immune de toutes charges, *Iliensibus* (ce dit Suctone de Caligule) *quasi Romanæ gentis auctoribus tributa in perpetuum remisit*: bien toutesfois que Strabon *lib. 13.* disent qu'Alexandre fut le premier, *qui eam urbem ἐλευθέρῃ καὶ ἀφοροῦν pronunciauit.* Et en furēt si soigneux, que quand mesmes par les hazards de la guerre elle venoit à changer de main, ils ne permirent iamais que sa liberté fust en rien violée: comme ils le monstrent bien, quand ils firent la paix avec le Roy Antiochus, ainsi qu'il se voit dans Tite Liue *lib. 38.* & qu'ils escriuissent vn iour au Roy Seleucus vne lettre, par laquelle *ita*

demum amicitiam & societatem pollicebantur, si cōsanguineos suos Ilienses ab omni onere immunes prætitiſſet, dit Suctone in Claudio, cap. xxv.

Nos Roys tout de meſme ont eſtimé, qu'ils deuoient vſer de pareille courtoisie à l'endroit des Allemans, leurs anciens freres & compagnons d'armes, ainſi qu'ils ont fait aux treize Cantons des Ligues des Suiffes, leurs plus grands amis, qui peuuent pareillement trafiquer en ce Royaume, en payant ſeulement les anciens droits d'entrée & de ſortie, comme il eſt porté par les lettres du Roy Loys vnzième, & ſes ſucceſſeurs. Et de ceux cy nous pouuõs dire à touſiours, ce que dit autresfois Ciceron d'aucuns des allies des Romains, *horum vt auxilium nobis non deſuit, nos auxilio deeſſe non debemus, ſed remuneranda eorum pericula qui nos adiuuerunt.* Car certes la France ſera à iamais debitrice & redeuable à leur bonne volonté, & au ſecours & aſſiſtence, qu'ils nous ont donné au plus fort de ces derniers troubles.

Nos Roys auſſi ont eſté portez à ceſte faueur pnblique enuers les Alemans, à l'exemple de leurs anceſtres, leſquels authoriſans la Henſe Teutonique introduiſte ſoubs l'Empereur Frideric Barberouſ-

se, comme remarquent noz histoires, & celles des Saxons & des Vandales, ils donnerent libre entrée en ce Royaume aux marchands de ladite Hense ou confederation, en payant les droits anciens, comme il se lit en l'ordonnance de Charles cinquiesme de l'an 1371. & de Charles 8. de l'an 1497.

D'aillieurs aussi la loyauté, & artifice des ourages qu'ils nous enuoient, meritēt bien ce bō traitemēt: Car il faut que nous confessions, qu'il n'y'eust oncques nation plus experte aux ourages de la main, que sont aujourd'huy les Alemans, qui mesme ont remporté cest honneur immortel, d'auoir inuenté les plus vtiles arts, que nous ayons, & entre autres l'Imprimerie, comme le discours Palmerius *in Chro.* Car combien que Plin *lib. 3. 5. cap. 6.* face mention de quelques Peintres qui iuenterent l'encre pour escrire, ceste loüange neantmoins, n'est rien au pris de celle, que merite l'Imprimerie, vray don de Dieu, pour remettre sus les lettres qui falloient du tout perdre & esteindre, & en eterniser à l'aduenir la memoire, ensemble des hommes signalez & illustres.

Nous laisserons pour ceste heure leurs

autres inuentions excellentes, pour vous dire que le commerce qu'ils font avec nous, est d'autant plus fauorable, que les ouurages & estoques qu'ils nous apportent, vont du tout au profit & à l'vtilité. Au lieu que ce qui nous est apporté d'Italie, & d'ailleurs, ne va qu'aux delices & à effeminer noz mœurs; voire pour affoiblir ce Royaume, à cause des grands thesors qui s'en enleuent. Et pouuons sur ce subiect faire vne pareille plainte deuant vous, que fit vn iour Tibere au Senat, dit Tacite lib. 3. *annal.* en ces mots : *atque illa fœminarum propria, quid lapidum & vestium causa, pecuniæ nostræ ad exteras aut hostiles gentes transferuntur.*

Mais reuenants à ce priuilege, noz Rois n'ont pas voulu qu'indifferemment tous marchands des villes Imperiales d'Allemagne eu peussent iouyr, ains seulement ceux qui seroient natifs d'icelles, & qui se seroiēt inscrits au greffe de la Seneschaucée de Lyon. Et est ceste remarque de naissance, fondée sur ce que ce priuilege n'est octroyé qu'en faueur de ceste nation, & qu'il ne seroit raisonnable, qu'un estrangier venu de nouueau demeurer en icelles, vint à iouyr de mesme prerogatiue; Qui
est

est vne jalousie ordinaire des originaires sur les estrangers habitans en mesmes villes, & qui a esté de tout temps fauorisée des loix publiques; comme nous l'apprenons de celles des Romains dites, *Servilia, Licinia, Plancia, Mutia, Papiria, Patronia, Papia, Iulia*; sembables à celles qu'eurent les Lacedemoniens, les Atheniens, & les Aeginètes, comme le discourt amplement Demosthene en l'oraisō in *Aristocrat.* ou mesme il fait mention d'un nommé Lampis, le plus riche marchand qui fust de son temps en la Grece, lequel bien qu'il eust rendu la ville d'Aegine tres-celebre entre les autres, pour le grand commerce qu'il y faisoit, neantmoins, dit cest Orateur, il n'auoit peu encores obtenir droit de bourgeoisie en icelle, ny l'exemption du subside, qui se leuoit sur les estrangers y demeurants.

Et est à croire, que les originaires desdites villes Imperiales, ont esté les auteurs de ceste distinction & difference, veu qu'il se remarque, que de tout temps les Alemans ont refuy le meslange des estrangers, ce que Tacite nous enseigne en son traicté de *moribus Germanor.* disant, *ipse eorū opinio-nibus accedo, qui Germaniæ populos nullis aliarū*

*nationum concubiis infectos, propriâ & sincerâ & tantum sui similem gentem exitisse arbitrantur: qui estoit mesme la cause, pour laquelle ils detestoient ceux de leur nation, qui alloient demeurer ailleurs, ce qui est tesmoigné par les traictez de paix qu'ils firent avec les Romains, ou ils faisoient tousiours inserer ceste clause, dit Ciceron, *orat. pro Balbo*, *Ne quis eorū civis reciperetur à Romanis.**

Quant à l'inscription que doiuent faire les marchands desdites villes, de leur nom & demurance c'est pour eiter aux fraudes que le Fisque pourroit ressentir de l'vsurpation iniuste, qui se pourroit faire de ce priuilege, par autres soubz le nom des vrayz citoyens d'icelles, & ce à l'exemple de l'inscription requise par la Hense Teutonique, & de celle qui se faisoit sur le registre du Censeur par les Nauiculaires, lesquels pour fournir la ville de Rome de ses necessitez, iouyssoient de quelques priuileges.

Noz Roys aussin'ont voulu par leurs lettres que ces marchâds iouysent d'une immunité entiere, ains seulement des subsides nouveaux, c'est à dire de ceux qui ont esté creéz depuis l'an 1515. que ce priuilege leur fust pōtroyé: Car quant aux anciens

debuoirs, qui sont les premiers appuis de cest Estat, ils veulent que chacun y contribuë, specialemēt aux anciennes Doüianes, & droicts d'entrée & de sortie du Royaume, que les Grecs appelloient *Εξαγωγή & Εισαγωγή* & les nostres *transitoria tributa*, & qui sont veritablement si anciens, qu'il ne se treuve point d'Estat, & Republique, qui n'en ait eu de semblables, cōme le discours Aristote *lib. 2. Oecōnō. & Justin. lib. 36.* & plusieurs autres historiens.

Car cōbien que nous lisons dans Lāpride, qu'Alexādre Seuerē dōna vne tres-grāde immunité aux marchands estrangers, *ut Romā volentes concurrerent*; si est-ce que son histoire, & celles de ses successeurs, tesmoignent qu'on continua tousiours de leuer ce droit. Les loix & les cōstitutions qui se lisēt es tiltres *de public. vectig. & cōmiss. & in edicto de Alexandri.* en dōnent vn tesmoignage tres-certain; Strabon mesme le cōfirme *lib. 4.* ou parlant de la Brétagne qui estoit lors tributaire de l'Empire, disoit, *τὴν τε εἰσαγωγῶν ἐπὶ τὴν κελπὴν, τὴν ἐξαγωγῶν.* & le traite plus au long au liu. dernier.

Vray est que de peur de mesconten-
ter les marchands, ils y apportoiēt vne

grande moderation , comme on en peut voir les marques , *in edicto Claudij* , dont les restes se lisent *in frag. Instit. ult. tit. 3. de lat.* & dans Suetone en la vie de ce Prince : est toutesfois fort remarquable que les Romains , ne donnerent aux estrangers vne si grãde liberté de traficquer avec leurs subiects, cõme nous faisons. Car ils leurs prescriuoiet certaines villes, & limites, iusques où ils pouuoient aller, *mercaturæ causa*; comme il se voit en tous les traictez par eux faits avec leurs voisins; & plus particulièrement en ceste loy singuliere de l'Emp. theodose, qui se lit encores au tiltre *Commerc. & Mercator.* en cest termes, *Mercatores tam imperio nostro, quam Persarum Regi subiectos, ultra ea loca, in quibus fœderis tempore, cum memorata natione nobis conuenit, nundinas exercere minimè oportet, ne alieni regni (quod non conuenit) scrutentur arcana. Nullus igitur posthac imperio nostro subiectus, ultra Nisibin, Callinicum & Artaxatan emendi seu vendendi species causa proficisci audeat. Nec præter memoratas ciuitates cum Persa merces existimet commutandas &c.* Mais au contraire les François ne firent oncques difficulté de receuoir à traficquer parmy eux, voire iusques au milieu du Royaume, & dans les plus celebres villes d'iceluy, tou-

tes sortes d'Estrangers. Qui a esté vn tesmoignage perpetuel de la grādeur de leur courage exempt de tout soupçon & meffiance; & aussi de l'extreme ciuilité & courtoisie dont ils ont tousiours vse à l'endroiēt des estrangers.

Ces choses ainsi premises, le iugement de ceste cause sera aisé à faire, veu que les opposans nous ont iustifié par attestations publiques, qu'ils sont originaires d'une des villes cōprinſes au priuilege, ensemble qu'ils se sont fait inscrire, tant au Greffe du siege Presidial de Lyon, que de la preuosté de de Paris; & partant ils doiuent estre declarez frācs immunes & exempts du nouveau droiēt d'entrée, créé seulement en quatre vingts dixsept, & auoir main-leuée des marchandises sur eux saisies par le fermier dudiēt droiēt, ce que nous consentons. La Cour l'ordonna ainsi par son Arrest du mois d'Aoult. 1600.

VINGTNEVFIESME PLAID.

*Sur l'immunité des Officiers domestiques
de la Royne doüairiere.*

D'UN des principaux honneurs, que nous deuons aux Roys, consiste en celuy, qu'ils desirent estre rendu à la grandeur de leurs cheres espouses.

De faict nous apprenons dans les histoires, que les grands Princes ont tousiours voulu, que leurs femmes ayent esté honprées des mesmes tiltres, & iouy des mesmes priuileges, que leurs propres majestez. Tacite le tesmoigne lib. 1. Annal. parlant de Liuia femme d'Auguste, *Liuia in familiam noménque Augustæ absumpta* & dit que depuis elle, toutes les Imperatrices furent nommées Augustes, & Suetone, discourant des honneurs qui luy furent deferrez, dit, *Liuia diuinos honores & circensi pompa currum Elephantorum Augusto similem decernendum curauit.* iusques à inserer son image

en la monnoye , comme on le voit encores en plusieurs pieces, & medales, dont le public est redeuable à la curiosité de ceux qui en ont eu la garde.

Cela ne luy fust attribué seulement pendant la vie d'Auguste : mais encores durant sa viduité & le regne de Tibere, car elle ne se presentoit iamais en public, dit cest autheur en l'histoire de ce Prince, qu'elle ne fust saluée par vn applaudissement public, de ce nom glorieux, *Parens vel mater patriæ*, & Dion dit qu'en l'vne des faces de sa monnoye, elle estoit figurée avec ceste superbe inscription, *Iulia Augusta Genitrix Orbis*.

Que les ornemens aussi de ces Princesses, fussent semblables à ceux des Empereurs leurs maris , Herodian entre autres le remarque, parlant de Martia concubine de l'Empereur Commode, ἡ ἑδὲν (inquit) ἀπειχε γαμετῆς γυναικὸς, ἀλλὰ πάντα ὑπῆρχεν, ὅσα σεβαστὰ, πλὴν τῆ πυρὸς : qu'elle ne différoit en rien de sa femme legitime, & qu'elle auoit toutes les marques & ornemens imperiaux, excepté le feu, qui estoit *insigne præcipuum* de ceste majesté. Et après leur mort on souloit pareillement leur rendre les mesmes honneurs, qu'aux

Empereurs, comme Capitolin le remarque *in Antonino Pio*, ou parlant du deceds de la femme de ce Prince, il dit, *Faustina amissa, à senatu cōsecrata est, delatis circensibus atque templo, & flaminicis & statuis aureis, & argenteis.*

Et quant aux priuileges, il est certain qu'ils estoient du tout semblables à ceux de l'Empereur, ce qu'Vlpian enseigne *in l. 30. ff. de legib.* disant, *Princeps legib. solutus est, Augusta autem licet legibus soluta non sit; Princeps tamen eadem illi priuilegia quæ & ipse habet tribuit.* & le mesme *in l. 1. ff. de iure fisci*, en ces termes, *quodcumque priuilegiū fisco competit hoc idem & Cæsaris ratio, & Augusta habere solet.* Specialement en ce qui regardoit l'hōneur de ses domestiques, comme il se lit *in l. 3. C. de præpos. sacri cubic.* où l'Empereur dict, *cubicularios tam sacri cubiculi mei quàm venerabilis Augustæ, quos virósq; certum est obsequiis occupatos & aula penetralibus inherentes, his priuilegijs perfrui volumus, ut neq; possessiones eorū angarias, vel paraueredos dare cogantur. &c.*

Les Roys de Perse en vsèrent ainsi à l'endroit de leurs femmes, comme le recite au long Agathocles, & Athenée apres luy, & n'en repeterons autre chose, qu'une remarque qu'ils font comme d'un grand priuilege des Roynes de ce pays-là, c'est qu'il n'y

auoit que le Roy, elles, & leur fils aîné, qui eussent ceste prerogatiue, de porter le pourpre, *quæ ἀρχῆς σύμβολον erat & propria imperatorum*, mesmes de boire d'une certaine eauë, qu'ils appelloient dorée, dont la source estoit au pied de la Tour de Suse, & dont l'usage estoit interdict à toutes les autres sur peine capitale.

Les Roys d'Egypte en firent de mesme, iusques à assigner à leurs femmes, le reuenue des plus notables villes de leur Royaume, les vnes *εἰς κόσμον*, dit Herodote, pour leur parure & ornemens, & les autres pour l'entretenement de leur maison & domestiques.

Noz Roys n'ont esté moins curieux que tous ceux-là de l'honneur de leurs femmes; ils ont voulu qu'elles fussent appellées Roynes, & que pour les rendre plus venerables & Augustes, elles fussent sacrées comme leurs majestez, parées des mesmes ornemens, & seruies avec mesme respect & reuerence; iusques là qu'aucuns ont souffert, que les ans du regne de leurs femmes, fussent mis avec les leurs dans les chartes. Et qu'elles eussent des Officiers pareils à eux, iusques à des Mai-

res de leurs Palais, Referendaires, Comtes d'estable, & autres necessaires pour mon-
strer leurs grandeurs.

Ils ont voulu aussi, que tous leurs domestiques peussent iouyr des mesmes priuileges, exemptions, franchises, & immunitiez que les leurs, & ce non seulement durant la vie de leurs maris : mais encores pendant leur viduité, pourueu qu'elles ne derogeassent ny à l'honneur, ny à la grandeur de leurs mariages. Et à fin de les semondre à s'en souuenir pour tousiours, estants deuenuës vefues, elles furent appellées Blâches en ces derniers siecles, en memoire de Blanche de Castille, vefue du Roy Loys 8. & mere du Roy Loys 9. & de Blanche d'Eureux vefue du Roy Phylippes de Valois, lesquelles furent de leur temps ; & seront à iamais des exemples parfaicts de chasteté & pieté entiere, & ce à limitation de ces anciennes Roynes d'Aethiopie, qui se nommerent Candaces, du nom de ceste Candace, tant renommée par les histoires, & dont parle Pline *lib. 6. cap. 29.*

Nostre Roine douairiere ne merite moins d'honneur que toutes ses deuan-
cieres, tant pour le sacré respect que nous

deuons à la memoire du feu Roy son mary qui a esté des plus accomplis Princes, qui ayent regné sur nous, & sur lequel la posterité ne treuuera rien à redire, sinon qu'il fust trop bon, pour les humeurs des hommes de son temps: comme aussi pour les vertus admirables de ceste grande Princesse, qui n'en a eu oncques, qui l'aient deuancée en toutes les parties requises en vne très-accomplie Roïne.

C'est donc avec raison, qu'elle est interuenüe en ceste cause, pour exciter la Cour à luy conseruer l'honneur qui luy a esté laissé, de rendre tous ses domestiques francs, immunes & exempts de toutes tailles, tant & si longuement qu'ils seront couchez en son estat: Ce que certes on ne luy peut denier qu'avec pudeur, ores que la plus-part de ses Officiers ne luy facent seruiçe, & que par la reigle commune les Officiers domestiques des Roys & Roynes, ne doiuent iouyr du priuilege, s'ils ne font seruice actuel, *nisi sint in actu constituti, &c.* en trois épiques. comme dit l'Empereur Iusti. in Nou. 81. attendu que par l'Arrest donné au Conseil priué, & dont lecture a esté presentement faicte, le Roy a ordonné que tous ceux qui estoient couchez & em-

ployez audit estat iouyroient du priuilege, combien qu'ils ne fissent seruice, comme à la verité il ne seroit raisonnable de retrancher cest honneur à la Royne douairiere sous pretexte que pour accompaigner sa viduité de modestie, elle s'est elle mesme priuée de cest apparat de Cour, & dispense les siens de sa suite : aussi que vous auez ja iugé le semblable, pour les Officiers domestiques de monsieur le Prince de Condé, dont l'aage ne requiert pour le present vne assistance & suite de tous ses seruiteurs couchez en l'estat de sa maison.

On a d'ailleurs obiecté à l'appellant, qu'il faisoit trafic de marchandise, & que derogant par ce moyen à son priuilege, il estoit taillable comme les autres : mais vous auez ouy la response qu'il y apporte, que de verité il vend les fruiçts de ses heritages, qui luy restent de superflu, apres sa maison fournie, dont mesmes les intimez semblent estre demeurez d'accord par leur plaidoié. Or que cela ne se puisse appeller marchandise, ains plustost le deuoir d'un bon & sage Oeconome : Aristote le discours prudemment en ses Politiques, où il establit deux sortes de negociation, l'une qu'il appelle *οικονομικήν*, & l'autre *καπηλικήν*, &

veut que la premiere soit principalement en la culture de la terre & nourriture des animaux, & l'appelle *διχαίωξις*, & pour ce qu'elle est le plus honneste, le plus innocent, & naturel moyen pour acquerir des biens & des richesses, & luy submet comme subsidiaire, celle qu'il appelle *μεταβλητικήν*, qu'il veut aussi consister en l'achapt des choses necessaires, & vtiles pour l'usage de la vie, qui est pareillement vn moyen honneste, Oeconomique & naturel, permis voire necessaire à toutes sortes de personnes : desquelles deux especes, nous estimons que se doit entendre ce passage de Tertullian in *Apologet.* ou parlant des Apostres il dit, *rusticamur, & nos vobiscum, navigamus, militamus, & mercamur & miscemus artes*: mais quant à l'autre espee de negotiation & cōmerce qu'Aristote appelle *χαπιλικήν* qui n'a autre but que le gain, & qui consiste à acheter pour reuendre plus cher, elle a esté veritablement de tout temps reputée deshonneste, vile & abiecte; voire mesmes interdite à tous ceux, qui tiennent quelque rang, & dignité en la republique, sur peine de perdre leurs priuileges. A quoy se peut rapporter ce qu'Herodote liu. 2. a remarqué qu'en la ville de Corinthe, & en

plusieurs lieux de la Grece & aux nations des enuirs & loingtains, c'estoit chose honorable de ne rien faire; qui n'estoit autre chose que pour distinguer les hommes de qualité & de rang, d'auec les marchands & les mechaniques. Ce que les intimez n'ayant iustificié contre l'appellant, leur objection ne merite qu'on s'y arreste.

Ce qu'estant ainsi, & que d'ailleurs l'appellant a iustificié estre employé en l'estat de la Royne, nous concluons à ce qu'en conuertissant son appel en opposition, il soit dict, qu'à bonne & iuste cause il s'est opposé, & qu'il iouyra de sondict priuilege tant & si longuement qu'il sera couché audict estat & ne fera acte derogant.

Ce que la Cour ordonna par son Arrest du mois d'Auril, 1599.

TRENTIESME PLAIDOYE.

*Que personne n'est exempt des droicts
d'entrée, creés par l'Edict de quatre
vingts dixsept, ny des subuen-
tions commandées en
leur lieu.*

LEs deputez de l'assemblée ge-
nerale tenuë à Roüen, en qua-
tre vingts seize, ayans recogneu
les charges grandes & immen-
ses du Royaume, & que les deniers ordi-
naires n'y pouuoient suffire, donnerent ad-
uis au Roy, de créer ce subside sur les mar-
chandises entrans és villes & gros bourgs;
& comme ceste ouuerture fust trouuée vti-
le & commode, aussi fust elle embrassée &
suyuie, l'Edict faict, verifié, & enregistré où il
fust necessaire, *sic enim est tributorum tolerans
Francia.*

Et à vray dire, entre les leuées qui se
font par les Royaumes, il n'y en a point
de plus iuste, de plus esgale, & de moins

incommode, que celles qui se font de ceste forte, d'autant qu'un chacun y contribuë, selon que plus ou moins il reçoit, vend, & consomme de biens.

L'estat de Rome fust le plus accomply en toutes ses parties, qu'aucun autre qui ait oncques esté au monde : aussi le principal & plus fort nerf d'iceluy, consistoit en semblables leuées. *Liuius* le tesmoigne *lib. 27.* disant, *Consulibus aurum vicesimarium, quod in sanctiore aerario ad ultimos casus seruaretur promi placuit,* & *Ciceron lib. II. ad Attic. epist. 16.* *Portorijs, inquit, Italiae sublatis, quod vectigal superest domesticum præter vicesimum.* *Arrianus* le touche aussi *lib. 3. dissertat. Epict. cap. 25.* disant, *seruus imprimis cupit se donari libertate, quam ob causam? an quia vicesimarijs aurum dare desiderat?* Il parle là des Esclaues, pource qu'à la verité, le plus grand reuenu de ce subside, prouenoit de la vente & affranchissement des Esclaues, ainsi que le remarque *Tacite lib. 13. annal.* Comme aussi il n'y auoit rien dont se fist lors un plus grand, ny plus riche commerce. Bref de ce que dessus nous auons vne preuue parfaicte dans les tiltres des *Pandectes* & du *Code, de public. vectig. & commiss.*

Le semblable fust practiqué en *Athenes.*

nes. Car la pluspart de leurs reuenus publics, qu'ils appelloient *prytanea*, consistoit *in metallorum & fori*, id est, *rerum venalium, vectigali*, dit Suidas, & ne practiquent la capitation qu'en cas de necessité extreme, comme le remarque Thucydide *lib. 3.* & Demostene orat. *περὶ οὐρυμω-
εἶων* iugeant prudemment, que ceste forme de leuée de deniers, est tousiours plus odieuse au peuple, qu'aucune autre que ce soit.

De faict nous voyons, qu'aujourd'huy en la pluspart des Estats de la Chrestienté, on en vse ainsi; en Espagne, en Italic, en Alemagne, & Angleterre, on ne leue point de tailles; tout le reuenu public consiste en semblables subsides, & seroit tres-expedient que le mesme se practiquast en la France: car l'inegalité qui ne se peut cuiten en ces cottisations personnelles, cause au milieu du peuple, beaucoup d'iniustice, de procez, & de ruines: comme ie preuoy & espere tout ensemble que l'utilité publique du Royaume le portera vn iour à cest aduis, & qu'on iugera que c'est le meilleur moyen, pour assurer le reuenu d'un estat. Ce subside donc estant créé, comme il n'a peu estre si tost estably en

Y

quelques Prouinces, le Roy qui en auoit faict estat pour acquitter les charges de son Royaume, a voulu que cependant, on le tiast en icelles, par forme de subuention, vne somme de deniers approchante du reuenu qu'il en pouuoit attendre; Ce qu'ayant esté faict en la ville de Loudun, & l'appellant comprins en l'affiette des deniers, il sy seroit opposé se fondant sur sa Noblesse notoire; Et neantmoins par sentence des Esleuz des Lieux, il en fust debouté, dont il auroit interietté l'appel, auquel il vient de conclure.

Et semble qu'il n'est destitué d'apparence, veu que par le droict Romain, tous ceux qui tenoient quelque reng en la Republique, & estoient honorez des dignitez, estoient aussi exempts de pareils subfides, ce que Symmache tesmoigne lib. 5. epist. disant: *Portorium non recte poscitur à Senatoribus candidatis! quia nostri ordinis functiones onerari geminis incommodis non oportet. Quæso igitur ut humanitatem nostri ordinis editoribus impartias.* & ailleurs. *Quæstores nostri ordinis nunquam ferarum suarū portorium contulerunt: nunc à fratre meo Cynegio V. CC. vectigal exigitur, quod solos Vrforum negotiatores, ut pote quæstui seruientes, oportet agnoscere.*

Ce que l'Empereur Neron auoit aupara-
 uant ordonné en faueur des Gensd'ar-
 mes, lors que sur la remonstrance du Se-
 nat, il chagea le dessein qu'il auoit eu d'a-
 bolir toutes les daces & tributs de l'Empi-
 re, *Edixit quoque princeps, dit Suetone, ut mi-
 litibus vectigalium immunitas seruaretur, nisi in
 ijs quæ ueno exercerent*; comme de verité il
 sembleroit que tels subsides deuroient e-
 stre restraints aux marchandises, suyuant la
 loy. 5. C. de vectig. & commiss. la loy, *licitatio
 S. carum S. res S. fiscus ff. eodem*: toutes con-
 formes à ceste ancienne inscription; *Quid-
 quid ususarium inuehitur, ansarium non debet*,
 qui estoit vn tribut, qui se leuoit sur le com-
 merce, & dont est fait mention in l. 1. C.
Aermog. de iure fisci.

Toutesfois le contraire s'observe parmy
 nous en cest endroit, pour ce que par l'E-
 dict de creation de ce subside, il est nom-
 mément porté, qu'un chacun y contribuë-
 ra sans exception de personne, comme de
 fait il n'y a Prince ny Ecclesiastique, ny
 Conseiller de Cour souueraine, qui en soit
 exempt, pour ce que comme il est dict in l.
*omnium C. de vectig. & comm. hoc vectigal,
 omnis est mercium, non personarum*.

Y ij

TRENTIESME PLAID.

Et combien que la leuée en laquelle l'appellant a esté cortisé, se face par forme de taille, vous en deuez neantmoins faire vn pareil iugement, attendu qu'elle est subrogée au lieu de ce subside, suyuant la reigle des choses subrogées, & dont nous auons les exemples, *in l. licet Imperator. de legat. 1. in §. fuerat Instit. de actionib. in l. unica §. ut omnes C. de rei vxor. act. in l. cum qui §. iniuriarum ff. si quis caut.* Ainsi l'auiez-vous iugé, contre vn Cōseiller du Parlement de Bretagne, contre le Prieur de Ioigny, le semblable aussi se doit faire en ceste cause. Cè que la Cour ordonna par son Arrest du mois de Mars 1601.

TRENTEVNIESME PLAID.

Sur la restitution requise par vn mineur, qui s'estoit obligé, comme certificateur de la caution d'un comptable : si la caution profite en la restitution du certificateur : & si les Esleuz qui l'ont receu, en doiuent estre tenus.

LE demandeur se voyant pour-
suiuy par le Receueur general
des Finances à Tours, pour le
payement d'une somme notable,
dont vn sien frere Receueur particulier des
Aydes & tailles de Chinon estoit demeuré
en reste, vers luy; & ce, comme certificateur
de la caution de sondit frere, auroit obtenu
lettres pour se faire releuer de son obliga-
tion. Et pour le voir enteriner faict assigner
en la Cour, tant ce Receueur, ladite cau-
tion, que les Esleuz de Tours, par deuant
lesquels il estoit obligé. Et en outre auroit

Y iij

interictté appel de l'acte iudiciaire, contenant son obligatiō, fondant son appel & ses lettres, sur la minorité, & lésion, en laquelle son indiscretion & foible conseil l'auroit precipité.

Contre lequel le Receueur general a dit, qu'il dénioit sa minorité; Et quand il feroit tel, qu'en matiere de deniers Royaux la minorité ne luy pouuoit seruir, veu mesmes qu'il estoit marié & marchand public.

La caution a dict le semblable, & soutenu en outre, qu'au cas que la Cour iugeast qu'il deust estre releué, que ce benefice luy deuoit aussi profiter, pour le descharger de moitié de son obligation. Et quant aux Esleux, qu'ils estoient solement intimez & assignez, attendu qu'il n'y a ordonnance qui les en rende responsables: & d'ailleurs, que lors qu'ils receurent l'obligation du demandeur, il paroissoit aagé de plus de vingt cinq ans; & qu'à ceste fin, sur la remonstrance qu'ils en auoient cy deuant faicte à la Cour, il auoit esté ordonné, qu'il assisteroit en personne en l'audience, lors que la cause seroit plaidée.

Ce qui est donc premierement à examiner, est de voir, si le demandeur estoit mineur lors de son obligation. La loy civile nous enseigne deux moyens, pour la preuve & iustification de l'aage, sçavoir est la profession & recognoissance publique du pere, *l. 9. C. de probat.* & le tesmoignage des sages femmes, & des voisines, *l. 3. S. duæ ff. de Carb. edict.* suyuant lesquels le demandeur a rapporté l'extraict du registre des baptisteres de sa paroisse, le papier domestique ou son pere decedé y a plus de dix ans, a escrit l'aage de tous ses enfans, ce que les anciens appelloient *παῖδες γαρφύρα*, ensemble vne enqueste faicte avec tous les defendeurs, par laquelle & ses autres pieces, à eux communiquées, & non contredictes, il a clairement verifié, que lors de son obligation, il n'auoit que vingt deux ans.

Ce que presuppósé, il nous faut voir, si pour auoir esté marié, & marchand public des deuant son obligation, il peut estre restitué contreicelle, attendu la qualité du subiect dont est question. Quát au mariage, il est certain, qu'il ne priue point le mineur de ce benefice, comme l'Empereur l'expose *in l. 1. C. qui & aduers. quos in in-*

tegr. rest. non pot. en ces mots, si propaganda soboli, educationi liberorum minor prospexerit, à solito auxilio remoueri debet, pour ce que le mariage excite bien le soin, le sens & la diligence: mais pour celà il n'augmente de gueres la sagacité & la prudence requise pour la conduite des affaires. C'est pourquoy vn autre Empereur in l. 12. C. de administr. Tutor. neque ignoras non multum patrocinari fecunditatem liberorum ad rerum suarum administrationem.

Et combien que contre ce droit Romain, & pour vne bien-seance publique, la coustume de Touraine & plusieurs autres de ce Royaume auctorisent le mineur marié de gouuerner son bien, ce n'est pas à dire pourtant qu'elles le priuent de ce secours legitime, si aux affaires qu'il entreprend, faute de conseil il se treuve lesé & circonuenue; c'est vne grace & honneur qu'elles font au mariage, & n'entendent pas, qu'elles soient tirées à son desauantage: de la mesme sorte, que l'ancienne loy *Papia Poppæa* voulant que pour semondre ces Citoyens au mariage (que *Cassiodore epist. 10. lib. 21. variarum*, appelle *generis humani procreabile sacramentum*) les enfans suppléassent à l'aage requise par les loix anna-

les, pour paruenir aux grades & dignitez de la Republique, ce qu'elle appelloit *iura parentis, vel iura liberorum*, comme il se voit in l. 1. C. de iure liber. dans Iuuenal Saty. 3. & Mart. epig. 93. lib. 3. on ne peut pas dire que pour cela son intention fust, que lors qu'ils auroient des enfans, ils fussent tenus & reputez pour majeurs en autres choses, & qu'ils leur fussent preiudiciables, comme il est traicté in l. eo tempore. C. de in integr. rest. minor. l. 2. ff. de minorib. l. ad rempub. ff. de muner. & honorib.

Quant à l'exercice de la marchandise, il peut bien aussi rendre l'homme plus industrieux & habile, mais pour cela il ne priue pas vn mineur de la restitution s'il se treuve qu'il soit lesé & trompé, comme il est dit in l. 1. c. qui & aduers. on ces termes, *licet minor diligens paterfamilias fuerit, actibusque publicis industrius, adeo ut labi eum per atatem uerisimile non sit: tamen si causa cognita circumuentus deprehendatur, propter hoc ab auxilio remoueri non debet.*

Or ne peut-on remarquer lesion plus euidente, que celle dont se plaint le demandeur en ceste cause, d'auoir respondu pour la somme de dix mille liures, qu'on luy demande aujourd'huy: Et qui luy

tourneroit à pure perte s'il estoit contrainct les payer. C'est pourquoy ores que ce qui se fait en iugement soit plein de poids & d'auctorité, si est-ce que si le mineur y est interuenu pour vn autre, il est tousiours restituable, comme il est dict *in l. de die §. si seruus ff. qui satisfac. cog.* d'autant que la fideiussion est ordinairement accompagnée d'infortune, *qui spondet & praestanda consecratur aliena negotia, contritione conteretur*, dit le Sage.

Que si quelques coustumes, en faueur du commerce priuent de ce benefice le mineur exerçant marchandise publique, pour les obligations qu'il fera en foire, ou marché public, à l'exemple du fils de famille, comme il est dit *in l. si quis patrem. ff. ad Macedoni.* on ne peut pas en inferer le semblable, pour les obligations, auxquelles il pourroit entrer, hors le faict de marchandise, *arg. l. sed & si tantum. & l. nisi hoc actum ff. de pact.* & par la mesme raison, qu'il a esté souuent iugé, que la femme marchande publique, ne pouuoit obliger son mary hors le faict de sa marchandise.

Ce qui a esté dit aussi, qu'en matiere de deniers Royaux, le mineur n'estoit re-

stituable, ne nous peut pas auoir pout garāds, Car combien que la loy *si quis patrē ff. ad Macedo.* dise que le fils de famille ne se peut preualoir du Macedonian à l'encontre du Fisque à *quo vestigalia conduxit*: toutesfois nous ne debuons mettre au mesme rang, le mineur, & le fils de famille; d'autant que les loix donnent en toutes occasions, beaucoup plus de faueur au mineur, qu'aux fils de famille. De fait nous voyons que par tout le tiltre *si aduersus fiscum*, le mineur lésé & circonuenu, est tousiours restituable contre le Fisque, ores que le Fisque ne se puisse preualoir du mesme priuilege contre le mineur.

Nous en auons autresfois remarqué vn exemple, en l'ordonnance du Roy Charles 9. par laquelle combien que les enfans des comptables, ne soient receuables à se porter heritiers d'iceux par benefice d'inuentaire, neantmoins elle en excepte les mineurs.

Ce que d'ailleurs, la caution a dit, de uoir estre deschargé de la moitié du contenu en son obligation, au cas qu'il fust treuue iuste de restituer le demandeur son certificateur, n'est soubs correction non plus considerable; car si le fideiussesseur du

mineur, qui a son obligation commune avec luy: ne participe en rien au bénéfice que la loy luy donne comme il est traité au tiltre de *fideiussorib. minor.* à plus forte raison cela doit estre dénié à ladite caution, veu que son obligation & celle du certificateur, sont différentes; en ce que la caution va pour fortifier la seureté du comptable, & le certificateur, celle de sa caution; d'où venoit que par nòz anciennes reigles, & la disposition de droit, comme on ne pouuoit s'adresser à la caution, sans auoir premierement conuenu & discuté le comptable, aussi ne pouuoit on poursuivre le certificateur sans auoir préalablement discuté la caution; & ores qu'aujourd'huy, pour accélérer les deniers du Roy, le contraire s'observe; si est-ce que si le certificateur a esté contraint de payer, il a son recours, pour le total à l'encontre de la caution, comme il a esté souvent iugé en ceste Cour: mesme depuis vn mois, pour vn nommé le Mertier certificateur de la caution du receueur de Castillon sur Indre: d'autant qu'en effect l'obligation du certificateur, n'est que subsidiaire & au défaut de la caution, Vlpian l'appelle *auctorem secundum, ut & in*

veteri glossario, dicitur βεβαιωτής. Ce qu'estant ainsi, vous iugerez le peu de raison qu'a ce defendeur, de pretendre vne discharge, pour la moitié du contenu en son obligation, sous pretexte de la restitution de son certificateur.

Quant aux Eleuz, qui soustiennēt auoir esté sans subiect appelez en ceste cause, ils se mesprenent grandement. Car par l'Ordonnance du Roy François premier, de l'an cinq cens quarante trois, ils sont faicts responsables des deniers Royaux, au cas que discussion faite sur le comptable, sa caution, & certificateur, il ne se treuve de quoy payer le Roy. Ce qui a esté faict afin qu'ils soient songneux de prendre garde à la seureté des deniers publics, & de faire renforcer les cautions des cōptables, & leurs certificateurs, quand il en est besoin. Et ce ad instar du Magistrat que la loy rend obligé au pupille, si apres auoir discuté le Tuteur & ses collegues, il ne se treuve de quoy luy satisfaire comme il est traité au tiltre de *conuen. magistr.* & en plusieurs autres endroiets de nos liures.

Mais voyons, si ce qu'ils ont alegué pour leur principale defence, est receuable, scauoir est que ce demandeur lors de son obli-

gation faisoit mōstre d'auoir plus de vingt cinq ans : & qu'ayans esté deceus par ceste apparence , il ne seroit raisonnable qu'ils en receussent dommage : qu'à ceste occasion la Cour auoit 'ordonné sur leur requeste , qu'il assisteroit en personne en ceste audience.

Et de verité vous le voyez estre de plus haute stature , & procerité de corps , & plus couuert de barbe que ne porte le cōmun de ceux de son aage : Toutesfois chacun sçait, & est vne des plus populaires experiences , que les vns meurissent beaucoup plustost que les autres, Seneque disant apres Fabius Papirius, *natura sui iuris est, nec ad leges humanas componitur, modo properat, & ad vota percurrit, modo lenta est & remoratur.* Cæsar mesme tesmoigne ce progrès inégal de la nature lib. 7. de bello Gal. parlant des anciens Germains, *qui diutissimè (inquit) impuberes permanserunt, maximam inter suos ferunt laudē. hoc staturam ali, vires neruōsque cōfirmari putant.* Qui fust la raison sur laquelle les anciens se fonderent d'absoudre la mere , qui auoit porté son fruiet treize mois apres la mort de son mary : Et vne autre, qui estoit accouchée sept mois apres son mariage : Et qui fust aussi le subiect, que

print l'Empereur Iustinian, d'abolir ceste coustume qu'eurent quelques vns, de voir *ipsam corporis habitudinem*, pour iuger de l'aage: cōme il se liēt in §. I. *Inst. quib. mod. tue. fin.* Et à ceste occasion, comme les Atheniens eussent comprins és charges publiques de leur ville, le fils d'Iphicrates, sous pretexte, qu'il estoit de fort haulte stature, & neantmoins au dessoubs de l'aage legitime, ce pere commança à se moquer d'eux disant: *si longos ex pueris viros putabunt, breues ex viris pueros censebunt.* C'est dōc vne simplicité vaine, plustost qu'une excuse valable à ces Esleuz, de s'estre arrestez à ceste apparence exterieure: ils deuoient s'informer plus songneusement de son aage.

Partant nous concluons à ce qu'en faisant droict sur l'appel interiecté par le certificateur, & ayant esgard aux lettres par luy obtenues. qu'il plaise à la Cour mettre l'appellation & ce dont a esté appellé au neant, & le retablir en tel estat qu'il estoit auparauant son obligation, sauf au receueur general, de s'adresser à l'encontre dudit comptable, & ladite caution, pour le payement de son deub, ainsi qu'il verra bon estre: & pour le regard des Esleuz, qu'il sera differé à y faire droict, iusques

apres discution faite sur les biens, tant du-
dit comptable que de ladite caution : &
quant à la requeste faicte par ladiete cau-
tion, pour estre deschargé de moitié de son
obligation, mettre les parties hors de Cour
& de procez. Ce que la Cour ordonna par
son Arrest du mois d'Auril, 1601.

T R E N T E D E V X I E S ^{me} P L A I D.

*Que l'Heritier du Contumax condamné
par Arrest, n'est receuable à purger sa
memoire, qu'en payant les reparations
ciuiles, & les amendes adiugées au
Roy.*

EN TRE les loix, qui nous sont par-
ticulieres en ce Royaume, & sans
exemple des anciens, ceste-cy en
est vne, qui reçoit le contumax
condamné, où ses heritiers à ester à droit
& se purger du crime dont il a esté accu-
sé: La loy de Rome voulut bien que ce-
luy dont les biens auoient esté saisis, & an-
notez, en haine de sa contumace, fust re-
ceu

ceu en sa defense, pour en auoir main-leuée : si dans l'an de la saisie, il se representoit, dit le Iurisc. *in l. i. ff. de requir. reis*. Mais il ne se treuue point, qu'elle ait oncques ordonné que celuy qui eust esté condamné par contumace, peust leuer sa condamnation, en se representant : de faict la constitution de l'Empereur Seuerus, fust seulement, *de requirendis reis, & non de damnatis requirendis*.

Aussi combien que les histoires soient pleines de plusieurs qui furent condamnés par contumace : comme à Rome les enfans d'Ancus Martius, Cæso Quintius, Furius Camillus, Cæcilius, Metellus, Posthumius Pergensis, Catilina, & Marcus Popilius, duquel Tite Liue, parlant, escrit *Latam de eo rogationem, ut si ante illum diem Romā non venisset, de eo absente Caius Licinius statueret, ac iudicaret*. Et en Athenes le furent aussi Themistocles, Alcibiades, Demetrius, Callimedon, Charicles. A Carthage, Asdrubal : & à Sparte Cleandrides, Gylippus, & Leonidas, lequel bié qu'il ne se fust retiré hors la ville, ains seulement en franchise au temple de Iunon : neantmoins il fut condamné comme contumax, pour s'estre opiniasté en cest asyle, & n'auoir

Z

voulu se presenter deuant Lisander , dit Plutarque en la vie d'Agis.

De tous lesquels, il ne se lit point, qu'aucun ait esté releué de sa condamnation, par sa seule comparution , mais bien par vn appel , & prouocation : ou par le benefice, grace & faueur du Prince , du Senat ou du peuple : Et ce encores sans les submettre à nouuelles procedures , en cassant les premieres : comme fut Furius Camillus, Alcibiades, Ciceron , Quintius, Seruilius, Hala, Popilius, Metellus, Aristides, Pericles, & Demosthenes : Estant de la prudence des loix , de n'estre tellement armées de rigueur , & de seuerité , qu'elles n'ayent aussi de la clemence, pour en gratifier ceux, qu'elles iugent, pouuoir plus profiter à la patrie, en bien faisant à l'aduenir, qu'ils ne luy auroient fait de dommage, par leurs actions passées : *cum & fulmen quod Iupiter mittit, sit placabile.* Dont se doit entendre, le tiltre, qui se lit au droit Romain , de *sententiam passis, & restitutis*. Qui se practiquoit à l'endroit de ceux, que le public iugeoit capables de ceste faueur, non pour se représenter en iugement : mais pour la consideration susdicte.

Et à vray dire, ce droit dont nous vsons

semble estre sans raison pertinente: Car quelle apparence y a-il ; que celuy qui estant appellé en iugement, s'est faict excuser sous faux pretextes, qui a mesprisé la voix du Magistrat : qui a negligé celle des loix, qui a fuy au loing le sanctuaire de la iustice: qui a perseueré en ce mespris plusieurs années, qui en fin a ouy la condamnation de ses forfaits : vienne neantmoins , sans autre cognoissance de cause à faire reuoquer par sa seule presence, tout ce qui auroit esté solennellement faict à lencontre de luy.

Si routes ses fuittes & contumaces sont excusables en iustice: pourquoy vient on iusques au iugement? Et si elles sont iniustes: & que pour ce, la loy repete le fuiant, pour present: pourquoy apres que sur des informations & procedures legitimes, il a esté condamné, on le reçoit à se purger, sans loy, sans appel, & sans le benefice du Prince?

S'il se plaint auoir esté iugé plus seuerement que ne portoit sa charge, ceste contumace ne le rend elle pas conuaincu de son crime: voire n'est-ce pas adiouster crime sur crime, que de mespriser la voix de la iustice? Le premier dont il est accusé, ne

touche que le particulier qu'il a offensé :
 mais ce second est contre la Republique.
 Ce fust pourquoy Socrates , dit Platon *in*
Critone , craignant que les loix d'Athenes,
 sous lesquelles il auoit esté nay, nourry, &
 esleué , n'eussent occasion de luy repro-
 cher ceste mesme desobissance (que cest
 Auteur appelle impieté & perfidie) aim-
 mieux mourir , que decliner par vne fui-
 te honteuse , l'exécution d'un iugement
 iniuste. Qui fust aussi le subiect , pour le-
 quel ce mesme peuple , dit Demosthene
orat. in Mid. couroit sus avec autant de ri-
 gueur & de seuerité , contre celui qui mes-
 prisoit la voix du Iuge , que contre celuy
 qui eust faict vn effort , ou rebellion con-
 tre la Republique.

Bref , pourquoy tiendrez vous plustost
 pour conuaincu , celui qui corrompt son
 aduersaire , celui qui par sa mort preuient
 la peine qu'il a deseruie ; que celui qui ne
 se veut commettre , ni aux loix de son pais ,
 ny aux Iuges establis par le Prince : ny à
 son aduersaire . Qui fust la raison qu'eut
 Auguste , dit Dion au lieu. 54. d'ordonner
 que celui qui ne voudroit se trouuer en
 iugement fust aussi tost condamné , sans au-
 tre cognoissance de cause : Et qu'à mesme

prudence, le Pape Boniface escriuant aux Euesques de France, sur le faict de Maximus Euesque de Valence, leur commanda que puis qu'il mesprisoit leurs monitions & censures, ils le iugeassent comme contumax & rebelle. Que saint Augustin *lib. 1. de ciuit. a dit, reum contēpti & deserti imperij, omni legum priuandum auxilio* : Et finablement que Philon en son traitté, *de Temul.* expliquât ceste loy seuerē, prononcée par Moïse, contre le fils contumax, & qui neglige la voix de son pere, a escrit que l'esprit desobeissant, est autant desagreable à Dieu que le contentieux & le rebelle.

Ouy mais, on nous repliquera, que blasmant en autrui ceste contumace enuers les loix, nous nous en rendrons nous mesmes aucunement coupables, en mesprisant ceste loy receuë, gardée & obseruée du commun consentement de tout le Royaume, sçauoir est que le contumax condamné, en se presentant dans les cinq ans, efface sa contumace, & tout ce qui a esté faict contre luy en consequence d'icelle : & qu'apres les cinq ans, il peut faire le semblable, en prenant lettres du Prince, comme il est plus à plain contenu en l'Edict de Moulins art. 28.

Z iij

Nous recognoissons, que quelle que puisse estre ceste loy, nous luy deuons obeyssance, & que tant qu'elle sera en regne, elle nous doit seruir de reigle, en toutes ces occurrences. Mais neantmoins estans obligez par le deub de noz charges, de remarquer, selon les occasions, le default des loix, & les inconueniens, qui en arriuent, nous n'auons peu laisser passer celle-cy, sans en dire nostre aduis: Et adiousterons hardiment à ce que dessus, que tant qu'elle sera en auctorité, on pourra dire de ce Royaume avec vn bon autheur, *quis non ibi audacius peccet, ubi tam facile damnatur, & damnatus tam facile absoluitur?*

Ioinct que ce long terme, qu'elle donne aux condamnez, leur faict tousiours naistre quelque moyen pour éuiter la peine des loix: soit par la mort de leurs aduersaires, & tesmoings, ou par quelque autre rencontre, *cum multa & saepe maxima rerum momenta, puncto temporis vertantur*, disoit Tite Liue, comme nous en lisons dans Plutarque vn exemple de Pompée, lequel attendit acortement qu'Antistius, duquel il recherchoit la fille en mariage, fust paruenue en la Preture, pour reprendre le procez intenté contre son pere defunct, pour

mal-versation & larcin des deniers publics; & fit tant, que par ce moyen il fust enuoyé quitte & absouz, quoy que le faict fut très-manifeste. Et à ce propos se peut rapporter ce traitt excellent de Quintilian, en sa Declamatiō 319. *naturalis est, inquit, improbis hominibus dilationis cupiditas: Queretur de adulterio, & queretur diu, & extrahet iudicium sicut adhuc extrahit. Alij iudices & alia sortitionis fortuna. Interim ut nihil artes valeant, multum fata possunt. Multum citra scelus quoque impedi- menti per se ipsa mortalitas adfert.*

On nous dira d'auantage que la loy Romaine fust en cela trop plus douce & remise, que ceste Ordonnance; veu qu'elle ne permettoit, qu'en matiere criminelle, on procedast par condamnation contre l'absent, comme le monstre le Iurisconsulte, *in l. absentem ff. de pœnis*. Ce qu'aussi nous recognoissons pour veritable, & neantmoins qu'il ne s'obseruoit, que souz ceste distinction, qu'on ne pouuoit prononcer aucune peine capitale, contre l'absent contumacé, mais bien vn bannissement, vne amende pecuniaire, voire iusques à confiscation de biens; comme nous en voyons deux exemples dans Tite Liue, l'vn de Postumius, disant, *Postumius*

vadibus datis non affuit, tribuni vocauerunt plebem, quæ ita sciuit : Si M. Postumius ante Kalendas Maias non prodisset, citatusque eo die non respondisset, neque excusatus esset, videri eum in exilio esse. Et l'autre de Fulvius, en ces termes, *priusquam dies comitiorum aderat, Cn. Fulvius Tarquinius abiit : id ei iustum exilium esse sciuit Plebs :* si ce n'estoit toutesfois, que la cause eust esté contestée en la presence de l'accusé : Car si apres il s'absentoit, le Iuge pouuoit prononcer contre luy selon la rigueur des loix qu'il auoit offencées, & comme s'il eust esté present, ainsi que Cicéron le remarqué en l'oraison *pro Cluentio*, parlant d'un certain Fabricius, & l'enfeigne apres luy Asconius sur l'oraison *pro Milone*.

Il faut pourtant que nous aduoüions, que ceste loy de Rome fust d'ailleurs plus seuer, que la nostre ; en ce qu'elle ne retracta iamais les iugemens donnez par contumace, sous pretexte de la representation du condamné : & qu'elle faisoit perdre irreuocablement les biens saisis, & annotez, avant même la condamnation, si dedans l'an de la saisie, l'accusé ne se representoit : Et quand elle eust esté encores plus seuer en cest endroit, leur

Republique n'eust esté si souuent pollué & contaminée, de tant de sortes de crimes, dont les histoires sont pleines.

Finablement on nous dira, que ceste ordonnance, doit estre d'autant plus religieusement gardée & obseruée, qu'elle va à la tution de l'innocence, dont la defense est imprescriptible, comme estant du droict de nature : & qu'à ceste consideration, la loy Romaine a dict sagement, *Tutius esse nocentem absolueré, quàm condemnare innocentem*. Mais soit que nous en demeurions d'accord, comme de tout ce qui se peut dire en recommandation de l'innocence, si ne pouuons-nous aprouuer par les vrayes reigles de la iustice, que ce contumax soit mis au rang des innocens, veu mesmes la denomination que luy donnent les Grecs l'appellans *καταφροντις*, comme qui diroit contempteur des decrets de iustice.

Par ce discours donc, se peut esclarcir, tout ce qui a esté agité de part & d'autre en ceste cause : car en effect toute ceste longue dispute, se resoult en ce seul conflict de la raison, contre la loy, *quod non vetat lex, vetat fieri ratio* : la raison veut, voire mesmes l'vtilité publique, & le bien du

Royaume , que pour donner crainte & exemple aux autres, vous deboutiez la demanderessé de l'enterinement des lettres par elle obtenües en la Chancellerie, par lesquelles il est mädé à la Cour la recevoir à purger la memoire de son Oncle decedé depuis trois ans, & condamné à mort par Arrest donné en ceste Cour, par default & contumaces des quatre vingts & deux, pour vol par luy faict au grand chemin, des deniers publics qui s'apportoient en la recepte generale de Paris pour payer les rentes constituées sur icelle.

Car puisque nous voyons les hommes de ce siecle plus enclins aux crimes & delicts, qu'ils ne furent iamais; & qu'ils sont promeuz à ceste audace, par l'attente qu'ils ont d'euitier la peine, par leurs fuittes, & de se purger quand le temps leur en donne l'opportunité : qui est celuy qui ne iugera estre tres-expedient, mesme necessaire de retrancher au contumax condamné, & à son heritier, ceste grace & faueur, que contient ceste ordonnance ? Il nous fault (disoit vn ancien sur ce propos) mal traiter la memoire des morts, pour demouuoir les viuants de les suyure.

Mais d'ailleurs, le respect que nous

deuons aux loix, desquelles, pour deuenir libres, nous deuons estre serfs, nous porte voire nous force à vn aduis contraire : car quelque default & imperfection que puissent auoir les loix, si leur deuons nous tousiours l'entiere obeissance : ainsi qu'au pere, mesme au Prince, quelque vicieux qu'il puisse estre.

Et combien que ceste ordonnance ne parle de l'heritier du Contumax condamné, si sommes nous encores contraincts de luy laisser ceste mesme faueur, par la reigle de droict, qui veut, & ordonne, *heredem eiusdem potestatis iurisque esse, cuius fuit defunctus*, cōme dit Vlpian *l. 59. ff. de reg. iur. & in l. 2. & penult. ff. de req. reis.*

Neantmoins, pour en seruant à la loy, n'abandonner la raison, & le bien public, nous estimerions qu'il seroit iuste en enterinant les lettres de la demanderesse, ordonner que ce seroit à la charge, qu'elle ne pourroit estre receuë à dire & proposer aucune chose pour la iustification dudit defunct son Oncle, que premiere-ment, elle n'eust payé les amendes & reparations adiugées au Roy, & à la partie ciuile.

Aussi bien les amendes estans l'expia-

tion des loix offencées, ne sont plus en la disposition des hommes : qui estoit la raison pour laquelle Verrius Flaccus dit que les anciens appelloient l'amende, *Sacramentum* : pource qu'ils l'estimoient sacrée, ainsi que les victimes , qu'on immoloit aux Dieux, pour expier les fautes. Ce que demonstra sagement Alexandre, lequel eust requis par Athenodorus, de l'assister de son suffrage & faueur vers le peuple d'Athenes, pour luy faire remettre l'amende, qu'il auoit encouruë, pour ne s'estre treuue en la feste de Bacchus , & n'auoir contribué aux jeux qui s'estoient celebrez en son honneur : Ce Prince iugeant, que c'estoit faire iniure aux loix, que de remettre la peine de leur offence , luy denia son assistance, & toutesfois pour luy tesmoigner son affectiō, il la paya de ses propres deniers. Ioinct qu'il ne seroit iuste de reuocquer ce droit acquis au Roy & à la partie par vn Arrest legitime, suyuant ce qui est traicté *in l. uenia C. de in ius vocando*, & discouru amplement par Boërius, *quest. 64.*

Surquoy la Cour ayant appointé la cause au Conseil, elle la iugea depuis, conformément à nostre conclusion & aduis, par son Arrest du mois de Mars 1577.

TRENTETROISIESME PLAID.

Sur la prohibition du transport de l'or & argent hors le Royaume.

LA plus ancienne Ordonnance que nous ayons, sur la prohibition du transport de l'or & argent hors le Royaume, est celle du Roy Loys 12. de l'an cinq cens six, suivies de celles des Roys François 1. Henry 2. Charles 9. Henry 3. & du Roy a present regnant de l'an 1540. 1548. 1566. 1577. & 1594.

Et d'autant qu'il nous semble voir les esprits curieux de ceste assistance, s'enquerir en eux-mesmes, d'où vient que ce grand Royaume de tout temps si bien reiglé & policé en toutes ses parties, a manqué iusques à ce dernier siecle, d'une loy si utile voire si necessaire, pour l'entretienement de sa grandeur & puissance: A ceste occasion nous en discourrons sommairement & représenterons les raisons, pour lesquelles ceste loy n'a eu lieu entre noz ances-

TRENTETROISIEME

stres , & est neantmoins aujourd'huy des plus necessaires à l'Estat.

Quelques anciens auteurs dignes de creance , nous tesmoignent , que jadis ce Royaume estoit fort abondant en or , à cause des riches minieres qui se treuuoient en plusieurs endroicts d'iceluy , spécialement es Pyrenees , en Guienne & Aquitaine , & entre autres Strabon le dit *lib. 3.* en ces termes , ἀξιῶσι δὲ γαλάται τὰ παρ' ἐαυτοῖς εἶναι κρίτῃ μέταλλα ἐν τῷ κίμερῳ ὄρει καὶ τὰ ὑπ' αὐτῇ κεῖμενα τῇ πυρίῃ τὸ μῦθος πλεῖον τῷ εἰῶθαι εὐδοκίμει. Et en vn autre endroict du *lib. 4.* où il parle de *littore Narbonensi.* ἔχουσι δὲ παρβέλλοι τὸν κόλπον ὅτι χερσεῖα ἀσθ' ἀμότατα πάντων. ἐν γὰρ βόθροις ὀρυχθεῖσιν ὅτι μικρὸν εὐείσκονται ἢ χειροπλήτευσ χερσεῖς πλάκες ἐστ' ὅτι μικρὰς καθ' αἰσῶς δεόμεναί εἰσι. & veut dire que l'or qui se treuuoit en ces lieux-là , estoit fort net , & que pour le purifier il falloit bien peu de feu : Diodore dit le semblable *lib. 6. de aut. gest.* & Pline *lib. 33. cap. 3.* Aufone mesme tesmoigne que les fleues de la Guienne engendroient l'or , disant *in Mosella.*

*Concedet gelido Durani de monte volutus
Amnis, & auriferū postponet Gallia Tatinū.*

A quoy se rapporte ce que Procope, & quelques vns de noz anciens Croniqueurs disent, que quand l'Empereur Iustinian enuoya aux François des lettres confirmatiues du quittement que les Ostrogots leur auoient fait de la Prouence, les Roys qui estoient lors Clotaire & Thiebert, firent faire en signe de resiouyſſance des jeux dans l'Amphitheatre d'Arles, où ils ietterent au peuple des pieces d'or tiré au mesme pays, qui pouuoit estre l'or de Paillole, qui se recueilloit aux riuieres de Geuodan, & des montaignes voisines quand il auoit pleu. Et estoient ces pieces d'or marquées de leurs effigies par vn priuilege particulier, dit cest auther, n'estant lors licite à aucun autre Prince estrange, marquer de son effigie sa monnoye d'or, non pas mesmes à celuy de Perse qui n'auoit la sienne que d'argent.

C'estoit donc pour l'abondance d'or qu'ils auoient, & l'honneur que ces premiers Princes s'attribuoient de voir leur monnoye auoir cours par tout l'Empire, qu'ils ne se soucioient d'en prohiber le transport. Aussi qu'il se remarque que noz ancestres ont tousiours estimé que c'estoit vne de leurs gloires, d'accommoder les

estrangeurs de tout ce qui croissoit parmy eux; Ce qu'Agrippa magnifie, avec vn cloge tres-honorable, en ceste harangue insigne qu'il fist aux Iuifs dans Hierusalem, & qui se lit dans Iosephe. 2. *Galli (inquit) omne genus bonis apud se scitatis totum pene orbem irrigant.* Et de faict nous auons encores vne Ordonnance Latine du Roy saint Loys de l'an 1254. adressée aux Gouverneurs des Frontieres, qui empeschoient indifferemment le transport des bleds & des vins, *defensam (inquit) bladi vel vini aut mercium aliarum extrahendarum, sine urgente causa non faciant & cat.*

Toutesfois plusieurs sont, qui ne veulent adiouster foy à ces anciens tesmoins de l'abondance de l'or de ce Royaume; veu qu'il ne reste aujourd'huy aucune apparence de leur dire, & qu'il n'y a pour le present prouince au monde qui en soit plus sterile que la France: mais ils ne considerent pas, que cela pronient de ce que l'auarice extreme des siecles qui ont suivy, a osté à la terre tout le loisir qu'elle desire pour parfaire ceste substance si elabourée. Car la nature n'en a iamais esté sterile pourueu qu'on luy en donne le temps: Ce que Plin veut tesmoigner au lieu susdit

dit parlant de Salances & Esapobes, lesquels pour auoir treuue la terre de Colchos vierge, ils en tirerent vne grâde quantité d'or & d'argent ; & est appellée terre vierge, qui par vne longue reuolution de siècles, n'a souffert aucun labourage, & qui s'est reposée long temps en son dedans.

Peut estre aussi que noz anciens, plus curieux des bonnes mœurs que des richesses, ne se soucioient point qu'on transportast d'entreux, ces deux metaux, que les plus sages appellerent la peste du genre humain, & que jadis les Lacedemoniens bannirent expres du milieu d'eux, avec defences precises à leurs citoyens d'en retenir sur peine capitale, disent Xenophon & Plutarque és traitez qu'ils ont faicts de leur republique.

*Sur ce domme.
Sur l'or et
l'argent.*

Nous ne debuons pourtant attribuer l'introduction de ceste loy nouuelle, à nostre conuoitise publique, ains à l'auarice des Royaumes voisins, qui non seulement ont commencé les premiers à faire ces defences, mais encores, comme enuieux de nostre puissance, ont suscité leurs subiects pour sous pretexte du commerce qui leur est permis en France soustraire

nostre monnoye, à laquelle pour les y amorcer, & les nostres ensemble, ils donnent chez eux vn plus grand prix, faisans valoir l'escu, trois ou quatre sols d'auantage, le teston & le quart d'escu vn sol plus qu'icy; & puis (qui est le plus grand inconuenient que nous en ressentons) ils la vont alterans en leur monnoye de mauuais alloy, & toutesfois de valeur esgale au commerce.

Nous lisons dans Strabon, que les anciens Roys de Parthe, ayans recogneu vn pareil incōuenient en leur Estat, & que les estrangers sous pretexte du trafic, enleuoient vne grande partie de leur monnoye d'or, firent deffenses d'en battre plus grande quantité, qu'il n'en falloit pour l'vsage, & le commerce ordinaire de leurs subiects; & voulurent que le surplus fust mis en meubles & vstanciles, *in supellectili & instrumento*, les termes de cest authœur sont, τὸν δὲ πλεῖστον χρυσὸν καὶ ἀργυρὸν ἐν ταῖς κατὰ σκευαῖς εἶναι νομίσματα δὲ ὁ πολλὸν πρὸς τὰς δορεῖας ἐκείνα κεχαισμένα νομίζεν μᾶλλον, καὶ πρὸς κειμηλίαν ἀπόθεσιν, τὸ δὲ νόμισμα πρὸς τὰς χρείας ἀρκεῖν. &c. Qui est à nostre iugement, vne loy tres-propre, pour conseruer en vn pais les thresors qui y naissent, ou qui

y font apportez d'ailleurs; bien toutesfois que d'autres tiennent pour vne reigle d'Estat, qu'il faut mettre en monnoye la pluspart de l'or & de l'argent, & en laisser en meubles & vstancilles le moins que l'on pourra.

Quelques vns aussi pourront dire que si nous obseruons precisement ces deffenses, de transporter l'or & l'argent; ce sera oster le moyen de plus negotier avec l'estranger; d'autant que l'ame & le subiect du commerce consiste en ces deux choses; & que cela nous apporteroit avec le temps vn fort grand preiudice. Et à la verité, la liberté du commerce avec les estrangers, a esté l'vne des choses plus requises pour l'vtilité & honneur des grands Estats & Republicques, ce que Tite Liue demonstre en peu de paroles, parlant de Carthage lib. 16. *id oppidum (inquit) malarum gentium fines contingit, quarum commercium in eum maximè locum mutui vsus contraxere*; voulant dire que le commerce nous auoisine avec les nations estranges, & nous faict participer en l'vsage de ce qui croist parmy eux, & de leurs plus excellens ouurages.

Mais vn des plus recommandables fruiets, qui se rapporte de ce general com-

Aa ij

TRENTETROISIEME

hausserent
les monnoies
plus ou moins
valables.

nostre monnoye, à laquelle pour les y amorcer, & les nostres ensemble, ils donnent chez eux vn plus grand prix, faisans valoir l'escu, trois ou quatre sols d'auantage, le teston & le quart d'escu vn sol plus qu'icy; & puis (qui est le plus grand inconuenient que nous en ressentons) ils la vont alterans en leur monnoye de mauuais alloy, & toutesfois de valeur esgale au commerce.

Nous lisons dans Strabon, que les anciens Roys de Parthe, ayans recogneu vn pareil incōuenient en leur Estat, & que les estrangers sous pretexte du trafic, enleuoient vne grande partie de leur monnoye d'or, firent deffenses d'en battre plus grande quantité, qu'il n'en falloit pour l'vsage, & le commerce ordinaire de leurs subiects; & voulurent que le surplus fust mis en meubles & vstanciles, *in suppellectili & instrumento*, les termes de cest autheur sont, τὸν δὲ πλεῖστον χρυσὸν καὶ ἀργυρὸν ἐν ταῖς κατεσκευαῖς εἶναι, νομίσματα δὲ ὀλιγά. πρὸς τὰς δορεῖς ἐκείνα κεχρησμένα νομίζουν μᾶλλον, καὶ πρὸς κειμηλίαν ἀπόθεσιν, τὸ δὲ νόμισμα πρὸς τὰς χρείας ἀρκῆν. εἶς. Qui est à nostre iugement, vne loy tres-propre, pour conseruer en vn pais les thresors qui y naissent, ou qui

y font apportez d'ailleurs; bien toutesfois que d'autres tiennent pour vne reigle d'Estat, qu'il faut mettre en monnoye la pluspart de l'or & de l'argent, & en laisser en meubles & vstancilles le moins que l'on pourra.

Quelques vns aussi pourront dire que si nous obseruons precisément ces deffenses, de transporter l'or & l'argent; ce sera oster le moyen de plus negotier avec l'estranger, d'autant que l'ame & le subiect du commerce consiste en ces deux choses; & que cela nous apporteroit avec le temps vn fort grand preiudice. Et à la verité, la liberté du commerce avec les estrangers, a esté l'vne des choses plus requises pour l'vtilité & honneur des grands Estats & Republiques, ce que Tite Liue demonstre en peu de paroles, parlant de Carthage lib. 16. *id oppidum (inquit) maltarum gentium fines contingit, quarum commercium in eum maximè locum mutui usus contraxere*; voulant dire que le commerce nous auoisine avec les nations estranges, & nous faiët participer en l'vsage de ce qui croist parmy eux, & de leurs plus excellens ouurages.

Mais vn des plus recommandables fruiës, qui se rapporte de ce general com-

merce, est aux exemples des belles & genereuses actions, qui se commettent en vn Estat, & qui se portent aussi tost aux plus esloignées nations, dont autrement le bruit s'arresteroit aux prochaines frontieres. C'est pourquoy Iosephe se plaint, que peu d'Historiens ont veritablement parlé des grandes actions des Iuifs, pour ce qu'ils auoient de tout temps négligé le commerce avec les estrangers. Et dict plus, que pour la mesme raison Herodote & Thucydide ne parloient point des Espagnols, & que l'historien Ephorus discouroit des Espagnes, comme d'une seule Cité, pour ce que la Grece en leur temps, n'auoit eu aucun commerce avec ceste nation.

Qu'il faut donc prendre garde, que par ceste prohibition de transporter l'or & l'argent, nous ne preiudicions au commerce d'avec les nations estranges, & ne racourcissions l'honneur, & la renommée de tant d'actes genereux, que la France produit tous les iours, mesmement souz les auspices heureux, du plus grand, & magnanime Roy qui fust iamais.

Mais soubs correction, le commerce ne sera aucunement preiudicié, par les defen-

ses que nous recommandons : car le vray commerce que nous auons à desirer avec les estrangers , est qu'ils apportent chez nous ce que nous n'auons point , & qu'ils remportent chez eux , ce que nous auons de trop. En sorte que ce trafic se face par permutation , qui est le vray moyen que la nature nous a enseigné pour s'accommoder les vns avec les autres ; & cestuy-la ne nous peut iamais manquer , pour la necessité qu'ont les estrangers de se descharger en ce grand Royaume de ce qui leur est inutile , & d'y venir prendre ce qui leur est necessaire.

Et d'autant que nostre coustume est, de releuer l'honneur de noz loix, sur l'exemple de celles de Rome, qui ont esté si sages & si prouides, qu'elles n'ont rien obmis de ce qui faisoit pour la grandeur de leur Estat : voyons sil vous plaist ce qu'elles nous ont laissé sur ce subiect. L'Empereur Valentinian nous le tesmoigne, *in l. 2. C. de commer. & mercat.* disant : *non solum Barbaris aurum minimè præbeatur, sed etiam si apud eos inuentum fuerit, subtili auferatur ingenio: sed si ulterius aurum pro mancipijs vel quibuscumque speciebus ad barbaricum fuerit translatum a Mercatoribus, non iam damnis, sed suppli-*

TRENTETROSIÈME

cijſ ſubiugentur, Et l'Empereur Martian en termes plus rigoureux *in l. 2. C. quæ export. no. deb.* diſant, *perniciouſum eſſe, & proditiōi proximum, Barbaros, quos indigere conuenit, ut validiores redderentur inſtruere.*

En quoy eſt à remarquer, que ſoubs le nom de Barbares ſe doiuent entendre, non ſeulement ceux, contre leſquels la guerre eſtoit ouuerte : mais auſſi tous ceux, qui ne recognoiſſoient l'Empire de Rome, *qui neque fœdere, neque amicitia, vel ſocietate vel hoſpitalitate ei coniuncti erant*, comme dit le Iuriſconf. *in l. 5. §. in pace ff. de capt. & poſt l. reuerſ.* dont l'on peut inferer, que ces deffenses de transporter l'or & l'argent, n'auoient point de lieu à l'endroit des allies, & confederez de l'Empire; & que ce droit n'eſtoit ſi vniuerſel que le noſtre, qui deffend ce transport indifferemment hors le Royaume : combien toutesfois, que quand il va de l'intereſt de noz allies, les Roys n'ont iamais manqué de leur bailler paſſeport, & congez iuſques à certaines ſommes.

De maniere, que qui voudroit iuger ceſte cauſe par ce que nous auons repreſenté iuſques icy, il eſt certain que l'appel qui a eſté interieſté de la ſentence des Iuges des

traictes, par laquelle, les deniers dont les appellans se sont treuuez saisis, passans en la Franche Comté, seroit recogneu sans propos & raison; mais les circonstances qui ont esté remarquées nous font estimer pour ceste fois, *mitius agendum esse* avec les appellans; Sçauoir est, pour ce qu'il n'y a que trois sepmaines, que le Roy à renouuellé par son Edict, les defenses de transporter l'or & l'argent hors le Royaume: Et que si en temps de paix, on donne loisir d'un mois, pour apprendre vne nouuelle loy, dit la constit. *ut fact. noue const. & Cicer. orat pro Flacco.* ce qu'il appelle *trinundini promulgationem*: Il estoit plus raisonnable d'vser de mesme grace, en temps de guerre; auquel le bruit des armes empesche que l'on entende la voix des loix. Aussi que durant ces troubles, & iusques aujourd'huy, celles qui auoient esté faictes par les Roys precedans sur ce subiect, ont esté du tout negligées.

En second lieu, on a fait force en la qualité des appellans, qui sont tous laboureurs dont la simplicité & l'ignorance portent tousiours avec soy leur excuse, mesmes *in causis fisci*, dit la loy, *ex quibusdam S. ult. ff. de iure fisci.*

Et d'ailleurs, le desseing qu'ils auoient d'aller en la Franche Comté acheter des cheuaux, pour remettre sus le labourage intermis par la guerre, & dont ils font apparoir par le passeport qui leur a esté expédié par le Gouverneur de Prouins, les exempte de toute suspicion de dol & fraude publique; veu mesmes, que les cheuaux sont autant, voire plus nécessaires à vn Estat, quel'or & l'argent, pour le seruice que l'homme en tire pour l'entretienement de la vie commune. C'est pourquoy entre les Tributs & indictions que les Romains leuoient sur leurs peuples tributaires, le plus grand, & le plus exactement poursuiuy, estoit celuy des cheuaux, comme nous l'apprenons *in l. 15. C. Theod. de Proxi. Com. dispos.* & dont sur tout, ils defendoient le commerce avec les estrangers, si ce n'estoit avec congé, & permission, comme il se recognoist en ce passage de Tite Liue *lib. 43. Illa petentibus data (inquit) ut equorum ijs commercium esset, eadēque ex Italia potestas fieret.* ce qui s'est aussi practiqué autrefois en ce Royaume, comme on en voit les marques és annales de Pepin, & és ordonnances Latines de Philippe 6. de l'an 1348.

Ces particularitez donc , nous feront pour ce coup departir de la rigueur de nos loix , & demander qu'il plaise à la Cour mettre l'appellation & ce dont a esté appellé au neant , & ordonner que l'argent saisi sur ces appellans leur sera rendu & restitué : & neantmoins que deffenses leur seroit faictes , & à toutes autres personnes, de quelque qualité & condition qu'ils soient, de plus transporter or & argent hors ce Royaume, & pour quelque cause que ce soit , sur les peines contenuës ausdites ordonnances. Ce que la Cour ordonna par son Arrest du mois de Juillet 1595.

XXXIIII. PLAIDOYE.

*Sur les peages qui se leuent sur le sel
voituré par les riuieres.*

MAISTRE Claude Iosse adiudicataire du fournissement general des greniers à sel de France , a faict appeller en la Cour les peagers de la riuere de Seine , & par sa com-

TRENTE QUATRIESME
mission, tendu à quatre fins. La premiere, à ce qu'ils eussent à luy exhiber leurs lettres, en vertu desquelles ils leuoient peage sur ses voituriers. La seconde, à ce que ce pendant defenses leurs fussent faites de leuer aucune chose sur les Alleges, ains seulement sur les bateaux maires, La troisieme, que defenses aussi leur fussent faictes, de se faire paier en essence de Sel. La quatrieme, à ce qu'il fust dit avec eux qu'ils seroient payez de leursdicts peages, à raison de l'eualuation, & estimation faicte d'iceux par l'ordonnance de l'an mil cinq cents quarante six, lesquelles conclusions ont esté reduictes par les Aduocats qui ont plaidé en autant de questions, & controuerses que nous auons à resoudre.

Quant à la premiere, il estoit certain par la disposition de droit, que non seulement les interdicts, mais toutes autres actions introduictes pour conseruer à vn chacun la liberté de nauigation, *& ne deterior, difficilior & rarior fieret*, estoient publiques & populaires, & partant permises & ouuertes à tout le monde, *l. unica §. hoc interdictum, ff. ne quid in flu.* Et ores que ceste loy ne parle que contre ceux, qui ont

construiſt vn œuure nouveau ſur vn fleuve public, par lequel le nauigage ſoit empesché, neantmoins avec beaucoup plus de raiſon, elle ſe doit eſtendre contre ceux, qui par de nouveaux & intolerables peages, empeschent le commerce des riuieres nauigables Auſſi que l'Edit du Preteur eſtoit conceu en termes généraux, *ne quid in flumine publico fiat, quominus nauigatio deterior exiſtat.*

Si donc il eſt permis au moindre homme priué, de tirer en iugement, celui qui le trouble en ſa nauigation & commerce pour rapporter lettres & tiltres en vertu deſquels on luy faiſt ce nouveau trouble : avec combien plus d'apparence cela doit il eſtre licite audit Ioſſe, Fermier general des Gabelles de ce Royaume, & ſubrogé par ſon bail aux droicts vniuerſels du Roy? Mais quand ledit Ioſſe, ne ſeroit perſonne legitime pour ce faire, nous qui parlons pour le Roy l'aſſiſterons en cela, & demanderons avec luy la meſme choſe.

Et ne peuuent les peagers, reuoquer en doute, ſi nous ſommes capables pour le faire. Car le Roy & ſon Fiſque ont ce priuilege de droit, de ſe faire exhiber quand il luy plaïſt les tiltres de ceux qu'il pre-

TRENTE QUATRIÈME

tend entreprendre sur les droicts l. 3. ff. de edendo, l. 45. §. neque ff. de iure fisci. à quoy se rapporte celieu de Suetone in Calig. arguebat perperā sibi edi hos census &c. & plus à propos cest autre de Tacite lib. 14. où parlant de Neron il dit, edixit Princeps ut leges cuiusq; publici, occulta ad id tempus, proscriberentur.

Or que le Roy aye grand interest de voir lestiltres de ceux qui leuent des peages sur les riuieres publiques, personne ne le peut mettre en question, pour ce que les fleuves estans à luy, & inter iura regalia, comme il est dict in cap. unico, Quae sint regal. in vsib. feudo. il luy appartient aussi d'empescher, qu'il ne se face sur iceux aucune exaction, sans sa permission, ou de ses predecesseurs: non plus que sur vn grand chemin, que la loy avec Siculus Flaccus appelle regia, cōsularem vel pratoriā viam, ce qui est traicté amplement par Iean Faure in S. flumina, Instit. de rer. diuis. & par quelques autres in l. iniuriarū §. penult. ff. de iniur. in l. venditor fundi, ff. comm. praed. tam vrb. comme nous esperons, que par l'euenement de ceste poursuite, il se cognoistra que la plupart desdits peagers n'ont aucuns tiltres valables, & que les vns ont eu quelques concessions à temps, qui sont ja de long

temps expirées, & d'autres les ont eu sous quelques cōditions & charges, qu'ils n'ont point accomplies. car ainsi que nous lisons dans Plutarque *in Pompeio*, & dās Pline *lib. 19.* que les premiers peages, qui se leuerent iamais, furent pour soudoyer l'armée qui fust mise sus, pour rompre les Pirates, qui alloient rodans par la Mer Rouge, & empeschoient le commerce d'Arabie, d'Ethiopie & des Indes : Tout de mesme il faut que nous nous persuadions, que ces peages que nous voyons se leuer sur noz fleuves & riuieres, n'ont esté permis que pour tenir les ports, ports, passages, & nauigages bons & asseurez : Ce que n'accomplissans les peagers, au contraire chargeans tous les iours le Roy, de frayer seul pour l'entretienement de toutes ces choses : il est certain que leurs peages doiuent aussi cesser, suyuant la loy. 1. *Quato tit. ff. de condict. ob causam.*

Il ioinct que le publica vn fort grand interest, de voir retrancher toutes ces daces qui vont peu à peu ruynans le trafic & commerce, contre les autheurs & vsurpateurs desquelles, nous nous contenterons de rapporter ce traict excellent de Cassiodore *in formula Comitum portus urbis Romanae*,

TRENTE QUATRIÈME

en ces mots, *placidum mare damnat, qui undas cupiditatis exaggerat*, voulant dire, que celui qui pour servir à son avarice, augmente les impositions & peages sur la mer & les fleuves, condamne la bonace de leurs ondes, & les accuse de ce qu'ils se rendent faciles à la navigation tant utile, voire nécessaire pour le bien de la vie commune: C'est pourquoy le Roy Theodoric disoit en ce mesme autheur epist. 16. *portus nostros navis veniens non pauescat, nec manus exigentium incurrat. plures enim ea damna nudarunt quam naufragia.*

Tout ce qui nous a esté communiqué iusques aujourdhuy par les Peagers, pour la iustification de leurs droicts, ne sont que certains extraicts de quelques vieux comptes rendus en la Chambre par aucuns Receueurs du domaine; & chacun sçait avec quelle facilité cela à peu passer: la pluspart n'ont autres choses, que copies d'enquestes qui parlent bien d'une ancienne & immémoriale possession: mais il est notoire, que par telle possession on ne peut prescrire contre le Roy, ses droicts de regale & de souveraineté, comme font les peages, si on ne rapporte titres & documens de sa Majesté: comme de ce. y a

Edict expres du Roy François de l'an mil cinq cens trente neuf, verifié au Parlemēt en mesme temps, *juxta l. cum sponsus §. in vetigal. ff. de public Bal. consi. 187. l. 1. & ult. C. de fund. limit. l. f. C. ne rei dominic. vel tempo.* de la mesme sorte que par sa disposition canonique, les personnes laïques ne peuvent par prescription centenaire & immemorale s'attribuer droit de leuer decimes, *cap. 1. de prescript. lib. 6.* Ioinct que le mesme Roy François, ayant par son Edit de l'an cinq cens quarante quatre, ordonné la mesme chose qui se demande aujourdhuy, personne n'auroit tenu compte d'y obeir, sinon aucuns Religieux & administrateurs de quelques Hospitaux; & est toutesfois necessaire pour le bien public de le faire executer.

Quant au second point concernant les Alleges, sur lesquels ledit Iosse demande estre defendu aux peagers de leuer aucuns peages, la Cour a entendu, qu'il se fonde sur l'Edict de l'an cinq cens quarante six, & l'article quinziesme de son bail, contenant les defenses precises ausdits peagers de rien exiger sur les Alleges: ains seulement sur les bateaux maires, c'est à dire sur les bateaux mentionnez aux bre-

uets & rescriptions des officiers des emboucheures. car ainsi se doiuent entendre les basteaux maires, & non comme on a voulu dire les plus grands bateaux de la riuere de Seine, qui sont de cent cinquante muids ou enuiron, & que Cæsar *lib. 7. de bello Galico*, appelle *Lintres*: comme les plusgrands qui seruoient sur le Tibre s'appelloient *Codicariæ*, & sur le Danube *Dromones*, comme remarquent Nonius Marcellus, & Varro *lib. 3. de vit. pop. Rom.*

Or que ladiſte Ordonnance ſoit iuſte, chacun le void à l'œil, pour ce qu'il ne ſeroit raifonnable, que leſdits peagers tiraſſent profit de l'incommodité & deſpence extraordinaire des voicturiers; qui n'allegent iamais qu'ils n'y ſoient preſſez par le deffaut des eaues, & à leur grand dommage, pour les frais qu'ils y font, & les grands dechés qui prouiennent, de remuer ſouuent ceſte ſubſtance aqueuſe.

Les defendeurs ſe ſont plaints par leur plaidoyé, que les voituriers faiſoient faire leurs bateaux trop amples, & de trop grande charge: & qu'anciennement il paſſoit cent bateaux par leurs deſtroicts, au lieu de quarante pour le preſent: mais ceſte

ste plainte n'est soubs correction aucunement considerable , comme contraire au bien public , pource que nous deburions tous vouloir , que ceste riuere qui nourrist vn si grand peuple, fust plus capable, & que les bateaux fussent plus grands : car les viures & toutes autres commoditez nous seroient en plus grande abondance, & à beaucoup meilleur prix : & sur ceste consideration la loy de Rome vouloit que ceux qui entreprenoient fournir ceste grande ville de ses necessitez ordinaires, pour gagner l'exemption des charges publiques, ne se peussent seruir de vaisseaux de moindre port, que de cinquante mil muids de leur mesure *his qui naues marinas fabricauerunt, & ad annonam populi Romani præfuerint, non minores quinquaginta milium modiorum, donec hæ naues nauigent vacatio publici muneris præstatur,* ce dit Vlp. in l. 3. ff. de excusat. muner.

Quant au troisieme point, touchant la demande que faict ledit Iosse, que defenses aussi soient faictes ausdits peagers, d'exiger leurs peages en essence de sel ains seulement en argent, la Cour a pareillement entendu, qu'il est en cela assisté de l'adite ordonnance de l'an cinq cens quarante six, & dudit article de son bail

TRENTE QUATRIÈME

verifié sans modification pour ce regard: comme aussi il y a grande raison, veu le grand preiudice que cela apporteroit aux Gabelles du Roy, car puisque la Gabelle a esté introduicte pour seruir d'un principal nerf à l'Estat, & que nous voyons aujourdhuy la pluspart du peuple auoir toute sa substance en rentes sur le sel, il est nécessaire de retrancher toutes ces prerogatives, & faire que toutes personnes comme estans également subiettes d'un mesme Roy, le soient aussi d'une mesme loy, & qu'ils prennent le sel de leur provision aux greniers & magasins publics. Ce que les Romains mesmes pratiquerent exactement, lors que pour subuenir aux necessitez de leur Estat, ils introduisirent la gabelle sur le Sel, par le conseil que leur en donna le Censeur *Linus*, comme l'Historien de ce mesme nom le marque *lib. 29.* Et que depuis, sur nouuelles occurrences d'affaires, ils firent acheter du public à vn chacun le bled, l'huile & autres especes necessaires pour l'entretenement de la vie commune, ainsi que nous en voyons les marques au tiltre, *ut nemini liceat ab emptione specierum se excusare,* comme le semblable fust par eux obser-

ué, quand apres auoir conquis la Iudée, ils firent defenses à vn chacun de vendre ny trafiquer de baulme, reseruant cela à leur Fisque, à l'exemple du Roy des Gebanites, qui en fist ainsi du Cinamome croissant en abondance en son pays, comme dit Pline *lib. 12. cap. 19. & 25.* Ce qu'aujourd'huy les Venitiens imitent prudemment: car n'ayans aucuns marais propres pour faire Sel, & estants contraincts d'inuiter par priuileges, & exemptions de toutes daces, les marchands forains & estrangers de leuren porter; il n'y a toutes-fois que la Seigneurie qui en face trafic, & sur la réuente qu'elle en faict, tant aux subiects d'icelle, qu'à ses voisins, consiste le principal reuenu de son Estat.

Par lesquelles raisons & exemples nous sommes obligez d'assister ledit Iosse en sa demande, excepté pour quelques Monasteres & Hospitaux, ausquels par arrests contradictoires la Cour a permis prendre du Sel en essence pour la prouision de leur maison seulement.

Quant au dernier poinct, & qui est de plus grande importance au public, nous ne repeterons point, ce que ledict Iosse a représenté de son interest particulier,

Bb ij

TRENTEQUATRIÈME

ſçauoir eſt, du paiement qu'il a eſté con-
 trainct faire au Roy de trois cents mil
 eſcuz d'une part, & cinquante mil eſcuz
 d'autre, ſur le corps du prix de ſon ſel, ny
 des gages, que par ſon bail, il eſt tenu de
 paier aux Officiers des greniers, & qu'i-
 celles charges deduiſtes & deſalquées,
 ſondit pris ne reuiendroir à trente ſols
 pour minot, dont il a voulu inferer, que
 quand les peagers ſeroient bien fondez, à
 ſe faire paier au pris du marchand, qu'ils
 ne le pourroient pretendre à l'encontre
 de luy ſinon à la raiſon ſuſdiſte: Mais nous
 ſupplions la Cour de peſer pour la deciſion
 de ceſte difficulté ladiſte ordonnance
 de l'an cinq cents quarante ſix, portant l'e-
 ualuation & eſtimation de tous leſdiſts
 peages à certaine ſomme de deniers; avec
 deſenſes precises aux peagers de xiger
 d'oſeſnauant des voituriers, que iuſques
 à la concurrence de laeiſte eſtimation; &
 que ceſte ordonnance ayant eſté faiſte &
 cōcertée en l'aſſemblée generale des de-
 putez des Cours ſouueraines, & autres ſi-
 gnez perſonnages, il eſtoit à croire que
 ceſte eſtimation par eux faiſte a eſté pour
 ſeruir de reigle certaine à l'adueuir, autre-
 tement il euſt eſté auſſi aiſé de reigler les

peages au pris du marchand tel qu'il estoit lors, & pourroit estre cy apres,

Et quant à ce que les defendeurs ont voulu faire force en certaine declination de septante neuf, contenant l'estimation des peages au pris du marchand, la Cour sil luy plaist prendra garde, que ceste declaration fust faite en faueur de quelques vns, & qu'elle n'a onc esté verifiée que par prouision, & nō avec vn contradicteur legitime, ains seulement avec maistre Guichard Faure, qui tenoit lors seulement en party, les gabelles, & non le fournissement; & au demeurant que ce seroit chose trop preiudiciable au public, que ceste augmentation donnée par les Roys aux prix du sel, pour subuenir aux vrgentes affaires du Royaume, tournast au profit des Peagers, qui seuls en ce faisant profiteroient en la misere commune.

Le premier qui leua la Gabelle sur le sel fust Phillippes le Long, & n'estoit que dv'n double pour liure, Philippes de Vallois l'augmenta de deux autres deniers, Charles sixiesme de deux autres, Loys vnzieme la haussa iusques à douze deniers, & depuis comme les necessitez du Royaume sont accreuës, aussi elle est de beaucoup

TRENTE QUATRIÈME

augmentée : quelle raison donc y auroit il de donner ce profit aux peagers, veu que la loy dit, qu'il faut tousiours reduire les seruitudes, comme peu fauorables à leurs principes & origines, *l. non modus ff. de seruit.*

& que quand vne chose a esté vne fois réglée & déterminée, elle ne reçoit plus d'augmentation, *l. Rutilia Polla. ff. de contrah. emptio.*

Qui fust la mesme consideration qu'eust le Roy Charles 9. de faire son Edit de l'an 1565. par lequel il reduisit en deniers les rentes payables en bled à raison du denier douze, de la finãce qui en auoit esté payée, & qu'eust aussi le Roy Henri 2. de reduire en liures les constitutions & prestz faits par escus, qui auoient esté eualuez à quarante six sols, deux ans au parauant par l'Ordonnance de l'an cinq cens quarante neuf : & combien que quelques vns apres auoir veu depuis le pris de l'escu estre quasi augmenté du tiers, ayent voulu estre payez à raison de ceste augmentation, toutesfois ils en ont tousiours esté deboutez par les Arrest des Cours de Parlement, fondez sur la raison susdicte, & qui est conforme à l'opinion de Bartole & autres docteurs *in l. Paulus ff. de solut.* aussi qu'il ne se-

roit iuste, que le creancier seul profitast de l'augmentation de la monnoye, dont le prix aussi bien que du sel ne despend de la qualité de sa matiere, ains seulement de la volonté du Prince.

Pour conclurre donc & fermer ce discours, nous requerons qu'il plaise à la Cour ordonner que tous les peagers tant de la riuere de Seine que des autres fleuves nauigables, estans au ressort de ladite Cour, seront tenus apporter dedans trois mois par deuers icelle, les tiltres & enseignemens de leurs peages, autrement & à faute de ce faire dans ce temps-là, & iceluy passé, qu'ils soient declarez descheus de leursdits droicts & peages, & ce pendant que deffenses leur soient faictes d'exiger leursdits pretendus droicts sur les Alleges, ains seulement sur les bateaux maires, cōme pareillement de les prendre en essence de sel, excepté les monasteres & hospitaux, ausquels par arrests contradictoires, il a esté permis d'en prendre pour leur provision. Et finalement de se faire payer par lesdits peagers plus auant que l'estimation faicte de leurs peages par ladicte ordonnance de l'an mil cinq cens quarâte six, le tout à peine de concussion. La Cour

TRENTE QUATRIESME

auroit ordonné que tous pretendans droits de peages sur les riuieres du ressort d'icelle, seroient tenus apporter leurs tiltres, & iustifier de leurs droicts dās trois mois apres la signification du present Arrest, autrement & à faute de ce faire dans ledict temps, iceluy passé, seroit fait droict sur la decheance desdits droicts, ainsi que de raison. Et au principal ladite Cour auroit appointé les parties au Conseil. Ce pendant par prouision & sans preiudicier aux droicts des parties audit principal, auroit ordonné que tous lesdits pretendans droicts de pages ayans obtenu arrest de ladite Cour, adiudicatifs d'iceux, seront payez sur les bateaux maires seulement en deniers, non en especes, & suiuant l'eualuation portée par l'Edict de l'an cinq cens quarante six, fors les monasteres & hospitaux, qui pour ce ont obtenu arrests de ladite Cour pour la nourriture de leurs maisons seulement. Faict en ladite Cour au mois de Decembre, 1600.

XXXV. PLAIDOYE'.

Si les Bastards des Gentilshommes legitimez par le Roy, iouyssent comme nobles de l'exemption de tailles.



EST E question semble aucunement difficile, pour les diuerses raisons, iugemens & autoritez qui sy rencontrent: car d'une part, on peut dire, que la vertu & la force de la legitimation conferée par le prince, n'est autre chose qu'un retablissement aux mesmes honneurs de naissance, qui accompagnent les autres naiz en loyal mariage: ce que le Poëte Statius, *in lacrymis Etrusci*, a exprimé en ces mots.

Mutantque genus ----

----Et celsi natorum aequavit honore.

A raison de quoy, Iustinian en sa nouuelle 78. appelle ce benefice τ παλιγενεσίας δικηον, & en suite de en la 29. il dit μηδὲν τῶν νομίμων παίδων διαλλάττοντας εἶναι, que les Bastards legitimez ne differēt en rien de

ceux, qui sont naiz en loyal mariage: Et que non seulement, ils sont faicts capables de succeder à leur pere, mais aussi à ceux de sa gent & famille, ce qui a aussi esté recogneu par les Iurifconsultes: comme nous l'apprenons dans *Martian in l. qui in prouincia, §. diuus ff. de rit. nupt.* où il dit que les Empereurs Marcus & Lucius reftablirent au premier honneur de naissance quelques enfans naiz d'un mariage peu legitime, ce qu'il appelle *natalibus restituere*, & ce mot, *natales*, est interpreté par *Sosipater lib. i. generis nobilitas*, comme s'il vouloit dire, que la legitimacion obtenüe du Prince, efface ceste honteuse tache de la naissance des Bastards, & les fait participer aux mesmes honneurs, & tiltres de noblesse, dont ont iouy leurs peres. Et que n'estant auparauant recogneüz, que de la nature seule, la loy vient apres les adopter comme siens, & leur faict part de tous ses biens & honneurs.

Ce qui se doit entendre, tant de la legitimacion prouenante du Prince, que de toutes les autres especes, qui se lisent és tiltres *quibus mob. natural. efficitur legit.* & és Nouvelles 89. & 117. Bien toutesfois, que nous n'ayõs en France, que deux sortes de legitima-

tion, celle dont nous parlons, & l'autre par le mariage subsequnt, d'entre le pere & la mere du fils naturel: Et de faict, nous voyõs tous les iours que les Bastards legitimez sont par les Arrests des Cours de Parlement, non seulement admis aux successions, mais aussi en la noblesse & armes de leur pere, avec vne simple difference d'vne barre au costé gauche de leur escu, & ce suyuant l'oppinion des Docteurs *in l. f. C. de verbo. signif. in cap. per venerabilem, qui filij sint legit. de Guido Papæ quest. 59. & 482. de Chassanée in consuet. Burg. tit. de la succession des Bastards, §. 5.* Lesquels tous estiment que la legitimation obtenuë du Prince, est de pareille force & vertu, que la restitution conferée à l'Esclaue pour le recouurement de sa liberté, par le moyen de laquelle *ingenuo ita factus similis, ac si maculam seruitutis nunquam substinisset l. 4. ff. de iure aureo. anulor. l. 3. & l. ult. ff. de natal. restit.*

A quoy (si les meurs de l'antiquité peuvent seruir d'exemple aux nostres) se pourroit rapporter que les Grecs anciens ne mettoient point de difference, entre les Bastards & les legitimes. car pourueu que la vertu les rendist semblables, ils l'estoient aussi en grades & honneurs. Et pource que

ordinairement on experimentoit parmy eux, que les Bastards s'efforçoient d'effacer par belles actions, ce défaut qui estoit en eux, ils firent que ce nom deuint glorieux & honorable. De fait nous lisons dans Homere *lib. 8. Iliad.* que pour glorifier Teucer il l'appelle *νότος*, surquoy l'interprete Eustathius a dict, *ὅτι τῇ ἀρετῇ καὶ τὰς γυναικας ὑπερέβαινε*, & le mesme Homere *lib. 14. Od.* fait Vlysse raconter sans pudeur à son hoste Eumenes, qu'il estoit Bastard nay d'une concubine achetée par son pere.

Peut estre qu'ils auoient vne mesme opinion que les Égyptiens, lesquels au rapport de Diodore *lib. 1. cap. 3.* tenoient qu'il n'y auoit point de Bastards, pour ce que le pere estoit seul autheur de la generation, & que la mere n'y contribuoit rien du sien, sinon le lieu & l'aliment; que le pere seul, estoit le createur, & la mere l'hostesse, & la nourrice de ce qui estoit créé, & estimoient par mesme fantaisie, que les arbres, qui portoient fruit estoient les masles, & que ceux qui n'en portoient point estoient les femelles; qui ne seruoient que pour aduancer la saison des autres.

Quoy que s'en soit, ces premiers Grecs

furent telle estime , de ceux qui estoient naiz hors le mariage , qu'ils preparerent vn certain lieu dedié & vouë à Hercule, qu'ils appelloient *κυνοςαργής* auquel ils les nourrissoient , & faisoient instruire en la vertu , aux despends du public , & estimoient que fil y auoit quelque chose de honteux, en ce mot de Bastard, que la nature toutesfois leur estoit mere esgale , comme aux autres , suyuant ce vers d'Euripide in *Antigona*.

Ονόματι μεμπτόν νότον ἢ φύσις δ' ἴση;

Mais les exemples qui se trouuent es sainctes & sacrées histoires, des honneurs receus de la main de Dieu par les bastards seront peut estre suffisans , pour monstrier , qu'ils n'en doiuent pas receuoir moins des hommes: car qui ne sçait que Salomon fust conçu en adultere comme il se lit au 2. des Rois, & toutesfois Dieu mit en luy le Thresor de toute la prudence humaine, & le fit succeder au Royaume de son pere : Et ce grand Capitaine Iephté estoit-il pas fils d'vne Concubine, comme il est dit aux Iuges II. & toutesfois Dieu le choisit pour Iuge & Prince de son peuple, & se seruit de son bras inuincible en l'execution de tant de belles

TRENTECINQVIESME

& loüables actions Ismaël fils naturel d'Abraham, duquel sont descendus les Ismaélites habitans des Arabies desertes, participa-il pas en la benediction de son pere? comme on voit au Genese, 21. & au 46. Gad & Afer enfans de Iacob & de Zelpha sa concubine, & Dan & Neptalin enfans du mesme Iacob, & de Bala chambriere de Rachel, furent-ils pas faits chefs de Tribu? & leur posterité eust-elle pas pareille portion en la terre promise que les autres enfans de Iacob? Mais qui est bien d'avantage, ne lisons-nous pas, au Genes. 38. que Phares & Zaram furent fils de Iuda le Patriarche & de Thamar sa belle fille? Et toutesfois Iesus-Christ, l'honneur entier du ciel & de la terre, a choisi ceste lignée pour en tirer sa naissance, comme nous l'apprenons en saint Matthieu, & au C. *Dominus noster*, 56. *distinét*.

Ceste antiquité sainte, iugeoit que puisque la nature auoit autant contribué à la generation de ceux-là, & que Dieu leur auoit autant departy de son souffle diuin, comme aux autres, qu'il estoit aussi raisonnable de les tenir au mesme rang, condition & qualité, & que d'en vser autrement, c'estoit punir en l'innocence des en-

fans, le vice & intemperance du pere, contre les reigles de la iustice. *ferretne vlla ciuitas latorem istius legis, vt condemnaretur filius aut nepos, si pater deliquisset?* dit Ciceron lib. 3. de nat. deorum. Philon appelle cela ἀρχαῖον νόμον comme fil vouloit dire qu'estendre la punition du pere sur l'innocence des enfans, c'est vne iustice inhumaine & importune : Car à la verité d'estre nay d'adultere n'est pas la faute du fruiet, disoit saint Hierosme, mais de celuy qui seme & produict. c'est pourquoy, comme vn enuieux reprochoit à Timothée son extraction, & qu'il estoit fils bastard de Conon, ce grand restaurateur de la ville d'Athenes, apres la prinse d'icelle par Lyfander, & la chasse des trente Tyrans par Thrasylbule, il repliqua fort à propos, qu'il auoit beaucoup d'obligation à sa mere, puisque à cause d'elle, il se pouuoit estimer fils d'un si grand personnage.

Toutesfois le contraire de ce que dessus, a esté de tout temps gardé, & obserué en ceste Cour, sçauoir est que les bastards bien que legitimez, ne participent à la noblesse de leur pere, pour iouyr de l'immunité & exemption des tailles, &

autres charges, dont les Nobles du Royaume iouyſſent, & ce pour des raiſons trop plus fortes, & plus iuſtes que celles qui leur ſont oppoſées.

D'autant premierement que la Nobleſſe n'eſt autre choſe que l'illustration de la race, laquelle prend ſa ſource & racine en la famille paternelle, comme entre les Romains faiſoit le droit des choſes ſacrées, *ut ſepultura, l. familia ff. de relig. ius famil. l. penult. C. eod.* Or il eſt notoire que les Baſtards n'ont point de race, ains qu'ils prennent leur premiere & ſeule Origine du ventre ſouillé de leur mere, dit la loy 16. la loy *eius ff. ad municip.* C'eſt pourquoy Plutarque, Apulée & Iſidore diſent que les anciens appelloient les Baſtards, *ſpurij filios*, *ἄπὸ τῆς ἀπορίας*, *ab ea ſcilicet parte matris, qua honeſtè nominari non poteſt*, & partant on ne peut dire qu'ils ayent aucune part en la Nobleſſe de leur pere.

Le Prince qui eſt la loy animée, a bien vn pouuoir ſur ce qui eſt du pere naturel, & peut par ſon reſcript gratifier ſon vœu, & appeller à la ſucceſſion d'iceluy, ceux qu'il aura engendré hors le mariage : mais le Prince ne peut rien changer ſur le droit du ſang, & faire que celuy-la ſoit noble de

face

race qui n'en a point du tout, & que celuy qui n'est que legitimé, soit tenu pour estre nay de legitime mariage : la loy imite bien la nature, mais elle n'a pas vne pareille puissance, & ne peut faire que ce qui n'est point soit, & que ce qui est ne soit point; Comme par exemple combien que l'adoption soit vne chose tres fauorable, *ut remedium fortunæ, orbitatus scilicet*, dit Seneque, & qu'en l'antiquité lors qu'ils adoptoient quelqu'un ils imitassent la nature, ainsi que les Poëtes disent, que Iunon adoptant Hercule, le fit passer sous sa cotte, & fit tout ce que les femmes ont coustume de faire en leurs accouchemens, bref que l'adoption *imitetur prolem, quam legisse iuuet, quam genuisse velit*, dit Ausonne, toutesfois le Iuriconsulte dit que l'adoption *ius sanguinis non adfert. l. 23. ff. de adopt.* en sorte que l'adopté ne participe point és droicts de consanguinité; qu'Arnobe *lib. 2.* appelle *Germanitatem*, ny par nostre reigle, à la Noblesse du pere adoptant.

A plus forte raison, le mesme se doit dire du fils legitimé, pour ce que la legitimation n'estant si fauorable que l'adoption, elle ne doit estre de plus grande efficace, pour attribuer *ius sanguinis*, c'est à dire

Cc

origine, le nom de leur famille, à fin que dès ce temps ils fussent veuz & recogneus par tous ceux, qui estoient de mesme nom & gent, qu'Halicarnasse *lib. 3.* appelle *συγγενικὸν ἢ πατρωνυμικὸν.*

Nos mœurs ne sont pas fort differens de ceux-la, car outre que par l'ordonnance du Roy François de l'an 1535. & de Héry 3. de l'an 1579. les peres sont tenus faire inscrire leur nō, & celuy de leurs enfans au registre des baptisteres, qui se garde aux Eglises parochiales, nous auons encores ceste obseruance, de leur cōtinuer le nom de la mesme famille, dont nous sommes yssus de maniere que par ce moyen, la filiation se peut aisément verifier. Mais pour ce que ceste ordonnance est negligée, les Curez ne tenant compte de l'observer, à ceste occasiō nous auōs tousiours desiré, pour preuue entiere de la genealogie, outre l'extraict de ce registre, voir le testament du pere, le partage de sa succession, le contract de mariage, ou le pere a assisté, ou bien quelque autre acte public, digne de foy, & faisant mētion de la filiation: mesmes la continuatiō d'armes semblables au veu & sceu d'un chacun; *hæc enim illiterata testimonia dicuntur,*

& dont les nobles ont de tout temps esté tres-curieux , pour les raisons discouruës par les histoires ; & principalement pour marquer leurs extractiõs; Jusques-là qu'anciennement il y auoit des peuples entiers, lesquels en signe & pour marque de l'ancienneté de leur noblesse portoient la Lune comme les Arcades, & les Atheniens la Cigale, aux nœuds & entrelassemens de leurs cheveux avec le fil d'or, dit Thucid. au premier de son histoire.

Les dignitez au semblable, que nous pretendons auoir accompagné & annobly la vie & condition de noz ancestres, & desquels nous desirons tirer nostre Noblesse, se doiuent verifier, par les prouisions, & actes de reception en icelles : ou bien, si ce sont charges militaires, par les extraicts des roolles des monstres & des comptes rendus en la chambre par les Thresoriers ordinaires, ou extraordinaires des guerres, faisant mention des soldes & appointemens par eux receus, pour l'exercice de telles charges. Item par les actes de conuocation du ban & arriereban, par les actes de foy & hommage, qu'ils ont rendus à cause des fiefs qu'ils tiennent du Roy, ou autres Seigneurs. Bref par les anciennes inscriptions
du

du nom, gestes & armes de leurs ancestres, & qui se treuuent és temples, ou autres lieux publics.

Mais si toutes ces choses defaillent, ne peut-on les suppleer par tesmoings? c'est ce qui s'offre principalement à iuger en ceste cause: car de ce que les Esleuz ont déclaré l'intimé noble sur vne seule enqueste, les habitans de la paroisse où il est demeurant, en ont interietté l'appel auquel ils viennent de conclurre.

Et à la verité bien qu'en ladicte enqueste, il y ait bon nombre de tesmoings, qui deposent de la genealogie de l'intimé, & des tiltres & armes de ses pere & ayeul, si est-ce que cela ne suffit, pour ce que par les reigles & maximes de tout temps obseruées en ceste Cour, les faicts de genealogie & de Noblesse, doiuent estre verifiez tant par lettres que par tesmoings: En quoy nous auons imité l'ancienne loy de Rome, qui requeroit pour faire preuue entiere de l'ingenuité non seulement des tesmoings, mais aussi des documens par escrit, *si tibi controuersia ingenuitatis fiat: defende causam tuam instrumentis, & argumentis, quibus potes. soli enim testes ad ingenuitatis probationem non sufficiunt* dit la l. 2. C. de test. & seruent les

Dd

tesmoings, pour faire ſçauoir, ſi celuy de la Nobleſſe duquel il ſagit, & ſes Pere & ayeul, ont touſiours veſcu noblement ſans faire actes derogeants à nobleſſe : les lettres & tiltres valent, pour monſtrer la genealogie, & les dignitez d'iceux. Car ſi l'Ordonnance de Moulins, exclud la preuve par tesmoings, de choſe qui excède cent liures, pour ce que la voix du peuple, le plus ſouuent eſt tromperieſſe, faulſe & vaine, dit l'Emp. apres Ciceron *in l. decurio. C. de pœn.* à combien plus forte raiſon, doit elle eſtre obſeruée en matiere de nobleſſe, dont le prix eſt vrayement inſtimable?

Elle ſ'obſerue pour la nobleſſe & feodalité d'un heritage, qui ne ſe peut verifier que par eſcrit, ſuiuant le chap. 1. *Quid ſit inueſtit. in vſib. feudor.* cōme auſſi les hommages ne ſe font & ne ſont receus que par eſcrit : à plus forte raiſon la doit on garder & obſeruer és nobleſſes des perſonnes, veu qu'elles ſont de bien plus grande ſuite, & importance que celle d'un heritage.

Nous n'auons veu exempter de ceſte reigle commune, que les nobleſſes que le Roy donne à ceux, qui retournent glorieux, ou d'un aſſault de ville, ou de quel-

que autre entreprinse de guerre : car pour ce regard nous auons veu receuoir la seule preuue par tesmoings , sçauoir est des soldats qui y estoient presents : & ce en consideration du priuilege des Gensdarmes, qui les dispence de l'estroicte obseruance des loix. *l. i. ff. de test. milit. l. scimus C. de iure deliber.* Aussi que la seule presence du Prince faict plus de foy & de force que tous les escrits du monde, comme il est dict des testaments faicts en sa presence, *l. omnium C. de test.*

Ce droit donc, que nous obseruons, de requerir avec le tesmoignage des hommes, la preuue par escrit, pour verifier la noblesse, doit obliger tous ceux qui ont l'honneur de ceste qualite, d'estre curieux de laisser à leur posterité dequoy iustifier leurs actions illustres, & d'y apprendre à s'y conformer.

Partant nous requerons qu'il soit dict qu'il a esté mal iugé, & qu'en emendant le iugement l'intimé articulera ses faicts de genealogie & de noblesse, & verifera iceux tant par lettres que par tesmoins.


Ceste cause estant preste à estre plaidée, elle fust appointée au Conseil du cōsentement des parties, & depuis iugée confor-

Dd ij

TRENTESIXIÈME
mement à nos conclusions, par Arrest du
mois de Iuin, 1599.

XXXVII. PLAIDOYE.

*Si en matiere de Noblesse, on est receua-
ble en requeste ciuile, sous pretexte de
pieces de nouuel recourrees, & autres
questions notables traittées incidem-
ment.*

OMME c'eust esté à l'Athlete vaincu aux Olympiques, vne plainte ou excuse impertinente deuant les Hellanodices, de dire que la victoire luy eust esté enleuée, pour ne s'estre préparé de bonne heure au combat, ou auoir oublié ses armes, & autres choses propres pour tels exercices : d'autant qu'il se deuoit tenir prest, voire mesme s'esprouuer, & ses armes ensemble, auant que d'en venir là : ce que ces anciens au rapport de Themistius *orat. i.* appelloient *δυνασται*. Ainsi en pouuons-nous dire de celuy, qui ayant esté vaincu en iu-

gement, se va plaignant que ç'a esté, pour auoir mal assailly, ou s'estre mal deffendu; ou auoir oublié à produire & se seruir de telles, ou telles pieces: pour ce qu'on ne doit iamais descendre en ce champ de iustice, que bien préparé, & qu'on ne soit garny de tout ce qui est necessaire, pour iustifier son intention, qui est ce qu'enseigne Paulus, disant, *actor instructus & paratus ad agendum veniat.*

Et ne sera peut estre ceste comparaison iugée mal à propos: veu mesmes que noz Iurisconsultes, appellent ces differents & disputes iudiciaires, *certamina*, in l. 1. §. *solent ff. de agnosc. & alent. in l. 24. C. de leg. in l. 3. C. de posth. hered.* & que Ciceron ce Pere de bien dire, appelle en ses Topiques, l'action, & la defense, *telum*, & *clypeum*, & que quand il veut dire que l'Orateur vient à plaider, il vse de ceste phrase, *descendit in arenam*..

C'est sur ceste consideration donc, que le droit Romain, & l'usage de ce Royaume, n'ont voulu, que sous pretexte de pieces nouvellement recourées, ou d'une defense obmise, on vint par requeste à retraicter vn Arrest legitiment donné, comme il est dict in l. 4. *C. de re iudic. in*

T R E N T E S E P T I E S M E

l. 2. C. sentent. resc. non posse, l. sub prae-textu C. de transact. si ce n'estoit toutesfois és causes de l'Eglise, de la Republique, du Fisque, & des mineurs, lesquels sont exceptez de ceste reigle, tant pour leur merite singulier, que pour ce qu'estans contraincts d'assailir & se deffendre par l'interposition de personnes neutres, leurs droicts ne sont ordinairement, si bien debattus & esclarcis, comme il est dit *in auth. de non alien. reb. eccl'es. §. si nimus, l. Imperatores ff. de re iud. l. 1. de sent. advers. fisc. lat. & ailleurs.*

Outre lesquelles exceptions, y en a vne autre, tirée de la bonne foy & probité, requise en la plaidoyrie; qui est si les piec-es ou les iustes moyens dont on se veut preualoir, contre l'arrest, ont esté subtraits ou cachez, par le dol, fraude, & mauuais artifice de la partie aduersé, *adeo ut lis bona periret*, comme dit la loy 18. *§. dolo ff. de dolo.* Car en ce cas, il ne seroit raisonnable, que la malice, & le mensonge, se trouuassent auctorisez de la Iustice, que Platon compare sagement, à vne vierge pudique, dont la candeur refuit & abhorre tous fards, deguise-mens & mensonges: & qui doit estre tousiours telle que la despeint le Philosophe Chrysippus dans A. Gelle, *forma*

atque filo virginali; aspectu vehementi & formidabili luminibus oculorum acribus. De fait les anciens Peintres ne la representoient iamais qu'ils ne luy donnassent tousiours la verité pour compagne: si que souuent nous nous sommes esbays comment le Senat de Rome, autresfois Auguste comme vn confistoire de Dieux, peust souffrir deuant ses yeux, ceste effrontée iactance de Lucius Cotta, qui se vantoit, auoir par son artifice, arraché vne bonne cause, des mains de son aduersaire.

Ces Athletes des Olympies, dont nous venons de parler en vsoient bien autremēt: car si aucun eust combattu contre les loix prescrites, & vsé de la moindre fraude, il estoit non seulement mulcté d'une amende seuerre, qu'ils appelloient, *κακομαχία*, & *eorum omnium quæ τῶν νόμων τῶν ἐναγωνίων peccarentur*, comme dit Athenee liu. 6. chap. 12. Mais estoit aussi priué du prix de la victoire avec ignominie, ainsi que Platon le recite de Cleomedes au 9. de ses loix; Et Pollux *in Onomast. ch. 30.* d'un Lucius, qui laissa passer en la course, son Antagoniste, à fin de luy nuire en derriere, surquoy semble auoir regardé Ciceron en ce lieu du 3. des offic. disant, *de generis qui-*

dem & malitiosi animi est, ac de sua virtute diffidentis, in cursu antecedentem impedire, atque intercludere aduersarium.

Que si la fraude fust bannie avec tant de rigueur, de ces jeux & esbattemens de peu d'importance au public : A combien plus forte raison, doit-elle estre interdite des temples sacrez de la iustice, où il s'agit de la vie des hommes, de leurs estats, & fortunes. C'est pourquoy les Magistrats souuerains, ont tousiours esté fauorables aux plaintes, qui leur ont esté faictes des fraudes practiquées en iugement, & ont reuocqué facilement les Arrests dont elles auroient esté cause, *iniquum ducentes malitiam premio esse, cum longè æquum sit ex eo quod perfidè gestum est nihil consequi*, comme disoit le Iurisc. Marcellus *in l. 4. ff. de doli & met. except.*

Mais le principal but de ceste cause, est de voir, si outre ces exceptions, nous pouuons dire, que les causes de noblesse soient aussi exceptées de la reigle susdite. C'est à dire, si celuy, qui a esté déclaré roturier, & taillable, par arrest contradictoirement donné, avec toutes les formes de la iustice, & sans arguer son aduersaire, d'aucun dol, fraude, & surprinse, est rece-

uable à se pourvoir , par requeste ciuile, contre cest Arrest, sous pretexte de pieces par luy nouuellement recourées? Certes la question en est aucunement difficile, encores qu'elle semble, se pouuoir resoudre sur l'exemple des causes liberales, que les loix veulēt demeurer entieres, & inuulnerées, quelques iugemens qui y seroient interuenus, contraires à la verité, comme il est amplement traité *in l. Diui fratres ff. de liber. caus. in l. ingenuum ff. de stat. hom. adeo ut velint dictam sententiā, contra libertatē nunquā transire in rem iudicatam*; comme autresfois il auoit esté ordonné par les douze tables. Iusques-là, que si vn ingenu eust affermé par serment, & deuant le Iuge, qu'il estoit liberte de Titius, & que le serment sur toutes choses doibue estre sacré-sainct & inuiolable; ces loix neantmoins n'ont voulu, que pour cela, sa liberté fust en rien interessée, dit le Iurisc, *in l. eum qui S. si libertus ff. de iurciur.* & le monstre plus particulierement Ciceron, en l'vne de ses oraisons contre Verres, ou parlant de ceste Sicilienne, qu'il appelle *Lilybatanam*, femme tres-riche & opulente: laquelle pour cuidoer destourner par quelque respect de religion, le Preuost de Marc Antoine en

la Sicile, de l'iniure qu'il luy vouloit faire, d'enleuer par force ses chantres, *seruos symphonicos*, dit qu'elle luy iura qu'eux & elle mesmes appartenoint à Venus Erycine, & que sur ceste affirmation, ayant esté vendiquée en seruitude, par le Questeur Cæcilius, & ses biens saisis & vendus, fut neantmoins depuis restablie, & restituée par le gouuerneur de la Prouince, pour ce qu'elle fust recogneuë libre, & que le serment qu'elle auoit fait, auoit esté *auertende tantum iniuriæ causa*.

Le Iurisconsulte Massurius, nous donne encores de cecy vn exemple beaucoup plus approchant de ceste cause, *in l. 2. §. ult. ff. si libert. ingenu. esse dicat.* disant, qu'un certain homme libre, s'estant veu reduict en la main & puissance d'un autre, mesme souffert auoir esté par luy affranchy, & luy auoir volontairement rendu comme liberte, tous les offices & seruices requis des hommes de ceste condition, par l'espace de plus de 5. ans, neantmoins, qu'ayant de nouuel recouuré des pieces iustificatiues de sa liberte, *instrumenta ingenuitatis*, il fut remis & restably en icelle par l'Empereur.

C'estoit donc vne reigle certaine, que la

voye estoit tousiours ouuerte contre tous iugemens & sentences données contre la liberté, si elle se pouuoit iustifier par preuues nouuelles, & qui estoit fondée, tant sur la faueur de ce plus cher don que nous ayons de la nature; que sur la consideration des parens, qui autrement seroient iniuriez, en la seruitude de celuy, qui seroit sorty de leur famille, comme il est dit *in l. 1. & 2. ff. de liber. caus.*

Mais asseurerons-nous le semblable des causes de la Noblesse? ce qui fait hesiter en cela, est l'inegalité grande, qu'il y a entre les merites de ces deux choses: Car la liberté, comme nous venons de dire, prouient du pur droict de la nature, qui nous a tous engendré libres, là où la Noblesse prouient seulemēt du droict des hommes, qui ont donné aux vns ce degré & prééminence sur les autres; celle-là nous est plus chere, que la vie, & celle-cy ne nous vaut que de parure & ornement: le prix de celle-là, est infiny, & inestimable; & celle-cy a esté plusieurs fois vendüe à l'encan, pour vne legere somme: Toutes les loix du monde ont fauorisé la liberté: mais quelques vnes ont banny la Noblesse: elles ont voulu que la prouision fust tousiours

TRENTESEPTIESME

donnée en iugement à celle là, (ce que ces anciens par la loy des 12. tables appelloient *vindicias pro libertate*,) & au contraire qu'elle fust tousiours deniée à celle-cy, comme estant odieuse à cause de cces immunittez, ioints que n'estant qu'une qualité accidentelle, elle ne se presume iamais, si elle n'est esclarcie.

Toutesfois, nous n'estimons pas, que ces considerations meritent d'y arrester vostre iugement : car puisque le plan de tous ces traictez ciuils que nous faisons, est l'vtilité publique du Royaume, & qu'il est manifeste, n'y auoir rien plus vtile, & plus aduantageux à l'Estat que la Noblesse, comme en estant le bras & la force, l'appui & le maintien, & dont le labeur, & les veilles, sont le repos de tous, les hazards & perils, sont l'assurance de tous, les plaies & la mort mesme, sont de tous aussi le salut & la vie : *Et cuius virtuti fideique possessionum fortuna, tutela urbium, salus militum, reipub. creditur gloria*, disoit vn ancien. A ceste raison, qui ne dira avec nous, qu'elle merite bien d'estre dispensée de la rigueur de la reigle susdite, & qu'on reçoie vn Gentilhomme à se pourvoir contre l'Arrest, qui l'auroit contre verité déclaré roturier,

en rapportant preuue nouuelle & certaine de sa condition?

Ioinct qu'il importe autant, à vn courage noble de luy oster ce tiltre d'honneur, que le priuer de la vie, qu'en cela tous ceux qui sont sortis de la mesme lignée, feroient autant interessez que luy aussi qu'ores, que les droicts de Noblesse, prennent leurs reiglements des hommes, si est-ce qu'ils tirent leur origine de la mesme nature, qui ayant faict naistre les vns plus forts, plus heureux, & plus sages que les autres, a quand & quand faict naistre la Noblesse.

Ce qu'estant ainsi, voyons si le demandeur en requeste ciuile, rapporte auourd'huy pieces suffisantes pour iustifier sa noblesse, & vous demouuoir de l'Arrest par lequel elle luy a esté deniée. Premièrement il vous resouuiédra, que par le proces il estoit demeuré d'accord, que son Pere & son Ayeul auoient toute leur vie derogé à Noblesse: dont s'estant faict retenir par lettres, force neantmoins luy auroit esté, selon noz reigles, repeter sa noblesse, & genealogie de ses Bisayeul & Trisayeul, que les loix appellent majeurs, & que pour le regard du Trisayeul, il monstroit bien

qu'il auoir prins qualité d'Escuier, par quelques pieces, & actes publics mais quant à son Bisayeul, il n'en iustificoit aucune chose, que par vne enqueste faite sans forme, vingt ans apres sa mort, & en laquelle il n'y a aucun Gentil'homme ouy, comme il est necessaire : & que cela n'estant suffisant pour iustifier, ny la genealogie, ny la noblesse du demandeur, la Cour n'auoit peu autrement iuger, que de le declarer roturier & taillable.

Ce qu'il represente donc maintenant, sont deux sentences données par les Eleus d'Angoulesme, par defauts & contumaces au profit de son bifaieul, contre les habitants de la paroisse ou il estoit demeurant, par lesquelles sans aucune cognoissance de cause, il fut déclaré noble, & ordonné que comme tel il seroit rayé des rôlles de la taille; Mais ces sentences sont si peu cōsiderables, qu'elles ne meritoient qu'on fondast sur icelles vne requeste ciuile, & ce pour deux raisons, que vous iugerez pertinentes: l'vne, pour ce qu'elles n'ont esté emologuées en la Cour, comme il est requis par l'Ordonnance d'Orleans, à peine de nullité: l'autre, d'autant que quand bien ces habitants les eussent expressement

consenties , elles ne seroient toutesfois d'aucune efficace, suyuant ce qui est traicté *in l. vacuatu. C. de decurio. in l. i. C. de decret. decur.* & *in l. unica, C. de immu. nem. conced.* pour ce que telles matieres estans des plus graues & importantes , ne se peuuent decider que sur vne tres-grande cognoissance de cause & verification tres-exacte, des faicts de genealogie & de noblesse , de celuy qui en faict poursuite : & non sur vn consentement des parties aduerses , ou sur simples defauts & contumaces.

Mais outre ce que dessus , on a encores obiecté comme en passant au demandeur, que quand bien seldits Bisayeul , & Trisayeul , eussent esté indubitablement nobles, il ne pourroit pourtant se pretendre tel , à cause que son pere & son ayeul , ont toute leur vie derogé à noblesse : qui est vn argument nouveau , & qui semble aucunement douteux , veu que comme les dignitez nobles , du pere & de l'ayeul , acquierent à leur posterité la noblesse : qu'aussi il sembleroit raisonnable , de dire que leur vie roturiere , & mecanique , leur eust laissé la mesme condition , & ce ad instar de l'homme libre, qui se vendi passus est : car dès lors sa liberté est perdue pour luy , &

sa posterité, née de luy en seruitude, comme il est dict, *in l. homo liber ff. de stat. hom. in l. cum pacto, ff. de liberal. caus. & in l. I. C. cui ad libert. procl. non lic.*

Joindz que d'ailleurs, tous priuileges & immunitéz, se perdent du tout, pour n'en auoir iouy, *longissimo tempore*, disent noz maistres *in l. voluntaria C. de excus. tutor. in l. 2. C. de decur. & in l. 2. C. de his qui spo. mu.* Iusques-là mesmes, qu'ils tiennent, qu'un Fief & heritage noble, deuient pour tousiours roturier, & sans espoir de plus recouurer sa liberté, s'il se treuve, que par trente ans, il ait esté comprins aux Cadastres, & Compoix: & qu'il ait payé les tailles, redevances & seruitudes accoustumées aux terres roturieres *l. hi penes C. de agri. & cens. l. 1. C. de censib. l. ult. ff. priuileg. veter.*

Toutesfois, nous n'auons veu iusques aujourd'huy practiquer ceste rigueur, contre les personnes nobles, pourueu qu'ils fussent releuez par le Prince, de la derogeance par eux faicte à noblesse, ny mesmes de priuer les enfans de la noblesse, ores que leur pere & ayeul, y eussent derogé tout le cours de leur vie, pourueu aussi qu'ils fussent assistez de lettres conuenables:

nables : la raison en est claire , & euidente, pour ce qu'ils vont repetant leur noblesse de leurs maieurs & ancestres, qui ont precedé leurs peres & ayeuls.

C'est pourquoy Ouide faict Romulus chercher la splendeur de sa race , dans les anciens siecles, disant,

*Principiūmque sui generis, reuolutaque quarens
Sæcula, cognatos venit adūsque Deos.*

Iulius Capitolin dit le semblable , d'Antonin le Philosophe , *cuius originem recurrrens à Numa probatur sanguinem trahere.* Herodian en dit de mesmes, discourant de l'origine de l'Empereur Commode , *ἄνωθεν ἐν περὶ γενέσεως βασιλείᾳ.* Toutesfois , nous estimons qu'il seroit raisonnable , de borner cela au septiesme degré, pour ce que oultre iceluy, la nature ne recognoist plus de consanguinité, dit Modestin en la loy 4. ff. de gradib. cognat. & Insti. au §. der. Inst. de success. cognat. Mais ce discours ne va qu'à l'instruction du Barreau. car autrement il est inutile en ceste cause, pource que comme a esté dict, le demandeur ne rapporte rien de nouveau , qui puisse valoir pour nous esclarcir de la pretenduë noblesse de ses ancestres.

Quant aux lettres, par lesquelles il a faict

E c

TRENTESIESME

mander par le Roy à la Cour, le faire iouyr des priuileges de noblesse, nonobstant, & & sans s'arrester audict Arrest, & desquelles il a incidemment demandé l'enterinemēt, elles ne meritent sous correction qu'on sy arreste aucunement, estant chose nouuelle, & neantmoins de dangereux exemple, de faire retracter les Arrests, par lettres ou rescripts du Prince, ce que l'antiquité a tousiours reprouué, comme il est dict *in l. f. C. sentent. resc. non poss.*

Partant nous concluons, à ce que tant sur ces lettres, que sur celles en forme de requeste ciuile, les parties soient mises hors de Cour & de procez. Et qu'en ce faisant il soit dict, que l'Arrest sera executé selon sa forme & teneur. Ce que la Cour ordonna par son Arrest du mois de May, 1601.

XXXVIII. PLAIDOYE'.

Si l'exercice de l'art de verrerie, deroge à Noblesse, & si la marchandise de verrerie, est franche de subside.

IL semble que ç'a esté vne loy vniuerselle, & presque receüe de tous les peuples, d'auoir exclus & priué les Artisans mecha- niques, des honneurs, grades & dignitez des Republiques. Philostrate le tesmoigne en vn lieu des vies des Sophistes, où il dit qu'en Athenes il estoit deffendu à tous Artisans, de faire eriger en leur nom, aucune statuë aux Olympies, c'est à dire sur le Theatre & le champ de l'honneur de la Grece; dont mesmes il infere, que Theodore le pere d'Isocrate, ne fut oncques Artisan, pour ce qu'on voyoit encores de son temps en ce lieu, vne statuë erigée en son honneur.

A ceste occasion Lycurgue, dit Plutarque au traitté des diëts notables des La-

Ee ij

cedemoniens , deffendit expressement à ses Citoyens , de s'entremettre en l'exercice d'aucun art mechanique , laissant cela à faire à leurs Ilotes & Esclaves. Herodote liu. 2. dit que le semblable fut obserué de son temps entre les Thraces, les Scythes, les Lydiens, & les Perses, & Aristote liu. 7. de ses Polit. dit que les Thebains eurent vne loy, par laquelle , il estoit deffendu *πὴν δέχεσθαι μὴ ἀπεχόμενοι ἢ ἀργῶς, μὴ μετέχειν ἀργῶς*: que celuy qui ne s'estoit abstenu dix ans entiers de l'exercice des arts mechaniques, & de la marchandise, ne pourroit paruenir aux dignitez de la Republique. Mais le Philosophe Zenon passa bien plus outre: car il mesprisa de telle sorte les Artisans, que mesme il ne vouloit qu'on erigeast des temples aux Dieux, disant, qu'ils seroient à tousiours profanes, à cause des Artisans qui les auroient bastis. Les Poëtes adioustent d'auantage , que les Dieux eurent aussi en tel mespris les arts mechaniques, qu'à ceste occasion ils refuserent à Vulcan les honneurs diuins, & le chasserent de leurs sacrez conuiues.

Qui ne dira donc apres toutes ces choses, qu'il seroit absurde, de soubstenir que ceste profession des arts mechaniques, &

la Noblesse, peussent subsister ensemble en vn mesme subiect, comme qui diroit que la lumiere & les tenebres, la vertu & le vice, & tous les contraires du monde, peussent compatir ensemble. Car la Noblesse estant vn relief, parure, & ornement de la vertu, & de l'honneur, quelle correspondance & habitude pourroit-elle auoir avec des boutiques, & des forges, où il ne se recognoist rien, que de vil, d'abiection & de sordide ? ce que Socrate monstra fort bien, dit Xenophon au liu. 1. de ses dicts & de ses faits, lors qu'ayant apperceu quelques Artisans tenir place entre les premiers de la ville en vne assemblée publique, il les fit chasser de force, leur disant, reposez-vous mal-heureux, & vous contentez d'obeyr à ceux, qui valent mieux que vous: car vous n'estes bons, ny pour bien faire, ny pour donner conseil & aduis.

Aussi nous apprenons, qu'à ceste occasion en tous Estats & Republiques, on a tousiours distingué les Nobles d'avec les Plebées, & Artisans. Cæsar mesme liu. 6. de *bel. Ga.* dit que dès son temps la France estoit diuisée en trois sortes de gens, les Nobles, les Druides, & le tiers Estat: Et

E c iij

qu'à cestuy-cy, furent laissez les arts mechaniques, & le trafic : aux Druides, la religion, & aux nobles seulement les lettres, les sciences, & les armes. Ne seroit-ce pas donc perdre ce bel ordre : & en le perdant, perdre aussi l'honneur, le lustre & la gloire des Estats, que de permettre aux Nobles la profession des arts mechaniques ? Les Romains qui eurent vn pareil ordre en leur estat, se donnerent garde sur toute chose de l'enfreindre : car dès aussi tost, qu'ils recognoissoient vn de leurs nobles, se mesler de ceste profession vile, ils l'éfazoient du rang de la noblesse ; comme il fust fait à l'endroit des predecesseurs d'Octaviã, de Cornelius Sylla encores qu'ils descédissent d'une souche tres-noble, & tres-anciëne : ainsi que le remarquent Plutar. *in sylla*, Cice. *in epist. ad Octo.* & Suet. en sa vie : Iusques là que Tite Liue liu. 6. dit, que les dames Romaines le sçeurent bien practiquer à l'endroit de Virginia fille d'Aulus Patrice, car pour s'estre mariée à vn homme plebée, & auoir par ce moyé derogé à sa Noblesse, elles la chasserent des sacrifices, qu'elles faisoient *Pudicitie Patritie*, ausquels il n'y auoit, que les femmes Nobles, qui y peussent assister.

On peut recognoistre sur l'exemple de noz voisins, ce que ce meslange, de la marchandise, avec la Noblesse, peut apporter de confusion : car deormais il n'y à tantost plus parmy eux, que le seul nom & tiltre de Noblesse, denué entierement de la verité de la chose. Et toutesfois ils apportent pour excuse, que la Noblesse est vn caractere qui nous est tellement acquis, par le moyen du lieu & de la famille, dont nous sōmes sortis, qu'il ne peut estre effacé par vne professiō contraire, enquoy ils se trompent grandement. car ce qui donne & oste la noblesse, est principalement la qualité de la profession, que l'on exerce : comme le discours Ciceron liu. 2. *de leg.*

Mais il semble qu'Aristote, establisant au liu. 3. de ses Polit. deux fortes d'arts, les vns fordides & les autres honnestes, vueille par mesme moyen dire, que les honnestes peuuent estre permis à toutes fortes des personnes, sans deroger à leurs qualitez, & appelle ceux là honnestes, qui se peuuent exercer, sans gaster, ou corrompre le corps, & force la nature de l'homme, comme sont L'agriculture, & les autres, representez par Homere dans le bouclier d'Achile.

Entre lesquels voyons si nous pourrions donner place à la verrerie. Car c'est le subiect de ceste cause. Et certes si nous croyons cest Aucteur excellent, il semble, qu'elle deuroit plustost estre du nombre des sordides: pour ce qu'il dit generalement, que tous ceux, qui se seruent en leurs ouurages de feu & de forge, sont tenus pour vils, sordides & des-honestes, d'autant qu'il n'y a rien qui plus gaste le corps, & corrompe l'esprit de l'homme, que la force du feu: c'est pourquoy ces Poëtes anciens d'escriuoient Vulcan, & ses Cyclopes, borgnes, boiteux, contrefaits, idiots, & sans aucun esprit & entendement.

Toutesfois nous ne serons en cela de l'aduis d'Aristote, pour ce qui concerne l'art de la verrerie, d'autant que le verre est le premier effect de la Philosophie Chimique, tant prisée & estimée des anciens: Et de faict ils ne chercherent l'Idée, ou exemplaire de ceste tant désirée pierre, que sur le verre, tesmoing Raimond Lulle en la Theorique de son testament, où il dit, *vitrum sit tibi in exemplum huiusce rei*, & auant luy Arnauld de la Ville-neufue, en son traicté, de la nouvelle lumiere,

le dit aussi en ces termes : *Quis ergo faciet talem aquam Philosophicam ? certe dico quod ille qui scit facere vitrum.*

Ils disent d'auantage , que comme l'or est la plus eslabourée substance en l'action de la nature , que d'autre costé , le verre est le dernier ouurage , & effect , que produise le feu , en sorte qu'ils appellent l'or le fils du Soleil , dont il porte le nom , & le verre , celuy du feu. Et combien que Pline liu. 36. ch. 26. recite qu'on treuve du sable vitreux au fond du Lac qu'il appelle Cendena , qui est au pied du mont de Carmel : & que Iosephe liu. 2. des antiq. en die autant , d'une vallee de Surie , qui est proche du ruisseau qu'il appelle Beleus : Il faut neantmoins tenir , par les reigles de ceste Philosophie , que c'est le feu enfermé aux entrailles de la terre , qu'Heraclite appelle le fondement de toutes choses , qui le produict.

Ils adioustent aussi , que sur cest art de verrerie , a esté inuétée l'emaillerie , qui est vn autre artifice des plus nobles que nous ayons , & que Pline liu. 34. ch. 17. attribue aux auciens Gaulois , disant , *plumbum album incoquitur æris operibus Galliarum inuento , ita ut vix discerni possit ab argento , eaq; incoalia*

vocant, comme à la verité les Gaulois ont tousiours esté adonnez, & se sont rendus fort industrieux aux œuures metalliques, & autres prouenans de l'artifice du feu.

Si que le verre, estant l'un des effects d'une science si noble, & donnant pied encore à l'inuention de tant d'excellens œuures, comment pourroit-on dire que l'exercice qu'on y employe, fust acte derogant à Noblesse? Le plaisir d'ailleurs, & la commodité que nous apporte l'usage du verre, le doit rendre aussi d'autant plus recommandable. Il nous admet au dedans de noz hostels la clarté du iour, & la lumiere du Soleil, comme s'il n'y auoit rien au deuant: & neantmoins il nous garantit des incommoditez de l'air, comme si c'estoit vne espesse muraille: mesmes que nous lisons dans Pline qu'anciennement ils faisoient les chambres entieres de verre, au liu. 36. chap. 25. & Seneque le confirme epist, 86. disant, *at nunc quis est qui sic lauari sustineat? pauper sibi videtur ac sordidus, nisi parietes magnis & pretiosis orbibus refulserunt; nisi vitro absconditur camera.* Vopiscus mesme tesmoigne que l'Empereur Aurelian auoit fait couvrir de verre les principales pieces de sa maison, disant, *nam & vitris quadraturis bitu-*

mine inserto domum induxisse perhibetur. Le verre d'ailleurs est doué de telle pureté, & netteté en sa substance, que les Roys mesme le preferent aux vases d'or & d'argent. & lisons dans Pausanias, que les sacrifices, qui se faisoient au temple de Iupiter en Menale, estoient en des vases de verre: car ce qu'il appelle *κύλικες ὑαλινῆς*, est ce que Martial appelle *calices vitreos*. Nous apprenons aussi du Iurif. *in l. S. i. ff. de supel. leg.* que les anciens Romains, vsoient de plats de verre, pour seruir sur table les viandes. Mais Claudian dit, qu'Archimedes faida du verre, en vn subiect bien plus noble: Car il en fit faire vne Sphere admirable, qui representoit à l'œil le cours du Soleil, & de la Lune, & les conuersions des astres, ce qu'il n'eust peu faire si facilement, de toute autre matiere.

Et faut que nous confessions, que nous ne lisons iamais l'histoire de ce Verrier excellent, & miserable tout ensemble, descrite par *Ioh. Saresberiensis liu. 6.* comme l'ayant empruntée de *Petronius*, & dont fait aussi mention *Pline liu. 36. ch. 26.* que nous ne blasmions quant & quant, & avec passion vehemente, ceste barbare cruau-

TRENTE-VIETIESME
té de l'Empereur Tibere, qui le fit mourir,
pour faire aussi mourir avec luy, l'art ad-
mirable, qu'il auoit apprins, de rendre le
verre, ferme & malleable, comme le cui-
ure: Car si ceste inuention eust esté com-
muniquée & apprinse, c'eust esté pour en
receuoir vne des plus grandes commodi-
tez, que l'on eust peu souhaiter. L'Empe-
reur Theodose, ne luy a pas ressemblé en
cela, car pour exciter les Verriers à enri-
chir leur profession, par belles inuentions,
il les honora de l'exemption, & immunité
de la plus-part des charges de la Republi-
que, comme il se voit *in l. 2. C. Theod. de pri-
uileg. artif.*

Mais si cest art, dira quelqu'un, ne de-
roge point à noblesse, d'où vient qu'au-
tresfois quelques Gentils-hommes de
Champagne, demanderent au Roy Phi-
lippines le Bel, qui fut le premier Roy Com-
te de ceste Prouince, lettres de declara-
tion à cest effect? Et qu'à leur exemple,
tous les verriers des autres Prouinces, en
ont obtenu de semblables des Roys qui
ont suiuy? Certes nous n'estimons, que ce-
la ait esté fait pour vilité aucune, qui fust
en cest exercice: mais bien à cause du
Trafic, & du gain qu'ils en faisoient, ce

qui a esté tousiours treuue mal-seant à la Noblesse : Et pour raison dequoy , force leur a esté d'obtenir ceste dispense , laquelle ne leur a oncques esté refusée, soit en consideration du merite de l'art , ou pour ce que les Nobles , qui s'y adonnoient n'auoient autre moyen de viure , & entretenir leur familles , que du trafic qu'ils en faisoient. Comme en semblable occasion, en vsa le Roy Henry deuxiesme à l'endroit des Inuiguteurs & Cadets de Bretaigne , qui pour estre excluz , par la rigueur des loix de leur pays, des successiōs de leurs parens , ils estoient contrainsts se faire Procureurs, Notaires, & Chastelains de leurs freres aisnez. Et fit sa majesté donner Arrest en son Conseil priué, & expedier lettres Patentes sur iceluy , de l'an cinq cens quarante huiet, par lesquelles il declara sa volonté estre , que la profession qu'ils feroient de ces Offices, bien qu'abieets & mechaniques, ne leur pourroit estre imputée, pour les troubler en la iouyssance des priuileges de Noblesse.

Ces choses ainsi premises , ceste cause sera fort aisée à iuger : car en tant que touche la personne de l'opposant , il nous a faiet voir vn Arrest, de l'an quatre vingts

deux, par lequel son pere fust déclaré exempt de la taille, en qualité de Gentil-homme verrier, apres neantmoins auoir iustificié qu'il estoit extraict de noble & ancienne lignée. Et outre ce, il nous a communiqué vne enqueste faicte avec les deffendeurs, par laquelle il iustifie sa filiation.

Et quant à la marchandise de verrerie, qui a esté saisie par le fermier de l'imposition nouuelle, & dont l'opposant aussi demande main-leuée, Il estoit certain qu'elle est exempte de tous subsides; fors & excepté le verre, qui nous est apporté du dehors du Royaume, qui est subiect à l'imposition foraine suyuant l'Edict de l'an 1541. semblable à celuy que fit autre fois l'Empereur Aurelian, par lequel au rapport de Vopiscus, il ordonna, que le verre qui seroit apporté d'Alexandrie à Rome, payeroit le tribut, *vectigal inquit ex Aegypto urbi Romæ Aurelianus vitri, chartæ, lini, stupæ, atque analobicas species æternas constituit*, mais pour le regard des impositions nouuelles, dont est question en ceste cause, il est raisonnable d'en exempter le verre, d'autant qu'il n'est compris aux declarations & pencartes des marchandises subiectes à icelles, suyuant en

cela la disposition de droit, *in l. f. 9. species ff. de pub. vect. & comm.* En secõd lieu, pour ce que de tout temps ceste marchandise a esté tenuë exēpte, & y a esté conseruée, par plusieurs lettres Patentes verifiées en ceste Cour, & finablement pour le merite d'icelle, & que son prix ne consiste qu'au seul artifice, subiect encores au fracas & au bris, à la moindre rencontre : Ce qu'exprime fort bien Martial, *epig. 115.* disant,

Aspicias ingenium Nili, quibus addere plura

Dum cupit, ah quoties perdidit auctor opus!

Ioint aussi, qu'en tout le plaidoyé des defendeurs, nous n'auons rien remarqué, surquoy on puisse faire force au contraire, sinon en ce qu'ils ont dit, que l'opposant ne se pouuoit preualoir de ladiète dispense & priuilege, ny pour luy ny pour ladiète marchandise, pour n'en auoir prins confirmation du Roy à present regnant.

Et de vray, c'est vne commune obseruance de ce Royaume, que les priuileges se doibuent confirmer de reigne en reigne, ainsi mesmes qu'il se practiqua à Rome, suyuant la loy, qu'en fit tout exprés l'Empereur Tibere, dont toutesfois, les bons Empp. souloient descharger leurs subiects, en les confirmant par vn Edict

general, dès l'entrée de leur reigne : comme Suetone nous en donne vn exemple in Tito, disant, *natura autem beneuolentissimus, cum ex instituto Tiberij, omnes dehinc Casares beneficia à superiorib⁹ cōcessa Principibus, aliter rata non haberent, quàm si eadem ijsdem & ipsi dedissent, primus præterita omnia confirmauit edito, nec à se peti passus est.* Pline le Jeune nous en donne vn autre exemple celebre, par vn Edit de l'Empereur Nerua inseré apres l'Epistre 66. du liu. 10. duquel nous auons extraict ce qui s'en suit, comme tres-digne de remarque : *satis est cùm hoc sibi quisque ciuium meorum spondere possit, me securitatem omnium quieti meæ prætulisse : ut & libenter noua beneficia conferrem & ante me concessa seruarem, &c. Nolo existimet quisquam quæ alio principe vel priuatim vel publicè consecutus, ideo saltem à me rescindi, ut potius mihi debeat, si illa grata & certa fecero : nec gratulatio ullius instauratis eget precibus. Et qui non habent, me quem fortuna imperij vultu meliore respexit, nouis beneficijs vacare patiantur, & ea demum sciant roganda esse, quæ non habent.* Ce que nous auons bien voulu remarquer, pour monstrier, que sous vn bon Prince, comme est le nostre, ceste reigle ne doit estre interpretée si à l'estroit, que d'oster entie-

rement

rement le priuilege, pour n'y auoir obey, & n'auoir prins ceste confirmation.

Partant, nous consentons, qu'en tant que touche le premier chef des conclusions du demandeur, il soit dit, qu'à bõne & iuste cause, il s'est opposé à la taxe, qui a esté faicte de sa personne, aux roolles des tailles: & qu'il en sera rayé & biffé, avec deffenses de l'y comprendre à l'aduenir, sous pretexte de l'exercice qu'il fera de l'art de verrerie, si ce n'est, que d'ailleurs il fist actes derogens à Noblesse. Et pour le regard du second chef, concernant la saisie faicte de ladiète marchandise, pour le payement de l'imposition nouuelle, que main-leuée luy en soit faicte, avec pareilles deffenses audit Fermier, & à tous autres, d'exiger aucune chose sur ladite marchandise de verrerie, sur peine de concussion: & neantmoins requerons, estre enioinct audit demandeur, d'obtenir du Roy lettres de confirmation dudit priuilege & dispense dedans trois mois, sur peine de descheance d'iceluy.

Ce que la Cour confirma, pour le regard du second chef, mais auant que iuger le premier elle voulut voir au Conseil, les pieces iustificatiues de la Noblesse & filia-

tion du demandeur, & depuis elle luy ad-
 iugea ses conclusions, par Arrest du mois
 d'Aoust mil cinq cens nonante sept. Le
 semblable fust iugé depuis pour les Gen-
 tils-hommes verriers de Melun, par Arrest
 du mois de Septembre audit an. Et depuis
 encore pour les verriers de Charleu, Fon-
 taine, & de Thierarce en Picardie, par Ar-
 rest du mois d'Auril 1601. ensemble pour
 les Verriers de Princeaux, près Neuers, par
 Arrest du mesme mois & an. Et porte ce
 dernier Arrest, ceste restriction notable,
*sans qu'à l'occasion de l'exercice & trafic de ver-
 rerie, lesdits Verriers puissent pretendre avoir ac-
 quis degré de Noblesse, ny droit d'exemption : &
 aussi sans que les habitans des lieux puissent pre-
 tendre que les Verriers fassent acte dérogeant à
 Noblesse.* Ce qui a esté ordonné pour eiter
 à l'vsurpation de l'immunité que faisoient
 les mercenaires seruans aux verreries, &
 autres de condition roturiere & taillable.

XXXIX. PLAIDOYE'.

*Si les tailles sont réelles ou personnelles en
Guienne, & si on peut transiger pour
raison d'icelles.*

L'ABESSE, & les Religieuses du
Conuent de Prouillan lez Con-
dom en Guienne, ont interietté
appel, de ce que les deputez de
Condomois, en leur dernière recherche,
les ont taxez aux roolles de la taille, à la sô-
me de cinquante escuz, & ayant releué cest
appel au Parlement de Bordeaux, & inti-
mé les habitans de Condom, le Roy, pour
les considérations qui vous ont esté dites,
l'auroit euocqué en son Conseil, & ren-
uoyé en ceste Cour.

Les appellans se sont fondez sur plu-
sieurs moyens. Le premier que leur qualité
d'Ecclesiastiques, les exemptoit de tou-
tes tailles & contributions : Le second,
que le bien qu'ils possèdent, est le dot, &
ancien patrimoine de leur maison. Le

Ff ij

Troisiesme, qu'ils ont vne transaction de l'an cinq cens cinquante, faicte entre elles, & les intimez, par laquelle, il est nommément porté, qu'elles ne pourront estre taxées, à plus haut, qu'à dix liures par an, Le dernier qu'elles sont assistées d'un Arrest contradictoirement donné audict Parlement de Bordeaux, par lequel ceste transaction est confirmée.

Contre le premier, & le second moyen, les intimez repartent, & disent, que les tailles sont reelles en Condomoys, & que partant, ny la condition des personnes, ny la qualité des biens, & heritages n'estoit considerable, par ce qu'il n'y a que les biens Nobles, & Feodaux qui en soient exempts. Au troisiesme, qu'on ne pouuoit transiger pour raison de la taille, pour ce qu'elle faisoit part du droit public; Et au dernier, qu'ils auoient incidemment obtenu requeste ciuile, contre ledict Arrest fondée sur precipitation.

Nous auons donc, pour faciliter le iugement de ceste cause, à examiner la verité & iustice, de ces quatre moyens & articles. Quant au premier, il n'y a point de doute que les Ecclesiastiques, ne soient francs, quittes, & immunes de toutes charges, &

contributions, comme souuent nous l'auons discouru en ce lieu, & specialement ceux & celles, qui delaiſſans les delices du monde, se sont captiuez d'eux-mesmes, sous le joug austere des loix claustrales, pour vacquer aux prieres & meditations enuers Dieu.

Car nous n'estimons point, qu'il y ait prudence ny force au Conseil, & aux armées des Roys bastantes pour conseruer l'heur de leurs Estats, si elles ne sont assistées des prieres enuers Dieu, signamment de ces personnes sequestrées, que Saluian appelle *sanctos Dei* li. 8. *de guber. Dei*, & leurs monasteres, *officinas virtutum*, apres saint Ambroise *lib. 10. epist. 82.* C'est pourquoy saint Bernard parlant de ses ames deuotes disoit, *civitatem custodiunt isti vigiles.* Et l'Abbé de Ferrieres *epist. 45.* rendant compte au Roy Charles qui viuoit lors des saintes occupations de ces Religieux, luy escriuoit en ces termes, *qui indefinenter vobis in diuersa occupatis, pro salute ac prosperitate vestra excubant.* Constantin mesme l'aduouë quand il dit *in l. 16. C. Theo. de cleric. & Episc. rempublicā magis Religionibus, quā officijs, labore & sudore corporis contineri.* Et l'Ecriture sainte nous le confirme assez, par le recit,

qu'elle nous faict des victoires, que remporterent les Israélites, pendant que les mains de Moyse estoient tenduës au Ciel: & des pertes qu'ils souffroient, quand il les laissoit pendre en terre.

C'est donc la moindre recognoissance, que le public doibue à ces saintes personnes, que les tenir libres, & exempts de ces charges temporelles, & seruiles: aussi vous avez veu, que les intimez ne les desaduoient point, mais ils disent, que les tailles estans reelles en Condomois, la qualité des personnes n'estoit considerable.

Or combien, que ceste question, sçauoir si les tailles en Guienne, spécialement en Condomois, estoient reelles ou personnelles, ait esté pour l'importance d'icelle en mesme occurrences, appointée au conseil, & que comme estant de faict, la decision d'icelle depende des enquestes, qui en seront faictes, en vertu des Arrests cy-deuant donnez. Neantmoins pour l'esclarcissement de la cause & autres qui se pourront presenter cy-apres, nous dirons ce que nous en auons appris par les liures.

Dion au 54. & autres historiens nota-

bles, disent que l'Empereur Auguste ayant diuisé la Gaule nouuellement conquise par son deuancier, en quatre parties, & aduancé l'Aquitaine iusques à la riuere de Loyre, il imposa sur icelles, le tribut que Ciceron 3. *orat in Verrem*, appelle *uictoria premium*, & *pœnam belli*, voulant neantmoins, que celuy qui se leueroit sur la prouince Narbonnoise fust réel, & celuy qui se leueroit sur les autres, fust personnel.

La raison de ceste diuersité fut, ou pour ce que le tribut, que payoient les habitans de ces Prouinces, aux Roys & Seigneurs qui leur commandoient auparauât, se leuoit de ceste sorte, ce que les Romains ne souloient gueres changer, comme on en voit vn exemple en ce mesme lieu de Ciceron, disant. *In Sicilia ciuitates ex agris decimas pendunt populo Romano, quemadmodum olim Hieroni regi pendere consueuerant*; Ou pour ce que ceste Narbonnoise, s'estoit reduite quelque temps deuant les autres, sous l'Empereur, comme le discours Velleius Patercul. *lib. 1. Histor.* apres toutesfois auoir faict paroistre la force de leurs armes, & grandeur de courage, pour raison dequoy ils furent grandement pri-

sez & honorez des Romains, iusques à en faire leur principale colonie, & forteresse, contre toutes les nations voisines, comme le mesme Ciceron le tesmoigne *orat. pro Fonteio*, disant, *Est in ea provincia Narbo Martius colonia nostrorum ciuium, specula populi Romani ac propugnaculum istis ipsis nationibus oppositum & obiectum.*

A ceste occasiō donc, ceste Prouince fust traittée plus fauorablemēt, & renduë semblable à l'Italie en tous ses droicts & prerogatiues, comme nous en lisons encores les marques *in l. f. ff. de censib.* car toutes les Prouinces conquises, ne furent traittées de mesme sorte, ce que designe Siculus Flaccus au commencement de son traitté, *de condit. agror.* disant, *leges itaque pro suo quisque merito acceperunt.* Or est-il qu'en ce temps-là, le cens ou le tribut ordinaire, qui se leuoit en Italie, estoit reel; & se nommoit *iugatio.* ainsi qu'il se lit *in l. 1. de quib. muner. vel præstat. lib. 10. C. l. 1. de suscept. od. lib.* & en cent autres lieux, comme mesmes il souloit estre anciennement en la pluspart des grandes & celebres Monarchies, ainsi qu'Herodote *lib. 2.* nous recite parlant de Sesostris Roy d'Égypte, lequel diuisa entre ses subiects tout l'héri-

rage de son Royaume, par portions esgales, à fin qu'ils luy en payassent aussi tous les ans vne redevance semblable. Et d'autant que les debordemens incertains du Nil prenoient tantost plus sur l'un, tantost moins sur l'autre, il institua des Mesureurs & Arpenteurs, qui luy rapportoient par chacun an la mesure de toutes les terres labourées, à fin de departir & proportionner plus iustement son tribut; Le mesme Herodote dit, que Darius fit le semblable en la Perse, & Thucydide aussi escrit, que les Tyrans qui occuperent la ville d'Athenes, en firent ainsi, & leuerent la vingtiesme partie des fruiçts prouenans au territoire d'icelle.

Mais retournans aux Romains, Tite Liue, & les aures historiens tesmoignent, que la capitation fust ostée, par le Roy Sextus Tullius, *instituto censu*; Et ores que long-temps depuis, & par interualles, elle fust remise, comme nous le voyons *in l. f. §. penult. ff. de muner. & honor. in l. etatem ff. de censib. l. cum antea C. de agric. & censit.* Dont l'Empereur Constantin exempta les habitans des villes *l. vnica C. de capit. ciui. censib. exim.* si est-ce que ceste prouince Narbonnoise retient tousiours ceste

forme des cens réel , sans auoir oncques souffert ceste capitation, comme beaucoup plus fascheuse & seruile.

Et quant aux trois autres parties de la Gaule , pour ce qu'elles resisterent , par l'espace de neuf ans , contre les armes de Iules Cæsar , Auguste voulut que le cens, qui se leueroit sur icelles, fust personnel, en signe de subiection plus grande , voire d'ignominie. Ce que ledit Paterculus designe clairement, disant, *Caïj Cæsaris ductu auspiciisque infraëta Gallia pæne idem quod totus terrarum orbis ignauum conferunt tributum.* Et auant luy , l'auteur de l'Epitome de Tite Liue, *cum Augustus (inquit) conuentum Narbonæ ageret, census à tribus Gallijs quas Cæsar vicerat, actus.*

Lequel cens fust aussi leué si seuerement, par vn Licinius commis à cest effet, qu'il ne leur laissa rien derriere , iusques à se rendre si insolent, que nonobstant que le cens se leuast tous les mois, il en voulut compter quatorze, en l'an, disant que Decembre n'estoit que le dixiesme , & que les autres s'appelloient Augustes , dont ayant esté accusé deuant l'Empereur , il le mena en sa maison , où luy monstrant les grands tas d'argent, luy fit croire, qu'il

les auoit assemblez pour affoiblir les Gaulles, & que les ayant gardez à ceste intention, il luy en faisoit lors vn present, ce qui fust cause de la reuolte d'aucuns Gaulois, & de l'ésmeute des Sicambriens, dit Dion.

Mais quoy qu'ils fissent, si ne peurent-ils empescher, qu'on ne retint tousiours sur eux ceste forme de cens personel, comme nous en voyons le tesmoignage dans Ammian Marcellin *lib. 16.* ou parlant de l'Emper. Iulian il dit, *quàm profuerit anhelantibus extrema penuria Gallis, hinc maxime claret quod primitus partes eas ingressus pro capitibus singulis tributi nomine videnosquinos aureos reperit flagitari, discedens verò septenos tantum munera vniuersa complentes.* Et combien que ceste charge fust personelle, si ne laissoient-ils pas pourtant, de prendre par description tous les lieux, ce qu'ils appelloiēt *censum agere*, à fin que l'assiette se fist plus iustement, & à raison des biens & facultez d'vn chacun.

Du nombre donc de ces Prouinces subiectes au cens personel, fust l'Aquitaine, & par consequent la Guienne & Condomois qui en faisoit part, selon la diuision d'Auguste, & dont la principale ville estoit Bordeaux qui se nommoit Aquita,

à cause de l'abondance de ses eaux : car le nom qui luy a esté donné de Burdigala, est recent, & ne se trouue en aucun auteur plus ancien que Strabon, l'appellant ainsi, *quasi diceret Burgum Gallorum.*

Et ores que toutes ces prouinces, receurent depuis de grands changements, sçauoir est la Narbonnoise par l'occupation qu'en firent les Visigots, & qui n'en furent chassez, que cinq cens ans apres qu'elle fust conquise par les Romains. Et les trois autres par l'establissement des Roys François, neantmoins il semble que comme ils retindrent les mesmes loix & coustumes, qu'ils auoient auparauant, qu'aussi ils obseruerent tousiours la mesme forme qu'ils auoient accoustumé, pour le payement de leurs tributs.

Nous lisons bien dans noz anciennes Chroniques, vn Edict faict par Clotaire fils de Clouis premier, par lequel il ordonnoit que les Eglises apporteroient à la recepte Royale, le tiers des fruiçts de leurs heritages, dont on pourroit inferer qu'en ce temps là, les tailles estoient reelles, par toute la France, mais la reuocation qui en fust aussi tost faicte, par l'entremise & remonstrance de l'Euesque de Tours nom-

mé Iniuriosus, comme d'une chose nouvelle & inaccoustumée, nous doibt suader le contraire; Comme le semblable se doit dire d'un autre ordonnance du Roy Childebert contenant que tout propriétaire payeroit pour chacun arpent de vigne vne amphore, qui estoit selon l'aduis de Budée, la huitiesme partie de nostre muid de Paris: car ceste charge fust treuuee si estrange & nouvelle, que le peuple fust quasi aux termes de se ruer sur Marc referendaire de ce Roy, qui auoit charge de faire ceste leuée: il se saisit neantmoins de tous ses registres, & les mit au feu: Aussi que Fredegonde ayant recogneu que depuis l'establissement de ceste leuée, les mal-heurs s'alloient multiplians sur ses enfans, & toute sa maison, fit tant quelle fust abolie, & tous les registres brulez.

Mais pour monstrier que le cens ordinaire qui se leuoit lors en ces plus proches parties de la Gaule, fust personel, Gregoire de Tours le tesmoigne au discours de ce Roy, disant, qu'ayant enuoyé Florant grand maistre de sa maison, & Romul Comte de son palais en Poictou, renouuelier le papier des cens, que le peuple deb-

T R E N T E N E V F I È S M E

uoit payer, d'autant que plusieurs estoient morts, & toute la charge retomboit sur les veufues, & les Orphelins, à quoy ces Commissaires voulans pourvoir, rendirēt subiects à ce tribut ceux qui iustement le debuient payer, & deschargerent les pauvres & miserables personnes, ce qu'ils n'eussent fait, si ce cens eust esté reel, bien toutesfois qu'ils comprisent au cens, les heritages, voire, les precieux meubles, mais ce n'estoit que pour en faciliter le departement, & l'assiette sur les personnes.

Depuis ce tempslà, noz histoires font fort peu de mention de leuées des deniers sur le peuple, d'autant que les Roys se contentoient, de leur Domaine, ce consistant en Fiefs, droicts d'iceux, lots. ventes, quints & requints, rentes, censcs, vsages, droicts de iustice, amendes, confiscations, mainmortes, aubeines, monnoyes, eaux & forests, droicts de trauers, barrages & pontenages, l'esquels comme ils estoient lors entiers & non alienez, aussi suffisoient ils pour l'entretienement de la grandeur & majesté de leur Estat. Toutesfois *Aimoinus lib. 4. cap. 116. & 117. & lib. 6. cap. 31.* parlant de Charlemaigne, fait mention de trois assemblées generales qu'il fit fai-

re en diuers endroicts de ce Royaume, *in earumque singulis oblata sibi annua dona more solemni suscepisse*, qu'il y receut les dōs & presents qu'on luy souloit faire par chacun an, lesquels se pouuoient comparer *sacris istis largitionibus*, qui se faisoient aux Empp. Romains, & dont est fait mention *in l. 2. C. de ijs qui ex public. rat.* Et en tout le tiltre, *de Cano. largit.* & lesquels se leuoient aux Prouinces, par la mesme forme & maniere, qui leur estoit plus commune & familiere, pour la leuée de leurs autres tributs.

Il faut neantmoins que nous aduoüions, que les tailles & autres leuées de deniers, n'ont esté certainement réglées aux derniers siecles, que iusques au regne de Charles septième : car nous apprenons de noz mesmes histoires, que Loys le Ieune en l'an mil cent soixante & sept, leua vne vingtiesme partie de tout le reuenu de son peuple, par l'espace de quatre ans, Philippes le Bel la centiesme, autresfois la cinquantesme ; le Roy Iean la vingtiesme, & sur ceux qui n'auoient ny cens ny heritage, dix escuz pour teste, Charles 5. mit sus le Fouage, qui estoit de quatre liures pour feu aux villes, de dix sols aux champs. Bref nous ne voyons point qu'il y

ait eu reigle assuree pour la forme des tributs de ce Royaume, sinon que depuis ledit Charles septiesme lequel reduisit les tailles en forme de tribut ordinaire sur le peuple; Et voulut qu'elles fussent imposees sur les biens ruraux es Prouinces ou les tributs auoient de toute ancienneté esté reels, comme en Languedoc, & Prouence, & sur les personnes aussi es autres endroits, ou de tout temps ils auoient esté personnels, comme en tout le ressort de ceste Cour, & estimons que le semblable fut fait en la Guienne, veu qu'il ne se treuve aucun Edict ou Ordonnance, parlant de la realité des tailles de ladiete Prouince, comme il s'en voit plusieurs de celles de Languedoc & de Prouence.

Nous lisons bien dans Froissard *lib. 1. c. 244. & 246*, que le Prince de Galles Duc de Guienne, voulut contre la coustume du pais, leuer vn franc sur chacun feu, dont il luy en prit mal, pour ce que c'estoit vne chose nouuelle. Et ce qui confirme nostre opinion, est, que par la representation des roolles des tailles qu'ils imposet en la Guienne, nous auons veu qu'ils sont bien differets des Cadastres & Compoix de Languedoc & Prouence, pour ce qu'en ceux-cy
les

les choses sont imposées & en ceux-là les personnes. Et combien qu'il y ait en consideration de tels & tels biens, si est-ce, qu'on ne peut pas en inferer vne realité, ainsync nature mixte, comme és tailles du Daulphiné, au rapport de *Guido Pape*, en sa decision 87. & autres suyuanes, où il dit que les Nobles, & les Ecclesiastiques en sont frâcs & immunes. Encores n'y a-il qu'és Bailliaiges de Condomois, Basadois, & Angenois où ils meslent par leurs roolles les choses avec les personnes, car au reste de la Guienne ils imitent noz formes.

Mixte.

Toutesfois nous remettrons l'entiere resolution de ces doubtes à l'ouuerture des enquestes, qui s'en font de l'ordonnance de la Cour, car en ces matieres on doit principalement regarder, *quod est in consuetudine* comme dit Barto *in l. unic. C. de mulierib. & in quo loc. mun. lib. 10. C.*

Mais à fin, que ceste cause se puisse iuger, nous concederons pour ce coup aux intimez, que les tailles sont réelles en Condomois, si n'estimerons-nous pourtant, qu'ils ayent peu imposer les appellantes pour raison des biens qu'elles possèdent, & qui sont à leur adueu mesmes, de l'ancien dot & patrimoine de leur monastere, fondé jadis par

réelles en Condomois

les Roys d'Angleterre & Ducs de Guienne. car encores que ce ne soient biens nobles, & feodaux, ains de condition roturiere, si est-ce que pour estre le dot de l'Eglise, il doit demeurer franc, exempt & immune de toutes tailles.

Les loix diuines & humaines, ont faict deffenses de construire & edifier Eglises sans les doter de reuenu suffisant pour les reparer, nourrir & entretenir ceux qui les deseruent, comme il est dit *in C. nemo. de consecr. distinct. 1. C. antep. extra, de consecrat. Eccles. vel alt. & in auth. ut nemo fabricet orat. domos.* Et ce reuenu là pour estre dedié & consacré à l'usage & exercice des saincts & sacrez mysteres de la religion, est-il pas raisonnable qu'il soit exempt des charges & seruitudes profanes, comme il est traicté *in l. placet C. de sacros. Eccl. & in auth. item nulla communit. de Episc. & cleric. c. 1. de censib. C. non minus, de immunit. Eccles.* à quoy se peut approprier ce que dit Ciceron, bien que Payen, en ce beau lieu de l'oraison de *Aruspici. resp. si minus (inquit) iure ciuili præscriptum est, lege tamen naturæ, cōmuni gentium iure sancitum est, ut nihil mortales à dijs immortalibus usucapere possint.*

Et en cela est distingué le reuenu do-

tal de l'Eglise, d'auec les autres biens tribu-
 taires par elle acquis depuis sa fondation:
 car ceux-cy doibuent payer la taille, & *trā-*
seunt cum suo onere : mais ce bien dotal, par le
 propre merite de ce à quoy il est vouié, est
 rendu sacrosainct & inuiolable, ce qui est
 conforme à ce qui fust arresté *in concilio*
Vormaticensi cap. 50. en ces termes, *sancitū est,*
ut unicuique Ecclesiæ unus mansus integer absq;
alio seruitio attribuatur, ce qui est mesmes re-
 peté aux capitulaires de Charlemaigne *lib.*
I. art. 91. & *in leg. Franc. lib. I. cap. 85.* & appel-
 lent *mansum*, ce que deux bœufs peuuent
 labourer par an, de sorte que si l'Eglise n'a
 esté dotée dès son commencement, & que
 tous les biens qu'elle possède soient d'ac-
 quisition & de condition roturiere, on doit
 defalquer du total ce *mansum*, & le tenir
 franc & quitte de toutes charges, qui est
 l'obseruance commune des Prouinces où
 les tailles sont réelles. D'où nous inferons
 donc, le peu de raison qu'ont eu les intimez
 d'auoir comprins en leurs roolles les appel-
 lantes à cause de leurs biens, veu qu'ils ne
 monstrent point que ces biës là ayent onc-
 ques esté imposez, & qu'ils demeurent
 d'accord que c'est l'ancien patrimoine de
 leur fondation.

Quant à la transaction, que ces appel-
lantes alleguent, pour vn autre fondement
de leur appel, pretendans que par icelle,
les intimez leur ont promis ne leur deman-
der à l'aduenir que la somme de dixliures
par an; Il est certain que si leurs biens e-
stoient taillables, elle ne leur pourroit ser-
uir d'aucun tiltre vallable, d'autant que
par l'ordonnance du Roy Charles 8. de
l'an quatre cens quatre-vingts trois art. 16.
faicte pour le reiglement des tailles récl-
les de Languedoc, toutes transactions, pa-
ches, conuentions & coustumes faictes
ou à faire portans exemption de tout ou
de partie de la taille, sont cassées & annul-
lées, ce qui est conforme à la disposition
de droit *in l. vacuatis C. de decurio. l. 1. ff. de
decret. decurio. l. vnica, de immunitat. nem. con-
ced. l. immunitatem C. de agric. & cens.* lesquel-
les sont toutes fondées sur ce qu'il n'appar-
tient qu'au Prince de descharger vne per-
sonne ou vn heritage de la taille. Et que
d'ailleurs les tailles faisans part du droit pu-
blic, on ne pouuoit-y preiudicier par pa-
ction priuée.

De sorte que combien que le docteur
Accurse sur la loy *inter debitorem*, la loy, *epi-
stola §. pactum ff. de pactis*, tiennne qu'ores que

telles conuentions soient nulles pour raison du Fisque, neantmoins elles doibuent estre entretenües pour le regard des parties, si est-ce que le contraire a esté de tout temps obserué en ceste Cour, pour les raisons susdictes, si ce n'est qu'une communauté eust promis à quelqu'un, pour ses seruices publics, payer la taille pour luy, comme il a esté autresfois iugé pour des medecins. Mais puisque la qualité & condition des biens des appellantes les affranchit assez du payement de la taille, ceste transaction leur estoit inutile: toutes-fois puis qu'elle a esté faicte & entretenüe depuis cinquante ans, n'estant rien suruenü de nouveau qui luy soit contraire, il est raisonnable qu'elle soit aussi gardée & obseruée pour l'aduenir.

Quant à la requeste ciuile obtenuë, contre l'Arrest du parlemēt de Bordeaux, par lequel il est dit qu'en payant par les appellantes dix liures par chacun an suyuant ladite transaction, elles seroient deschargées du surplus de leurs taxes, nous ne voyons point que la Cour s'y doibue aucunement arrester, tant pour ce qu'il ya plusieurs années que cest Arrest a esté donné, & que les Intimez l'ont executé sans

sen plaindre qu'à present, qu'aussi pour ce qu'il fust donné contradictoirement en l'audiéce publique, qui ne se tient és Cours souueraines, *nisi stata vel condicta die*, & apres auoir ouy Messieurs les gens du Roy qui remonstrentent amplement le merite de la cause.

Nous estimons donc que conuertissant par la Cour, l'appel en opposition, il doit estre dit, qu'à bonne & iuste cause lesdites Abesse & Religieuses se sont opposées, & en ce faisant, qu'elles seront rayées & biffées des roolles & compoix de la ville de Condon, en payant neantmoins la somme de dix liures par chacun an, suyuant l'Arrest de Bordeaux, & sur la requeste ciuile, que les parties soient mises hors de Cour & de procez. Ce qui fust prononcé par la Cour, au mois de Mars, 1597.

XL. PLAIDOYE.

Sur l'annoblissement d'une mestairie roturiere en Bretagne, & que cela ne s'est peu faire sans indemniser la parroisse où elle est assise.

LE Roy pour recognoistre les longs & loüables seruices du Sieur de Brezelles Conseiller au Parlement de Bretagne, à annobly & erigé en Fief vne sienne mestairie, sise en vn village près de Reines, & à cest effect, luy en a octroyé ses lettres Patentes, qui ont esté enterinées tant au Parlement, que chambre des Comptes dudit pays, avec ceste clause, *sans tirer à consequence.* A l'execution desquelles lettres, & Arrests de verification, les habitans de la parroisse où est située ceste mestairie s'y seroient opposez. Et d'autant que sa majesté a pour le present interdict audit parlement la cognoissance des finances & tailles, ledit Sieur de Brezelles auroit prins commission de ceste Cour, comme

Gg iij

Q V A R E N T I E S M E .

de la principale entre toutes les autres pour telles matieres , à fin d'y faire appeller les oppofans pour y deduire leurs caufes d'oppofition. Lesquelles comme vous auez entendu par le discours de leur Aduocat, fe refoluent en vn feul point, qui eft que le demandeur ne peut & ne doit iouyr de l'ef- fe&t de fes lettres, iufques à ce qu'il les ait fait descharger de deux feux, que fouloit porter ladi&te meftairie ; Le demandeur au contraire dit qu'il ne leur appartient de s'oppofer à la volonté du Roy, ny de controoller fa liberalité, & au demeurant que fes lettres ont e&té verifiées purement & fimplement. C'eft le different que vous auez à iuger.

Pour ledit Sieur demandeur, fait que ceste faueur qu'il a reçu du Roy, eft d'autant moins fubie&te à l'enuie de fes parties aduerfes, qu'elle eft, & a e&té de tout temps commune & ordinaire, noz liures eftans pleins de concessions fait&tes d'heritage avec pleine immunité, à ceux qui auroient bien merité du public. Ciceron le refmoigne *lib. 2. de natura deor.* parlant de Publ. Vatinus, lequel pour fes merites à *senatu agro donatus & vacatione.* Et Valere *lib. 1. cap. 8.* parlant de *Gneus Martius Corio-*

lanus, qui à Posthumus Cominius Conf. donis militari-
bus & agris cētum iugeribus, & ornatus equis
donatus, Tite Liue lib. 2. le dit aussi de Ga-
ius Mutius, cui virtutis causa trās Tiberim agrum
dono dedere, & Seneque lib. 7. de benef. dit à
cette occasion, *donum istud amplissimum fuisse*
Imperatorum, ac fortium ciuium. De faict nous
lisons dans les mesmes auteurs, que Cor-
nelius Sylla, & Auguste ne recogneurent
les seruices de leurs vieux Gens-d'armes
que par semblables faueurs.

Et est de ces heritages francs & priuile-
giez dont entend parler Ciceron *orat. con-*
tra Rullum, les distinguant d'auec les autres,
en ces termes : *optimo iure prædia sunt, quæ*
sunt optima conditione, libera meliore conditione
quàm serua, soluta quàm obligata, immunia quàm
ea quæ pensitant, mais cela se recognoist bien
plus particulièrement dans Sículus Flac-
cus, au traicté qu'il a faict exprés, *de condit.*
agror. où il dit au chap. *de diuisis & assignatis*,
que les Empereurs souloient conseruer in
eorum sanctuario, le registre & commentaire
de telles concessions, & si qua (dit-il) benefi-
cio concessa, aut assignata colonia fuerit siue in
proximo, siue inter alias ciuitates in libro benefi-
ciorum adscribemus; Ce que Lampride cōfir-
me in Senero, & plusieurs autres Historiens.

Bref tous les Fiefs que nous voyons aujourdhuy par la France, l'Alemaigne, l'Eſpaigne & l'Italie, tenants leur origine de la ſeule volonté & diſpoſition des Princes ſouuerains, ſont-ce pas autant de teſmoignages de pareilles graces & faueurs? c'eſt pourquoy vn ancien appelloit le Fief, *τετρακόνκλημα*.

Mais ce qui doit faire plus de force en ceſte cauſe contre les oppoſans, eſt que ceſte grace qu'il a reçu du Roy ne va qu'au ſeul tiltre d'honneur, & ſans aucun profit & emolument, eſtant notoire à vn chacun, que les maiſons & heritages tenus en Fief & à hommage, ſont beaucoup plus chargez & obligez que les roturiers: Car outre l'eſtroitte obligation, dont le Vaſſal eſt lié par la forme de ſa foy, de ſeruir ſon Seigneur à toutes occaſions, de la renouuerer avec vne demiffion, preſque ſeruite à toutes mutations, & luy en payer les reliefs: Il y a encores vne infinité de cas, qui le rendent ſubiect à commiſe & conſiſcation, comme on peut voir aux tiltres *de noua forma fidel. & quib. mod. feud. amitt. in uſib. feudor.* Là où l'heritage roturier, n'eſt tenu que du cens reel enuers le Seigneur, & nullement obligé à aucunes charges

personnelles & serviles, & dont le propriétaire peut dire, *sibi ipsi & non alteri viuere & mori. l. quod traditum l. non ea l. sub diuersis ff. de condit. & demonstr.*

C'est pourquoy, il ne s'est point veu iusques aujourdhuy, qu'aucune communauté se soit opposée à telles infeodations, ny qu'une action semblable ait esté oncques assistée du suffrage public, veu que tant plus il y a des fiefs & benefices, il ya aussi d'autant plus de personnes obligées à seruir & secourir l'Estat, principalement aux necessitez de la guerre, à ceste occasion le Poëte lib. 8. *Ligurini* alloit disant,

*Publica militiæ vassallus munera iustæ,
Non renuat, domini quæ libes in castra vocatus
Aut aut, aut alium pro se submittat iturum
Arbitrio domini*

Ioint à ce que dessus que les Nobles, les Ecclesiastiques & les Conseillers du Parlement sont exempts de toutes tailles & fouïages, comme il est porté par la coutume de Bretaigne art. 292. & de l'ancienne art. 688. & par les ordonances de François dernier Duc, & du Roy Loys douziesme. Si qu'estant le demandeur extrait de noble famille, & Conseiller audit Parlement, comme les opposans le reco-

Q U A R A N T I E S M E

gnoissent, quel subiect peuuent-ils auoir de luy demander indemnité?

Aussi que les graces & faueurs, que conferent les Princes, doiuent estre tousiours prises & interpretées benignement & pleinement, tant en consideration de l'a grandeur & majesté du Prince dont ils partent, que pour ce que le public a interest de les entretenir, comme estant vne semonce honorable à vn chacun de les meriter par belles actions. c'est pourquoy vn de noz Iurisconsultes disoit, *beneficium Imperatoris, quod diuina eius indulgentia profiscitur, quàm plenissime interpretari debemus.* de mode que de vouloir astringre ledit Sieur demandeur à vne indemnité. ce seroit luy rendre ce benefice du Roy inutile & infructueux contre le vouloir de sa majesté.

Au contraire, de la part desdits defendeurs s'est peu dire, que par le droit des Gés, tous heritages estoient de cōdition roturiere & taillable, comme ayant esté autresfois le prix des, vaincœurs, lesquels les ont relaschez aux vaincus avec telle condition; Ce que discourt amplement ledit Siculus Faccus, & Appian *lib. i. ἰμφολίαν*, C'est pourquoy on a tousiours tenu ceste

teigle, pour commune & generale, *fundum sine censu vel reliquis comparari non posse*: car ces infeodations dont on vous a parlé, ne sont qu'une inuention moderne, excogitée par les Lombards, & depuis introduite parmy nous du temps seulement de Huë Capet: Et pour ce que ce sont autant de priuileges contraires au bien commun, & qui vont du tout à la ruine du peuple tributaire, & taillable, il faut en arrester le cours, & les restreindre le plus que l'on pourra.

Ce qui se doit principalement observer en la Bretagne, tant pour les grandes levées de deniers qui s'y font, que pour ce qu'il n'y a Prouince en tout le Royaume. où il y ait plus de Fiefs, & maisons Nobles qu'en celle là, ce qui est aduenü autresfois à cause des longues & assiduelles guerres, que noz Roys presque depuis Charlemaigne, ont eu avec les Seigneurs d'icelle, & qui estoient obligez de recognoistre par vn tel moyen les nobles de leur Prouince, comme noz histoires le tesmoignent.

Et est l'importance de ceste cause, en ce, que toutes les maisons nobles & seodales de la Bretagne, sont exemptes

Q V A R A N T I E S M E

du Foüage, qui est le tribut ordinaire qui se leue audit pays, & qui est ainsi appellé, pour ce qu'il se prend pour chacun feu & maison *ad instar* de celuy qui se leuoit souz l'Empereur Nicephore, & que Cedrenus & Zonare appellent *καπνικόν*, *fumarium*, vnde & *καπνολογέιν*, *focos describere*, comme il se lit en vne certaine constitution de l'Emp. Michaël Connenus, qui est vne espee de tribut réel, & qui approche de celuy que Ciceron *lib. 13. ad Atticum* appelle *ostiarium*, pour ce qu'il se leuoit *in singula domus ostia*.

L'interest donc des deffendeurs est notable, en ce que la mestairie dont est question, qui souloit par cy-deuant payer deux feuz en leur parroisse, sera aujourd'huy exempté par le moyen de ce priuilege, & sa charge reietée sur le reste, contre la reigle commune, qui ne permet que les vns soient molestez pour les debtes des autres.

Nous ne doubtons point que le Roy ne puisse gratifier de ses faueurs, qui bon luy semblera, & qu'il n'appartienne à personne de s'en formaliser: mais puisque sa majesté n'a dispensé le demandeur de l'indemnité qu'il doit à ladite parroisse, est-il

pas raisonnable qu'il s'en acquitte? Si le Roy en eust prins sur luy le deschet, & qu'il eust dedui& du foyage d'icelle la corte que souloit porter le demandeur, il n'y auroit aucun doubte: mais n'en ayant rien dit par ses lettres Patentes, il est à presumer qu'il a entendu que le demandeur l'indemnifast, comme nous voyons qu'il s'obserue tous les iours és annoblissemens, que le Roy faict des personnes.

Les exemples qui ont esté cottez des anciens Autheurs, & de nos Iuriconsultes, ne parlent en la pluspart que des exemptions des charges réelles, qui se donnoient aux personnes signalées, & qui finissoient avec leur vie, comme nous en voyons les marques *in l. sunt muner. ff. de vacat. muner. l. vnic. de his qui à Princip. vacat. l. munerum §. f. de muner. & honor.* mais il y a bien difference entre ce priuilege personnel, & l'exemption d'un heritage tributaire qui doit durer à iamais.

Ce qui a esté dit aussi de l'immunité des Nobles, & Conseillers dudit Parlement, n'est point considerable en ceste cause, pour ce qu'elle s'entend seulement du lieu où ils font leur continuelle demeurance, & non pour leurs maisons rurales & rotu-

QVARENTIESME PLAID.

rières, comme il se voit en l'ancienne coutume de Bretaigne, & en vn Edict du Roy Charles sixiesme de l'an mil quatre cens huit.

Ces raisons donc nous estans de plus grand poids & auctorité, nous concluons à ce qu'il plaise à la Cour, faisant droit sur l'opposition des deffendeurs, ordonner que le demandeur fera descharger dedans six mois ladicte parroisse de deux feuz, que souloit porter ladicte metairie, autrement & à faulte de ce faire, qu'il l'indemnifera en deniers, ou rentes, iusques à la concurrence de ces deux feuz. Ce que la Cour ordonna par son Arrest du mois de Decembre, 1600.

XLI. PLAIDOYE'.

*Si les mineurs sont exempts
de la taille.*

L'APPELLANT se plaint, de ce que les habitans de Montbrison ont mis à la taille son pupille. Et que s'y estant opposé pardeuāt les Esleuz de Forests, il a neantmoins esté par leur iugement'condemné à payer sa taxe, dont il a appellé, & fondé son appel sur la minorité de son pupille. Les intimez au cōtraire, disent que de tout temps, ils ont veu ceste coustume en Forests, & par tout le Lyonnois, de comprendre les mineurs aux tailles, & que ce qu'ils en ont fait, & les Esleuz apres eux, n'a esté que suyuant ceste ancienne obseruance *moribus vntium comprobata.*

Et certes si ceste cause n'estoit preiugée par plusieurs Arrests donnez sur mesme subiect, elle ne seroit sans doubte, d'autant que par la disposition de droit, les mineurs ne sont exempts que des charges

H h

pures personnelles, l. 8. ff. de munerib. & honor. l. 6. §. 1. ff. de decurio. l. 57. ff. de rei indic. & non des charges reelles, & patrimoniales Et appelle la loy, charge personnelle, *quæ corporibus, labore cum sollicitudine animi ac vigiliantia solemniter existit*, & la charge réelle, *in qua sumptus maxime postulatur*. l. 1. §. illud, ff. de muner. & honor. de sorte que selon ceste definition, nostre taille se consistant seulement. en prestation de deniers, & non en aucune fonction corporelle, il sembleroit qu'elle fust du tout charge patrimoniale, & que partant les mineurs n'en pourroient estre exempts.

Toutes fois nous auons obserué, qu'en ceste Cour on s'est plustost arresté à l'explication que donne Hermogenian de la charge réelle, qu'il dit estre celle, *quæ rei coheret* d. l. 11. c. de vacat. muner. & que de ce on a iugé la taille deuoir estre plustost reputée personnelle, pour ce que *personis indicitur, non rebus*, & qu'à ce moyen les mineurs en estoient exempts. Al'exemple de l'ancienne capitation des Romains, de laquelle, ores quelle s'imposast *ratione census*, comme faict nostre taille, les mineurs de vingt ans neantmoins en estoient exempts, & les filles viuants en virginité,

mesmes les anciēnes veufues; Ce que l'Emper. Valerian nous demonstre en vne loy digne de remarque, qui est la seconde du tiltre *de censu siue adscript.* au Code de Theodose, en ces mots *In virginitate perpetua viuentes, ut eam viduam de qua ipsa maturitas ætatis pollicetur nulli iam eam esse nupturā, à plebeia capitationis iniuria vindicandas esse decernimus. Item pupillos in virili sexu, usque ad viginti annos ab istiusmodi functione immunes esse debere.*

Ce qui ne se rapporte pas pourtāt à ce que dit le Panegyrique *de laudibus Constantini* parlant d'une remise faicte par ce Prince de ceste charge, & contribution, *remissione ista, inquit, ciuibus tuis dedisti vires, dedisti opes, dedisti salutem, & tum liberi parentes suos cariores habent, & mariti coniuges non grauati tuentur, & parentes adultorum non pœnitet filiorum, quorum onera sibi remissa latantur,* dont appert que les mineurs mesmes de vingt ans payoient la capitation,

Ce qu'Ulpian aussi tesmoigne *in l. 3. ff. de censib.* disant, *ætatem in censendo considerare necesse est, quia quibusdam ætas tribuit ne tributo onerentur, veluti in Syriis à quatuordecim annis masculi, à duodecim fœminæ, usque ad sexagesimum quintum annum tributo capitis obligantur.*

Hh ij

Mais il se peut faire que l'Empereur Valent. auoit prorogé le temps de ceste immunité, iusques à vingt ans aux masses, & aux filles, tant qu'elles demeureroient en virginité, comme mesme l'Empereur Gordian modera tellement de son temps ceste charge, qu'il fit comprendre trois hommes, pour vne teste, & quatre femmes pour vne, comme il se lit *in l. 10. C. de agric. & censit. lib. 11. Cod.*

Mais reuenans à noz mœurs & reiglemens, nous auons veu que iusques à present, la Cour (comme estant en vn regne beaucoup plus doux & tollerable, que n'estoit l'Empire de Rome) ha par ses Arrests exempté les mineurs de vingt cinq ans, viuans sous la main & conduite de leurs Tuteurs, & Curateurs. Et que non seulement elle a peu estre portée à cela pour la raison susdite, mais aussi pour ce qu'elle à iugé, que le public debuioit vser de ceste faueur à l'endroit de ce premier aage, qui doibt estre employé à apprendre les bonnes mœurs, & la suffisance necessaire, pour l'entretienement du reste de leur vie. Vray est que nous lisons en noz histoires que quelquefois les mineurs ont esté compris és leuées qui se sōt faites en ce royaume.

me, comme Froissart le tesmoigne parlant de la prison du Roy Iean, où il dit que ce Prince mit vn subside sur tous ces subiects, ores qu'ils feussent en garde & mainbourguie, c'est à dire en bas aage; car c'est ce que signifie ce viel mot de la langue Belgique dont est fait souuent mention és capitulaires de Charlemagne, mais cest exemple n'a esté suiuy depuis, & auons tousiours tenus pour exempts ceux de ce bas aage.

En quoy nous imitons les Atheniens, lesquels auoient en leur Republique vn magistrat nommé Eponymus, dont la charge principale estoit, en la directiõ, instruction & protection des pupilles, & d'auoir soing que quand ils estoient sortis *ex ephæbis*, ils fussent enuoyez voir & visiter les regions voisines, *unde πελπολοι dicti*, & ce iusques à vingt deux ans, & que cependant *diario indictionum eximerentur*, & à leur retour, comme ils estoient faits capables de gouverner leur bien, ainsi estoient-ils dès lors compris aux charges de la Republique, disent Harpocraton & Vlpian sur Demosthene.

La Cour aussia iugé, que puisque les mineurs estoient pendant leur minorité, incapables des honneurs de leurs villes, & communautéz, comme il est dit *in l. 8. ff. de mi-*

Q V A R A N T E V N I E S M E
norib. & honor. qu'il estoit pareillement rais-
sonnable de les exempter des charges, &
incommoditez d'icelles.

Et quant à la pretenduë coustume, que
les intimez disent auoir esté iusques au-
iourd'huy audict pays de Forest & Lyon-
nois, de comprendre les mineurs à la taille,
elle n'est sous correction considerable,
comme contraire aux Arrests & reigle-
mens de la Cour, qui a tousiours iugé que
les tailles en tout le ressort d'icelle estoient
personnelles, & qu'en consequence les mi-
neurs en estoient exempts.

Nous concluons donc à ce que l'appella-
tion & ce dont a esté appellé soient mis au
neant, & qu'en emendant il soit dit, que le
pupille de l'appellant, soit rayé & biffé des
roolles, iusques à ce qu'il ait atteint l'aage
legitime, & que deffenses soient faiçtes aux
Esleuz de Forests, & autres de plus à l'adue-
nir y laisser comprendre les mineurs. Ce
que la Cour ordonna par son Arrest du
mois d'Auril, 1596.

XLII. P L A I D O Y E'.

Iusques à quoy s'estend l'obligation des pleiges des Comptables & de leurs certificateurs, & s'il faut premierement discuter le Comptable ou ses heritiers.

E Roy a cy-deuant permis aux habitans de la ville de Troyes leuer sur eux vne somme notable de deniers, pour acquiter les debtes par eux créés en cōmun durant ces derniers troubles. A la recepte desquels il fust cōmis le Receueur ordinaire des Aydes & tailles de ladite ville, lequel seroit decedé apres en auoir reçu vne bonne partie. Ces habitans pour en auoir compte, auroient faict appeler en la Cour les cautions & certificateurs baillez par ce deffunct, lors de sa reception au serment de son office, en la chambre des Comptes, & conclu à l'encontre d'eux, à ce qu'ils fussent condemnez solidairement vn seul & pour le tout, à leur donner compte de ladicte somme, & payer le reliqua.

Hh iiij

A quoy les defendeurs auroient respondu qu'ils ne sont obligez qu'au Roy, & en tout cas, auant que de venir aux cautions, il se falloit adresser aux heritiers du comptable, comme auant que s'adresser aux certificateurs, il falloit discuter les cautions

De maniere que ceste cause, se resout en deux questions sommaires, la premiere, sçauoir si les cautions & certificateurs de ce defunct comptable, sont tenus de rendre compte de ceste somme aux demandeurs, & leur payer le reliqua qui en fera deub : la seconde, sçauoir, si on peut s'adresser aux cautiōs, quon n'aye discuté les heritiers du defunct, & aux certificateurs, sans auoir aussi discuté les cautions.

Quant à la premiere, elle est fort aisée à resoudre, d'autant que l'obligation fideiussoire, estant de droit, estroit, on ne la peut estendre plus auant que les termes expres d'icelle, *fideiussores non alias tenentur quam si se quid daturos facturosve promiserint*, dit la loy 65. ff. de fideiussor. De sorte que cōbien, que l'interest soit de mesme nature, que le principal, comme ayant leur origine commune, & qu'és causes du Fisque eschet tousiours quelque faueur, neant-

moins le Iurisconsulte dit qu'un certain personnage s'estant obligé pour un Fermier public, *in centum annua*, le Fisque ne le peult contraindre au payement de l'usure, pour ce que *lecta subscriptione* il apparoissoit, qu'il ne s'y estoit expressement obligé, *l. 67. ff. eod.*

Et d'ailleurs, ores que le public soit aussi recommandable en toutes ces causes, toutesfois si quelqu'un s'est obligé vers iceluy pour un Magistrat, auquel les affaires communes sont commises, il ne peut estre recherché, pour les peines & amendes, lesquelles l'Officier auroit encouru par sa maluersation, *in pœnam vel mulctam quam non spopondisset non debere conueniri d. l. 97. Gl. unic. C. de peric. eor. qui pro mag. interuener.*

A ceste raison donc les demandeurs seront iugez non receuables en leur actiõ, veu que la caution des defendeurs n'a esté que pour asseurer ce qui pourroit estre deub au Roy par l'estat final des comptes du defunct, & iusques à certaine somme portée par leur acte de caution. A quoy ayant entierement satisfait, nous les estimons asseurez contre tous autres, veu mesme que nous auons cy deuant veu un

particulier declaré par arrest non receuable, à rechercher les cautions d'un comptable, qui auoit employé sa quitance en son compte, & baillé sa promesse au lieu d'argent, pour ce que la Cour vit, que les cautions n'estoient obligez *in omnem negotiationem* du comptable, ains seulement au payement du debet de compte apres l'apurement & closture d'iceux.

Aussi que la Cour a tousiours estimé, que comme l'obligation des fideiusseurs & cautions commence par courtoisie, & finit ordinairement par misere, il estoit pareillement raisonnable de les traicter benignement, & de restreindre leur obligation le plus estroictement que l'on pourroit, imitant en cela l'equité des Empp. Hadrian & Iusti. lesquels considerants, que des responses pour autrui, le public en resentoit vn fort grand preiudice, par l'euerfion qui en arriuoit de plusieurs familles, auroient par leurs Constitutions notoires à vn chacun octroyé aux fideiusseurs plusieurs faueurs & benefices. Font à ce propositant de preceptes des anciens, pour se donner garde des responses, comme celuy de l'oracle de Delphes *Εἴηται φῶν*, & autres que nous obmettons,

pour ce qu'ils font à la bouche de tout le monde.

Quant à l'autre question agitée en ceste cause, touchant l'ordre, qui est à tenir, pour poursuiure vn comptable, ses cautions & certificateurs, combien qu'à present elle soit inutile, pour ce que comme nous auons dit, les demandeurs ne sont en tout receuables en leur action, contre lesdits defendeurs, neantmoins nous la touchons en peu de paroles, afin que le barreau se souuienne en vne autre occasion, comme on a accoustumé d'en vser. Nous auons obserué iusques aujourdhuy l'ordonnance du Roy Loys douziesme, de l'an mil cinq cens treize, statuant que les pleiges & cautions des comptables, ne pourroient estre contraints, sinon apres diligence faicte sur les personnes, & biens meubles exploitables desdits officiers cōptables, qu'aussi on ne pourroit s'adresser aux certificateurs qu'apres vne discussion pareille sur les cautions, encores que par les lettres de plegeries & cautions n'en fust faicte mention expresse.

Ce qui approche d'vne constitution que'fit Iustinian en faueur des pleiges, & qu'il intitule, *πρὸς τὸς ἀνεγὰς ἀσπίτων*

Q V A R A N T E D E V X I E S M E

ἵπταρεῖν καὶ τῷ πρωτοτύπῳ χρεωστῶν, voulant par icelle, que le creancier ne puisse s'adresser au pleige sans discution prealable sur le debiteur principal. Il modere en cela la rigueur de l'ancien droit, par lequel il estoit permis *statim impetere fideiussorem, relictō reo principali. l. iure nostro. l. si alienam C. de fideiussor.* Ce que Ciceron mesme tesmoigne, auoir esté obserué de son temps, *lib. 12. & 16. ad Atticum*, ou parlant de Dolabella son debiteur, dit qu'il luy estoit libre de conuenir premierement ses pleiges & cautions.

Ce qui sembloit neantmoins estre iniuste, & sans raison: Car puisque la caution n'est qu'accessoire à l'obligation principale, est-il pas aussi plus equitable que l'on s'adresse au principal debteur, auant que de venir aux cautions?

C'est pourquoy bien que ce droit rigoureux s'obseruaist ainsi entre les anciens, & aux causes priuées; si est-ce qu'en mesme temps és causes fiscales, les Empp. vouloiēt vne discutiō prealable sur le debiteur principal, ce que tesmoigne le Iuriscōsulte Paulus *in l. Moschis ff. de iure fis.* disant, *Moschis quædam fisci debitor ex conductione vectigalis hæredes habuerat, à quibus post. aditam hæredita-*

tem Faria , Semillia , & alij pradia emerant cum conuenirentur propter Moschidis reliqua, dicebant & heredes Moschidis idoneos esse, & multos alios ex ijsdem bonis emisse. Aequum putauit Imperator prius heredes conueniri debere , deinde in reliquum possessorem omnem , dont appert que ce droit la estoit beaucoup plus doux & gracieux que le nostre , pour ce qu'il desiroit vne disction entiere de meubles & immeubles du principal obligé , là où le nostre se contente d'une disction sommaire, sur les meubles exploitables seulement , auant que s'adresser aux pleiges.

Ce que nous auons dit de la caution à l'esgard du principal obligé, se doit pareillement entendre du certificateur à l'esgard du pleige, d'autant que son obligation n'est aussi qu'accessoire à la fideiussion, & de fait la loy des douze tables dit Aulugelle *lib. 16. cap. 10.* l'appelle *subuadem*, & les Iuriconsultes *adfirmatorem fideiusoris*.

Pour nous fermer donc, nous estimons que par les raisons cy-deuant deduites, les deffendeurs doiuent estre enuoyez absouts des fins & conclusions des demandeurs. Ce que la Cour ordonna, sauf ausdicts demandeurs à se pouruoir contre la vesue & heritiers dudit deffunct, ou ainsi

Q V A R A N T E D E V X I E S M E
qu'il verront bon estre, par Arrest du premier iour plaidoyable d'apres la saint Martin 1600.

Ce que nous auons dit cy-dessus de l'ordre des discussions à faire sur le comptable, ses heritiers, cautiōs & certificateurs, a esté obserué presque iusques à present. Mais comme la faueur du Fisque se va tous les iours augmentant, aussi on commence à se departir de ceste obseruance, & ne faiēt-on plus de difference entre les comptables, leurs pleiges & certificateurs. Les Receueurs generaux decernent d'oresnauant leurs contraintes, contre le premier que bō leur semble. Le Controolleur des restes en faiēt de mesmes, & cela s'auētorise par les Arrests. Il ny a tantost plus, que pour raison des fermiers des Aydes, leurs pleiges & certificateurs, que nous retenons l'vsage de l'ordonnance.

XLIII. PLAIDOYE'.

*Si vn habitant nouveau doit contribuer
aux debtes & charges precedens son
aduenement.*



E faißt de ceste cause est sommaire. Les habitans de Marans disent auoir emprunté des quatre vingts huißt, vne somme notable de deniers pour subuenir à leurs affaires communes. Que depuis ces troubles ils ne l'ont peu leuer sur eux, pour satisfaire à leur creancier, sinon depuis deux ou trois mois. Qu'au departement, & assiette qu'ils en ont faißt faire, ils ont compris les intimez, lesquels s'y sont opposez, & soubstenu pardeuant les premiers Iuges qu'ils en deuoient estre rayez, attédu que ceste dette auoit esté créée auparauant leur aduenement audit Bourg. Les appellans au contraire ont maintenu, qu'en telles matieres on doit considerer seulement le temps auquel la leuée se fait pour y obliger tous ceux, qui s'y treuuent

QVARENTETROISIÈME

lors demeurants. Surquoy par sentēce desdits premiers Iuges, il a esté dit que les Intimez seroient deschargez de leurs taxes, & rayez du roolle de l'assiette. Dont lesdits habitans ont interietté l'appel qui soffre à iuger, & qui semble en apparence douteux; pour les diuerses raisons & auctoritez de droit, qui se peuuent rapporter de part & d'autre.

Car pour la sentence, fait la reigle que nous tenons perpetuelle en droit, comme fondée sur la loy de nature, que personne ne peut estre recherché pour le payement des debtes d'un autre, ce que l'Emper. exprime en termes precis *in l. 1. C. ut nullus. ex vicaneis.* disant, *grauē esse non solū legibus, verum naturali aequitati contrariū, pro alienis debitis alios molestari.* De sorte que combien que la loy feigne que le pere & le fils, le mari & la femme soient vne mesme & seule personne à cause des offices mutuels dont ils sont obligez les vns enuers les autres; neantmoins elle ne veut point, que l'un puisse estre tenu des debtes de l'autre: cōme il est traité és tiltres, *ne filius pro patre, ne uxor pro marito.* Iusques là mesmes qu'ores que selon nature le serf deuenu libre, soit la mesme personne, si est ce que la loy pour

ne

ne contreuenir à ceste reigle, ne veut pas qu'il soit tenu payer, ce qu'il a promis en seruitude, comme il se voit au tiltre, *An seruus ex suo facto post manumissionem teneatur*, pour ce qu'elle le faine vn nouuel homme. Que par ceste raison donc generale, les intimez se peuuent dire exempts de contribuer à l'acquit de la debte dont est question, veu qu'ils ne sont nommez ny compris en l'obligation qui en a esté faicte; Qu'ils ne s'oyent venuz demeurer audit bourg, que six ou sept ans apres. Et que l'action que le creancier d'icelle a intenté contre lesdits habitans, *certi condictio est*, & partant pure personnelle, & qui regarde seulement ceux qui ont emprunté lesdits deniers, ou donné charge de les emprunter, comme il est dict *in l. si quis certum ff. si cert. pet. §. i. & §. in perso. Inst. de act.*

Secondement lesdits Intimez se peuuent dire assiste d'un texte tres-exprés, & qui semble decisif de ceste question, en la loy *providendum C. de decurio. lib. 10.* disant, *providendum est eorum nouitati decurionum, qui nuper nomen curijs indiderunt, ne preteritis debitis susceptorum onerentur.* Ce qui estoit fondé sur vne prudence politique, à fin que ceux qui desiroient s'habituier en quelque ville,

Q V A R A N T E T R O I S I E S M E
ou communauté, n'en fussent diuertis par
la crainte des debtes contractées auant leur
aduenement.

En troisieme lieu, fait pour les Intimez
ceste autre reigle & maxime ordinaire,
qu'en matiere d'indiction, on considere
toufiours le temps de la cause d'icelle, &
non de l'execution, cōme tous les Docteurs
le traitent *in d.l. prouidendum*, & *in l. Incola.*
ff. ad municip. in l. 4. §. actor. ff. de re iud. Bald.
in l. 1. ff. quod cuiusq. vniuersit. arg. l. 1. C. de
nanib. non excus. lib. II. & l. 2. §. viarum ff. ne
quid in loco publi. arg. l. 2. & §. 1. ff. de excu-
sat. Tutor. & l. 1. de pœnis: de sorte, que n'e-
stans lesdits intimez demeurās audit bourg
lors de l'origine & creation de ladite deb-
te, il n'y auroit apparence de les astringre
au payement d'icelle.

Et combien qu'il se peust dire, qu'ayans
iceux intimez succédé au lieu d'autres,
qui estoient obligez, si est-ce que de là on
ne peut inferer qu'ils ayent aussi succédé
en leur obligation. Car le successeur sin-
gulier n'est iamais tenu des debtes de son
deuancier, *l. 1. §. si hæres praecept. ff. ad Trebel.*
mesme le successeur en la dignité, *l. murile-*
guli C. de murileg. si ce n'estoit qu'on iusti-
fiast, que la dette eust tourné à son profit.

De maniere qu'en tout cas il faudroit que les appellans eussent faict paroistre en quoy lesdits deniers ont esté employez, & qu'il en fust reuenu quelque profit & vtilité aux intimez : car s'ils ont esté consommez inutilement, ce seroit aux administrateurs à en respondre *l. 27. ff. si cert. pet. arg. l. 1. ff. si aduers. credit. & auth. hoc ius porrectum, C. de sacros. eccles.* & ne seroit raisonnable d'en rechercher de nouveaux venus qui n'en ont oncques ouy parler, suyuant le texte formel de la loy, *si quos commoditas C. de fund. rei pri.* disant, *nec tamen decoctoris cuiusque reliquis, qui nouus accedit debet onerari.*

Au contraire de ce que dessus, faict pour les appellans, que la debte dont est question, a esté conçeuë pour & au nom des habitans dudit bourg de Marans; ce qui s'est peu faire, *nam & ciuitatem mutui datione obligari posse Vlp. ait. d. l. 27. ff. si certum pet.* c'est à dire par l'entremise de son Syndic, ses Escheuins ou autres personnes publiques; car ces noms de cité, vniuersité, paroisse ou communauté, sont par maniere de dire corps mystiques & incertains, qui ne font leur fonction que par l'organe de leurs argens publics, dit le Iurisc. Paulus *in l. 1. §. ult. ff. de acquir. vel amitt. heredit. &*

QV ARANTETROISIESME

Cicéron le monstre *Verr. i.* disant, *Si tota Sicilia una voce loqui posset, hoc diceret, quod auri, quod argenti. & rel. quoniam id non potest, harum rerum actorem, quem idoneum esse arbitrata est, ipsa delegit.*

Or estant les communautéz de ceste qualité, c'est à dire corps qui ne subsistent en la nature, mais qui se considerent seulement en l'esprit, comme toutes autres choses vniuerselles, *ut populus, grex, homo, animal, equus & similia, quæ uni nomini subiecta dicuntur*, comme dit la loy 30. ff. de *usurpatio.* on n'a que faire, quand il est question de leurs droicts actifs ou passifs; de s'arrester aux *indiuidus* dont elles sont abstraites, ny de s'informer de ceux qui ont esté, sont, & seront en icelles, & comme dit *Vlp. utrū omnes ijdem maneant, an pars maneat, vel omnes immutatae sint l. 7. ff. quod cuiusq. vniuers. no.* Au contraire l'on oppose ordinairement les choses singulieres aux vniuerselles *l. i. ff. de dot. præl. l. i. ff. de interdict.* c'est pourquoy les Jurisconsultes ont dit que l'usufruct legué à vne ville ou cité, ne finit pas avec la vie de tous ceux qui habitoient en icelle lors du legs; encores qu'en l'espace d'un siecle tous les hommes se renouellent; ains seulement par l'euerfion

entiere de toute la ville & cité, *ut quondam Chartagini contigit, dum aratrum passa*, dit la loy, *si ususfructus ff. quemadm. ususf. amitt.* autrement l'usufruit dure tousiours, pour ce que le peuple qui y est aujourd'huy, est réputé celui, qui y estoit il y a deux cens ans *l. proponebatur ff. de iudicijs*, à l'exemple des fleuves qui sont tousiours tenus pour les mesmes, encores qu'ils soient *in assidua mutatione*, comme dit Seneq. Epist. 50.

Combien donc, que les intinez ne fussent demeurans audit bourg lors de la creation de la debte dont est question, voire que tous les habitans d'iceluy fussent changez, si est-ce qu'estans membres de la mesme communauté, il est certain qu'ils ne s'en peuuent dire exempts. Qui est la mesme raison, pour laquelle Vlpian *in l. 7. §. f. ff. quod cuiusq. uniuerfit.* dit que si vne communauté, qui doit, ou à qui il est deub vne somme de deniers, vient à se diminuer, mesmes à se reduire à vn seul, ce seul la peut se faire payer, & peut aussi estre contraint de payer toute la somme, *si uniuerfitas (inquit) ad unum redit, magis admittitur, posse eum conuenire & conueniri, cum ius omnium in unum redierit, & stet nomen uniuerfitatis.*

QUARANTETROISIEME

Le semblable a esté déterminé par les Empp. au fait des charges réelles, voulans que si tous les heritages d'une contrée ou département, soient demeurez deserts & incultes, que les charges d'iceux soient reiectées sur celuy qui restera en labour, comme il est plus à plain traité, *in l. omne C. de omni agr. desert.* pour ce que telles debtes sont deuës *ab vniuersis, non à singulis.*

Par ces raisons, ce qui a esté dit pour les intimez se trouuera sous correction suffisamment refuté: car premierement le til-tre, *ut nullus ex vica* parle seulement des debtes priuez d'aucuns particuliers, pour raison desquelles, il ne seroit raisonnable d'en poursuivre les autres, & ne touche point aux debtes de la communauté.

Quant à la loy *prouidendum*, elle se doit aussi entendre seulement de ceux qui pour succeder à vn autre en sa dignité, ne doiuent estre tenus de ses debtes, si ce n'est qu'elles eussent esté faictes à cause de la dignité.

Et quant à ce qu'on a dit, qu'en matiere d'indiction on regarde seulement le temps de la cause & origine d'icelle, le contraire s'est de tout temps obserué en ceste Cour; fors en certains cas, comme

en vn procez euocqué du Parlement de Bordeaux, & renuoyé par le Roy en ceste dicté Cour, où il s'agissoit d'une somme de deniers, que ceux de la religion pretendüe reformée auoient il y a quelque temps imposé sur eux par permission du Roy, dont aucuns se pretendoient exempts, à cause qu'ils s'estoient faits Catholiques depuis l'affiette faicte, mais auant la demande des deniers. Nous feusmes d'aduis, qu'en ce cas là, ceste reigle pouuoit auoir lieu, suýuant la doctrine de Bart. sur la l. 2. ff. de excus. tut. disant que l'excuse qui suruient au tuteur, apres sa creation, ne luy profite de rien, non plus qu'à l'accusé le priuilege suruenant *post admissum scelus*, comme le mesme le traite in l. 1. ff. de pœn.

Ce qui a esté dit aussi du successeur singulier, ne se peut bonnement adapter au propos de ceste question, d'autant que celuy qui est *allectus inter ciues*, vient à succeder, & est faict capable, voire participant aux droicts vniuersels de la communauté, sçauoir est aux honneurs d'icelle, *in templa, in fora, balnea & cætera communia*, & partant est-il pas raisonnable, qu'il participe aussi aux charges communes d'icelle?

Nous estimons donc que sous le plai-

QV ARANTEQVATRIESME
fir de la Cour, l'appellation & ce dont a e-
sté appellé doiuent estre mis au neant, &
qu'en emandant il sera dit, que les Inti-
mez contribueront à l'acquit des deniers
dont est question comme tous les autres
habitans. Ce que la Cour ordonna par
son Arrest du mois de Mars. 1596.

XLIIII. PLAIDOYE'.

*Sur la remise faicte par le Roy,
des restes des tailles.*

E O V T ainsi qu'apres vne longue
sterilité d'années, force nous
est de nous contenter des
fruiets, que la terre nostre me-
re commune nous donne, & que ce seroit
vne avarice inepte, ou vne auare ineptie
de luy demander le defaut du passé : Les
Princes, qui sont les peres communs des
peuples, en doibuent vsfer tout de mesme
enuers eux, apres que par plusieurs an-
nées ils les ont veu languir souz les mains
ruineuses de Mars & de Bellone, & se con-

tenter de ce qu'ils peuuent commodemēt payer des debuoirs ordinaires, sans les forcer outre leur puissance à payer les restes du passé, autrement ce fera à eux, que s'appliquera proprement ce reproche public, que faict Saluian *lib. 5. disant, pauperculi atque miseri spoliati resculis suis, & exterminati agellis suis, cum rem amiserint, amissarum tamen rerum tributa patiuntur, cum possessio ab his recesserit, capitatio non recedit.*

Aussi nous apprenons des liures des anciens, que les bons Princes ont tousiours ietté l'œil en telles occurrences, sur la misere de leurs subiects. L'Aucteur du Panegyrique de Constantin, faict honorable mention d'une remise & descharge faicte par ce Prince, disant, *septem milia capitum remisisti, quartam amplius partem nostrorum censuum: qua remissione viginti quinque millibus dedisti vires, dedisti opes, dedisti salutem; certè & tum liberi parentes suos cariores habent, & mariti coniuges non grauati tuentur, & parentes adulatorum non pœnitent filiorum quorum onera sibi remissa latantur.* Le Panegyrique de Theodose dit de luy le semblable, *quinque annorum nobis reliqua remisisti. O lustrum omnibus lustris felicius.*

Voire mesmes qu'il se lit de quelques

Q V A R A N T E Q V A T R I E S M E

vns, que pour faire cognoistre leur bien-
vueillance & liberalité, ont honoré le pre-
mier acte de leur regne & Empire de ceste
indulgence publique. Cedrenus *lib. 1.* &
Enimundus Bonafidius en son recueil, de
Const. Imp. l'ont escrit de l'Empereur Bo-
noniates en ces termes : *Cum ad Imperium*
peruenisset, à Patriarcha regali fascia tertio die co-
ronatur, ac primum illud liberalitatis specimen
edidit, ut quicquid fisco deberetur, id uniuersum
citra exceptionem aboleret, ac nouas tabulas ma-
gnifico edicto institueret.

Ce qui se doit entendre des debtes fis-
cales seulement, & non de ceste abolition
de debtes, que les anciens appellent *nouas*
tabulas, & qu'ils practiquoient aux rencon-
tres de semblables miseres, comme Cice-
ron le tesmoigne *lib. 2. offic. & 2. in Catil.*
Cæsar lib. 3. de bello civil. & Seneque *lib. 1. de*
benef. cap. 4. mais non iamais sans iniustice
& renouvellement de troubles. Ce que
preuoyant le bon & prudent Aratus, a-
pres auoir deliuré sa ville de Sycion de
l'oppression extreme des Tyrans qui la de-
tenoient, ne voulut vser de ce rude reme-
de : mais sçachant d'ailleurs l'estat misera-
ble où estoient reduicts ses Citoyens, &
qu'il estoit impossible aux vns de payer

leurs debtes, & vne nouuelle ruine aux autres de les en priuer, il empunta vne grande somme de deniers de Ptolomée Roy d'Ægypte, pour y fatisfaire.

Suetone *in Iulio Cesare*, dit qu'à mesme prudence ce Prince ne voulut permettre ceste syfactie, & extinction generale de debtes, bien que tres-importuné de le faire: mais que pour soulager les pauvres debteurs, & donner aussi satisfaction aux creanciers, il ordonna qu'on imputeroit sur le principal, ce qui auoit esté payé pour l'vsure, & que les creanciers prendroient en payement des heritages au prix qu'ils estoient auant la guerre, *disiecta (inquit) nouarum tabularum expectatione, quæ crebro mouebatur, decreuit tandem vt debitores creditoribus satisfacerent per æstimationem possessionum quanti quisque ante ciuile bellum comparassent, deducto summa aris alieni si quid vsuræ nomine numeratum fuisset, qua conditione quarta pars crediti deperibat.*

Mais l'honneur que luy & les autres Princes ont peu remporter, d'auoir sagement pourueu à tels accidens, n'est rien au prix de celuy qu'ils meritent de ceste remise generale de leurs propres debtes; à ceste occasion les compilateurs des loix

& ordonnances de l'Empereur Iustinian, ont esté soigneux pour son honneur, de faire conseruer entieres, deux constitutions par luy faictes sur ce subiect, l'une qui est, *de reliquis publicis non exigendis*, & l'autre, *de indulgentia reliquorum publicorum*, par lesquelles il excite à son exemple la pitié & misericorde des autres Princes de faire le semblable en pareilles occasions. Spartian, voulant deschiffrer les loüanges de l'Empereur Adrian, n'a pas oublié de remarquer la faueur dont il auroit vsé enuers les Gaules en pareilles rencontre disant, *Post hæc profectus in Gallias, omnes caussarijs liberalitatibus subleuauit* il appelle là *caussarias liberalitates*, pour ce qu'elles furent fondées sur les pertes & ruines qu'ils auoient souffertes. Et receurēt tant d'alegresse de ceste munificence, qu'ils firent battre dès lors de la monnoye en l'honneur de cest Empereur ou estoit ceste inscription, *Restitutori Gallie*.

Il faut toutesfois que nous aduoüions, que nostre Roy n'a eu que faire d'exemples, pour l'inuiter à ceste magnificence enuers son peuple, & luy remettre les restes comme il a fait des années precedentes: car il est, & fera à iamais vn exemple parfait, d'un Prince amateur de sō peuple.

Aussi vous ne prendrez, ce que nous auons rapporté des autres, que pour releuer sa louange, sur la memoire d'iceux.

Si tost que Dieu luy eust ouuert les portes de Paris, c'est à dire de son Royau-
me, le premier œuure que fit sa Majesté,
fust la remise ne tous les restes des an-
nées precedentes. Et en quatre vingts &
seize, ayant fait conuoquer à Rouen vne
assemblée generale de ses principaux Of-
ficiers, pour aduiser à remettre sus l'ordre
que la confusion de la guerre auoit osté, la
premiere chose qu'il ordonna, fût vne
semblable remise de tous les restes des
années qui auoyent couru depuis l'entrée
de Paris: & en quatre vingts dixhui&, sa
Majesté desirant recognoistre plus au vray
l'estat de son peuple, deputa plusieurs
grands personnages tant du conseil, que
des autres compagnies, afin de se trans-
porter par les Prouinces, pour reigler les
tailles, & tributs, releuer d'oppression les
foibles & les pauvres, faire payer à leur
soulagement ceux qui par la licence des
guerres, s'estoient affranchis sous lettres
supposées de noblesses & priuileges: & a-
pres auoir entendu leur rapport, & qu'il
estoit expedient de faire de rechef sentir

Q V A R A N T E Q V A T R I E S M E

au peuple vne nouuelle faueur & descharge, il fit son Edi& du mois d'Auril, par le premier article duquel il confirma les remises precedentes, & les estendit iusques en quatre vingts & dixhui&, qui a esté le seul remede, pour remettre sus le plat pays qui sans cela s'en alloit du tout abandonné, & la terre deserte. Ce qui se peut comparer à cest ancien Edi& de l'Empereur Basile Porphyrogenete appelé Alileugium, dont parle Cedrenus au lieu susdict.

Or combien, que pour ces considerations, telles remises soient sur toutes choses fauorables, vous auez ouy neantmoins en ceste cause, que l'appellant n'a laissé au preiudice d'icelles, de poursuiure avec toute rigueur les Intimez, pour le payement de la somme de mille escuz, dont le Receueur l'auoit assigné sur eux, des quatre vingts quinze, pour ses soldes & appointements.

Le pretexte qu'il donne à sa poursuite, est qu'ayant baillé sa quittance à ce receueur, il en a compté au Roy sans aucune reprise, & qu'à ce moyen sa Majesté estoit quitte vers luy, bien qu'il n'eust touché que du papier. Mais vous sçauiez qu'il luy est pour-

veu par l'Edit de Decembre, quatre vingts feize, qui veut que tels assignez prennent des receueurs des certificats *de non soluto*, pour se retirer au Roy afin d'auoir nouuelle assignation.

Et quant à l'argument, qu'il tire de la fin dudit premier article de l'Edit d'Auril, par lequel le Roy excepte des susdictes descharges & remises les obligations esquelles aucuns particuliers seroient entrez pour leur cōmunauté, enuers les Receueurs, s'ils en ont compté, comme de deniers receuz, cela soubs correction ne luy peut seruir d'aucune chose, pour ce que la cause n'est en ces termes, & qu'il n'a mis en fait que les intimez, ou aucuns d'eux, luy ayent oncques passé d'obligation, aussi que ledit article se doit interpreter de ceux qui ayant receu des cōtribuables des deniers de la taille, ne les ont payé aux receueurs, ains luy ont seulement baillé vne obligation: car autrement si vous l'interpretez au pied de sa lettre, vous rendrez la liberalité du Roy vaine & inutile, veu qu'il n'y a gueres de Receueurs, qui n'ayent tiré des obligations de leurs restes, & qu'ils n'en ayent compté sans reprinse. Par ces moyens, nous concluons à ce qu'il soit dit auoir

QVARETECINQVIESME
esté bien iugé par les Esleuz, en ce qu'ils
ont renuoyé les intimez absouts des de-
mandes & conclusions de l'appellant. Ce
que la Cour confirma par son Arrest du
mois de Iuillet, 1600.

XLV. PLAIDOYE'.

*Que le Roy peut establir des officiers sur
les terres & iustices des Seigneurs,
pour exercer la police des jaulges &
mesures.*



E nous seroit vn sacrilege, de dō-
ner autres bornes à la puissance
des Roys, sinon en ce qui est iniu-
ste & deshonneſte. Car estans
faicts ministres de l'auctorité ſouueraine
de Dieu, toutes choses, excepté ces deux,
leur ſont ouuertes & permises; c'eſt pour-
quoy ce Roy Theodahadus diſoit dans
Caſſiodore *epiſt. 16. lib. 10. variar. Quum Deo
preſtante poſſimus omnia, ſola nobis nō licere cre-
dimus quæ ſunt inhoneſta.* Or comme le prin-
cipal office des Roys, & leur charge plus
ſpeciale, conſiſte à faire adminiſtrer iuſtice,
auſſi

aussi pouuons-nous dire, que leur puissance, & leur auctorité doit estre en cela tenuë plus grande, plus absoluë & plus vniuerselle.

Plusieurs choses sont communes aux Roys avec leurs subiects, leurs subiects aussi ont quelques choses qui leur sont propres & particulieres, mais aux Roys seuls appartient de faire administrer la iustice: ce sont eux seuls qui peuuent faire, & defaire les loix, qui peuuent créer des Magistrats, & Officiers pour les executer, bref qui peuuent seuls donner auctorité & puissance pour faire iustice, qui est ce que Seneque a dit en vn mot, *imperio omnia Principis esse.*

De sorte que combien que plusieurs Seigneurs soient veus tenir comme en propre la iustice sur leurs terres & subiects: ce n'est toutesfois qu'une vsurpation, s'ils n'en ont tiltre particulier, concession & permission du Roy, ou de ses predecesseurs Roys de France: car c'est de luy qu'elle depend toute, comme la lumiere du Soleil, & de la mer les eaux; & si à bien considerer telles concessions, elles se trouueront au iugement des plus sages, sans autre fondement qu'en vne dereglee pro-

fusion des droits de la Couronne. car quelle apparence y a il, que les subiects du Roy reçoivent la iustice, sous autre nom & auctorité que de sa majesté, voire de ceux qui luy sont esgalement subiects? La iustice est le premier, & le plus eminent fleuron de son sceptre, c'est la main que Dieu luy a baillée pour se faire obeyr & aux loix gardiennes de son Royaume. c'est pourquoy elle doit estre d'autant moins communiquée & departie, que tous les autres droits de sa Couronne.

Nous apprenons aussi de noz anciennes histoires, que ce fut Charlemaigne, qui le premier auctorisa les Gentilzhommes ayants fiefs superieurs. droit de cens & rentes sur aucuns roturiers & villages, d'ouyr leurs differents, & leur rendre iustice; mesmes s'ils auoient des vassaulx entendus, de les contraindre à les assister de leur presence & conseil: mais c'estoit au nom du Roy que cela se faisoit, & par forme de commission tant seulement, ainsi que les fiefs n'estoient lors que simples benefices à vie & pour vn temps.

Et ne pensons iamais à l'heureuse condition de ces anciens siecles, que nous ne deplorions quant & quant les miseres,

que la mution de ces choses nous a apportée : car alors les Seigneurs ne faisoient leur profit des procès de leurs subiects, & ne tiroient ce gain profane, du saint & sacré miniftre de la iustice. Ils le reputoient à leur charge & debvoir, & n'auoient rien en plus grande recommandation finon que les procès & occasions d'iceux fussent diminuez, & que la meilleure & plus courte iustice fust administrée : mais depuis que ceste iustice leur a esté rendue propre, & patrimoniale, (ce qui n'est que depuis Huë Capet) les procès se sont multipliez, & par mesme malheur, les ruines & infortunes.

Bref cela se treuuera encores d'autant plus estrange, qu'il n'y a presque qu'en ce Royaume qu'il s'obserue : Car ores que l'usage des Fiefs, soit commun en Alemaigne, Espagne, & plusieurs autres lieux, la iustice neantmoins en appartient seulement aux Roys, & Princes souuerains. Et d'auoir inferé de la propriété d'un Fief, un droit particulier en la iustice, vous iugez bien que cela est sans raison, veu que le Fief, & la Iurisdiction, n'ont rien de commun ensemble, & qu'il n'y a aucun Fief, qui de sa nature attribue droit de iustice.

Kk ij

Toutesfois puis que noz mœurs confirmez d'un si long-temps sont autres , il nous y faut aussi acquiescer , & dire avec cest ancien, *laudandi veteres, sed nostris utendum annis*. Mais nous maintenons pourtant que le Roy, ayant honoré les Seigneurs de son Royaume, de ce droit de iustice, en leurs terres & seigneuries, il ne s'est du tout priué d'icelle, ains au contraire, qu'il l'a retenuë entiere, en ce qui est de la police generale, signamment des poix, mesures & jaulges, pour ce que ce sont droicts vraiment domaniaux inalienables & inseparables du Domaine de sa Couronne, & qu'à luy seul appartient de reigler ces choses, sans lesquelles il ne se peut faire aucun commerce, ny en general, ny en particulier.

C'est pourquoy, nous apprenons des liures de l'antiquité que les Princes se sont tousiours attribué ce droit, comme nous en voyons un tesmoignage dans Ammian Marcellin *lib. 27.* où l'Empereur Iulian enioint à Pretextat, qui estoit lors *Urbis Romæ præfectus*, *ut pondera per vniuersas regiones institueret, cum auditati multorum ex libidine trutinas componentium occurri nequiret.* & en la Nouuelle 128. où l'Empereur Iustinian cō-

mande, *ut pondera & mensuræ publicæ adseruantur, nec quid in ijs falsi à priuatis admittentur, ut in Ecclesia cuiusque ciuitatis, & en la loy 9. C. de susceptor.* où l'Empereur Theodose, enioint le semblable, *ut videlicet modij anei vel lapidei cum sextarijs atque ponderibus per mansiones singulâsque ciuitates collocentur.* & en la loy f. du mesme tiltre, où l'Empereur Honorius charge les Gouverneurs des Prouinces d'auoir le soing de ses poids & mesures, *adeo ut ad crimen suum noscant pertinere, si possessoribus vllum fuerit aliqua ponderum iniquitate illatum dispendium.* bref cecy se verifie fort clairement, par tout le tiltre de *ponderib. lib. 10. Cod.*

Et durant la Republique, comme l'autorité souueraine estoit au peuple, aussi fouloit-il tous les ans élire vn Magistrat nommé *Ædilis*, dont la principale charge & fonction consistoit en cela, & duquel parle le Poëte Persius en ce vers,

Frangeret heminas Areti Aedilis iniquas.
 Et Iuuenal Saty. 10. *Et de mensuris ius dicere, vasa minora Frangere pannosus vacuis Aedilis vlubris.* Lequel aussi se pouuoit comparer à ces quinze officiers d'Athenes, qu'Harporation appelle *μετρονόμοι*, dont les dix demeuroient au port de Pirée, où se faisoit

Q V A R A N T E C I N Q V I E S M E

le principal commerce, & les cinq autres en la ville. Moyse mesmes monstra bien que ce soing appartenoit aux Princes souverains, quand au milieu de ses loix principales, il met ceste-cy, *non facietis iniquum aliquid in pondere & mensura, statera iusta & æqua sint pondera, iustus modius, iustusque sester-tius.* D'où vient que l'Empereur Iustinian *in quad. pragmat. sanct. cap. 18.* commande que les mesures qu'ils auoit ordonnées, feussent gardez & obseruées par vn chacun mesme par le Pape & par le Senat, *in illis mensuris inquit, vel ponderibus quæ beatissimo Papæ, vel amplissimo Senatui nostra pietas in presenti contradidit.*

En soimne ceste proposition se iustifie par vn grand nombre de loix, qui se lisent çà & là dans les capitulaires de Charlemagne, & plus encores par vn Ediçt du Roy Henry deuxiesme de l'an mil cinq cens cinquante sept, par lequel sa majesté ordonna, que tous les poids & mesures du Royaume, seroient reduits à vn seul poids & mesure, qui seroient dictz, nommez, & appelez par tout le Royaume, & pays de son obeyssance, les poids & mesures du Roy, *ad instar* de ce que l'Orateur Aristide *in 3. sacrar.* dit qu'en toute l'Asie la mesure

estoit vne & s'appelloit ἡμῖνα βασιλική.

Or comme le plus grand commerce, & negotiation qui se faict en ce Royaume, est du vin, & sur lequel mesmes se leuent les plus grands, & principaux subside de l'État, aussi est-ce en cela, que le Roy doit principalement interposer son auctorité, à fin que la mesure des vaisseaux, estant iuste & legitime, le commerce en soit plus loyal & fidele, & lesaydes rendus plus certains, & moins subiects aux fraudes & deceptions, d'autant que comme dit le Iurisc. *in l. 34. §. alia. ff. de contrah. empt. facit mensura equa ut appareat quantum ematur.*

C'est pourquoy nous lisons dans Columelle *lib. 13.* & dans Vitruue *lib. 6.* que les Romains estoient entre autres choses fort soigneux, que la mesure & jaulge des vaisseaux de vin fust iuste, *sic vini dolium* (disent-ils) *triginta amphorarum, per medium occupet pedes quaternos &c.* iusques là, que nous lisons és liures de ses mesmes auteurs, qu'ils consacrerent l'Amphore, *Ioni Capitolino, ne cui violaretur* & à fin que celuy qui seroit si osé de l'effraindre, fust puny tât comme faulsaire, que comme sacrilege.

K k iiij

QVARENTECINQVIESME

Ce que le Poëte Fannius *in carm. de pōderib.*
& *mensur.* a clairement exprimé disant,

Amphora fit cubus : quam ne violare liceret,

Sacrauère Ioui Tarpeio in monte Quirites,

A mesme conseil, le Roy François par son
Edict de l'an cinq cens quarante trois, créa
en chacune des villes estans sur les riuieres
de Seine, Marne, Oyse & és enuirs, des
jaugeurs, marqueurs & mesureurs de vais-
seaux & fustailles à vins, & autres breuua-
ges & liqueurs, lequel fust executé au veu
& sceu des Seigneurs haults iusticiers sans
contredit quelconque.

Et de nouueau le Roy à present regnant
par son Edit de quatre vingts seize, a fait
vne pareille creation de jaugeurs par tou-
tes les villes de son Royaume, & qui a e-
sté executé avec pareille facilité, fors de
quelques vns; comme vous l'auiez entendu
en ceste cause de l'appellant, qui pretend
que le Roy ne l'a peu faire au preiudice
des droicts de sa pairrie; & de la iustice qui
luy appartient en la ville dont est question.
Et qu'en vertu d'icelle, il a de tout temps
iouy du droict de jauge sur ses subiects,
qu'il appelle droict de verge, & prins qua-
tre deniers pour tonneau. Comme de ve-
rité il nous a iustificié par bonnes pieces, ce-

ste longue possession & iouissance, mais nous soudenons qu'en telles matieres, la possession n'est suffisante, ains qu'il faut représenter le tiltre particulier de la concession, qui en a esté faicte par les Roys. Pour ce que ce sont droits domaniaux, & de souueraineté, qui ne se peuuent prescrire, comme souuent il a esté iugé au Parlement sur pareilles rencontres,

De sorte que quand en tout cas on laissera audit appellant, la iouissance de ce qu'il à droit de prendre pour la iaulge & mesure de chasque tonneau, il sera sous correction hors de tout interest: car vouloir empescher l'establissement d'un Iaulgeur, pour mesurer sous l'auctorité du Roy les vaisseaux à vin exposé en vente, il n'y auroit sous correction aucune apparee, veu les raisons susdites & que tous les autres Seigneurs le souffrent; Aussi que le Roy, par concession qu'il leur a faicte des fiefs & des iustices, ne s'est lié les mains iusques là, ains qu'il s'est tousiours reserué ceste puissance. Que par la mesme raison, il à autresfois crée & erigé en tiltre d'office Royal, des Courtiers, des Priseurs Vendeurs, des Notaires & gardes des Seaulx, voire mesmes des sieges Presi-

QVARENTECINQVIESME PLAID.
diaux entiers sur les terres des Seigneurs,
ce qui a esté executé, quelque plainte qu'ils
en ayent peu faire : aussi que quand il est
question du bien public, la puissance du
Prince ne se peut borner & limiter, par l'in-
terest d'aucuns de ses subiects.

Partant nous concluons, à ce que l'appel
interietté par ledit appellant de la receptiõ
faicte de l'inthimé, par les Esleuz des lieux
au serment de l'office de Iaulgeur en ladite
ville & election, soit mise au neant, & que
ce dont a esté appellé, sortira son plain &
entier effect : & en ce faisant, que ledit in-
timé iouyra de sondit office, sans preiudice
neantmoins des quatre deniers pretendus
par l'appellant, à cause de sondit droict de
verge, dont il pourra iouyr, ainsi que bien
& deuëment il en a iouy par le passé, & en
iouyt à present. Ce que la Cour ordonna
par son Arrest du mois d'Auril, 1599.

XLVI. PLAIDOYE'.

*Sur le priuilege des monnoyers , &
s'ils le conseruent , en se faisant
transférer d'une monnoye
en l'autre.*

LE labeur penible & continu des monnoyers , a merité de noz Roys plusieurs grands priuileges ; Philippes le Bel par son Edi& de l'an 1296. leur donna l'exemption de toutes charges personnelles , & leur assigna par chacun iour vne certaine somme de deniers. Ce qui leur a esté confirmé par tous ses succeffeurs. Le Roy François I. y adiousta l'exemption des tailles, les priuant toutesfois de ceste distribution de deniers, comme il se voit par son Edi& de l'an 1537. Et iusques aujourd'huy ils ont esté maintenus en l'un & en l'autre, pourueu qu'ils soient demeurans és villes où

QVARENTESIXIÈSME

les monnoyes sont establies, & qu'ils seruent actuellement en icelles, ce que le Iurisconsulte appelle, *in publica moneta operari*, in l. 6. §. 1. ff. ad leg. Jul. pecul.

L'affiduité de leur travail, estoit anciennement designée, dit Plutarque, par vn tableau attaché au portique de l'edifice, où la monnoye se souloit battre à Rome, auquel estoit figuré le labeur continu des abeilles, à appareiller & munir leurs ruches, pour faire le miel si vtile à la vie, Ce que ce Poëte Satyrique à voulu exprimer disant, *Conuenit ut vespis, quarum domus arce Moneta, & cat.* comme à la verité cela se rapportoit au grand nombre des cellules & officines, ou tous ces monnoyers travailloient continuellement, les vns à fondre, les autres à peser, les autres à tailler, battre & imprimer la monnoie, que Casiodore, *epist. 32. lib. 7.* appelle *viñuale metallum*, pour ce que c'est le subiect du commerce, qui faict viure les hommes. Martial aussi voulant représenter, cest assidu labeur des monnoyers, disoit en vn mot, *Acrariorum marculi die toto*, l. 2. 57.

Mais vne des principales causes de ce priuilege est, qu'anciennement les monnoiers estoient tenus au rang des domesti-

ques des Roys, veu mesmes que la monnoye ne se pouuoit faire ailleurs, qu'en leurs palais, ce qui se iustifie de ce lieu tiré *ex lege Franc. Caro. mag. quia in diuersis locis contra iustitiam fiunt, volumus ut nullo in alio loco moneta nisi in palatio nostro fiat.* Ainsi qu'à Rome elle ne se pouuoit faire *quàm in aede Iunonis Monetae*, ce qui fust ordonné par le Senat, dès la guerre Tarrentine, afin de recognoistre le secours qu'ils se persuadoient y auoir reçu de ceste deesse, & auquel temps ils créèrent ces officiers, que l'antiquité appelle *Triumuiros monetales*, semblables à noz generaux des monnoies.

Et est fort remarquable, que non seulement en cela les loix de France, & de Rome, se seroient rencontrées, mais encores en la forme, qualité & condition du serment & seruice des monnoiers. En ce qu'apres leur serment ils ne se pouuoient plus departir du seruice, & y obligeoient avec eux, leurs femmes, & tous leurs enfans, & descendans, comme il se voit és loix. i. & 7. *C. de murileg. & monet.* & és capitulaires de Charlemagne. Et combié, que cela ne s'obserue plus à present; si est ce que de ce que vous voyez aujourd'huy, que ceux qui sont yssus de monnoyers, ou

QVARENTESIXIÈSME
d'enfans de monnoyers masles ou femelles, sont si curieux de releuer ce serment pour cuider iouyr des priuileges, monstre bien, quelle estoit l'ancienne obseruance. Nous ne tenons pourtant ceux-là immunes & exempts de tailles, s'ils ne seruent actuellement, ores qu'aux iustices ordinaires, ils se fassent exempter des tutelles & commissions, sous pretexte que ce serment semble les obliger, qui est vn abuz à reformer, comme preiudiciable au public, veu qu'il se treuve tel, qui s'affranchira de ces charges, s'il monstre qu'aucun de ses ancestres ayent fait ce serment, ores qu'il n'eust seruy vne seule heure en la monnoye.

Mais pour nous remettre dans l'enceinte de ceste cause, vous auez entendu que les intimez conuiennent que les appellans sont monnoyers en la monnoye de saint Lo, l'un en vertu de sa prouision, & l'autre à cause des lettres par luy obtenues, pour y estre transferé, de la monnoye de Tours, en laquelle il auoit esté pourueu. Et quant au premier, qu'il n'y a eu subiect de l'auoir condamné à payer la taille, sous pretexte, qu'il n'est demeurant à saint Lo, car il iustifie par attestation

qu'il rapporte des maîtres & Gardes de la monnoye, qu'il sert assiduelement en icelle, & qu'il demeure au dedans de la baliue, qui est autant que s'il demouroit dedans la ville, comme vous l'avez souuēt iugé. Mais quant à l'autre, la difficulté y est plus grande, attendu que sa prouision & son serment n'ont esté pour la monnoye de saint Lo; ains pour celle de Tours, & qu'il n'a que de simples lettres de translation.

Nous auons dit cy-deuant, qu'anciennement la monnoye ne se pouuoit battre ailleurs *quàm in palatio Principis*, mais depuis fust aduisé, tant pour faciliter le commerce, que le payement des tailles, & des daces, d'establis des monnoyes aux principales villes de ce Royaume, comme on le voit aujourdhuy. Ainsi qu'en l'Empire, bien que du commencement la monnoye ne se peust faire qu'à Rome & *in aede Iunonis*, si est-ce, que pour les mesmes considerations, ils en firent depuis és villes plus celebres, comme à Lyon, au rapport de Strabon *lib. 4.* ou apres auoir descrit ceste ville, il adioute, *καὶ τὸ νόμισμα παρὰ τῆς οἰκίας τοῦ ἀρχιποῦ καὶ τὸ χρυσόν.* que les Romains y auoient establi vne officine publique où ils faisoient battre de la monnoye d'or

QVANTESIXIESME

& d'argent, Ciceron *lib. 13. epist. ad Gn. Plant.* fait mention d'une autre monnoye establie en la ville d'Apollonie en l'Épire, *cum signaretur (inquit) argentum Apolloniae, non possum dicere eum præsuisse, neque possum negare eum affuisse.*

Et est à presumer, que pour servir en icelles, on y enuoyoit des ouuriers, des autres & plus anciennes monnoyes qui estoient aussi contraints d'y aller, comme y estans obligez par leur serment; Ce qui se pratique encores aujourdhuy en ce Royaume, à l'exemple de ces forgerons, qui *desudabant in sacris fabricis*, dont parle Vegece *lib. 2. de re milit. cap. 11.* le tiltre de *fabricensibus lib. 11. Cod.* & la Nouvelle 85. car comme pour subuenir aux armées, & garnisons qu'ils tenoient aux Prouinces, ils firent cinq fabriques en Illyrie, six en Italie, huit en toutes les Gaules, où se faisoient les armes, dit l'Auteur du liure de la notice de l'Empire: ces forgerons aussi estoient contraincts d'aller servir de l'une en l'autre, selon que la necessité se presentoit, dit Cassiodore *epist. 25. lib. 5.*

Or comme ceste translation ne leur ostoit rien ny de leurs priuileges, ny de leurs salaires non plus qu'au soldat, qui *iussu Imperatoris*

Imperatoris stationem mutauerat dit la loy, 2. 6. miles ff. de re milit. le semblable se doit dire de noz monnoyers, qui par lettres du Roy, & verification d'icelles en la Cour des generaux des monnoies, sont transferez d'une monnoie en l'autre, comme souvent vous l'avez iugé.

Mais il y a deux circonstances en ceste cause, qui vous doiuent faire iuger autrement, la premiere vn Edict verifié en la Cour des aides de Normandie au mois d'Octobre 1596. par lequel il leur est mandé, n'auoir aucun esgard à telles translations, ains de faire iouyr seulement de l'exemption, ceux qui auroient esté pourueuz és monnoies de ladicte Prouince, & fait le serment en icelles. De sorte que le Roy vous ayant renuoyé ceste cause, qui estoit pendente en son Conseil, vous la deuez decider selon ses loix de Normandie, suyuant la sentence commune des docteurs *in l. I. C. de summa trinit.*

L'autre point à considerer en ceste cause, est que l'appellant ne iustifie, auoir oncques fait aucun seruice, ny en la monnoie de Tours, ny en celle de saint Lo, encores que la prouision soit de fort long temps, ce qui fait croire qu'il n'a recher-

ché ceste qualité, que pour vsurper induë-
ment ce priuilege & exemption au preiu-
dice des droicts du Roy.

A ces causes, nous concluons que pour
le regard de ce dernier, son appellation soit
mise au neant, & que ce dont a esté appellé
sortisse son plain & entier effect. Et quant à
l'autre, à ce qu'il soit dit, auoir esté mal iu-
gé, & en emendant, qu'il sera rayé des tail-
les, tant & si longuement qu'il sera demeu-
rant en ladiète ville & banlieuë de saint
Lo, & qu'il seruira actuellement en la mon-
noye d'icelle. Ce que la Cour ordonna par
son Arrest du mois de Feurier, 1601.

XLVII. PLAIDOYE'.

*S'il y a suite par hypothèque sur
vn office comptable.*



EST E cause se doit iuger par
l'article nonante cinq de la cou-
stume de Paris, contenant qu'of-
fice venal est reputé immeu-
ble, & a suite par hypothèque quand il est

faisi sur le débiteur, par auctorité de iustice, parauant resignation admise, & prouision faite au profit d'un tiers. Et combien que l'office dont est question, soit de receueur des Aides & tailles de Langres, si est-ce que pour deux raisons nous le debuons submettre au iugement de ladicte custume ; la premiere d'autant que celle de Langres ne statuant rien là dessus nous deuons comme en toutes autres choses recourir à ceste cy, *quasi ad ius civile* κατ' ἐξοχήν, & qui estoit à ceste occasion anciennement appelé le droit de France : la seconde pour ce que quand un office comptable en la chambre des Comptes de Paris est faisi, les criées se doiuent faire en la paroisse de ladicte chambre, & les encheres vente & adiudication en ceste Cour.

Or que l'office de Receueur soit venal, personne ne le peut reuoker en doubte, d'autant qu'il n'y a que les offices de iudicature qui soient reputez non venaux, non toutes fois qu'il ne se vendēt aussi cher que les autres, mais pour ce que par raison cela ne se doit faire. *Iudicē enim nec dare debere, nec accipere* disoit *Pescennius Niger*, conformément à ceste loy de Platon τὰς τῆ

QV ARANTESEPTIESME

παρεῖδι διακοῦντας, δῶρον χοεῖς πρὸς διακοῦν
& à celle de Iustinian 8. *Constit. ut praesides
absque vlla datione pecuniae ad officia mittantur.*

Mais quant aux charges des finances, qui n'estoient anciennement que simples commissions, excepté quelques vnes de la maison du Roy, chacun sçait qu'elles n'ont esté erigées en tiltre d'office, que pour deux considerations, l'vne pour en tirer de l'argent, & augmenter le reuenu de l'Estat, & l'autre, à fin qu'ils fussent plus auctorisez en l'exercice de leurs offices, à l'exemple del'Empereur Claudius, lequel au rapport de Suetone, *Quaestores rursus imposuit, iisque ne metu offensionum segnius perageret extra ordinem honores permisit.* il appelle là Questeurs, ce qu'ailleurs *in Vespas.* il appelle *Coactores*, & que Iustinian *in tit. de defens. ciuit.* appelle *Susceptores*, bien differens de l'ancienne Questure que Tacite *lib. vndecimo*, dit *apud maiores virtutis id praeium fuisse.*

En somme nous tenons par commune pratique, que tous ces offices des finances sont venaulx, & qu'ils se peuuent vendre, eschanger, trocquer & engager. En quoy nostre droit est aucunement different de celuy de Rome, d'autant qu'en-

tre leurs offices qu'ils appelloient *palatinas militias*, & qui n'auoient autre reuenu & emolument *quàm ex publica Principum liberalitate*, n'y auoit que ceux qu'on appelloit *militias ex casu*, qui se peussent vendre & engager, & qui eussent sùitte par hypothèque mesme contre le successeur; aussi ils estoient hereditaires, ainsi qu'il s'apprend *in l. f. C. de pignorib. nouella constit. 53, & 87.* comme l'on dit, que le feu Roy Henry 3. auoit deliberé d'en faire ainsi de tous les offices venaulx de ce Royaume, & n'y a aujourd'huy que les chausfecires des Chanceleries, qui soient de ceste condition, par Edict du Roy saint Loys, & les Greffiers, dont les offices n'estoient anciennement *inter militias*.

Mais est à noter, que les offices comptables ont cela de particulier, que le Roy à sùitte par hypothèque sur iceux pour seureté de ses deniers: mesmes à l'encontre des successeurs par resignation, encores qu'ils eussent esté pourueuz & receuz en iceux, qui est vne exception à adiouster audit article de la coustume de Paris, & qui est fondée sur le priuilege des deniers Royaux, qui ont tousiours leur hypothèque tacite, sur tous les biens de

Q V A R A N T E S E P T I E S M E

ceux qui les administrent, l. 2. & penult. C. qui potior. iu. in pign. l. si quis post hac C. de bonis damnat.

Par ces raisons donc, vous voyez que iustement le demandeur s'est opposé, à la faisie faicte de sondict office, à la requeste du defendeur, pour estre payé de la somme de deux mille escuz, qu'il pretend luy estre deubs par le resignant, attédu mesmes qu'il y a plus d'un an qu'il a esté pourueu & receu par Arrest de la chambre en l'exercice d'iceluy, aussi qu'il a esté cy-deuant faisi à la requeste du receueur general, auquel il a monstre auoir esté contraint payer le prix conuenu d'iceluy. Sur quoy la Cour prononça, qu'à bonne & iuste cause le demandeur s'estoit opposé & luy fit main-leuée de sondict office, par son Arrest de Iuillet, 1600.

XLVIII. PLAIDOYE'.

Sur la descharge requise par vn Fermier public , pour la non-iouyssance de son bail , à cause des troubles , nonobstant la renonciation par luy faicte à tous cas fortuits.

UN Fermier du tres-pas de Loire, fit appeller pardeuant le iuge des traittes , les Seigneurs qui tiennent ce droict du Roy par engagement, & desquels il auoit bail pour trois ans, à fin de voir dire avec eux, qu'il seroit deschargé dudiect bail , pour n'en pouuoir iouyr à cause de la continuation des troubles , & augmentation des subsidez , qui empeschoient le commerce; A quoy fust respondu par lesdicts Seigneurs, qu'il n'estoit receuable en ses conclusions , d'autant que ce bail luy auoit esté fait des quatre vingts & treize , que la guerre estoit en son plus grand feu, que la cruë des sub-

QVARENTEVTIESME

fides n'estoit cause suffisante, pour rompre le bail, ioint que par iceluy, il auoit expressement renoncé à tous cas fortuits, mesme d'hostilité, surquoy le Iuge ayant donné quelque reiglement en la cause, l'une des parties en auroit interietté appel pour saisir la Cour du principal, par le moyen d'une requeste présentée à ceste fin.

La question donc est de sçauoir, si pour les raisons susdictes, & attendu ladicte renonciation, il y a lieu de descharger le demandeur de son bail.

Pour les defendeurs fait, que le contract de location & de conduction, est par noz Iuriconsultes nombré entre ceux qui sont de bonne foy, *l. 21. ff. locat. §. actionum. Instit de act.* Or comme la foy n'est autre chose, dit Ciceron *lib. I. offic. quàm dictorum conuentorumque constantia & veritas*, aussi dit Vlpian, *nihil magis bonæ fidei congruit, quàm id præstari, quod inter contrahentes actum est.* C'est pourquoy Auguste respondit au peuple qui luy demandoit la largesse, qu'il luy auroit promis, *bonæ fidei se esse.*

Ce qu'estant ainsi, quelle raison pourroit auoir le demandeur, de pretendre la resolution du bail, qu'il a promis entre-

tenir si precisement , si sous pretexte des hazards & des pertes que rencontrent noz entreprinſes, il estoit permis se iouer de sa foy, qu'elle assurance pourroit on esperer au contrats ? il ne faudroit plus ny de de societé, ny de commerce entre les hommes, veu que toutes noz actions, sont subiectes à la fortune, *Deus enim aleatorem agit in rebus humanis.*

C'est pourquoy, combien que le mineur soit en la protection des loix, pour estre par elles restituée contre tous actes qui luy font preiudice, si est-ce quelles luy denient leur secours & assistance, *si occasione damni non inconsultè accidentis, sed facto velit restitui*, dit Vlp. l. II. §. *item non ff. de minor.* comme si apres auoir accepté la succession de quelqu'un, les edifices d'icelle vinsent a estre bruslez, & les heritages perdus par inondation des eaves, ou par quelque autre accident funeste ; Ou qu'apres auoir achepté vn esclau, qui luy estoit necessaire, il vinst à mourir, ou estre fait impuissant de luy rendre seruice.

Le demandeur n'a pas seulement preueu les accidents que la guerre traine avec soy : mais il les a veus & ressentis, & toute la France avec luy, des deuant &

QVARENT'HVITIÈSME

lors de son bail, sur ce il a renoncé aux faueurs & benefices que la loy a accoustumé de departir en ces rencontres extraordinaires. Et que telles renonciations se doibuent entretenir & obseruer, le Iurifconf. le dit par expres, *in l. sed & si quis §. quasitum ff. si quis caut.* estant d'ailleurs permis aux hommes, de renoncer à tous aduantages, & faueurs introduits pour leur profit & vtilité, *l. f. C. de pact.*

Ioint que le contract dont est question, se peut plus tost appeller achapt, que conduction. Et de fait, nous voyons dans les liures des anciens, que *conductiones ista uectigalium appellantur redemptiones, & publicani ipsi redemptores, unde illud Tullij Verr. 3. ubi consuetudo Censorum in bonis, prædijs, prædibûsque vendendis, id est elocandis.*

Et à vray dire, quand le publicain prend du public, pour certain prix, le droit & l'auctorité de leuer quelques daces sur les marchandises passants par certains chemins, on fleues publics, cōme ce tres-pas de Loyre dont nous parlons, qui se peut comparer à celuy qui est appellé *ius transituræ, vel transituræ lib. 4. legis Francicæ, cap. 37.* ou à celuy que la loy des Lombards *lib. 1.* appelle *transitorium tributum*, ou à celuy

dōt parle *Hirtius de bello Alexandrino*, disant, *erant omnibus ostijs Nili custodiae exigendi portorij causa disposita*, lors dis-ie que ces droits se prennent à ferme, ce n'est autre chose *quam alea emptio spei & futuri eventus*, comme le disent Bartole & Alexan. *in l. cotem ferro §. qui maximos ff. de public. & Bald. in l. licet C. locati*. Et que partant tout le peril, & la perte en doiuent tomber sur l'achepteur, suyuant les textes exprés de la loy, *nec emptio, ff. de contrah. empt. & de la loy, si iactum ff. de act. empt.* dont se pouuoit inferer, que tant s'en faut, que le demandeur eust raison, de conclure à la resolution de son bail, qu'au contraire il ne pouuoit pretendre aucun rabais, & diminution du prix d'iceluy; C'est pourquoy nous lisons dans Suetone, Dion & Appian, que Cæsar fust blasmé au Senat, d'auoir esté autheur de remettre aux fermiers publics sur semblables pretextes, que ceux qui ont esté deduiçts en ceste cause, la troisieme partie de leur prix, que l'vn d'eux à ceste occasion appelle *ἐκδίκησις*; Comme au contraire fust loüée l'oppinion de Caton, qui fust d'aduís de debouter les fermiers d'Asie de pareille demande, fondée sur ce que, *cupiditate prolapsi animosius, atque immoderatus in con-*

Q V A R A N T E H V I C T I E S M E
du étione vectigalium licitati erant.

Mais oyons l'autre partie; Pour ce fermer faiſt ce que Cicéron en ſes liures des Offices, remonſtre aux Magiſtrats, en faueur des fermiers publics, *nempe agendum eſſe cum publicanus ſicuti boni viri ſolent cum ſuis colonis*, pour ce que comme Polybe dit, parlant de *publicanorum rationibus*, lib. 6. *ζέοντες δ' ὄναι, καὶ συμπόματος γενομένης, καὶ φίσαι, καὶ παρὰ πᾶν ἀδυνάτῃ συμβάτοιο ἀπολύσαι τὴ ἐργασίαν*, ce ſont perſonnes qui non ſeulement donnent au public leur temps, peines & ſollicitudes, mais encores ſ'expoſent aux iniures & calomnies du commun peuple, qui a de couſtume de ſ'aignir & eleuer contre la dace & le tribut.

A ceſte occaſion, comme les tributs bien reiglez, ont touſiours eſté le principal appuy des Eſtats & Republiques; auſſi nous apprenons qu'à Rome, ils n'admettoient au bail d'iceux, que perſonnes dignes de recommandation, d'où Cicéron print ſubiect de dire, *orat. Planc. qui Publicanorum ordo quanto adiumento ſit in honore, quis neſcit? Flos enim equitum Romanorum, ornamentum ciuitatis, firmamentum Reipub. hoc ordine continetur.*

De ſorte, que ſi la loy fauoriſe le fer-

mier d'heritage priué , d'une equitable moderation de son prix , en cas de perte notable , qui luy seroit arriuée non seulement de la main de Dieu , que les anciens appelloient *θεῶς βίαι* : mais aussi de la main des hommes , auxquels il n'eust peu resister *l. ex conducto l. si merces §. vis maior ff. locat.* suyuant en cela , le precepte de Columelle *lib. 1. de re rust.* où il dit , *comiter agant cum Colonis , facilesque se prabeant , & anarius opus exigant quàm pensiones* , voire mesmes , si elle estime iuste , de le descharger de son bail , en cas de non-iouissance d'iceluy , *ultra dimidiam* , comme il est dit sur la loy *si uno §. Item cum quidem ff. eodem*. A plus forte raison la mesme faueur se doit faire à l'endroit de celuy *qui publica curat* , à fin de l'exciter & les autres à son exemple , à aymer le public.

L'obiection que les deffendeurs ont faicte , sur la qualité & condition du contract dont est question , fait plus à l'aduantage du fermier , d'autant qu'és contracts de bonne foy , on ne s'arreste point tant à ce qui a esté conuenue entre les parties , *quàm quid officij , siue bonæ fidei ratio ab utroque postulat l. 7. ff. de negot. gest. l. 6. ff. de contrah. empt. l. 17. ff. de pos. l. 31. §. quia assidua ff. de edi-*

QV'ARANT'EH VIT'IESME

lit. edict. c'est pourquoy anciennement en semblables actions, *nec sponsio fiebat, nec prætor certum aliquid in formula iudicij definiebat, sed Iudici dato potestatem faciebat statuendi de controuersia ex æquo & bono, & tanti reum damnandi quantum ex fide bono illum dare facere oporteret.* Festus, Seneca lib. 2. de clem. Cicero pro Roscio, Boëtius in Top.

A ceste cause, combien que ce fermier se fust obligé à l'entretienement de son bail, neâtmoins on ne l'y peut adstraindre, puisqu'il l'équité est au contraire, n'ayant iouy d'iceluy, ny perçu la premiere année, & presque en la seconde la moitié de ce qu'il doit du prix d'iceluy, les fraiz y compris, comme il semble l'auoir suffisamment iustifié. Qui est le cas, auquel les Docteurs sont d'aduis de resoudre le contract *in d. l. si uno S. cum quidem*, où ils apportent l'exemple, d'un qui auoit prins à ferme la fourniture de sel pour vne communauté, laquelle par la mortalité y suruenüe estoit diminuée depuis son bail de plus de moitié, & disent qu'ils furent d'aduis de le descharger, pour ce que cest accident *abstulerat*, comme ils parlent, *rei substantiam vsumque impedierat ultra dimidiam*, ce que l'Abbé mesme confirme, *in cap. propter sterilitatem Extr. locat.*

Nec mutat, que ce fermier auroit par son bail, prins sur soy le peril de tous cas fortuits, mesme de l'hostilité. car ceste clause estans d'oresnauant ordinaire en tous contracts de ceste nature, mesmes tournée en stile de Notaire, vous ne iugerez pas qu'il fust raisonnable, qu'elle seruist *pro aucupio*, pour vn piege à y precipiter les plus simples, car c'est vne espee d'injustice, d'interpreter la loy par ces paroles nuës, sans regarder à l'equité qui est la premiere en son intention, & la fin aussi, où elle tend tousiours signamment en ses contracts de bonne foy, c'est pourquoy Theophylacte *in act.* *Apost.* apres Menandre disoit, τὸν αἰχμαλωτίζοντα τὸ νόημα τῆς νόμων, ἢ τὸ ῥητὸν.

Aussi tous les Interpretes, sur ce §. *quæsitum*, demeurent d'accord, que telles renonciations ne sont d'aucune efficace si elles ne sont specialement exprimées, & ores que par ce bail, le cas d'hostilité soit specifié, & que ce soit la principale cause du trouble d'iceluy, cela pourtant, ne doit faire aucun preiudice au demandeur, pour ce que le bail luy ayant esté fait, incontinent apres l'heureuse conuersion de sa majesté à l'Eglise Catholique,

il esperoit avec toute la France, que la guerre deust aussi tost cesser, veu que ses ennemis n'auoient plus de pretexte.

Philon en son liure de *Abrahamo*, dit que les anciens Chaldées appelloient l'homme *Enos*, c'est à dire esperant, voulans signifier, que celuy qui n'espere point, & qui à rousiours la crainte pour conseil, ne merite le nom d'homme. Mais en quel temps ie vous prie, pouuoient les hommes, voire toute la France esperer, sinon lors qu'il ne luy restoit pour tous biens que la seule esperance, & qu'elle iugeoit que le remede de son extreme misere estoit en ce saint acte? De sorte que si l'esperance en vn subiect si plausible a trompé le demandeur, cela neantmoins luy doit seruir en ceste cause de suffisante excuse. La loy, dit Vlp. in §. *vis maior*, ne veut qu'on olte au fermier le profit excessif, *lucrum in modicum* qu'il auroit fait en sa ferme, pour ce qu'il est à presumer, que lors du contract, il l'a desiré, voire preueu par esperance. Le demandeur peut dire le semblable, & qu'ores qu'il ait renoncé par son bail à l'hostilité presente, que l'esperance neantmoins apres vn tel acte, luy faisoit pluost penser à la paix, qu'à vne continuation d'armes.

A ce

A ce propos Balde sur la loy, *licet. C. locati*, dit qu'une semblable renonciation faite en temps de guerre, n'oblige point, si elle n'est faite *casui fortuito presentis & futuri belli*. Aussi que ce fermier à pour autre fondement de sa cause, la multitude des subsides, qui se sont establis sur ladicte riuere, depuis son bail, & qui ont presque aboly le trafic & le commerce, estant veritable ce que Ciceron, *de Imp. Cn. Pompeij* disoit en une pareille rencontre; *nam in ceteris rebus cum venit calamitas, tum detrimentum accipitur, at in vectigalibus non solum euentus mali, sed etiam metus ipse affert calamitatem.*

Ces raisons, ioint la preuue que ce fermier rapporte de sa non-iouyssance, spécialement par les extraicts faits avec les defendeurs, des registres & controolles de ceux, qui sont commis à la recepte d'autres droicts, qui se leuent sur la mesme riuere, & mesmes marchandises, & que par iceux il appert, n'auoir en vn an receu, qu'à peu près du tiers de sa ferme, nous firent estimer qu'il y auoit lieu, de luy adiuger ses conclusions, à la charge, de tenir compte, aux defendeurs, de tout ce qu'il auoit receu de ladicte ferme.

M m

Cesté cause fust appointée au Conseil, & depuis iugée conformément à noz conclusions par Arrest du mois de Mars quatre vingts quinze. Le semblable fust aussi iugé, au profit du fermier du subside estably sur la mesme riuere pour le remboursement des fraiz faicts és sieges de Cran, & Rochefort, à l'encontre des Maire & Escheuins d'Angers, par Arrest du mois de Iuin, 1597.

XLIX. PLAIDOYE.

Si le Collecteur à aucun priuilege ou droit de preference contre le Proprietaire pour estre payé de la taille du fermier.



OMBIEN que la taille soit vne marque ciuile, de la subiection naturelle, du peuple enuers son Roy, si est-ce neantmoins, que nous auons obserué, que le Collecteur d'icelle, n'a aucun priuilege, ou droit de preference sur les particuliers, pour s'en faire

payer. En sorte, que s'il interuient (comme vous voyez au faict de ceste cause) vn opposant, qui demâde le fermage ou moyson de ses terres, sur les fruiçts qui en sont prouenus, ou le loüage de sa maison, sur les meubles de son locataire, nous auons veu, que par voz Arrests, il a esté preferé au collecteur, suyuant la disposition commune de droit *in l. in prædijs ff. in quib. caus. pig. l. si non inducta C. eod. l. Item quia ff. de pact.* qui luy donnent ce priuilege, contre tous creanciers, iusques à le preseruer mesme, contre le benefice de cession, quoy que presque permis en toutes autres affaires.

Et est ceste obseruance fondée sur deux grandes raisons, l'vne, d'autant, qu'ores que la taille, que le peuple paye au Roy, soit de debuoir, cōme nous auons dit, ce n'est pas neātmoins de là mesme sorte, que celle que paye vn peuple faict tributaire, par la force des armes, que Tertullian appelloit *notam captiuitatis*; & dont Appian nous donne vn exemple *in Lybicis*, parlāt de ceux, qui furēt deputez par les Romains, pour donner les loix à Carthage vaincuë, en ces mots τοῖς δὲ ἑλλοις φόρον ὠρεῖσθαι ὅτι τῇ γῇ καὶ ὅτι τοῖς σώμασιν. & lequel nous suffira à ce propos, au lieu

M m ij

cent autres, que nous pourrions rapporter sur ce subiect.

Car comme par la loy des armes, toutes choses sont permises au vainqueur, & conquerant, sur les personnes, & biens des vaincus; tesmoing ce qu'autrefois les Gaulois dirent aux Romains reduits sous leur puissance, *quid aliud est quàm vae victis?* Et que le tribut, qu'impose le vainqueur, est au lieu de la vie, de la liberté, & des biens, qu'il a remis aux vaincus: Aussi il semble estre aucunement raisonnable, que ce tribut là, soit payé par preference sur toutes autres debtes, *quasi videlicet vita & liberatis pretium*, selon la maxime de *captivis redemptis*, comme il est traicté en la loy, *non puto ff. de capt. & post reuer.* Et est de ceste espee, le tribut, qui se paye au grand Seigneur par ses subiects. Et sans aller si loing, comme sont ces tailles iurées & à volonté, abonnées & mortailles, que leuent aucuns Seigneurs de ce Royaume sur leurs subiects, en signe de leur ancienne servitude, & affranchissement qu'ils leur ont donné. Et dont ils se font payer par preference, & avant toutes autres debtes: comme il se voit és coustumes de Bourgogne, de Troyes, de Nivernois, de Chastillon sur

Indre, & s'apprend plus particulièrement des Arrests recueillis sur ce subiect, par ce tres-diligent, & tres-curieux Greffier du Tillet, au tiltre des subsides.

Mais la taille, qui se leue en ce Royaume, n'estant de ceste condition, nos Rois pleins de bonté, & amour paternelle enuers leurs peuples, n'ont pas treuue bon, qu'elle fust leuée avec vne si estroicte reigle, qu'elle vint à effacer & emporter le droit acquis à vn tiers.

La seconde raison de ceste reigle, est fondée en ceste mesme bonté de noz Roys, lesquels (ainsi que tous autres bons Princes) se sont soumis aux loix, & formes communes de la iustice; comme les Empereurs de Rome l'aduouierent d'eux-mesmes *in l. Princeps, in l. digna vox C. de legib.* & plus disertement l'Emper. Leôn *no. const. de bon. vac.* en ces termes, *neque aliud Imperatorie majestati (cui semper inhaerere debet & vigere iustitia) videri accommodum, quam commune ius omnib⁹ reseruare subiectis, & nihil amplius bonis licere Principib⁹, nisi quod licet priuatis.* A quoy se peut adiouster, ce qu'en dit Isidore *in. c. iustum. dist. 9.* en ces mots, *iusta est enim vocis auctoritas eorum, si quod populi prohibent; sibi non licere non patiantur,* dont a esté tirée ceste

QVARENTENBVFIESME

reigle & maxime de droit, approuuée par tous nos maistres, que le Fisque ne se peut attribuer aucun priuilege sur le particulier, *nisi iure ciuili cautum reperiatur*, comme le discourt amplement Cynus *in l. 1. C. de pet. hered.* & Guido Papa *quæst. 536.*

De fait nous voyons tous les iours, qu'il est permis au moindre homme priué, de se preualoir contre le Fisque, du benefice de diuision, de disputation, & d'ordre, & de tous autres introduicts par le droit, & dont les exemples se lisent *in l. Moschus ff. de iure fisci, in l. 2. de priuil. fisci l. 2. & 3. C. si propt. public. pensit. l. instar C. de iure fisci l. 1. C. de fid. instr. & tot. tit. de conueniend. fisci debit. & Quo quisq. ord. conueniat.* Iusques-là que les Empereurs autheurs de ces loix, ne voulurent receuoir les successions, qui leur estoient deferées, par des testamens imparfaits, & qui n'estoient dressez selon les formes communes & vulgaires, ny mesme accepter dons, ou cessions quelconques, *mutadi iudicij causa.* Mais au contraire il se treuve, que souuent ils ont relasché au particulier, le droit qui leur estoit acquis, & qu'ils pouuoient retenir selon les loix. En sorte qu'un ancien eust occasion de dire ce bon mot en leur louange. *O fœlix querela, leges*

pietate Principis superantur.

Ce qu'estant ainsi, & que tous les droits du monde voire la nature mesme, vueil-que le propriétaire soit payé par preference de la moyson de ses terres, sur les fruiçts en prouenans : Nous sommes contraincts (quoy que tenus, comme la voix du Fis-que, d'en esleuer les droiçts en toutes autres choses) de dire, que la sentence, dont a esté interiecté l'appel, auquel on vient de conclure, ne se peut soustenir ; En ce que par icelle, les premiers Iuges, ont ordonné que sans auoir esgard à l'opposition de l'appellant, tendant à fin d'estre payé du fermage de ses terres, suyuant le bail, dont il faisoit apparoir, les fruiçts de ses heritages, seroient vendus, & les deniers en prouenans, baillez au collecteur, pour la taille de son fermier. Ce qui est, comme nous auons dit, contraire à l'intention du Roy, à voz Arrests, & anciens reiglemens de ceste Cour.

Nous remarquerons neantmoins en passant, qu'on en vse autremét aux Prouinces où les tailles sont réelles & appellées *onera fructuum* ; Car en suite de ce, on donne au Roy, vne hypotheque speciale, & priuilegiée sur les heritages tributaires, suy-

M m iij

uant sur ce subiect ainsi qu'en toutes autres choses, la disposition du droict Romain, comme il se lit *in l. 1. C. si propt. public. pens. & tot. tit. fundum sine cens. vel reliq.* Dōt mesmes ont esté faictes deux reigles, fort aduantageuses pour le Fisque, l'une, que le successeur est tenu des restes du passé, *in xta l. Imperatores ff. de publ. l. neque stipendium ff. de imp. in re dot. l. 1. C. de ann. & trib. l. 2. C. de prad. nauicul.* La seconde, que le collecteur peut pour se faire payer, commencer par execution, ainsi qu'il est ordinaire en toutes actions hypothecaires, suyuant aussi la loy. 1. & 2. *C. de cap. pignor. trib. cau. l. 2. C. de exact. tribut.* Et est ceste obseruance desdits pays, fondée sur ce que les heritages, n'estans si dignes que les personnes, il a esté aussi iugé conuenable, que la leuée des charges imposées sur icelles, se fist avec plus de seruitude.

Partant, nous consentons, qu'en emendant le iugement, il soit dit, que les deniers prouenus de la vente desdits grains, soient rendus & restituez à l'appellant, iusques à la concurrence de son fermage, selon qu'il est contenu par son bail, & que le surplus demeure au collecteur, & sauf à luy à se pourvoir, sur les autres biens meubles du-

dit fermier, pour ce qui restera à luy payer, de la taxe d'iceluy, Ce que la Cour ordonna par son Arrest de Ianuier 1597.

L. PLAIDOYE.

Que les excuses du droit Romain, ne sont receuës, pour sexempter des charges de l'assiette & collecte des tailles.



Nous auons à examiner en ceste cause, les excuses, sur lesquelles les trois appellas, que vous venez d'ouyr ont fondé l'appel de l'eslection faicte de leurs personnes; L'vn pour faire l'assiette; Et les deux autres pour faire la collecte des tailles de leur ville. Le premier à dit, que son aage sexagenaire, & la memoire recente, de l'office, de Controolleur par luy exercé en l'Eslection, sont causes suffisantes, pour le descharger de faire ceste assiette. Le second, qu'il estoit Notaire Royal; Qu'il auoit six enfans, & que l'année precedente, il auoit leuë vne somme de deux

cens esleuz, pour satisfaire a vn créancier de leur cōmunauté. Le troisième, qu'il estoit Aduocat au siege Royal de ladiète ville.

Quant au premier, la verité estoit que le droict Romain, dispensoit les vieillards de soixante ans, de toutes charges personnelles, comme il se voit au tître du Cod. *Qui etate se excus. & in l. si pater §. f. ff. de adopt. l. 3. §. quamuis ff. de munerib. & hon. l. maiorem ff. de iure immunit.* ce que Pline le Jeune confirme epist. 4. disant, *extrema tempora nobis impertire debemus, ut ipsa leges monent, quæ maiores annis 60. otio reddunt*, Et Varon mesme liu. 3. de *vita Pop. Ro.* en ces termes, *cum in quintum annum peruenerant, atque habebant 60. annos, tum denique erant à publicis negotijs liberi atque otiosi.* Et plus vniuersellement encore, cest ancien prouerbe, *senes de ponte deijci*, expliqué au long par Feste Pompée liu. 17.

Toutesfois nous ne recognoissons le droit Romain, pour ce qui concerne les charges d'Assesseur & de Collecteur des tailles, nous nous arrestons seulement à l'habitude de la personne. Car si celuy, qui a esté esleu, se treuve encores vigoureux d'esprit, & valide de corps, nous auons coustume de l'y astraindre, combien qu'il

eust plus de 60. ans , suyuant l'opinion d'Vlpian *in l. 2. §. ita ff. de vac. muner.* si-
gnamment où il n'est question, que de l'as-
siete, *qua non implenda corpore, sed tantum con-*
silio viri prudentis, dit ce Iurif. Mais puisque
vous voyez, que cet appellant s'est treuue
asses fort, pour venir de cinquante lieux,
assister au iugement de sa cause, vous iu-
gerez aussi qu'il peut supporter plus aisé-
ment vne charge beaucoup plus difficile,
& onereuse que celle dont il s'agit.

Le second chef de ses excuses, n'est
soubz correction non plus considerable:
Car encores que la loy Romaine permet-
te, que l'on puisse retenir les mesmes pri-
uileges, & exemptions, apres s'estre demis
des charges, qui les attribuent, comme il
est dit *in l. eos l. maximarum C. de excus. muner.*
l. unica C. de Mag. scrinior. l. Iubemus C. de pro-
ximi. sacr. scrini. Toutesfois, nous auons tou-
iours veu restraindre cela, aux grandes di-
gnitez. N'estant raisonnable, de l'esten-
dre iusques à ces petits offices de Cōtroll-
leurs, dont le priuilege & la dignité si au-
cune en ont, ne consiste qu'en la finance
qu'ils en ont payée. Ioint que routes ces
loix se doiuent entendre du priuilege ac-
quis *labore longi temporis*, là ou cest appellant

CINQUANTIÈME

est demeuré d'accord, qu'il nauoit exercé ledict office qu'un an seulement.

Quant à l'autre appellant, il estoit aussi certain, que la qualité de Notaire, dont il estoit pourueu, ne le pouuoit dispenser de faire la collecte; Pour ce que la fonction de Tabellion, ou de Notaire, auoit iusques au iourd'huy esté tenue pour ville abiection, & sans aucun priuilege, *vt & antiquitus serui erant publici*. De sorte, qu'ores que la loy Romaine, exempte des charges personnelles, tous ceux, *qui pro utilitate publica operas suas exhibent*, comme il est dit *in l. semper §. penult. ff. de iure immu.* cela neantmoins a tousiours esté réservé par vos arrests aux estats, qui ont dignité annexée.

Le second chef aussi de ses excuses, ne nous semble estre de plus grands poids & merite, car pour auoir leué l'année precedente la somme de deux cens escuz, pour le remboursement d'un particulier; cela ne le peut pas excuser de la collecte des deniers du Roy sous pretexte mesme de l'intervalle accordé par la disposition de la loy Romaine, comme il se lit au titre, *de munerib. & honorib. non cōti. & de interval.* d'autant que nous soustenons, que cela se doit entendre seulement, quand la pre-

miere charge, sur laquelle on fonde l'exécution de la seconde, a esté executée entièrement & par l'espace d'un an; suiuant les textes exprez de la loy *neminem C. de suscept. lib. 10. & tot. tit. ut omnes Iudic. tam ciuil quam milit.* & ce, *ad instar trium tutelarum*, que *a quarta tum demum excusant, si perfecta fuerint l. 2. §. ult l. 4. de excusat. Tutor.* Ou comme celuy qui n'ayant accompli le temps legitime, pour seruir en la guerre, ne se peut preualoir d'aucun priuilege, ores qu'il eust obtenu vn honnesté congé, dit la loy 2. & 3. *C. de his qui non implet. stip. lib. 10.*

Et quant au dernier chef de ses excuses, fondé sur le nombre d'enfans, combien que le mesme droit Romain, veuille que le nombre de cinq enfans exempt le pere des charges personnelles, *tit. de his qui numer. liberor. se excus.* Et que toutes les loix: des autres Estats, ayent tousiours fauorisé, & recogneu la fecondité, cōme il se voit dās Halicarnasse liu. 3. Et Aristote liu. 2. de ses politiques si est-ce que pour le faict des charges d'Assesseur, & de Collecteur des tailles, ceste excuse n'a esté oncque receuë parmy nous, d'autant que ce sont charges qui regardent le seruice du Roy, contre lequel il ne seroit raisonnable qu'on s'aidast des

exceuses ou des priuileges contenus au droit Romain. Ioint que ces charges n'estants qu'annales, & de peu de durée, il n'y a pas grand subiect de s'en plaindre.

Quant au troisieme appellant, il y a bien plus d'apparence de l'arrester à son excuse, veu que nous auons obserué iusques auourd'huy, que les Aduocats ont tousiours esté tenus francs, & exempts de telles charges. Et ce en consideration du grand merite de leur profession, & que leur ordre est le seminaire des Magistrats comme disoit l'Empereur Valentinian en sa nouuelle, *de postul.* & qui donna subiect à *Ennodius* de dire, *nota proximitate sociari Causidicum & Senatorem.*

Partant nous consentons, que pour le regard de ce dernier, l'appellation & ce soient mis au neant, & en emandant, qu'il soient déclaré exempt de ladicte charge, & qu'en ce faisant, il soit enioint aux habitants de proceder à nouuelle election. Et pour le regard des deux premiers, que leurs appellations soient mises au neant, & que ce dont est appellé sortisse son plain & entier effect. Ce que la Cour ordonna par son Arrest du mois d'Auril 1595.

LI. PLAIDOYE.

Si l'aide est deub au lieu de la vente, ou au lieu de la deliurance de la marchandise subiecte à icelle.

L'APPEL qui se presente à Iuger, est d'une sentence donnée par les Eleuz de Chartres par laquelle l'appellant, est condamné paier le droit du 20. denier, au fermier d'iceluy en ladite ville, à raison du nombre de vin, qu'il a confessé auoir liuré en icelle, à quelque marchands y demeurants. Et se fonde ledit appellant, sur ce qu'il dit, auoir fair apparoir ausdits Eleuz du marché par luy fait dudit vin, en la ville de Chasteaudun, & des airres reçeus sur iceluy, & que partât, il ne pouuoit estre cōtraint, payer le droit en la ville de Chartres.

L'Intimé au contraire, soustient que ce droit luy estoit acquis, puisqu'il appellant mesme recognoist, auoir liuré le vin en la ville de Chartres.

De maniere, que ce que nous auons à

resoudre est de sçauoir, si ce droit est deu
au lieu de la vente, ou au lieu de deliuran-
ce. Pour l'appellant, fait l'ordonnance du
Roy Charles. 6. de l'an 1387. & celles des
Roys qui ont suiui, par lesquelles il est
notamment porté, que ce droit sera leué,
à cause de la vente du vin, & autres mar-
chandises y subiectes. En sorte que nous
pouons appeller ces droits, *iura contra-*
ctuum, & non rerum, à l'exemple de Balde &
autres Docteurs parlants de semblables
subsides, sur la loy 1. *C. de contrah. empt.* &
dire en consequence, qu'ils sont deubs, au
lieu du contract, & non de la deliurance
de la chose, comme mesme l'a estimé Bar-
tole in l. *C. de sum. Trinit.*

Ioint aussi, que par la disposition de
droit, la vente se doit tenir pour parfail-
te, & accomplie, si tost que l'on a conue-
nu du prix, dit la loy. 1. ff. *de contrah. empt.*
d'autant, que ce contract prenant son ori-
gine du droit des gens, il reçoit sa perfe-
ction, du simple consentement des par-
ties, si que des aussi tost, il fait n'aistre en-
tre elles vne obligation reciproque, de
payer le prix, & de liurer la chose, iusques
là, que les loix veulent, que si la chose ven-
duë, vient à se deperir, mesme auant la
tradition,

tradition, ce soit au dommage de l'acheteur, *l. quod sape ff. de contr. empt. l. necessario ff. de peric. rei vend. l. cum Emptor ff. de rescind. vendit.* où Iulianus dit à ce propos, *homine mortuo, perinde habendam esse venditionē ac si traditus fuisset*, qui est pour monstrier, qu'en telles matieres on doit seulement considerer la vente, & non la deliurance.

Mais l'appellant adiousté, que le marché dont est question, n'est demeuré aux termes d'un simple & nud consentement: ains qu'il a esté redigé par escrit, & passé par deuant les Notaires de Chasteaudun, & les airres baillées sur le prix conuenu. Qui est vn argument certain, de l'accomplissement entier d'iceluy, suiuant ce qui est dit *in l. 35. ff. de contrah. empt. & in l. 16. C. de fide instr.* & plus particulièrement *in l. 5. S. item si institor ff. de Instit.* où Vlpian voulant designer vne vendition parfaicte, dit *annulū arre nomine acceptum*. Et de fait quelques vns, ont deriué la denomination de l'arre à *verbo Greco ἀρράγες* qui signifie ferme & stable, Varro mesme le demonstre *lib. 5. de ling. lat.* disant, *arrabonem sic dictam, ut reliquum præstetur*, dont se peut inferer pour l'appellant, que ledit droit ne pouuoit estre demandé, au lieu de la deliuran-

CINQUANTEVNIÈME
ce, ains de la vente seulement.

Au contraire, pour l'Intimé faisoit, que combien que le droit dont est question, fust deu à cause de la vente, neantmoins il ne se debuoit paier, qu'au lieu de la deliurance. Et ce, pour deux raisons trop plus fortes, & plus iustes, que celles de sa partie aduersé. L'une, d'autant que si on en vsoit autrement, ce seroit faire ouverture aux marchands, d'aller passer tous leurs contractz, en lieux francs & exempts de ce droit, & frauder en ce faisant le Roy de ces debuoirs qui importent à son seruice, comme vous voyez, que l'appellant en donne vn exemple euident en ceste cause; Car combien qu'il ne soit habitât de Chasteaudun, toutesfois il a recherché ce lieu pour y passer son contract, à cause qu'il est exempt dudit droit, par vn ancien priuilege octroyé aux Comptes de Dunois; Ce qui ne se pourroit faire si aisément au lieu de la deliurance, pour ce que le port, & le transport de la marchandise, cousteroit beaucoup plus, que les droits qu'ils voudroient frauder.

La seconde raison est, pour ce que combien que le consentement de parties, donne l'estre au contract de vente, si est ce

pourtant que la tradition en est l'accomplissement. En sorte qu'avant icelle, le vendeur demeure toujours maistre, & seigneur de la chose vendue, dit *Iustin. in S. quod si fugeris, Instit. de empt. & vendit. & Ulpian in l. ex empto ff. de act. empt.* Jusques là que si ceste mesme chose venoit à estre desrobée, avant la tradition, l'acheteur n'auroit aucune action, pour en faire poursuite, si elle ne luy estoit cedée par le vendeur : comme il est traité *in l. si vendidero ff. de furtis. l. si ager ff. de rei vindicat. l. sicut si si debitor ff. in quib. pig. tacit. contrah.* ce que Varron a voulu toucher, *lib. II. de re rust. cap. II.* disant, *nec cum id factum est, tamen Grex Dominum non mutavit, nisi sit es adnumeratum, & res ipsa tradita* ; pour ce que c'est la tradition qui transfere la propriété, & non ce simple & nud consentement. *l. traditionibus C. de pact. l. cum precario ff. de prec.* de mode, que l'effect de ce contract, consistant principalement en la deliurance, vous iugerez qu'il est plus raisonnable, que ce droit dont est question, soit payé au lieu où elle se doit faire.

Ioint qu'en cela, l'Intimé est assisté de l'opinion de tous les Docteurs, qui ont tous estimé en telles matieres *inspiciendum*

Nn ij

CINQUANTEVNIESME PLAID.

esse locum traditioni rei designatum, comme il se lit en leurs escripts, sur la loy, *quero ff. de solut. & in l. multum C. si quis alteri vel sibi*: se fondant principalement sur ce texte notable de la loy 3. *ff. de bon. auct. Iud. possid.* disant, *contractum non utique eo loco intelligi, quo negotium gestum sit, sed quo soluenda est pecunia.*

Et à la verité ces raisons nous sont de tel poids & auctorité, qu'elles nous font adherer à icelles, & demander que l'appellation soit mise au neant, & que ce dont a esté appellé sortisse son plain & entier effect. Ce que la Cour ordonna, par son Arrest du mois de Novembre 1595.

F I N.

PRIVILEGE DV ROY.



EN R Y par la grace de Dieu Roy de France & de Nauarre. A noz amez & feaux Conseillers les gés tenans noz Cours de Parlement, Preuost de Paris, Baillif de Roüan, Seneschaux de Thoulouse, Bordeaux, Poictou & leurs Lieutenans, & tous autres nos Iuges & Officiers, & à chacun d'iceux endroict soy ainsi qu'il appartiendra salut. Nostre cher & bien amé Abel l'Angelier marchand Libraire iuré en nostre ville & Vniuersité de Paris, nous a fait dire & remonstrier qu'il a recouuert vn liure intitulé, *Cinquante Plaidoyers faicts par M. C. le Bret nostre Conseiller & Aduocat en la Cour des Aydes*, lequel il desire d'imprimer ou faire imprimer & mettre en lumiere, mais il doute qu'autres Libraires ou Imprimeurs que luy voulussent faire le semblable, qui seroit par ce moyé le frustrer de ses labeurs, fraiz & despens qu'il a faits, pour le recouurement des copies & impression d'icelles, il nous a supplié & requis luy vouloir sur ce pouruoir de nos lettres à ce requises & necessaires. A ces causes desirant bien & fauorablement traicter ledit l'Angelier, à fin qu'il puisse tirer quelque recompense du bien que le public en receura; luy auons de nos grace special, pleine puissance & auctorité Royal, permis & accordé, permettons & accordons par ces presentes, voulons & nous plaist qu'il puisse &

Nn iij

luy soit loisible imprimer ou faire imprimer & mettre en lumiere, vendre & distribuer par tout nostre Royaume, pays, terres & seigneuries de nostre obeyssance, ledit liure en toute forme & maniere que bõ luy semblera, faisant tres-expres- ses inhibitions & defenses à tous autres de quel- que qualité qu'ils soient ou puissent estre, d'im- primer ou faire imprimer, vendre ne distribuer ledict liure, sous pretexte de quelque addition, changement ou autre forme & deguisement que l'on voudroit prétendre & y apporter en quelque sorte & maniere que ce soit, sinon ceux qui au- ront esté imprimez & seront faits par ledit l'An- gelier ou de son vouloir & consentement, & ce pour le terme & espace de dix ans entiers & con- secutifs, à commencer du iour que lesdits liures auront esté acheuez d'imprimer, reuquant dès à present toutes autres permissions & priuileges qui en sont ou pourroient estre cy apres obtenus ou pourroient obtenir s'en puissent seruir en au- cune sorte & maniere que ce soit. Declarans à ceste fin tous les autres exemplaires quels qu'ils soient ou puissent estre; acquis & confisque au- dit l'Angelier, lesquels il pourra faire saisir par Officiers de Iustice où ils puissent estre trouuez, nonobstant oppositions ou appellations quelcõ- ques, pour lesquelles & sans preiudice d'icelles ne voulons estre differé. Voulons en outre que les contreuenans soient condamnez à telle amē- de arbitraire qu'il appartiendra, comme cõtreue- nans & infracteurs à noz vouloir & intention. Si vous mandons & à chacun de vous commettons



& enioignons par celsdites presentes chacun endroit soy comme à luy appartiendra, que de noz present priuilege & de tout le contenu cy-dessus; vous faites, souffrez & laissez iouyr & vser pleinement & paisiblement ledit l'Angelier durant ledit temps, & à ce faire souffrir & obeyr contraindez ou faites contraindre tous ceux qu'il appartiendra & qui pour ce seront à contraindre, par toutes voyes deuës & raisonnables, en mettant par ledit suppliant au commencement ou à la fin dudit liure le contenu en nostre present priuilege: Car tel est nostre plaisir. **Donné à Paris le 3. iour de Septembre, l'an de grace 1601. & de nostre regne le treziesme.**

Par le Roy en son Conseil,

RENOVARD.

